

Namo tassa bhagavato arahato sammāsambuddhassa

Aṅguttaranikāye

Pañcakanipāta-aṭṭhakathā

1. Paṭhamapaṇṇāsakaṃ

1. Sekhabalavaggo

1. Saṃkhittasuttavaṇṇanā

1. Pañcakanipātassa paṭhame sattannaṃ sekhānaṃ balānīti **sekhabalāni**. Saddhābalādīsu assaddhiye na kampaṭīti **saddhābalaṃ**. Ahirike na kampaṭīti **hirībalaṃ**. Anottappe na kampaṭīti **ottappabalaṃ**. Kosajje na kampaṭīti **vīriyabalaṃ**. Avijjāya na kampaṭīti **paññābalaṃ**. **Tasmāti** yasmā imāni sattannaṃ sekhānaṃ balāni, tasmā.

2. Vitthatasuttavaṇṇanā

2. Dutīye **kāyaduccaritenā**tiādīsu upayogatthe karaṇavacanaṃ, hirīyitabbāni kāyaduccaritādīni hirīyati jigucchati attho. Ottappaniddese hetvatthe karaṇavacanaṃ, kāyaduccaritādīhi ottappassa hetubhūtehi ottappati bhāyatīti attho.

Āraddhavīriyoti paggahitavīriyo anosakkitamānaso. **Pahānāyāti** pahānatthāya. **Upasampadāyāti** paṭilābhatthāya. **Thāmavāti** vīriyathāmena samannāgato. **Daḷhaparakkamoti** thiraparakkamo. **Anikkhattadhuro kusalesu dhammesūti** kusalesu dhammesu anoropitadhuro anosakkitavīriyo.

Udayatthagāminiyāti pañcannaṃ khandhānaṃ udayavayagāminiyā udayaṅca vayaṅca paṭivijjhitaṃ samatthāya. **Paññāya samannāgatoti** vipassanāpaññāya ceva maggapaññāya ca samaṅgibhūto. **Ariyāyāti** vikkhambhanavasena ca samucchadavasena ca kilesehi ārakā ṭhitāya parisuddhāya. **Nibbedhikāyāti** sā ca abhinivijjhanato nibbedhikāti vuccati, tāya samannāgatoti attho. Tattha maggapaññā samucchadavasena anibbidhappubbaṃ appadālitapubbaṃ lobhakkhandhaṃ dosakkhandhaṃ mohakkhandhaṃ nibbijjhati padāletīti nibbedhikā, vipassanāpaññā tadaṅgavasena nibbedhikā, maggapaññāya paṭilābhasaṃvattanato tabbipassanā nibbedhikāti vattum vaṭṭati. **Sammā dukkhakkhayagāminiyāti** idhāpi maggapaññā sammā hetunā nayena vaṭṭadukkhāṅca kilesadukkhāṅca khepayamānā gacchatīti sammā dukkhakkhayagāminī nāma, vipassanāpaññā tadaṅgavasena vaṭṭadukkhāṅca kilesadukkhāṅca khepayamānā gacchatīti dukkhakkhayagāminī. Dukkakkhayagāminiyā vā maggapaññāya paṭilābhāya saṃvattanatopesā dukkhakkhayagāminīti veditabbā. Iti imasmiṃ sutte pañca balāni missakāneva kathitāni, tathā pañcame.

6. Samāpattisuttavaṇṇanā

6. Chaṭṭhe **akusalassa samāpattīti** akusaladhammassa samāpajjanā, tena saddhiṃ samaṅgibhāvoti attho. **Pariyuṭṭhāya tiṭṭhatīti** pariyanandhitvā tiṭṭhati.

7. Kāmasuttavaṇṇanā

7. Sattame **kāmesu laḷitāti** vatthukāmakilesakāmesu laḷitā abhiratā. **Asitabyābhaṅginti**

tiṇalāyanaasitañceva tiṇavahanakājañca. **Kulaputtoti** ācārakulaputto. **Ohāyāti** pahāya. **Alaṃ vacanāyāti** yuttaṃ vacanāya. **Labbhāti** sulabhā sakkā labhituṃ. **Hīnā kāmāti** pañcannaṃ nīcakulānaṃ kāmā. **Majjhīmā kāmāti** majjhimasattānaṃ kāmā. **Pañītā kāmāti** rājarājamahāmattānaṃ kāmā. **Kāmātveva saṅkhaṃ gacchantīti** kāmanavasena kāmetabbavasena ca kāmācceva saṅkhaṃ gacchanti. **Vuddho hotīti** mahallako hoti. **Alappaññoti** yuttapañño. **Attaguttoti** attanāva gutto rakkhito, attānaṃ vā gopetuṃ rakkhituṃ samattho. **Nālaṃ pamādāyāti** na yutto pamajjituṃ. **Saddhāya akataṃ hotīti** yaṃ saddhāya kusalesu dhammesu kātuṃ yuttaṃ, taṃ na kataṃ hoti. Sesapadesupi eseva nayo. **Anapekkho dānāhaṃ, bhikkhave, tasmim bhikkhusmim homīti** evaṃ saddhādīhi kātabbaṃ katvāva sotāpattiphale patiṭṭhite tasmim puggale anapekkho homīti dasseti. Imasmim sutte sotāpattimaggo kathito.

8. Cavanasuttavaṇṇanā

8. Aṭṭhame **saddhammeti** sāsanasaddhamme. **Assaddhoti** okappanasaddhāya ca pakkhandanasaddhāya cāti dvīhipi saddhāhi virahito. **Cavati nappatiṭṭhātīti** imasmim sāsane guṇehi cavati, patiṭṭhātuṃ na sakkoti. Iti imasmim sutte appatiṭṭhānañca patiṭṭhānañca kathitaṃ.

9. Paṭhamaagāravasuttavaṇṇanā

9. Navame nāssa gāravoti **agāravo**. Nāssa patissoti **appatisso**, ajeṭṭhako anīcavutti. Sesamettha purimasadisameva.

10. Dutiyaagāravasuttavaṇṇanā

10. Dasame **abhabboti** abhājanaṃ. **Vuddhinti** vaḍḍhiṃ. **Virūhinti** virūlhamūlatāya niccalabhāvaṃ. **Vepullanti** mahantabhāvaṃ. Sesam sabbattha uttānamevāti.

Sekhabalavaggo paṭhamo.

2. Balavaggo

1. Ananussutasuttavaṇṇanā

11. Dutiyassa paṭhame **pubbāhaṃ, bhikkhave, ananussutesu dhammesūti** ahaṃ, bhikkhave, pubbe ananussutesu catūsu saccadhammesu. **Abhiññāvosānapāramippatto paṭijānāmīti** catūsu saccesu catūhi maggehi soḷasavidhassa kiccassa karaṇena abhijānitvā vosānapāramim sabbesaṃ kiccānaṃ niṭṭhitattā katakiccabhāvaṃ pāraṃ patto paṭijānāmīti mahābodhipallaṅke attano āgamanīyaguṇaṃ dasseti. **Tathāgatassāti** aṭṭhahi karaṇehi tathāgatassa. **Tathāgatabalānīti** yathā tehi gantabbaṃ, tatheva gatāni pavattāni nīṇabalāni. **Āsabhaṃ ṭhānanti** seṭṭhaṭṭhānaṃ. **Sīhanādanti** abhītanādaṃ. **Brahmacakkanti** seṭṭhacakkaṃ. **Pavattetīti** katheti.

2. Kūṭasuttavaṇṇanā

12. Dutīye **sekhabalānīti** sekhānaṃ nīṇabalāni. **Agganti** uttamaṃ. Sesabalāni gopānasiyo kūṭaṃ viya saṅgaṇhātīti **saṅgāhikaṃ**. Tāneva balāni saṃhatāni karotīti **saṅghātaniyaṃ**.

3. Saṃkhittasuttavaṇṇanā

13. Tatiye tattha muṭṭhassacce na kampaṭīti **satibalaṃ**. Uddhacce na kampaṭīti **samādhibalaṃ**.

4. Vitthatasuttavaṇṇanā

14. Catutthe **satinepakkenā**ti ettha nepakkaṃ vuccati paññā, sā satiyā upakārahāvena gahitā.

5. Daṭṭhabbasuttavaṇṇanā

15. Pañcame savisayasmimyeva lokiya lokuttaradhamme kathetuṃ **kattha ca, bhikkhave, saddhābalaṃ daṭṭhabbanti**ādīmāha. Yathā hi cattāro seṭṭhiputtā, rājāti rājapañcomesu sahāyesu “nakkhattaṃ kīlissāmā”ti vīthiṃ otiñnesu ekassa seṭṭhiputtassa gehaṃ gatakāle itare cattāro tuṇhī nisīdanti, gehasāmikova “imesaṃ khādanīyaṃ bhojanīyaṃ detha, gandhamālālaṅkāradīni dethā”ti gehe vicāreti. Dutiyatatiyacatutthassa gehaṃ gatakāle itare cattāro tuṇhī nisīdanti, gehasāmikova “imesaṃ khādanīyaṃ bhojanīyaṃ detha, gandhamālālaṅkāradīni dethā”ti gehe vicāreti. Atha sabbapacchā rañño gehaṃ gatakāle kiñcāpi rājā sabbattha issaro, imasmim̐ pana kāle attano geheyeva “imesaṃ khādanīyaṃ bhojanīyaṃ detha, gandhamālālaṅkāradīni dethā”ti vicāreti, evamevaṃ saddhāpañcomesu balesu tesu sahāyesu ekato vīthiṃ otarantesu viya ekārammaṇe uppajjamānesupi yathā paṭhamassa gehe itare cattāro tuṇhī nisīdanti, gehasāmikova vicāreti, evaṃ sotāpattiyaṅgāni patvā adhimokkhalakkhaṇaṃ saddhābalameva jeṭṭhakaṃ hoti pubbaṅgamaṃ, sesāni tadanvayāni honti. Yathā dutiyassa gehe itare cattāro tuṇhī nisīdanti, gehasāmikova vicāreti, evaṃ sammappadhānāni patvā paggahalakkhaṇaṃ vīriyabalameva jeṭṭhakaṃ hoti pubbaṅgamaṃ, sesāni tadanvayāni honti. Yathā tatiyassa gehe itare cattāro tuṇhī nisīdanti, gehasāmikova vicāreti, evaṃ satipaṭṭhānāni patvā upaṭṭhānalakkhaṇaṃ satibalameva jeṭṭhakaṃ hoti pubbaṅgamaṃ, sesāni tadanvayāni honti. Yathā catutthassa gehe itare cattāro tuṇhī nisīdanti, gehasāmikova vicāreti, evaṃ jhānavimokkhe patvā avikkhepalakkhaṇaṃ samādhibalameva jeṭṭhakaṃ hoti pubbaṅgamaṃ, sesāni tadanvayāni honti. Sabbapacchā rañño gehaṃ gatakāle pana yathā itare cattāro tuṇhī nisīdanti, rājāva gehe vicāreti, evameva ariyasaccāni patvā pajānanalakkhaṇaṃ paññābalameva jeṭṭhakaṃ hoti pubbaṅgamaṃ, sesāni tadanvayāni hontīti evamidha pañca balāni missakāni kathitāni. Chaṭṭhaṃ uttānatthameva. Evaṃ purimavagge ca idha ca aṭṭhasu suttesu sekhabalāneva kathitāni. Karaṇḍakolavāsī mahādattatthero panāha – “heṭṭhā catūsu suttesu sekhabalāni kathitāni, upari catūsu asekkhabalāni”ti.

7. Paṭhamahitasuttavaṇṇanā

17. Sattame silādayo missakāva kathitā. **Vimuttīti** arahattaphalavimuttiyeva. **Vimuttiñāṇadassanaṃ** paccavekkhaṇañāṇaṃ, taṃ lokiyameva.

8-10. Dutiyahitasuttādivaṇṇanā

18-20. Aṭṭhame dussīlo bahussuto kathito, navame appassuto dussīlo, dasame bahussuto khīṇāsavoti.

Balavaggo dutiyo.

3. Pañcaṅgikavaggo

1. Paṭhamaagāravasuttavaṇṇanā

21. Tatiyassa paṭhame **asabhāgavuttikoti** asabhāgāya visadisāya jīvitavuttiyā samannāgato. **Ābhisamācārikaṃ dhammanti** uttamasamācārabhūtaṃ vattavasena paññattasīlaṃ. **Sekhaṃ dhammanti** sekhaṇṇattasīlaṃ. **Silānīti** cattāri mahāsīlāni. **Sammādiṭṭhinti** vipassanāsammādiṭṭhiṃ. **Sammāsamādhinti** maggasamādhīnceva phalasamādhīnceva. Imasmim̐ sutte silādīni missakāni kathitāni.

2. Dutiyaagāravasuttavaṇṇanā

22. Dutīye **silakkhandhanti** sīlarāsiṃ. Sesadvayepi eseva nayo. Ime pana tayopi khandhā missakāva kathitāti.

3. Upakkilesasuttavaṇṇanā

23. Tatiye **na ca pabhassaranti** na ca pabhāvantaṃ. **Pabhaṅgu cāti** pabhijjanasabhāvaṃ. **Ayoti** kālālohaṃ. **Lohanti** ṭhapetvā idha vuttāni cattāri avasesaṃ lohaṃ. **Sajjhanti** rajataṃ. **Cittassāti** cātubhūmakakusalacittassa. Tebhūmakassa tāva upakkilesā hontu, lokuttarassa kathaṃ hontīti? Uppajjituṃ appadānena. Yadaggena hi uppajjituṃ na denti, tadaggeneva te lokiyassapi lokuttarassapi upakkilesā nāma hontī. **Pabhaṅgu cāti** ārammaṇe cuṇṇavicuṇṇabhāvūpagamanena bhijjanasabhāvaṃ. **Sammā samādhiyati āsavānaṃ khayāyāti** āsavānaṃ khayasaṅkhātassa arahattassa atthāya hetunā kāraṇena samādhiyati. Ettāvata cittaṃ visodhetvā arahatte patiṭṭhitaṃ khīṇāsavaṃ dasseti. Idānissa abhiññāpaṭivedhaṃ dassento **yassa yassa cāti**ādīmāha. Taṃ uttānatthamevāti.

4. Dussīlasuttavaṇṇanā

24. Catutthe **hatūpanisoti** hataupanissayo hatakāraṇo. **Yathābhūtañāṇadassananti** nāmarūpaparicchedañāṇaṃ ādiṃ katvā taruṇavipassanā. **Nibbidāvirāgoti** nibbidā ca virāgo ca. Tattha nibbidā balavavipassanā, virāgo maggo. **Vimuttiñāṇadassananti** phalavimutti ca paccavekkhaṇañāṇaṃca.

5. Anuggahitasuttavaṇṇanā

25. Pañcame **sammādiṭṭhīti** vipassanāsammādiṭṭhi. **Cetovimutti phalāti**ādīsu **cetovimuttīti** maggaphalasaṃmādhī. **Paññāvimuttīti** phalañāṇaṃ. **Sīlānuggahitāti** sīlena anuggahitā anurakkhitā. **Sutānuggahitāti** bāhusaccena anuggahitā. **Sākacchānuggahitāti** dhammasākacchāya anuggahitā. **Samathānuggahitāti** cittekaggatāya anuggahitā.

Imassa panatthassa āvibhāvattamaṃ madhurambabījaṃ ropetvā samantā mariyādaṃ bandhitvā kālānukālaṃ udakaṃ āsiñcitvā kālānukālaṃ mūlāni sodhetvā kālānukālaṃ patitapāṇake hāretvā kālānukālaṃ makkaṭajālaṃ luñcitvā ambaṃ paṭijagganto puriso dassetabbo. Tassa hi purisassa madhurambabījaropanaṃ viya vipassanāsammādiṭṭhi datṭhabbā, mariyādabandhanaṃ viya sīlena anuggaṇhanaṃ, udakāsecanaṃ viya sutena anuggaṇhanaṃ, mūlaparisodhanaṃ viya sākacchāya anuggaṇhanaṃ, pāṇakaharaṇaṃ viya jhānavipassanāpāripanthikasodhanavasena samathānuggaṇhanaṃ, makkaṭajālaluñcanaṃ viya balavavipassanānuggaṇhanaṃ, evaṃ anuggahitassa rukkhassa khippameva vaḍḍhitvā phalappadānaṃ viya imehi sīlādīhi anuggahitāya mūlasammādiṭṭhiyā khippameva maggavasena vaḍḍhitvā cetovimuttipaññāvimutti phalappadānaṃ veditabbaṃ.

6. Vimuttāyatanasuttavaṇṇanā

26. Chaṭṭhe **vimuttāyatanānīti** vimuccanakāraṇāni. **Yatthāti** yesu vimuttāyatanesu. **Satthā dhammaṃ desetīti** catusaccadhammaṃ deseti. **Atthapaṭisaṃvedinoti** pāliatthaṃ jānantassa. **Dhammapaṭisaṃvedinoti** pāliṃ jānantassa. **Pāmojjanti** taruṇapīti. **Pīti**ti tuṭṭhākārahūtā balavapīti. **Kāyoti** nāmakāyo. **Passambhatīti** paṭippassambhati. **Sukhaṃ vedetīti** sukhaṃ paṭilabhati. **Cittaṃ samādhiyati**ti arahattaphalasaṃmādhinā samādhiyati. Ayañhi taṃ dhammaṃ suṇanto āgatāgataṭṭhāne jhānavipassanāmagga phalāni jānāti, tassa evaṃ jānato pīti uppajjati. So tassā pītiyā antarā osakkituṃ na dento upacārakammaṭṭhāniko hutvā vipassanaṃ vaḍḍhetvā arahattaṃ pāpuṇāti. Taṃ sandhāya vuttaṃ – “cittaṃ samādhiyati”ti. Sesesupi eseva nayo. Ayaṃ pana viseso – **samādhinimittanti** aṭṭhatimsāya ārammaṇesu aññataro samādhiyeva samādhinimittaṃ. **Suggahitaṃ hotīti**ādīsu ācariyassa santike

kammaṭṭhānaṃ uggaṇhantena suṭṭhu gahitaṃ hoti suṭṭhu manasikataṃ suṭṭhu upadhāritaṃ. **Suppaṭividdhaṃ paññāyāti** paññāya suṭṭhu paccakkhaṃ kataṃ. **Tasmiṃ dhammeti** tasmiṃ kammaṭṭhānapāḷidhamme. Iti imasmiṃ sutte pañcapi vimuttāyatanāni arahattaṃ pāpetvā kathitānti.

7. Samādhisuttavaṇṇanā

27. Sattame **appamāṇanti** pamāṇakaradhammarahitaṃ lokuttaraṃ. **Nipakā patissatāti** nepakkena ca satiyā ca samannāgatā hutvā. **Pañca ñāṇānti** pañca paccavekkhaṇañāṇāni. **Paccattaññeva uppajjantīti** attaniyeva uppajjanti. **Ayaṃ samādhi paccuppannasukho cevāti**ādīsu arahattaphalasaṃmādhī adhippeto. Maggasamādhītipi vadantiyeva. So hi appitappitakkhaṇe sukhattā **paccuppannasukho**, purimo purimo pacchimassa pacchimassa samādhisukhassa paccayattā **āyatim sukhavipāko**, kilesehi ārakattā **ariyo**, kāmāmisavaṭṭāmisalokāmisānaṃ abhāvā **nirāmisō**. Buddhādīhi mahāpurisehi sevittā **akāpurisasevito**. Aṅgasantatāya ārammaṇasantatāya sabbakilesadarathasantatāya ca **santo**, atappaniyaṭṭhena **paṇīto**. Kilesappaṭippassaddhiyā laddhattā kilesappaṭippassaddhibhāvaṃ vā laddhattā **paṭippassaddhaladdho**. Paṭippassaddhaṃ paṭippassaddhīti hi idaṃ atthato ekaṃ. Paṭippassaddhakilesena vā arahatā laddhattāpi **paṭippassaddhaladdho**, ekodibhāvena adhigatattā ekodibhāvameva vā adhigatattā **ekodibhāvadhigato**. Appaṇṇasāsavasamādhī viya sasaṅkhārena sappayogena cittena paccanīkadhamme niggayha kilese vāretvā anadhigatattā **na sasaṅkhāraniggayhavāritagato**. Taṃ samādhim samāpajjanto tato vā vuṭṭhahanto sativapullappattattā **satova samāpajjati, satova vuṭṭhahati**. Yathāparicchinnaḷavasena vā sato samāpajjati, sato vuṭṭhahati. Tasmā yadettha “ayaṃ samādhī paccuppannasukho ceva āyatīna sukhavipāko cā”ti evaṃ paccavekkhamānassa paccattaṃyeva aparappaccayaññaṃ uppajjati, taṃ ekaṃ ñāṇaṃ. Eseva nayo sesesu. Evaṃ imāni pañca ñāṇāni paccattaññeva uppajjantīti.

8. Pañcaṅgikasuttavaṇṇanā

28. Aṭṭhame **ariyassāti** vikkhambhanavasena pahīnakilesehi ārakā ṭhitassa. **Bhāvanaṃ desessāmīti** brūhanaṃ vaḍḍhanaṃ pakāsayissāmi. **Imameva kāyanti** imaṃ karajakāyaṃ. **Abhisandeti**ti temeti sneheti, sabbattha pavattaṭṭisukhaṃ karoti. **Parisandeti**ti samantato sandeti. **Paripūreti**ti vāyuna bhastaṃ viya pūreti. **Parippharati**ti samantato phusati. **Sabbāvato kāyassāti** assa bhikkhuno sabbakoṭṭhāsavato kāyassa kiñci upādinnaḷasantatipavattiṭṭhāne chavimamsalohitānugataṃ aṇumattampi ṭhānaṃ paṭhamajjhānasukhena aphuṭaṃ nāma na hoti.

Dakkhoti cheko paṭibalo nhānīyacuṇṇāni kātuñceva yojetuñca sannetuñca. **Kaṃsathāleti** yena kenaci lohena katabhājane. Mattikābhājanaṃ pana thiraṃ na hoti, sannentassa bhijjati. Tasmā taṃ na dassesi. **Parippkosakaṃ parippkosakanti** siñcitvā siñcitvā. **Sanneyyāti** vāmahatthena kaṃsathālaṃ gahetvā dakkhiṇahatthena pamāṇayuttaṃ udakaṃ siñcitvā siñcitvā parimaddanto piṇḍaṃ kareyya. **Snehānugatāti** udakasinehena anugatā. **Snehaparetāti** udakasinehena pariggahitā. **Santarabāhirāti** saddhim antopadesena ceva bahipadesena ca, sabbatthakameva udakasinehena phuṭāti attho. **Na ca pagghariṇīti** na bindu bindu udakaṃ paggharati, sakkā hoti hatthenapi dvīhipi aṅgulīhi gahetuṃ ovaṭṭikāyapi kātunti attho.

Dutiyajjhānasukhaupamāyaṃ **ubbidodakoti** ubbhinnaudako, na heṭṭhā ubbhijjivā uggacchanaudako, antoyeva pana uppajjanaudakoti attho. **Āyamukhanti** āgamanamaggo. **Devoti** megho. **Kālena kālanti** kāle kāle, anvaḍḍhamāsaṃ vā anudasāhaṃ vāti attho. **Dhāranti** vuṭṭhim. **Nānuppaveccheyyāti** nappaveseyya, na vasseyyāti attho. **Sītā vāridhārā ubbhijjivāti** sītā vāridhārā taṃ rahadaṃ pūrayamānā ubbhijjivā. Heṭṭhā uggacchanaudakañhi uggantvā bhijjantaṃ udakaṃ khobheti, catūhi disāhi pavisanaudakaṃ purāṇapaṇṇatīṇakattāhaṇḍakādīhi udakaṃ khobheti. Vuṭṭhiudakaṃ dhārānipātabbuḷakehi udakaṃ khobheti, sannisinnameva pana hutvā iddhinimmitamiva uppajjamānaṃ udakaṃ imaṃ padesaṃ pharati, imaṃ na pharatiṭi natthi. Tena aphuṭokāso nāma na hoti. Tattha rahado viya karajakāyo, udakaṃ viya dutiyajjhānasukhaṃ, sesaṃ purimanayeneva veditabbaṃ.

Tatiyajjhānasukhaupamāyaṃ uppalāni ettha santīti **uppalinī**. Sesapadadvayepi eseva nayo. Ettha ca setarattanīesu yaṃkiñci uppalameva, ūnakasatapattaṃ puṇḍarīkaṃ, satapattaṃ padumaṃ. Pattaniyamaṃ vā vināpi setaṃ padumaṃ, rattaṃ puṇḍarīkanti ayamettha vinicchayo. **Udakānuggatānī** udakato na uggatāni. **Antonimuggaposiṇī** udakatalassa anto nimuggāniyeva hutvā posanti vaḍḍhantīti attho. Sesam purimanayeneva veditabbaṃ.

Catutthajjhānaupamāyaṃ **parisuddhena cetasā pariyodātenā**ti ettha nirupakkilesaṭṭhena parisuddhaṃ, pabhassaraṭṭhena pariyodātaṃ veditabbaṃ. **Odātena vatthenā**ti idaṃ utupharaṇatthaṃ vuttaṃ. Kiliṭṭhavatthena hi utupharaṇaṃ na hoti, taṅkhaṇadhotaparisisuddhena utupharaṇaṃ balavaṃ hoti. Imissā hi upamāya vatthaṃ viya karajakāyo, utupharaṇaṃ viya catutthajjhānasukhaṃ. Tasmā yathā sunhātassa purisassa parisuddhaṃ vatthaṃ sasīsaṃ pārupitvā nisinnassa sarīrato utu sabbameva vatthaṃ pharati, na koci vatthassa aphuṭokāso hoti, evaṃ catutthajjhānasukhena bhikkhuno karajakāyassa na koci okāso aphuṭo hotīti evamettha attho daṭṭhabbo. Catutthajjhānacittameva vā vatthaṃ viya, taṃsamuṭṭhānarūpaṃ utupharaṇaṃ viya. Yathā hi kathaci kathaci odātavatthe kāyaṃ aphasantepi taṃsamuṭṭhānena utunā sabbatthakameva kāyo phuṭo hoti, evaṃ catutthajjhānasamuṭṭhāpītena sukhumarūpena sabbatthakameva bhikkhuno kāyo phuṭo hotīti evamettha attho daṭṭhabbo.

Paccavekkhaṇanimittanti paccavekkhaṇaññaṃeva. **Suggahitaṃ hotīti** yathā tena jhānavipassanāmaggā suṭṭhu gahitā honti, evaṃ paccavekkhaṇanimittaṃ aparāparena paccavekkhaṇanimittena suṭṭhu gahitaṃ hoti. **Añño vā aññanti** añño eko aññaṃ ekaṃ, attanoyeva hi attā na pākaṭo hoti. **Ṭhito vā nisinnanti** ṭhitakassāpi nisinnā pākaṭo hoti, tenevaṃ vuttaṃ. Sesesupi eseva nayo. **Udakamaṇikoti** samekhalā udakacāṭi. **Samatittikoti** samabharito. **Kākapeyyāti** mukhavaṭṭiyaṃ nisīditvā kākena gīvaṃ anāmetvāva pātabbo.

Subhūmiyanti samabhūmiyaṃ. “Subhūme sukhetta vihatakhāṇuke bījāni patiṭṭhāpeyyā”ti (dī. ni. 2.438) ettha pana maṇḍabhūmi subhūmīti āgatā. **Catumahāpatheti** dvinnaṃ mahāmaggaṇaṃ vinivijjhītvā gataṭṭhāne. **Ājaññarathoti** vinītaassaratho. **Odhasatapodoti** yathā rathaṃ abhiruhitvā ṭhitena sakkā hoti gaṇhituṃ, evaṃ ālambanaṃ nissāya tiriyato ṭhapitapatodo. **Yoggacariyoti** assācariyo. Sveva assadamme sārētīti **assadammasārathi**. **Yenicchakanti** yena yena maggena icchati. **Yadicchakanti** yaṃ yaṃ gatiṃ icchati. **Sāreyyāti** ujukaṃ purato peseyya. **Paccāsāreyyāti** paṭṭinivatteyya.

Evaṃ heṭṭhā pañcahi aṅgehi samāpattiparikammaṃ kathetvā imāhi tīhi upamāhi paṇḍasamāpattiyā ānisaṃsaṃ dassetvā idāni khīṇāsavassa abhiññāpaṭipāṭiṃ dassetuṃ **so sace ākaṅkhatīti**ādīmāha. Taṃ uttānatthamevāti.

9. Caṅkamasuttavaṇṇanā

29. Navame **addhānakkhamo hotīti** dūraṃ addhānamaggaṃ gacchanto khamati, adhvāsetuṃ sakkoti. **Padhānakkhamoti** vīriyakkhamo. **Caṅkamādhigato samādhīti** caṅkamaṃ adhiṭṭhahantena adhigato aṭṭhannaṃ samāpattīnaṃ aññatarasamādhī. **Ciraṭṭhitiko hotīti** ciraṃ tiṭṭhati. Ṭhitakena gahitanimittaṃhi nisinnassa nassati, nisinnena gahitanimittaṃ nipannassa. Caṅkamaṃ adhiṭṭhahantena calitārammaṇe gahitanimittaṃ pana ṭhitassapi nisinnassapi nipannassapi na nassatīti.

10. Nāgitasuttavaṇṇanā

30. Dasame uddhaṃ uggatattā ucco, rāsibhāvena ca mahā saddo etesanti **uccāsaddamahāsaddā**. Tesu hi uggatuggatesu khattiyamahāsāla-brāhmaṇamahāsālādīsu mahāsakkāraṃ gahetvā āgatesu “asukassa okāsaṃ detha, asukassa okāsaṃ dethā”ti vutte “mayam paṭhamataraṃ āgatā, mayham paṭhamataraṃ āgatā, natthi okāso”ti evaṃ aññamaññaṃ kathentānaṃ saddo ucco ceva mahā ca ahosi. **Kevaṭṭā maññe macchavilopeti** kevaṭṭā viya macchavilope. Tesañhi macchapacchiṃ gahetvā āgatānaṃ

vikkiṇanaṭṭhāne “mayhaṃ detha mayhaṃ dethā”ti vadato mahājanassa evarūpo saddo hoti. **Mīlhasukhanti** asucisukhaṃ. **Middhasukhanti** niddāsukhaṃ. **Lābhasakkārasilokasukhanti** lābhasakkārañceva vaṇṇabhaṇaṇaṇca nissāya uppannasukhaṃ.

Taṃninnāva gamissantīti taṃ tadeva bhagavato gataṭṭhānaṃ gamissantī, anubandhissantiyevāti vuttaṃ hoti. **Tathā hi, bhante, bhagavato silapaññāṇanti** yasmā tathāvidhaṃ tumhākaṃ sīlaṇca ñāṇaṇcāti attho. **Mā ca mayā yasoti** mayā saddhiṃ yasopi mā samāgacchatu. **Piyānanti** piyajanānaṃ. **Eso tassa nissandoti** eṣā piyabhāvassa nipphatti. **Asubhanimittānuyoganti** asubhakammaṭṭhānānuyogaṃ. **Subhanimitteti** rāgaṭṭhāniye itṭhārammaṇe. **Eso tassa nissandoti** eṣā tassa asubhanimittānuyogassa nipphatti. Evamimasmiṃ sutte imesu pañcasu ṭhānesu vipassanāva kathitāti.

Pañcaṅgikavaggo tatiyo.

4. Sumanavaggo

1. Sumanasuttavaṇṇanā

31. Catutthassa paṭhame **sumanā rājakumārīti** mahāsakkāraṃ katvā patthanaṃ patthetvā evaṃ laddhanāma rājakaññā. Vipassisammāsambuddhakālasmiṃ hi nāgaresu “yuddhampi katvā satthāraṃ amhākaṃ gaṇhissāma”ti senāpatiṃ nissāya buddhappamukhaṃ saṅghaṃ labhitvā paṭipāṭiyā puññāni kātuṃ āradhesu sabbapaṭhamadivaso senāpatissa vāro ahoṣi. Tasmiṃ divase senāpati mahādānaṃ sajjetvā “ajja yathā añño koci ekabhikkhampi na deti, evaṃ rakkhathā”ti samantā purise ṭhapesi. Taṃdivasaṃ seṭṭhibhariyā rodamānā pañcahi kumārīkāsathehi saddhiṃ kīṭitvā āgataṃ dhītaṃ āha – “sace, amma, tava pitā jīveyya, ajjāhaṃ paṭhamaṃ dasabalaṃ bhojeyya”nti. Sā taṃ āha – “amma, mā cintayi, ahaṃ tathā karissāmi, yathā buddhappamukho saṅgho amhākaṃ paṭhamaṃ bhikkhaṃ bhujjissati”ti. Tato satasahassagghanikāya suvaṇṇapāṭiyā nirudakapāyāsaṃ pūretvā sappimadhusakkharādīhi abhisankharitvā aññissā pāṭiyā paṭikujjitvā taṃ sumanamālāgulehi parikkhipitvā mālāguḷasadiṣaṃ katvā bhagavato gāmaṃ pavisanavelāya sayameva ukkhipitvā dhātigaṇaparivutā gharā nikkhami.

Antarāmagge senāpatino upaṭṭhākā, “amma, mā ito āgamā”ti vadanti. Mahāpuññā nāma manāpakathā honti, na ca tesam punappunaṃ bhaṇantānaṃ kathā paṭikkhipitumaṃ sakkā hoti. Sā “cūḷapita, mahāpita, mātula, kissa tumhe gantuṃ na dethā”ti āha. Senāpatinā “aññassa kassaci khādanīyaṃ bhojanīyaṃ mā dethā”ti ṭhapitamha, ammāti. Kiṃ pana mama hatthe khādanīyaṃ bhojanīyaṃ passathāti? Mālāguḷaṃ passāmāti. Kiṃ tumhākaṃ senāpati mālāpūjampi kātuṃ na detīti? Deti, ammāti. Tena hi apethāti bhagavantaṃ upasaṅkamitvā “mālāguḷaṃ gaṇhatha bhagavā”ti āha. Bhagavā ekaṃ senāpatissa upaṭṭhākaṃ oloketvā mālāguḷaṃ gaṇhāpesi. Sā bhagavantaṃ vanditvā “bhavābhavābhiniḃbattiyaṃ me satī paritassanajīvitaṃ nāma mā hotu, ayaṃ sumanamālā viya nibbattanibbattaṭṭhāne piyāva homi, nāmena ca sumanāyevā”ti patthanaṃ katvā satthārā “sukhinī hohi”ti vuttā vanditvā padakkhiṇaṃ katvā pakkāmi.

Bhagavāpi senāpatissa geḥaṃ gantvā paññattāsane nisīdi. Senāpati yāguṃ gahetvā upagañchi, satthā hatthena pattaṃ pidahi. Nisīno, bhante, bhikkhusaṅghoti. Atthi no eko antarāmagge piṇḍapāto laddhoti? Mālaṃ apanetvā piṇḍapātaṃ addasa. Cūḷupaṭṭhāko āha – “sāmi mālāti maṃ vatvā mātugāmo vañcesī”ti. Pāyāso bhagavantaṃ ādiṃ katvā sabbabhikkhūnaṃ pahosi. Senāpati attano deyyadhammaṃ adāsi. Satthā bhattakiccaṃ katvā maṅgalaṃ vatvā pakkāmi. Senāpati “kā nāma sā piṇḍapātamadāsī”ti pucchi. Seṭṭhidhītā sāmīti. Sappaññā itthī, evarūpāya ghare vasantiyā purisassa saggasampatti nāma na dullabhāti kaṃ ānetvā jeṭṭhakaṭṭhāne ṭhapesi?

Sā pitugehe ca senāpatigehe ca dhanam gahetvā yāvatāyukam tathāgatassa dānam datvā puññāni karitvā tato cutā kāmāvacaradevaloke nibbatti. Nibbattakkhaṇeaya jāṇupamāṇena odhinā sakalam devalokam paripūrayamānam sumanavassam vassi. Devatā “ayaṃ attanāva attano nāmaṃ gahetvā āgatā”ti “sumanā devadhītā”tvevassā nāmaṃ akaṃsu. Sā ekanavutikappe devesu ca manussesu ca saṃsaranā nibbattanibbattaṭṭhāne avijahitasumanavassā “sumanā sumanā”tveva nāmā ahoṣi. Imasmimṃ pana kāle kosalarāñño aggamaheṣiyā kucchismimṃ paṭisandhimṃ gaṇhi. Tāpi pañcasatā kumārikā taṃdivasaññeva tasmimṃ tasmimṃ kule paṭisandhimṃ gahetvā ekadivaseyeva sabbā mātukucchito nikkhamiṃsu. Taṃkhaṇaṃyeva jāṇupamāṇena odhinā sumanavassam vassi. Taṃ disvā rājā “pubbe katābhinihārā esā bhavissatī”ti tuṭṭhamānaso “dhītā me attanāva attano nāmaṃ gahetvā āgatā”ti sumanātvevassā nāmaṃ katvā “mayhaṃ dhītā na ekikāva nibbattissatī”ti nagaramṃ vicināpento ‘pañca dārikāsātāni jātāni’ti sutvā sabbā attanāva posāpesi. Māse māse sampate “ānetvā mama dhītu dassethā”ti āha. Evamesā mahāsakkāram katvā patthanam patthetvā evaṃladdhanāmāti veditabbā.

Tassā sattavassikakāle anāthapiṇḍikena vihāram niṭṭhāpetvā tathāgatassa dūte pesite satthā bhikkhusaṅghaparivāro sāvattimṃ agamāsi. Anāthapiṇḍiko gantvā rājānam evamāha – “mahārāja, satthu idhāgamanam amhākampi maṅgalam tumhākampi maṅgalameva, sumanam rājakumārimṃ pañcahi dārikāsatehi saddhimṃ puṇṇaghaṭe ca gandhamālādīni ca gāhāpetvā dasabalassa paccuggamanam pesethā”ti. Rājā “sādhu mahāseṭṭhī”ti tathā akāsi. Sāpi raññā vuttanayeneva gantvā satthāram vanditvā gandhamālādīhi pūjetvā ekamantaṃ aṭṭhāsi. Satthā tassā dhammam desesi. Sā pañcahi kumārikāsatehi saddhimṃ sotāpattiphale patiṭṭhāsi. Aññānipi pañca dārikāsātāni pañca mātugāmasātāni pañca upāsakasātāni tasmimṃyeva khaṇe sotāpattiphalam pāpuṇiṃsu. Evaṃ tasmimṃ divase antarāmaggeyeva dve sotāpannasahassāni jātāni.

Yena bhagavā tenupasaṅkamīti kasmā upasaṅkamīti? Pañham pucchitukāmatāya.

Kassapasammāsambuddhakāle kira saḥāyakā dve bhikkhū ahesuṃ. Tesu eko sārāṇiyadhammam pūreti, eko bhattaggavattam. Sārāṇiyadhammapūraḥko itaram āha – “āvuso, adinnassa phalam nāma natthi, attanā laddham paresam datvā bhujjituṃ vaṭṭatī”ti. Itaro pana āha – “āvuso, tvam na jānāsi, deyyadhammam nāma vinipātetuṃ na vaṭṭatī, attano yāpanamattameva gaṇhantena bhattaggavattam pūretuṃ vaṭṭatī”ti. Tesu ekopi ekaṃ attano ovāde otāretuṃ nāsakkhi. Dvepi attano paṭipattimṃ pūretvā tato cutā kāmāvacaradevaloke nibbattiṃsu. Tattha sārāṇiyadhammapūraḥko itaram pañcahi dhammehi adhigaṇhi.

Evaṃ te devesu ca manussesu ca saṃsaranā ekaṃ buddhantaram khepetvā imasmimṃ kāle sāvattiyam nibbattiṃsu. Sārāṇiyadhammapūraḥko kosalarāñño aggamaheṣiyā kucchismimṃ paṭisandhimṃ gaṇhi, itaro tassāyeva upaṭṭhākaitthiyā kucchismimṃ paṭisandhimṃ gaṇhi. Te dvepi janā ekadivaseneva jāyīṃsu. Te nāmaggaḥādivase nhāpetvā sirigabbhe nipajjāpetvā dvinnampi mātaro bahi sakkāram saṃvidahiṃsu. Tesu sārāṇiyadhammapūraḥko akkhīni ummīletvā mahantaṃ setacchattam supaññattam sirisayanam alaṅkatapaṭiyattañca nivesanam disvā “ekasmimṃ rājakule nibbattosmī”ti aññāsi. So “kiṃ nu kho kammaṃ katvā idha nibbattosmī”ti āvajjento “sārāṇiyadhammanissandenā”ti ñatvā “saḥāyo me kuhiṃ nu kho nibbatto”ti āvajjento nīcasayane nipannaṃ disvā “ayaṃ bhattaggavattam pūremīti mama vacanam na gaṇhi, imasmimṃ idāni taṃ ṭhāne niggaṇhituṃ vaṭṭatī”ti “samma mama vacanam nākāsi”ti āha. Atha kiṃ jātanti. Passa mayhaṃ sampattimṃ, setacchattassa heṭṭhā sirisayane nipannosmi, tvam nīcamañce thaddhaattharaṇamatte nipannosīti. Kiṃ pana tvam etaṃ nissāya mānam karosi, nanu veḷusalākāhi katvā pilotikāya paliveṭṭitam sabbametaṃ pathavīdhātumattamevāti?

Sumanā tesam katham sutvā “mama bhātikānam santike koci natthī”ti tesam samīpam gacchantī dvāram nissāya ṭhitā “dhātū”ti vacanam sutvā “idaṃ dhātūti vacanam bahiddhā natthi. Mama bhātikā samaṇadevaputtā bhavissantī”ti cintetvā – “sacāham ‘ime evam kathenti’ti mātāpitūnam kathessāmi, ‘amanussā ete’ti nīharāpessanti. Idaṃ kāraṇam aññassa akathetvā kaṅkhaḥchedakam purisaheraññikam mama pitaram mahāgotamadasabalamaṃyeva pucchissāmi”ti bhuttapātarāsā rājānam upasaṅkamitvā “dasabalassa upaṭṭhānam gamissāmi”ti āha. Rājā pañca rathasātāni yojāpesi. Jambudīpatalasmiñhi

tissova kumāriyo pitūnaṃ santikā pañca rathasatāni labhiṃsu – bimbisārarañño dhītā cundī rājakaññā, dhanañcayassa seṭṭhissa dhītā visākhā, ayaṃ sumanā rājakaññāti. Sā gandhamālaṃ ādāya rathe ṭhitā pañcarathasataparivārā “imaṃ pañhaṃ pucchissāmi”ti yena bhagavā tenupasankami.

Idhassūti idha bhaveyyuṃ. **Eko dāyakoti** eko attanā laddhalābhato parassa datvā paribhuñjanako sārāṇiyadhammapūraḥko. **Eko adāyakoti** eko attanā laddhaṃ parassa adatvā paribhuñjanako bhattaggavattapūraḥko. **Devabhūtānaṃ pana nesanti** devabhūtānaṃ etesaṃ. **Adhigaṇhātīti** adhibhavitvā gaṇhāti ajjhottharati atiseti. **Ādhipateyyenāti** jeṭṭhakakāraṇena. **Imehi pañcahi ṭhānehīti** sesadeve sakko devarājā viya imehi pañcahi kāraṇehi adhigaṇhāti. **Mānusakenāti** ādīsu āyunā mahākassapatthero viya bākulatthero viya ānandatthero viya ca, vaṇṇena mahāgatimbaabhayatthero viya bhaṇḍāgāraamacco viya ca, sukkena raṭṭhapālakulaputto viya soṇasetṭhiputto viya yasadarako viya ca, yasena dhammāsoko viya, tathā ādhipaccenāti imehi pañcahi kāraṇehi atireko jeṭṭhako hoti.

Yācitova bahulanti bākulatthera-sīvalitthera-ānandattherādayo viya yācitova bahulaṃ cīvarādīni paribhuñjatīti imehi kāraṇehi atireko hoti jeṭṭhako. **Yadidaṃ vimuttiyā vimuttinti** yaṃ ekassa vimuttiyā saddhiṃ itarassa vimuttiṃ ārabha nānākaraṇaṃ vattabbaṃ bhaveyya, taṃ na vadāmīti attho. Sattavassikadārako vā hi vimuttiṃ paṭivijjhatu vassasatikatthero vā bhikkhu vā bhikkhunī vā upāsako vā upāsikā vā devo vā māro vā brahmā vā, paṭividdhalokuttaramagge nānattaṃ nāma natthi. **Alamevāti** yuttameva. **Yatra hi nāmāti** yāni nāma.

Gacchaṃ ākāsadhātuyāti ākāseṇa gacchanto. **Saddhoti** ratanattayaguṇaṇaṃ saddhātā. **Thanayanti** gajjanto. **Vijjumaḷīti** mālāsadisāya meghamukhe carantiyā vijjulatāya samannāgato. **Satakkakūti** satakūṭo, ito cito ca utṭhitena valāhakakūṭasatena samannāgatoti attho. **Dassanasampannoti** sotāpanno. **Bhogaparibyūḷhoti** udakoghena viya dānavasena dīyamānehi bhogehi paribyūḷho, devalokaṃ sampāpitoti attho. **Peccāti** paraloke. **Sagge pamodatīti** yasmīṃ sagge uppajjati, tattheva modatīti.

2. Cundīsuttavaṇṇanā

32. Dutiye **pañcahi rathasatehīti** bhuttapātarāsā pitu santikaṃ pesetvā pañca rathasatāni yojāpetvā tehi parivutātī attho. **Upasaṅkamīti** bhātarā saddhiṃ pavattitaṃ pañhasākacchaṃ pucchissāmīti gandhamālacuṇṇādīni ādāya upasaṅkami. **Yadeva so hotīti** yadā eva so hoti. Atha vā yo eva so hoti. **Ariyakantāni silānīti** maggaphalasampayuttāni silāni. Tāni hi ariyānaṃ kantāni honti, bhavantarepi na pariccajanti. Sesam catukkanipāte aggappasādasutte vuttanayeneva vedītabbaṃ.

3. Uggahasuttavaṇṇanā

33. Tatiye **bhaddiyeti** bhaddiyanagare. **Jātiyāvaneti** sayamjāte aropite himavantena saddhiṃ ekābaddhe vanasaṇḍe, taṃ nagaraṃ upanissāya tasmīṃ vane viharatīti attho. **Attacattutthoti** attanā cattuttho. Kasmā panesa bhagavantaṃ attacattutthameva nimantesi? Gehe kirassa maṅgalaṃ mahantaṃ, tattha mahantena saṃvidhānena bahū manussā sannipatissanti. Te bhikkhusaṅghaṃ parivisantena dussaṅghā bhavissantīti attacattutthameva nimantesi. Api cassa evampi ahoṣi – “daharakumārīkāyo mahābhikkhusaṅghamajjhe sathari ovadante olīnāmanā ovādaṃ gahetuṃ na sakkuṇeyyu”nti. Imināpi kāraṇena attacattutthameva nimantesi. **Ovadatu tāsam, bhanteti**, bhante bhagavā, etāsam ovadatu, etā ovadatūti attho. Upayogathasmiñhi etaṃ sāmivacanaṃ. **Yaṃ tāsanti** yaṃ ovādānusāsanaṃ etāsam. Evañca pana vatvā so seṭṭhi “imā mama santike ovādaṃ gaṇhamānā harāyeyyu”nti bhagavantaṃ vanditvā pakkāmi.

Bhattūti sāmikassa. **Anukampaṃ upādāyāti** anuddayaṃ paṭicca. **Pubbuṭṭhāyiniyoti** sabbapaṭhamam utṭhānasīlā. **Pacchānīpātīniyoti** sabbapacchā nipajjanasīlā. Itthiyā hi paṭhamataram bhuñjitvā sayanaṃ āruyha nipajjitum na vaṭṭati, sabbe pana gehaparijane bhojetvā upakaraṇabhaṇḍam

saṃvidhāya gorūpādīni āgatānāgatāni ñatvā sve kattabbakammaṃ vicāretvā kuñcīkāmuddikaṃ hatthe katvā sace bhojanaṃ atthi, bhuñjitvā, no ce atthi, aññaṃ pacāpetvā sabbe santappetvā pacchā nipajjitum vaṭṭati. Nipannāyapi yāva sūriyuggamanā niddāyitum na vaṭṭati, sabbapaṭṭhamam pana utthāya dāsakammakare pakkosāpetvā “idañcidañca kammaṃ karothā”ti kammantaṃ vicāretvā dhenuyo duhāpetvā sabbaṃ gehe kattabbakiccaṃ attano paccakkhamyeva kātum vaṭṭati. Etamatthaṃ sandhāya “pubbuṭṭhāyiniyo pacchānipātiniyo”ti āha. “**Kimkārapaṭissāviniyoti** kiṃ karoma kiṃ karomā”ti mukhaṃ oloketvā vicaraṇasīlā. **Manāpacāriniyoti** manāpamyeva kiriyam karaṇasīlā. **Piyavādinīyoti** piyameva vacanaṃ vādanasīlā. **Pūjessāmāti** catupaccayapūjāya pūjayissāma.

Abbhāgateti attano santikaṃ āgate. **Āsanodakena paṭipūjessāmāti** āsanena ca pādadhovanaudakena ca pūjayissāma. Ettha ca mātāpitūnaṃ devasikaṃ sakkāro kātabbo. Samaṇabrāhmaṇānaṃ pana abbhāgatānaṃ āsanaṃ datvā pādadhovanañca dātappaṃ, sakkāro ca kātabbo.

Uṇṇāti eḷakalomaṃ. **Tattha dakkhā bhavissāmāti** eḷakalomānaṃ vijaṭṭanadhovanarajanaveṇikaraṇādīsū kappāsassa ca vaṭṭanapisanaphoṭanakantanādīsū chekā bhavissāma. **Tatrupāyāyāti** tasmim uṇṇākappāsasaṃvidhāne upāyabhūtāya “imasmiṃ kāle idaṃ nāma kātum vaṭṭatī”ti evaṃ pavattāya vīmaṃsāya samannāgatā. **Alaṃ kātum alaṃ saṃvidhātunti** attanā kātumpi parehi kārapetumpi yuttā ceva samatthā ca bhavissāmāti attho.

Katañca katato jānissāma, akatañca akatatoti sakaladivasam idaṃ nāma kammaṃ katvā āgatānaṃ, upaḍḍhadivasam idaṃ nāma kammaṃ katvā āgatānaṃ, nikkammānaṃ gehe nisinnānaṃ idaṃ nāma dātuñca evañca kātum vaṭṭatīti evaṃ jānissāma. **Gilānakānañca balābalanti** sace hi gilānakāle tesam bhesajjabhojanādīni datvā rogam phāsum na karonti, “ime arogakāle amhe yaṃ icchanti, taṃ kārenti. Gilānakāle atthi bhāvampi no na jānanti”ti virattarūpā pacchā kiccāni na karonti, dukkaṭāni vā karonti. Tasmā nesam balābalaṃ ñatvā dātappañca kātappañca jānissāmāti evaṃ tumhehi sikkhitabbanti dasseti. **Khādanīyam bhojanīyañcassāti** khādanīyañca bhojanīyañca assa antojanassa. **Paccamsenāti** paṭilabhitabbena aṃsena, attano attano laddhabbakoṭṭhāsānurūpenāti attho. **Samvibhajissāmāti** dassāma. **Sampādessāmāti** sampādayissāma.

Adhuttīti purisadhuttasurādhattatāvasena adhuttiyo. **Athenīti** atheniyo acoriyo. **Asonḍīti** surāsonḍatādivasena asonḍiyo.

Evaṃ suttantaṃ niṭṭhapetvā idāni gāthāhi kūṭam gaṇhanto **yo naṃ bhārati sabbadāti**tiādimāha. Tattha **bhārātīti** posati paṭijjagati. **Sabbakāmaharanti** sabbakāmadaṃ. **Sotthīti** suitthī. **Evaṃ vattatīti** ettakaṃ vattaṃ pūretvā vattati. **Manāpā nāma te devāti** nimmānaratī devā. Te hi icchiticchitaṃ rūpaṃ māpetvā abhiramaṇato nimmānaratīti ca manāpāti ca vuccantīti.

4. Sīhasenāpatīsuttavaṇṇanā

34. Catutthe **sandiṭṭhikanti** sāmam passitabbakaṃ. **Dāyakoti** dānasūro. Na so saddhāmatkenaeva tiṭṭhati, pariccajitumpi sakkotīti attho. **Dānapatīti** yaṃ dānaṃ deti, tassa pati hutvā deti, na dāso, na sahāyo. Yo hi attanā madhuraṃ bhuñjati, paresam amadhuraṃ deti, so dānasañkhātassa deyyadhammassa dāso hutvā deti. Yo yaṃ attanā bhuñjati, tadeva deti, so sahāyo hutvā deti. Yo pana attanā yena kenaci yāpeti, paresam madhuraṃ deti, so pati jeṭṭhako sāmī hutvā deti. Tādisam sandhāya vuttaṃ – “dānapatī”ti.

Amañkubhūtoti na nittejabhūto. **Visāradoti** ñāṇasomanassappatto. **Sahabyataṃ gatāti** sahabhāvaṃ ekībhāvaṃ gatā. **Katāvakāsāti** yena kammena tattha avakāso hoti, tassa katattā katāvakāsā. Taṃ pana yasmā kusalameva hoti, tasmā **katakusalāti** vuttaṃ. **Modareti** modanti pamodanti. **Asitassāti** anissitassa tathāgatassa. **Tādinoti** tādilakkhaṇam pattassa.

5. Dānānisamsasuttavaṇṇanā

35. Pañcame **gihidhammā anapagato hotīti** akhaṇḍapañcasīlo hoti. **Sataṃ dhammaṃ anukkamanti** sappurisānaṃ mahāpurisānaṃ dhammaṃ anukkamanto. **Santo naṃ bhajantīti** sappurisā buddhapaṇḍitabuddhatathāgatasāvakaṃ etaṃ bhajanti.

6. Kāladānasuttavaṇṇanā

36. Chaṭṭhe **kāladānānīti** yuttadānāni, pattadānāni anucchavikadānānīti attho. **Navasassānīti** aggasassāni. **Navaphalānīti** āramato paṭhamuppannāni aggaphalāni. **Paṭhamam sīlavantesu paṭiṭṭhāpetīti** paṭhamam sīlavantānaṃ datvā pacchā attanā paribhuñjati. **Vadaññūti** bhāsitaññū. **Kālena dinnanti** yuttappattakālena dinnam. **Anumodantīti** ekamante ṭhitā anumodanti. **Veyyāvaccanti** kāyena veyyāvaṭṭakammaṃ karonti. **Appaṭivānacittoti** anukkaṇṭhitacitto. **Yattha dinnam mahapphalanti** yasmiṃ ṭhāne dinnam mahapphalaṃ hoti, tattha dadeyya.

7. Bhojanasuttavaṇṇanā

37. Sattame **āyūṃ detīti** āyudānaṃ deti. **Vaṇṇanti** sarīravaṇṇam. **Sukhanti** kāyikacetasikasukham. **Balanti** sarīrathāmaṃ. **Paṭibhānanti** yuttamuttappaṭibhānam.

8. Saddhasuttavaṇṇanā

38. Aṭṭhame **anukampantīti** anuggaṇhanti. **Kandhimāva mahādumoti** kandhasampanno mahārukkho viya. **Manorame āyataneti** ramaṇīye samosaraṇaṭṭhāne. **Chāyam chāyatthikā yantīti** chāyāya atthikāva chāyam upagacchanti. **Nivātavuttinti** nīcavuttiṃ. **Atthaddhanti** kodhamānathaddhatāya rahitam. **Soratanti** soraccena sucisīlena samannāgataṃ. **Sakhilanti** sammōdakaṃ.

9. Puttasuttavaṇṇanā

39. Navame **bhato vā no bharissatīti** amhehi thañṇapāyanaṭṭhapādavaḍḍhanādīhi bhato paṭijaggito amhe mahallakakāle ṭṭhapādadhovana-nhāpanayāgubhattadānādīhi bharissati. **Kiccaṃ vā no karissatīti** attano kammaṃ ṭṭapetvā amhākaṃ rājakulādīsu uppannam kiccaṃ gantvā karissati. **Kulavaṃso ciraṃ ṭṭhassatīti** amhākaṃ santakaṃ khetvatthuhirañṇasuvaṇṇādīṃ avināsetvā rakkhante putte kulavaṃso ciraṃ ṭṭhassati, amhehi vā pavattitāni salākabhattādīni anupacchinditvā pavattessati, evampi no kulavaṃso ciraṃ ṭṭhassati. **Dāyajjam paṭipajjissatīti** kulavaṃsānurūpāya paṭipattiyā attānaṃ dāyajjārahaṃ karonto amhākaṃ santakaṃ dāyajjam paṭipajjissati. **Dakkhinaṃ anuppadassatīti** pattidānaṃ katvā tatiyadivasato paṭṭhāya dānaṃ anuppadassati.

Santo sappurisāti imasmiṃ ṭhāne mātāpitūsu sammā paṭipattiyā santo sappurisāti veditabbā. **Pubbe katamanussaranti** mātāpitūhi paṭhamataraṃ katagunaṃ anussarantā. **Ovādakarīti** mātāpitūhi dinnassa ovādassa kattā. **Bhataposīti** yehi bhato, tesam posako. **Pasamsiyoti** diṭṭheva dhamme mahājanena pasamsitabbo hoti.

10. Mahāsālaputtasuttavaṇṇanā

40. Dasame **mahāsālāti** mahārukkhā. **Sākhāpattapalāsena vaḍḍhantīti** khuddakasākhāhi ca pattasāṅkhātena ca palāsena vaḍḍhanti. **Arañṇasminti** agāmake padese. **Brahāvaneti** mahāvane aṭṭaviyaṃ. Sesam sabbattha uttānatthamevāti.

Sumanavaggo catuttho.

5. Muṇḍarājavaggo

1. Ādiyasuttavaṇṇanā

41. Pañcamassa paṭhame **bhogānaṃ ādiyāti** bhogānaṃ ādātabbakāraṇāni. **Uṭṭhānavīriyādhighatehīti** uṭṭhānasāṅkhātena vīriyena adhighatehi. **Bāhābalaparicitehīti** bāhubalena sañcitehi. **Sedāvakkhittehīti** sedam avakkhipetvā uppāditehi. **Dhammikehīti** dhammayuttehi. **Dhammaladdhehīti** dasakusalakammaṃ akopetvā laddhehi. **Piṇetīti** piṇitaṃ thūlaṃ karoti. Sesametha catukkanipāte vuttanayeneva veditabbaṃ. Dutiyam uttānatthameva.

3. Itṭhasuttavaṇṇanā

43. Tatiye **āyusaṃvattanikā paṭipadāti** dānasīlādikā puññaṃpaṭipadā. Sesesupi eseva nayo. **Atthābhisamayāti** atthassa abhisamāgamena, atthappaṭilābhenāti vuttaṃ hoti.

4. Manāpadāyīsuttavaṇṇanā

44. Catutthe **uggoti** guṇehi uggatattā evaṃladdhanāmo. **Sālapupphakaṃ khādanīyanti** catumadhurayojitena sālipiṭṭhena kataṃ sālapupphasadisam khādanīyam. Tañhi paññāyamānavāṇṭapattakesaram katvā jīrakādisambhārayutte sappimhi pacitvā sappim vinivattetvā kolumbe pūretvā gandhavāsam gāhāpetvā pidahitvā lañchetvā ṭhapitaṃ hoti. Taṃ so yāguṃ pivitvā nisinnassa bhagavato antarabhatte dātukāmo evamāha. **Paṭiggahesi bhagavāti** desanāmattemaṃ, upāsako pana taṃ bhagavato ca pañcannañca bhikkhusatānaṃ adāsi. Yathā ca taṃ, evaṃ sūkaramaṃsādīnipi. Tattha **sampannakolakanti** sampannabadaram. **Sūkaramaṃsanti** madhurarasehi badarehi saddhiṃ jīrakādisambhārehi yojetvā pakkaṃ ekasaṃvaccharikasūkaramaṃsam. **Nibbattatelakanti** vinivattitelaṃ. **Nāliyasākanti** sālipiṭṭhena saddhiṃ madditvā jīrakādisaṃyutte sappimhi pacitvā catumadhurena yojetvā vāsam gāhāpetvā ṭhapitaṃ nāliyasākam. **Netam bhagavato kappatīti** ettha akappiyam upādāya kappiyampi na kappatīti vuttaṃ, seṭṭhi pana sabbampi taṃ āharāpetvā rāsim katvā yaṃ yaṃ akappiyam, taṃ taṃ antarāpaṇam paṇiṇitvā kappiyam upabhogaparibhogabhaṇḍam adāsi. Candanaphalakaṃ nātimahantaṃ dīghato aḍḍhateyyaratanam, tīriyam diyaḍḍharatanam, sāravarabhaṇḍattā pana mahaggham ahosi. Bhagavā taṃ paṭiggahetvā khaṇḍākhaṇḍikaṃ chedāpetvā bhikkhūnam añjanapisanattāya dāpesi.

Ujjubhūtesūti kāyavācācittēhi ujukesu. **Chandasāti** pemena. **Cattantiādīsu** pariccāgavasena **cattam**. Muttacāgatāya **muttam**. Anapekkhacittatāya cittaena na uggahitanti **anuggahitam**. **Khettūpameti** viruhanaṭṭhena khettasadise.

Aññataram manomayanti suddhāvāsesu ekaṃ jhānāmanena nibbattaṃ devakāyam. **Yathādhippāyoti** yathājjhāsayo. Iminā kiṃ pucchati? Tassa kira manussakāle arahattatthāya ajjhāsayo ahosi, taṃ pucchāmīti pucchati. Devaputtopi arahattaṃ pattatāya **taggha me bhagavā yathādhippāyoti** āha. **Yattha yatthūpapajjati** tīsu vā kulasampattīsu chasu vā kāmasaggesu yattha yattha uppajjati, tattha tattha dīghāyu yasavā hotīti. Pañcamam catukkanipāte vuttanayeneva veditabbaṃ. Chaṭṭhasattamāni uttānatthāneva.

8. Alabbhanīyaṭṭhānasuttavaṇṇanā

48. Aṭṭhame **alabbhanīyānīti** aladdhabbāni, na sakkā labhitum. **Ṭhānānīti** kāraṇāni. **Jarādhammam mā jīriti** yaṃ mayham jarāsabhāvam, taṃ mā jīratu. Sesapadesupi eseva nayo.

Nacchādeyyāti na ruceyya. **Abbhūti** nīhari.

Yatoti yasmim kāle. **Āpadāsūti** upaddavesu. **Na vedhatīti** na kampati nānusocati. **Atthavinicchayaññūti** kāraṇatthavinicchaye kusalo. **Purāṇanti** nibbikāratāya porāṇakameva. **Jappenāti** vaṇṇabhaṇanena. **Mantenāti** mahānubhāvamantaparivattanena. **Subhāsitenāti** subhāsitaṭṭhanena. **Anuppadānenāti** satassa vā saḥassassa vā dānena. **Paveṇiyā vāti** kulavaṃsena vā, “idaṃ amhākaṃ paveṇiyā āciṇṇaṃ, idaṃ anāciṇṇa” nti evaṃ paveṇikathanenāti attho. **Yathā yathā yattha labhetha atthanti** etesu jappādīsu yena yena yattha yattha ṭhāne jarādharmādīnaṃ ajīraṇatādiatthaṃ labheyya. **Tathā tathā tattha parakkameyyāti** tena tena tasmim tasmim ṭhāne parakkamaṃ kareyya. **Kammaṃ dalhanti** vaṭṭagāmikammaṃ mayā thiraṃ katvā āyūhitam, svāham idāni kinti karomīti evaṃ paccavekkhitvā adhivāseyyāti.

9. Kosalasuttavaṇṇanā

49. Navame **upakaṇṇaketi** kaṇṇamūle. **Dummanoti** duṭṭhumano. **Pattakkhandhoti** patitakkhandho. **Pajjhāyantoti** cintayanto. **Appaṭibhānoti** nippaṭibhāno hutvā. Sesam heṭṭhā vuttanayameva.

10. Nāradasuttavaṇṇanā

50. Dasame **ajjhommucchitoti** adhiommucchito gilitvā pariniṭṭhapetvā gahaṇasabhāvāya atirekamucchāya taṇhāya samannāgato. **Mahaccā rājānubhāvenāti** mahatā rājānubhāvena, aṭṭhārasahi senīhi parivārīto mahatīyā rājiddhiyā pāyāsīti attho. **Tagghāti** ekaṃsatthe nipāto, ekaṃseneva sokasallaharaṇoti attho. Iti rājā imaṃ ovādaṃ sutvā tasmim ṭhito dhammena samena rajjaṃ kāretvā saggaparāyaṇo ahoṣi.

Muṇḍarājavaggo pañcamaṃ.

Paṭhamapaṇṇāsakaṃ niṭṭhitam.

2. Dutiyapaṇṇāsakaṃ

(6) 1. Nīvaraṇavaggo

1. Āvaraṇasuttavaṇṇanā

51. Dutiyassa paṭhame āvaraṇavasena **āvaraṇā**. Nīvaraṇavasena **nīvaraṇā**. Ceto ajjhāruhanṭīti **cetaso ajjhāruhā**. Vipassanāpaññaṅca maggapaññaṅca uppattinivāraṇaṭṭhena dubbalaṃ karontīti **paññāya dubbalikaraṇā**. Yā vā etehi saddhiṃ vokiṇṇā paññā uppajjati, taṃ dubbalaṃ karontītipi **paññāya dubbalikaraṇā**. **Abalāyāti** pañcanīvaraṇapariyonaddhattā apagatabalāya. **Uttari vā manussadhammā alamariyaññāpadassanavisesanti** dasakusalakammaṃpathasaṅkhātā manussadhammā uttari ariyabhāvaṃ kātuṃ samatthaṃ ñānadassanavisesaṃ. **Hārahārīnīti** haritabbaṃ harituṃ samatthā. **Naṅgalamukhānīti** mātikāmukhāni. Tāni hi naṅgalasarikkhakkattā naṅgalehi ca khatattā naṅgalamukhānīti vuccanti.

Evameva khoti ettha sotaṃ viya vipassanāññaṃ daṭṭhabbaṃ, ubhato naṅgalamukhānaṃ vivaraṇakālo viya chasu dvāresu saṃvarassa vissaṭṭhakālo, majjhenadiyā rukkhapāde koṭṭetvā palālāṭṭhamattikāhi āvaraṇe kate udakassa vikkhittaviṣaṭṭhāyādiṇṇakālo viya pañcahi nīvaraṇehi pariyonaddhakālo, evaṃ āvaraṇe kate vihatavegassa udakassa tiṇapalālādīni parikaḍḍhitvā samuddaṃ pāpuṇituṃ asamatthakālo viya vipassanāññaṇena sabbākusale viddhamsetvā nibbānasāgaram pāpuṇituṃ

asamatthakālo veditabbo. Sukkapakkhe vuttavipallāsenā yojanā kātabbā. Imasmim̐ sutte vaṭṭavivaṭṭaṃ kathitaṃ. Dutiyāṃ uttānatthameva.

3. Padhāniyaṅgasuttavaṇṇanā

53. Tatiye **padhāniyaṅgānī**ti padhānaṃ vuccati padahanabhāvo, padhānamassa atthīti padhāniyo, padhāniyassa bhikkhuno aṅgānīti padhāniyaṅgāni. **Saddhoti** saddhāya samannāgato. Saddhā panesā āgamasaddhā adhigamasaddhā okappanasaddhā pasādasaddhāti catubbidhā. Tattha sabbaññubodhisattānaṃ saddhā, abhinīhāro paṭṭhāya āgatattā **āgamasaddhā** nāma. Ariyasāvakaṇaṃ paṭivedhena adhigatattā **adhigamasaddhā** nāma. Buddha dhammo saṅghoti vutte acalabhāvena okappanaṃ **okappanasaddhā** nāma. Pasāduppatti **pasādasaddhā** nāma. Idha okappanasaddhā adhippetā. **Bodhinti** catumaggaññaṃ. Taṃ suppaṭividdhaṃ tathāgatenāti saddahatī. Desanāsīsameva cetāṃ, iminā pana aṅgena tīsupi ratanesu saddhā adhippetā. Yassa hi buddhādīsu pasādo balavā, tassa padhānavīriyaṃ ijjhati.

Appābādhoti arogo. **Appātaṅkoti** niddukkho. **Samavepākiniyāti** samavipākiniyā. **Gahaṇiyāti** kammajatejodhātuyā. **Nātisītāya nācchuṇhāyāti** atisītalaggahaṇiko hi sītabhīruko hoti, accuṇhaggahaṇiko uṇhabhīruko, tesāṃ padhānaṃ na ijjhati, majjhimaggaṇikassa ijjhati. Tenāha – **majjhimāya padhānakkhamāyāti**. **Yathābhūtaṃ attānaṃ āvikattāti** yathābhūtaṃ attano aguṇaṃ pakāsetā. **Udayatthagāminiyāti** udayaṇca atthaṇca gantaṃ paricchinditaṃ samatthāya. Etena paññāsalakkhaṇapariggāhakaṃ udayabbayaññaṃ vuttaṃ. **Ariyāyāti** parisuddhāya. **Nibbedhikāyāti** anibbidhappubbe lobhakkhandhādayo nibbijjhitaṃ samatthāya. **Sammā dukkhakkhayagāminiyāti** tadaṅgasena kilesānaṃ pahīnattā yaṃ dukkhaṃ khīyati, tassa dukkhassa khayagāminiyā. Iti sabbehipi imehi padehi vipassanāpaññāva kathitā. Duppaññassa hi padhānaṃ na ijjhati.

4. Samayasuttavaṇṇanā

54. Catutthe **padhānāyāti** vīriyakaraṇatthāya. **Na sukaraṃ uñchena paggaḥena yāpetunti** na sakkā hoti pattaṃ gahetvā uñchācariyāya yāpetuṃ. Imasmimpi sutte vaṭṭavivaṭṭameva kathitaṃ.

5. Mātāputtasuttavaṇṇanā

55. Pañcame **pariyādāya tiṭṭhatīti** pariyādiyitvā gahetvā khepetvā tiṭṭhati. **Ugghātītāti** uddhumātā.

Asihatthenāti sīsacchedanattāya asiṃ ādāya āgatenāpi. **Pisācenāti** khāditaṃ āgatayakkhenāpi. **Āsīdeti** ghaṭṭeyya. **Mañjunāti** mudukena. **Kāmoghavulhānanti** kāmoghena vulhānaṃ kaḍḍhitānaṃ. **Kālaṃ gati bhavābhavanti** vaṭṭakālaṃ gatiṇca punappunabbhave ca. **Purakkhatāti** purecārikā purato gatāyeva. **Ye ca kāme pariññāyāti** ye paṇḍitā duvidhepi kāme tīhi pariññāhi pariṇānitvā. **Caranti akutobhayāti** khīṇāsavānaṃ kutoci bhayaṃ nāma natthi, tasmā te akutobhayā hutvā caranti. **Pāraṅgatāti** pāraṃ vuccati nibbānaṃ, taṃ upagatā, sacchikatvā ṭhitāti attho. **Āsavakkhayanti** arahattaṃ. Imasmim̐ sutte vaṭṭameva kathetvā gāthāsu vaṭṭavivaṭṭaṃ kathitaṃ.

6. Upajjhāyasuttavaṇṇanā

56. Chaṭṭhe **madhurakajātoti** sañjātagarubhāvo. **Disā ca me na pakkhāyantīti** catasso disā ca anudisā ca mayhaṃ na upaṭṭhahantīti vadati. **Dhammā ca maṃ nappaṭibhantīti** samathavipassanādhammāpi me na upaṭṭhahanti. **Anabhirato ca brahmacariyaṃ carāmīti** ukkaṇṭhito hutvā brahmacariyavāsaṃ vasāmi. **Yena bhagavā tenupasaṅkamīti** tassa kathaṃ sutvā “buddhaveneyyapuggalo aya”nti taṃ kāraṇaṃ bhagavato ārocetaṃ upasaṅkami. **Avipassakassa kusālānaṃ dhammānanti** kusaladhamme avipassantassa, anesantassa agavesantassāti attho.

Bodhipakkhiyānaṃ dhammānanti satipaṭṭhānādīnaṃ sattatiṃsadhammānaṃ.

7. Abhiṇhapaccavekkhitabbaṭṭhānasuttavaṇṇanā

57. Sattame **jarādhammomhīti** jarāsabhāvo amhi. **Jaraṃ anatītōti** jaraṃ anatikkanto, antojarāya eva carāmi. Sesapadesupi eseva nayo. **Kammassakotiādīsu** kammaṃ mayhaṃ sakaṃ attano santakanti kammassako amhi. Kammassa dāyādōti **kammadāyādo**, kammaṃ mayhaṃ dāyajjaṃ santakanti attho. Kammaṃ mayhaṃ yoni kāraṇanti **kammayoni**. Kammaṃ mayhaṃ bandhūti **kammabandhu**, kammañātakoti attho. Kammaṃ mayhaṃ paṭisaraṇaṃ paṭiṭṭhāti **kammaṃpaṭisaraṇo**. **Tassa dāyādo bhavissāmīti** tassa kammassa dāyādo tena dinnaphalapaṭiggāhako bhavissāmīti attho. **Yobbanamadoti** yobbanam ārabba uppannamado. Sesesupi eseva nayo. **Maggo sañjāyatīti** lokuttaramaggo sañjāyati. **Samyojanāni sabbaso pahīyantīti** dasa samyojanāni sabbaso pahīyanti. **Anusayā byantīhontīti** satta anusayā vigatantā paricchinnā parivaṭumā hontī. Evamettha heṭṭhā pañcasu ṭhānesu vipassanā kathitā, imesu pañcasu lokuttaramaggo.

Idāni gāthāhi kūṭaṃ gaṇhanto **byādhidhammātiādīmāha**. Tattha **ñatvā dhammaṃ nirūpadhinti** upadhirahitaṃ arahattamaggaṃ ñatvā. **Sabbe made abhibhosmīti** sabbe ime tayopi made adhibhaviṃ, atikkamma ṭhitosmīti attho. **Nekkhammaṃ daṭṭhu khematoti** pabbajjaṃ khemato disvā. **Tassa me ahu ussāho, nibbānaṃ abhipassatoti** tassa mayhaṃ nibbānaṃ abhipassantassa vāyāmo ahosi. **Anivattīti bhavissāmīti** pabbajjato anivattiko bhavissāmi, brahmacariyavāsato anivattiko, sabbaññutaññāto anivattiko bhavissāmi. **Brahmacariyaparāyaṇoti** maggabrahmacariyaparāyaṇo. Iminā lokuttaro aṭṭhaṅgiko maggo kathitoti.

8. Licchavikumārakasuttavaṇṇanā

58. Aṭṭhame **sajjāni dhanūnīti** sajjīyāni āropitadhanūni. **Addasūti** addasaṃsu. **Bhavissanti vajjīti** vaḍḍhissanti vajjirājāno. **Apānubhāti** avaḍḍhinissitā mānathaddhā. **Pacchāliyaṃ khipantīti** pacchato gantvā piṭṭhiṃ pādena paharanti. **Raṭṭhikassātiādīsu** raṭṭhaṃ bhuñjatīti **raṭṭhiko**. Pitarā dattaṃ sāpateyyaṃ bhuñjatīti **pettaniko**. Senāya pati jeṭṭhakoti **senāpatiko**. **Gāmagāmaṇikassāti** gāmānaṃ gāmaṇikassa, gāmasāmikassāti attho. **Pūgagāmaṇikassāti** gaṇajjeṭṭhakassa. **Kulesūti** tesu tesu kulesu. **Paccekādhiccaṃ kārentīti** paccekam jeṭṭhakaṭṭhānaṃ kārenti. **Kalyāṇena manasā anukampantīti** sundarena cittena anuggaṇhanti. **Khettakammantasāmantasabyohāreti** ye ca attano khettakammantaṇaṃ sāmantaṃ anantarakkhetasāmīno, te ca rajjudandaṇḍehi bhūmippamāṇaggāhake sabbohāre ca. **Balipaṭiggāhikā devatāti** kulappaveṇiyā āgatā ārakkhadevatā. **Sakkarotīti** tā devatā aggayāgubhattādīhi sakkaroti.

Kiccakaroti uppannānaṃ kiccānaṃ kāraṇo. **Ye cassa anujīvinoti** ye ca etaṃ upanissāya jīvanti. **Ubhinnañceva atthāyāti** ubhinnaṃpi hitatthāya paṭipanno hotīti attho. **Pubbapetānanti** paralokagatānaṃ. **Diṭṭhe dhamme ca jīvatanti** ye ca diṭṭhe dhamme jīvanti. Iti padadvayenāpi atītapaccuppanne ñātayo dasseti. **Vittisañjananoti** tuṭṭhijanaṇo. **Gharamāvasanti** gharāvāsaṃ vasanto. **Pujjo hoti pasamsiyoti** pūjetabbo ca pasamsitabbo ca hotīti.

9-10. Vuḍḍhapabbajitasuttadvayavaṇṇanā

59-60. Navame **nipuṇoti** saṅho sukhumakāraṇaññū. **Ākappasampannoti** samaṇākappena sampanno. Dasame **padakkhiṇaggāhīti** dinnovādaṃ padakkhiṇato gaṇhanto. Sesam sabbattha uttānamevāti.

Nīvaraṇavaggo paṭhamo.

(7) 2. Saññāvaggo

1-2. Saññāsuttadvayaṇṇanā

61-62. Dutiyassa paṭhame **mahapphalā**ti vipākaphalena mahapphalā. Vipākānisamseneva **mahānisamsā. Amatogadhā**ti nibbānapatiṭṭhā. **Sabbaloke anabhiratisaññā**ti sabbasmim̐ tedhātusannivese loke ukkaṇṭhitassa uppajjanakasaññā. Dutiyam̐ uttānatthameva.

3-4. Vaḍḍhasuttadvayaṇṇanā

63-64. Tatiye **varādāyī**ti uttamassa varassa ādāyako. Sesamettha catutthe ca uttānatthamevāti.

5. Sākacchasuttavaṇṇanā

65. Pañcame **alaṃsākaccho**ti sākacchāya yutto. **Āgataṃ pañhanti** pucchitaṃ pañhaṃ. **Byākattā hotī**ti vissajjitā hoti.

6. Sājīvasuttavaṇṇanā

66. Chaṭṭhe **alaṃsājīvoti** sājīvāya yutto. **Sājīvoti** pañhapucchanañceva pañhavissajjanañca. Sabbepi hi sabrahmacārino pañhaṃ upajīvanti, tenetaṃ pañhapucchanaṃvissajjanaṃ samānājīvatāya sājīvoti vuttaṃ. **Kataṃ pañhanti** abhisāṅkhatam̐ pañhaṃ.

7-10. Paṭhamaidhipādasuttādivaṇṇanā

67-70. Sattame **ussoḷhī**ti adhimattavīriyam̐. Aṭṭhame attano bodhimaṇḍe paṭividdhe āgamaṇaidhipāde kathetvā upari attanova cha abhiññā kathesīti. Navamadasamesu vipassanā kathitā. Sesam̐ sabbattha uttānamevāti.

Saññāvaggo dutiyo.

(8) 3. Yodhājīvavaggo

1. Paṭhamacetovimutti phalasuttavaṇṇanā

71. Tatiyassa paṭhame **yato kho, bhikkhavi**ti heṭṭhā vuttanayena vipassanam̐ vaḍḍhetvā arahattam̐ pattassa bhikkhuno idāni vaṇṇabhaṇanattam̐ idam̐ āraddham̐. Tattha **yato khoti** yadā kho. **Ukkhittapalighoti** avijjāpaligham̐ ukkhipitvā apanetvā ṭhito. **Samkiṇṇaparikhoti** saṃsāraparikham̐ saṃkirivā vināsetvā ṭhito. **Abbūḷhesikoti** taṇhāsāṅkhātam̐ esikāthambham̐ abbuyha luñcitvā ṭhito. **Niraggaḷoti** nīvaraṇakavāṭam̐ ugghāṭetvā ṭhito. **Pannaddhajo pannabhāro**ti mānaddhajañca khandhābhisaṅkhārakilesabhārañca pātetvā otāretvā ṭhito. **Visaṃyuttoti** vaṭṭena visaṃyutto. Sesam̐ pālinayeneva veditabbam̐. Ettāvatā bhagavatā maggena kilese khepetvā nirodhasayanavaragatassa nibbānārammaṇam̐ phalasaṃpattim̐ appetvā viharato khīṇāsavassa kālo dassito.

Yathā hi dve nagarāni ekaṃ coranagaraṃ ekaṃ khemanagaraṃ. Atha ekassa mahāyodhassa evam̐ bhaveyya – “yāvimaṃ coranagaraṃ tiṭṭhati, tāva khemanagaraṃ bhayato na muccati, coranagaraṃ anagaraṃ karissāmī”ti sannāham̐ katvā khaggaṃ gahetvā coranagaraṃ upasaṅkamitvā nagaradvāre ussāpīte esikāthambhe khaggena chinditvā saddhim̐ dvārabāhāhi kavāṭam̐ bhinditvā paligham̐ ukkhipitvā pākāram̐ bhinditvā parikhāṃ vikiritvā nagarasobhatthāya ussite dhaje pātetvā nagaram̐ agginā jhāpetvā

khemanagaraṃ pavisitvā pāsādaṃ āruyha ñātigaṇaparivuto surasabhojanaṃ bhuñjeyya. Evaṃ coranagaraṃ viya sakkāyo, khemanagaraṃ viya nibbānaṃ, mahāyodho viya yogāvācaro. Tassevaṃ hoti – “yāva sakkāyavaṭṭaṃ vaṭṭati, tāva dvattiṃsakammakāraṇāatṭhanavutirogapañcavīsati mahābhayehi parimuccanaṃ natthī”ti. So mahāyodho sannāhaṃ viya sīlasannāhaṃ katvā paññākhaggaṃ gahetvā khaggena esikāthambhe viya arahattamaggena tañhesikaṃ luñcivā, so yodho sadvārabāhakaṃ nagarakavāṭaṃ viya pañcorambhāgiyasamyojanaaggaḷaṃ ugghāṭetvā, so yodho palighaṃ viya avijjāpalighaṃ ukkhipivā, so yodho pākāraṃ bhindanto parikhaṃ viya kammābhisankhāraṃ bhindanto jātiṣaṃsāraparikhaṃ vikiritvā, so yodho nagaraṃ sobhatthāya ussāpitaddhaje viya mānaddhaje pātetvā sakkāyanagaraṃ jhāpetvā, so yodho khemanagare uparipāsāde subhojanaṃ viya kilesapariniḃbānagaraṃ pavisitvā amataṃ nirodhārammaṇaṃ phalasaṃpattisukhaṃ anubhavamāno kālaṃ vītināmeti.

2. Dutiyacetovimuttiphalasuttavaṇṇanā

72. Dutīye **aniccasaññā**ti khandhapañcakaṃ hutvā abhāvākārena aniccanti uppajjanakasaññā. **Anicce dukkhasaññā**ti yadaniccaṃ, taṃ paṭipīḷanākārena dukkhanti uppajjanakasaññā. **Dukkhe anattasaññā**ti yaṃ dukkhaṃ, taṃ avasavattanākārena anattāti uppajjanakasaññā. Sesāṃ heṭṭhā vuttanāyameva. Imesu pana dvīsūpi suttesu vipassanāphalaṃ nāma kathitanti.

3. Paṭhamadhammavīhārīsuttavaṇṇanā

73. Tatiye **divasaṃ atināmetī**ti divasaṃ atikkāmeti. **Riñcati paṭisallānanti** ekībhāvaṃ vissajjeti. **Desetī**ti katheti pakāseti. **Dhammapaññattiyā**ti dhammassa paññāpanāya. **Dhammaṃ pariyāpuṇātī**ti navaṅgavasena catusaccadhammaṃ pariyāpuṇātī vaḷaṅjeti katheti. **Na riñcati paṭisallānanti** ekībhāvaṃ na vissajjeti. **Anuyūjati ajjhataṃ cetosamathanti** niyakajjhatte cittasaṃādhiṃ āsevati bhāveti, samathakammaṭṭhāne yuttappayutto hoti.

Hitesināti hitaṃ esantena. **Anukampakenā**ti anukampamānena. **Anukampaṃ upādāyā**ti anukampaṃ cittena pariggahetvā, paṭiccatīpi vuttaṃ hoti. **Kataṃ vo taṃ mayā**ti taṃ mayā ime pañca puggale desentena tumhākaṃ kataṃ. Ettakameva hi anukampakassa satthu kiccaṃ yadidaṃ aviparītadhammadesanā, ito paraṃ pana paṭipatti nāma sāvakanāṃ kiccaṃ. Tenāha – **etāni bhikkhu rukkhāmūlāni...pe... amhākaṃ anusāsanī**ti. Tattha ca **rukkhāmūlānī**ti iminā rukkhāmūlasenāsanāṃ dasseti. **Suññāgārānī**ti iminā janavivittaṭṭhānaṃ. Ubhayenāpi ca yogānurūpaṃ senāsanamācikkhati, dāyajjaṃ niyyātetī. **Jhāyathā**ti ārammaṇūpanijjhānena aṭṭhatimārammaṇāni, lakkhaṇūpanijjhānena ca aniccādīto khandhāyatanādīni upanijjhāyatha, samathañca vipassanañca vaḍḍhethāti vuttaṃ hoti. **Mā pamādatthā**ti mā pamajjittha. **Mā pacchā vippaṭisārino ahuvatthā**ti ye hi pubbe daharakāle ārogyakāle sattaṣappāyādisampattikāle satthu sammukhībhāvakāle ca yonisomanasikāravirahitā rattindivaṃ maṅkulabhāṭṭā hutvā seyyasukhamiddhasukhamanuyuttā pamajjanti, te pacchā jarākāle rogakāle maraṇakāle vipattikāle satthu parinibbānakāle ca taṃ pubbe pamādavīhāraṃ anussarantā sappaṭisandhikālakiriyañca bhāriyaṃ sampassamānā vippaṭisārino honti. Tumhe pana tādisā mā ahuvatthāti etamatthaṃ dassento āha – “mā pacchā vippaṭisārino ahuvatthā”ti. **Ayaṃ vo amhākaṃ anusāsanī**ti ayaṃ amhākaṃ santikā “jhāyatha mā pamādatthā”ti tumhākaṃ anusāsanī, ovādoti vuttaṃ hoti.

4. Dutiyadhammavīhārīsuttavaṇṇanā

74. Catutthe **uttari cassa paññāya atthaṃ nappajānātī**ti tato pariyattito uttari tassa dhammassa sahavipassanāya maggapaññāya atthaṃ nappajānātī, cattāri saccāni na passati nappaṭivijjhatīti attho. Sesavāresupi eseva nayo. Evametesu dvīsūpi suttesu bahussutabhikkhu vipassanākammiko sotāpanno sakadāgāmī anāgāmī khīṇāsavoti cha janā dhammavīhārino nāmāti veditabbā.

5. Paṭhamayodhājīvasuttavaṇṇanā

75. Pañcame **yodhājīvā**ti yuddhūpajīvino. **Rajagganti** hatthiassādīnaṃ pādappahārabhinnāya bhūmiyā uggataṃ rajakkhandhaṃ. **Na santhambhatī**ti santhambhitvā ṭhātuṃ na sakkoti. **Sahati rajagganti** rajakkhandhaṃ disvāpi adhivāseti. **Dhajagganti** hatthiassādīnaṃ piṭṭhesu vā rathesu vā ussāpitānaṃ dhajānaṃ aggaṃ. **Ussāraṇanti** hatthiassarathānañceva balakāyassa ca uccāsaddamahāsaddaṃ. **Sampahāreti** samāgate appamattakepi pahāre. **Haññatī**ti vihaññati vighātaṃ āpajjati. **Byāpajjati** vipattiṃ āpajjati, pakatibhāvaṃ jahati. **Sahati sampahāranti** dve tayo pahāre patvāpi sahati adhivāseti. **Tameva saṅgāmasīsanti** taṃyeva jayakkhandhāvāraṭṭhānaṃ. **Ajjhāvasatī**ti sattāhamattaṃ abhibhavivā āvasati. Kiṃ kāraṇā? Laddhapahārānaṃ pahārajagganattañceva katakammānaṃ viśesaṃ ñatvā ṭhānantaradānattañca issariyasukhānubhavanattañca.

Idāni yasmā satthu yodhājīvehi kiccaṃ natthi, imasmiṃ pana sāsane tathārūpe pañca puggale dassetuṃ idaṃ opammaṃ ābhaṭaṃ. Tasmā te puggale dassento **evameva khoti**ādīmāha. Tattha **samsīdatī**ti micchāvitakkasmiṃ samsīdati anuppavisati. **Na sakkoti brahmacariyaṃ sandhāretu**nti brahmacariyavāsaṃ anupacchijjamaṇaṃ gopetuṃ na sakkoti. **Sikkhādubbalyaṃ āvikatvā**ti sikkhāya dubbalabhāvaṃ pakāsetvā. **Kimassa rajaggasminti** kiṃ tassa puggalassa rajaggaṃ nāmāti vadati. **Abhirūpā**ti abhirūpavati. **Dassanīyā**ti dassanayoggā. **Pāsādikā**ti dassaneneva cittappasādāvahā. **Paramāyā**ti uttamāya. **Vaṇṇapokkharatāyā**ti sarīravaṇṇena ceva aṅgasaṅṭhānena ca. **Ūhasatī**ti avahasati. **Ullapatī**ti katheti. **Ujjhagghatī**ti pāṇiṃ paharivā mahāhasitaṃ hasati. **Uppaṇḍetī**ti uppaṇḍanakathaṃ katheti. **Abhinisīdatī**ti abhibhavivā santike vā ekāsane vā nisīdati. Dutiyapadepi eseva nayo. **Ajjhottharatī**ti avattharati. **Vinivethetvā vinimocetvā**ti gahitaṭṭhānato tassā hatthaṃ vinibbethetvā ceva mocetvā ca. Sesametta uttānatthamevāti. Imasmiṃ sutte vaṭṭavivaṭṭaṃ kathitaṃ.

6. Dutiyayodhājīvasuttavaṇṇanā

76. Chaṭṭhe **asicammaṃ gahetvā**ti asiñca cammañca gahetvā. **Dhanukalāpaṃ sannayhitvā**ti dhanuñca sarakalāpañca sannayhitvā. **Viyūlhanti** yuddhasannivesavesena ṭhitaṃ. **Saṅgāmaṃ otaratī**ti mahāyuddhaṃ otarati. **Ussahati vāyamatī**ti ussāhañca vāyamañca karoti. **Hanantī**ti ghātentī. **Pariyāpādentī**ti pariyāpādayanti. **Upalikkhantī**ti vijjhanti. **Apanentī**ti sakasenaṃ gahetvā gacchantī. **Apanetvā ñātakānaṃ nentī**ti sakasenaṃ netvā tato ñātakānaṃ santikaṃ nenti. **Niyamānoti** attano gehaṃ vā sesaññāntisantikāṃ vā niyyamāno. **Upaṭṭhahanti paricarantī**ti pahārasodhanavaṇṇakappanādīni karontā jagganti gopayanti.

Arakkhiteneva kāyenāti arakkhitena kāyadvārena. **Arakkhitāya vācāyā**ti arakkhitena vacīdvārena. **Arakkhitena cittenā**ti arakkhitena manodvārena. **Anupaṭṭhitāya satiyā**ti satim supaṭṭhitaṃ akatvā. **Asaṃvutehi indriyehī**ti manacchaṭṭhehi indriyehi apihitehi agopitehi. **Rāgo cittaṃ anuddhamsetī**ti rāgo uppajjamānova samathavipassanācittaṃ dhamseti, dūre khipati. **Rāgapariyutthomhi, āvuso, rāgaparetoti** ahaṃ, āvuso, rāgena ratto, rāgena anugato.

Aṭṭhikaṅkalūpamātiādīsu **aṭṭhikaṅkalūpamā** appassādaṭṭhena. **Maṃsapesūpamā** bahuśādhāraṇaṭṭhena. **Tiṇukkūpamā** anudhanaṭṭhena. **Aṅgārakāsūpamā** mahābhitaṭṭhena. **Supinakūpamā** ittarapaccupaṭṭhānaṭṭhena. **Yācitakūpamā** tāvakālikaṭṭhena. **Rukkhaphalūpamā** sabbaṅgapaccāṅgalibhañjanaṭṭhena. **Asisūnūpamā** adhikuṭṭanaṭṭhena. **Sattisūlūpamā** vinivijjhanaṭṭhena. **Sappasirūpamā** sāsankasappaṭibhayaṭṭhena. **Ussahissāmī**ti ussāhaṃ karissāmi. **Dhārayissāmī**ti samaṇabhāvaṃ dhārayissāmi. **Abhiramissāmī**ti abhiraṭṭiṃ uppādessāmi na ukkaṇṭhissāmi. Sesametta uttānatthameva. Imasmiṃ sutte vaṭṭavivaṭṭaṃ kathitanti.

7. Paṭhamaanāgatabhayasuttavaṇṇanā

77. Sattame **āraññakenā**ti araññavāsīnā. **Appattassā**ti asampattassa

jhānavipassanāmaggaphalappabhedassa visesassa pattiyā. Sesapadesupi eseva nayo. **So mamassa antarāyoti** so mama jīvitantarāyo ca brahmacariyantarāyo ca, puthujjanakālakiriyaṃ karontassa saggantarāyo ca maggantarāyo ca bhaveyya. **Handāti** vavassagatthe nipāto. **Vīriyaṃ ārabhāmīti** duvidhampi vīriyaṃ karomi. **Satthakāti** satthaṃ viya sandhibandhanacchedakavātā. **Vālehi** kakkhaḷehi. **Māṇavehīti** corehi. **Katakammehi vā akatakammehi vāti** ettha corikaṃ katvā nikkhantā katakammā nāma, corikaṃ kātuṃ gacchantā akatakammā nāma. Tattha katakammā kammaṃ nippahantā sattānaṃ galalohitaṃ gahetvā devatānaṃ baliṃ karonti, akatakammā “evaṃ no kammaṃ nippahajjissatī”ti paṭhamataraṃ karonti. Idaṃ sandhāya **te maṃ jīvitā voropeyyunti** vuttaṃ. **Vāḷā amanussāti** kakkhaḷā duṭṭhā yakkhādayo amanussā.

8. Dutiyānāgatabhayasuttavaṇṇanā

78. Aṭṭhame **purā maṃ so dhammo āgacchatīti** yāva so dhammo maṃ na upagacchati, tāva ahaṃ puretameva vīriyaṃ ārabhāmīti attho. **Khīrodakābhūtāti** khīrodakaṃ viya bhūtā ekābhāvaṃ upagatā. **Piyacakkhūhīti** mettacakkhūhi.

9. Tatiyānāgatabhayasuttavaṇṇanā

79. Navame **dhammasandosā vinayasandosoti** dhammasandosena vinayasandoso hoti. Kathaṃ pana dhammasmiṃ dussante vinayo dussati nāma? Samathavipassanādhammesu gabbhaṃ aggaṇhantesu pañcavidho vinayo na hoti, evaṃ dhamme dussante vinayo dussati. Dussīlassa pana saṃvaravinayo nāma na hoti, tasmīṃ asati samathavipassanā gabbhaṃ na gaṇhāti. Evaṃ vinayasandosenaṃ dhammasandosō vedītabbo. **Abhidhammakathanti** silādiuttamadhammakathaṃ. **Vedallakathanti** vedapaṭisaṃyuttaṃ ñāṇamissakakathaṃ. **Kaṇhadhammaṃ okkamamānāti** randhagavesitāya upārambhapariyesanavasena kālakadhammaṃ okkamamānā. Apica duṭṭhacittena puggalaṃ ghaṭṭentāpi taṃ kaṇhadhammaṃ attano dahantāpi lābhasakkāratthaṃ kathentāpi kaṇhadhammaṃ okkamantiyeva.

Gambhīrāti pāḷigambhīrā. **Gambhīratthāti** atthagambhīrā. **Lokuttarāti** lokuttaradhammadīpakā. **Suññatāpaṭisaṃyuttāti** khandhadhātuāyatanapaccayākārapaṭisaṃyuttā. **Na aññā cittaṃ upaṭṭhapessantīti** jānanatthāya cittaṃ na ṭhapessanti. **Uggahetabbaṃ pariyāpuṇitabbanti** uggahetabbe ca vaḷañjetabbe ca. **Kavitāti** silokādibandhanavasena kavīhi katā. **Kāveyyāti** tasseva vevacanaṃ. **Bāhirakāti** sāsanato bahiddhā ṭhitā. **Sāvakabhāsītāti** bāhiraśāvakehi bhāsītā. Sesamettha heṭṭhā vuttanayattā suviññeyyattā ca uttānatthameva.

10. Catutthānāgatabhayasuttavaṇṇanā

80. Dasame **kalyāṇakāmāti** sundarakāmā. **Rasaggānīti** uttamarasāni. **Saṃsaṭṭhā viharissantīti** pañcavidhena saṃsaggena saṃsaṭṭhā viharissanti. **Sannidhikāraparibhoganti** sannidhikatassa paribhogaṃ. **Oḷārikampi nimittanti** ettha pathaviṃ khaṇantopi khaṇāhīti āṇāpentopi pathaviyaṃ oḷārikaṃ nimittaṃ karoti nāma. Tiṇakaṭṭhasākhāpalāsaṃ chindantopi chindāti āṇāpentopi haritagge oḷārikaṃ nimittaṃ karoti nāma. Ājīvatthāya paṇṇanivāpaādīni gāhāpento phalāni ocinante vā ocināpentena vattabbameva natthī. Imesu catūsu suttesu satthārā sāsaṇe vuddhiparihāni kathitāti.

Yodhājīvavaggo tatiyo.

(9) 4. Theravaggo

1. Rajanīyasuttavaṇṇanā

81. Catutthassa paṭhame **rajanīyesūti** rāgassa paccayesu ārammaṇesu. Sesesupi eseva nayo.

2. Vītarāgasuttavaṇṇanā

82. Dutiye **makkhīti** guṇamakkhako. **Paḷāsīti** yugaggāhalakkhaṇena paḷāsena samannāgato.

3. Kuhakasuttavaṇṇanā

83. Tatiye **kuhakoti** tīhi kuhanavatthūhi samannāgato. **Lapakoti** lābhasannissitāya lapanāya samannāgato. **Nemittikoti** nimittakiriyakārako. **Nippesikoti** nippesanakatāya samannāgato. **Lābhena ca lābham nijigīsītāti** lābhena lābhagavesako. Sukkapakkho vuttavipallāsavasena veditabbo. Catuttham uttānameva.

5. Akkhamasuttavaṇṇanā

85. Pañcame **akkhamo hoti rūpānanti** rūpārammaṇaṇaṇam anadhivāsako hoti, tadārammaṇehi rāgādīhi abhibhuyyati. Eseva nayo sabbattha.

6. Paṭisambhidāppattasuttavaṇṇanā

86. Chaṭṭhe **atthapaṭisambhidāppattoti** pañcasu atthesu pabhedagataṃ ñāṇaṃ patto. **Dhammapaṭisambhidāppattoti** catubbidhe dhamme pabhedagataṃ ñāṇaṃ patto. **Niruttipaṭisambhidāppattoti** dhammaniruttīsu pabhedagataṃ ñāṇaṃ patto. **Paṭibhānapaṭisambhidāppattoti** tesu tīsu ñāṇesu pabhedagataṃ ñāṇaṃ patto. So pana tāni tīṇi ñāṇāneva jānāti, na tesam kiccaṃ karoti. **Uccāvacaṇīti** mahantakhuddakāni. **Kiṃkaraṇīyānīti** iti kattabbāni.

7. Sīlavantasuttavaṇṇanā

87. Sattamaṃ uttānatthameva. Sīlaṃ panettha khīṇāsavasīlameva, bāhusaccampi khīṇāsavabāhusaccameva, vācāpi khīṇāsavassa kalyāṇavācāva, jhānānīpi kiriyajjhānāneva kathitānīti veditabbāni.

8. Therasuttavaṇṇanā

88. Aṭṭhame **theroti** thirabhāvappatto. **Rattaññūti** pabbajitadivasato paṭṭhāya atikkantānaṃ bahūnaṃ rattīnaṃ ñātā. **Ñātoti** paññāto pākaṭo. **Yasassīti** yasanissito. **Micchādīṭṭhikoti** ayāthāvadiṭṭhiko. **Saddhammā vuṭṭhāpetvāti** dasakusalakammamapathadhammato vuṭṭhāpetvā. **Asaddhamme patiṭṭhāpetīti** akusalakammamapathesu patiṭṭhāpeti.

9. Paṭhamasekhasuttavaṇṇanā

89. Navame **sekhassāti** sikkhakassa sakaraṇīyassa. **Parihānāyāti** upariguṇehi parihānatthāya. **Kammārāmatāti** navakamme ramanakabhāvo. **Bhassārāmatāti** ālāpasallāpe ramanakabhāvo. **Niddārāmatāti** niddāyane ramanakabhāvo. **Saṅgaṇīkārāmatāti** gaṇasaṅgaṇīkāya ramanakabhāvo. **Yathāvimuttaṃ cittaṃ na paccavekkhatīti** yathā yaṃ cittaṃ vimuttaṃ, ye ca dosā pahīnā, guṇā ca paṭiladdhā, te paccavekkhitvā upariguṇapaṭilābhāya vāyāmaṃ na karotīti attho. Iti imasmiṃ sutte sattanaṃ sekhānaṃ upariguṇehi parihānikāraṇaṇca vuddhikāraṇaṇca kathitaṃ. Yaṅca nāma sekhasa parihānakāraṇaṃ, taṃ puthujjanassa paṭhamameva hotīti.

10. Dutiya-sekhasuttavaṇṇanā

90. Dasame **viyattoti** byatto cheko. **Kimkaraṇīyesūti** iti kattabbesu. **Cetosamathanti** samādhikammaṭṭhānaṃ. **Ananulomikenāti** sāsanaassa ananucchavikena. **Atikālenāti** atipātova. **Atidivāti** divā vuccati majjhanhiko, taṃ atikkamitvā. **Ābhisallekhikāti** ativiya kilesasallekhikā. **Cetovivaraṇasappāyāti** cittavivaraṇasaṅkhātānaṃ samathavipassanānaṃ sappāyā. **Appicchakathāti** appicchā hothāti kathanakathā. **Santuṭṭhikathāti** catūhi paccayehi santuṭṭhā hothāti kathanakathā. **Pavivekakathāti** tīhi vivekehi vivittā hothāti kathanakathā. **Asaṃsaggakathāti** pañcavidhena saṃsaggena asaṃsaṭṭhā hothāti kathanakathā. **Vīriyārambhakathāti** duvidhaṃ vīriyaṃ ārabhathāti kathanakathā. **Sīlakathādīsu** sīlaṃ ārabha kathā sīlakathā. Samādhiṃ ārabha, paññaṃ ārabha, pañcavidhaṃ vimuttiṃ ārabha, ekūnavīsati paccavekkhaṇasaṅkhātānaṃ vimuttiñāṇadassanaṃ ārabha kathā vimuttiñāṇadassanakathā. **Na nikāmalābhīti**ādīsu na icchiticchitalābhī, dukkhalābhī na vipulalābhīti attho. Sesam uttānatthamevāti.

Theravaggo catuttho.

(10) 5. Kakudhavaggo

1-2. Sampadāsuttadvayaṇṇanā

91-92. Pañcamassa paṭhame pañca sampadā missikā kathitā. Dutiye purimā catasso missikā, pañcamī lokikāva.

3. Byākaraṇasuttavaṇṇanā

93. Tatiye **aññābyākaraṇānīti** arahattabyākaraṇāni. **Mandattāti** mandabhāvena aññāṇena. **Momūhattāti** atimūlhabhāvena. **Aññaṃ byākarotīti** arahattaṃ pattosmīti katheti. **Ichhāpakatoti** icchāya abhibhūto. **Adhimānenāti** adhigatamānena. **Sammadevāti** hetunā nayena kāraṇeneva.

4-5. Phāsuvihārasuttādivaṇṇanā

94-95. Catutthe **phāsuvihārāti** sukhavihārā. Pañcame **akuppanti** arahattaṃ.

6. Sutadharasuttavaṇṇanā

96. Chaṭṭhe **appaṭṭhoti** appasamārambho. **Appakiccoti** appakaraṇīyo. **Subharoti** sukkena bharitabbo suposo. **Susantosoti** tīhi santosehi suṭṭhu santoso. **Jīvitaparikkhāresūti** jīvitasambhāresu. **Appāhāroti** mandāhāro. **Anodarikattanti** na odarikabhāvaṃ amahagghasabhāvaṃ anuyutto. **Appamiddhoti** na bahuniddo. Sattamaṭṭhamāni uttānatthāni.

9. Sīhasuttavaṇṇanā

99. Navame **sakkaccaññeva deti no asakkaccanti** anavaññāya avirajjhivāva deti, no avaññāya virajjhivā. **Mā me yoggapatho nassāti** mayā katayoggapatho mayhaṃ mā nassatu, “eko sīho uṭṭhāya biḷāraṃ paharanto virajjhivā paharī”ti evaṃ vattāro mā hontūti attho. **Annabhāranesādānanti** ettha annaṃ vuccati yavabhattaṃ, taṃ bhāro etesanti annabhārā. Yācakānaṃ etaṃ nāmaṃ. Nesādā vuccanti sākuṇikā. Iti sabbapacchimāya koṭiyā etesaṃ yācakanesādānampi sakkaccameva deseti.

10. Kakudhatherasuttavaṇṇanā

100. Dasame **attabhāvapaṭilābhoti** sarīrapaṭilābho. **Dve vā tīni vā māgadhakāni gāmakkhattānīti** ettha māgadhikaṃ gāmakkhattaṃ atthi khuddakaṃ, atthi majjhimāṃ, atthi mahantaṃ.

Khuddakaṃ gāmakkhetaṃ ito cattālisaṃ usabhāni, ito cattālīsanti gāvutaṃ hoti, majjhimaṃ ito gāvutaṃ, ito gāvutanti adḍhayaḍḍhayaṃ hoti, mahantaṃ ito diyaḍḍhayaḍḍhayaṃ, ito diyaḍḍhayaḍḍhayaṃ ito gāvutaṃ hoti. Tesu khuddakena gāmakkhettena tīṇi, khuddakena ca majjhimena ca dve gāmakkhettāni tassa attabhāvo. Tigāvutañhissa sarīraṃ. **Pariharissāmīti** paṭijaggissāmi gopayissāmi. **Rakkhassetanti** rakkhassu etaṃ. **Moghapurisoti** tucchapuriso. **Nāssassāti** na etassa bhavēyya. **Samudācareyyāmāti** kathyeyāma. **Sammannatīti** sammānaṃ karoti. **Yaṃ tuma karissati tumova tena paññāyissatīti** yaṃ esa karissati, esova tena kammena pākaṭo bhavissati. Sesāṃ sabbattha uttānatthamevāti.

Kakudhavaggo pañcama.

Dutiya paṇṇāsakaṃ niṭṭhitaṃ.

3. Tatiya paṇṇāsakaṃ

(11) 1. Phāsuvihāravaggo

1. Sārajjasuttavaṇṇanā

101. Tatiyassa paṭhame **vesārajjakaraṇāti** visāradabhāvāvahā. **Sārajjam hotīti** domanassaṃ hoti.

2. Ussaṅkitasuttavaṇṇanā

102. Dutiye **ussaṅkitaparisaṅkitoti** ussaṅkito ca parisaṅkito ca. **Api akuppadhammopīti** api akuppadhammo khīṇāsavo samānopi parehi pāpabhikkhūhi ussaṅkitaparisaṅkito hotīti attho. **Vesiyāgocaroti** adīsū vesiyā vuccanti rūpūpajīvinīyo, tā gocarō assāti vesiyāgocarō, tāsāṃ gehaṃ abhiṇḥagamanoti attho. Sesapadesupī eseva nayo. Tattha pana **vidhavāti** matapatikā. **Thullakumārikāti** mahallikakumārikāyo.

3. Mahācorasuttavaṇṇanā

103. Tatiye **ito bhogena paṭisantharissāmīti** ito mama sāpateyyato bhogaṃ gahetvā tena paṭisanthāraṃ karissāmi, tassa ca mama ca antaraṃ pidahissāmīti attho. **Gahaṇānīti** parasantakānaṃ bhaṇḍānaṃ gahaṇāni. **Guyhamantāti** guhitabbamantā. **Antaggāhikāyāti** sassataṃ vā ucchedaṃ vā gahetvā ṭhitāya. Sesamettha uttānatthameva. Catutthe sabbam heṭṭhā vuttanayameva.

5. Phāsuvihārasuttavaṇṇanā

105. Pañcame **mettaṃ kāyakammanti** mettacittena pavattitaṃ kāyakammaṃ. **Āvi ceva raho cāti** sammukhe ceva parammukhe ca. Itaresupī eseva nayo. **Yāni tāni sīlānīti** adī catupārisuddhisīlavasena vuttaṃ. **Samādhisaṃvattanikānīti** maggasamādhīphalāsamādhīnībattakāni. **Sīlasāmaññagatoti** samānasīlataṃ gato, ekasādisasīlo hutvāti attho. **Takkarassāti** yo naṃ karoti, tassa. Iti imasmiṃ sutte sīlaṃ missakaṃ kathitaṃ, diṭṭhi vipassanāsammādiṭṭhīti.

6. Ānandasuttavaṇṇanā

106. Chaṭṭhe **no ca paraṃ adhisīle sampavattā hotīti** paraṃ sīlabhāvena na garahati na upavadati. **Attānupekkhīti** attanova katākataṃ jānānavasena attānaṃ anupekkhītā. **No parānupekkhīti** parassa katākatesu abyāvaṭo. **Apaññātoti** apākaṭo appapuñño. **Apaññātakenāti** apaññātabhāvena apākaṭatāya mandapuññatāya. **No paritassatīti** paritāsaṃ nāpajjati. Iti imasmiṃ sutte khīṇāsavova kathito.

7-8. Sīlasuttādivaṇṇanā

107-108. Sattame sīlasamādhipaṇṇā missikā kathitā, vimutti arahattaphalaṃ, vimuttiñānadassanaṃ paccavekkhaṇaṇāṇaṃ lokiyameva. Aṭṭhamepi eseva nayo. Paccavekkhaṇaṇāṇaṃ panettha asekhassa pavattattā asekhanti vuttaṃ.

9-10. Cātuddisasuttādivaṇṇanā

109-110. Navame cātuddisoti catūsu disāsu appaṭihatacāro. Imasmimpi sutte khīṇāsavova kathito. Dasame alanti yutto. Idhāpi khīṇāsavova kathito.

Phāsuvihāravaggo paṭhamo.

(12) 2. Andhakavindavaggo

1. Kulūpakasuttavaṇṇanā

111. Dutiya paṭhame **asanthavavissāsīti** attanā saddhiṃ santhavaṃ akarontesu vissāsaṃ anāpajjantesuyeva vissāsaṃ karoti. **Anissaravikappīti** anissarova samāno “imaṃ detha, imaṃ gaṇhathā”ti issaro viya vikappeti. **Vissatṭhupasevīti** vissatṭhāni bhinnakulāni ghaṭanattāya upasevati. **Upakaṇṇakajappīti** kaṇṇamūle mantāṃ gaṇhāti. Sukkapakkho vuttavipariyāyena veditabbo.

2. Pacchāsamaṇasuttavaṇṇanā

112. Dutiye **pattapariyāpannaṃ na gaṇhātīti** upajjhāye nivattivā ṭhite attano tucchapattaṃ datvā tassa pattaṃ na gaṇhāti, tato vā dīyamānaṃ na gaṇhāti. **Na nivāretīti** idaṃ vacanaṃ āpattivītikamavacanaṃ nāmāti na jānāti. **Ṇatvā vāpi**, “bhante, evarūpaṃ nāma vattaṃ na vaṭṭati”ti na nivāreti. **Kathaṃ opātetīti** tassa kathaṃ bhindivā attano kathaṃ paveseti. **Jaḷoti** jaḍo. **Eḷamūgoti** paggharitaḷamukho. Tatiyaṃ uttānameva.

4. Andhakavindasuttavaṇṇanā

114. Catutthe **sīlavā hoṭhāti** sīlavantā hoṭha. **Ārakkhasatinoti** dvārarakkhikāya satiyā samannāgatā. **Nipakkasatinoti** dvārarakkhanakeneva ṇāṇena samannāgatassatino. **Satārakkhena cetasā samannāgatāti** satārakkhena cittaṇa samannāgatā. **Appabhassāti** appakathā. **Sammādiṭṭhikāti** kammassakatajjhāna-vipassanāmagga-phalavasena pañcavidhāya sammādiṭṭhiyā samannāgatā. Apica paccavekkhaṇaṇāṇampi sammādiṭṭhiyevāti veditabbā.

5. Maccharinīsuttavaṇṇanā

115. Pañcame **āvāsamaccharinīti** āvāsaṃ maccharāyati, tattha aññesaṃ vāsaṃ na sahati. **Kulamaccharinīti** upaṭṭhākakulaṃ maccharāyati, aññesaṃ tattha upasaṅkamaṇaṃ na sahati. **Lābhamaccharinīti** lābhaṃ maccharāyati, aññesaṃ taṃ uppajjantaṃ na sahati. **Vaṇṇamaccharinīti** guṇaṃ maccharāyati, aññesaṃ guṇakathaṃ na sahati. **Dhammamaccharinīti** pariyattidhammaṃ maccharāyati, aññesaṃ dātuṃ na icchati.

6-7. Vaṇṇanāsuttādivaṇṇanā

116-117. Chaṭṭhe **saddhādeyyaṃ vinipātetīti** parehi saddhāya dinnapiṇḍapātato aggaṃ aggaḥetvā parassa deti. Sattame **issukinīti** issāya samannāgatā. Sesāṃ sabbattha uttānamevāti.

Andhakavindavaggo dutiyo.

(13) 3. Gilānavaggo

4. Dutyaupaṭṭhākasuttavaṇṇanā

124. Tatiyassa catutthe **nappaṭibaloti** kāyabalena ca ñāṇabalena ca asamannāgato. **Āmisantaroti** āmisahetuko cīvarādīni paccāsīsamāno.

5-6. Anāyussāsuttadvayavaṇṇanā

125-126. Pañcame **anāyussāti** āyupacchedanā, na āyuvaḍḍhanā. Chatṭhepi eseva nayo.

7. Vapakāsasuttavaṇṇanā

127. Sattame **nālaṃ saṅghamhā vapakāsitunti** saṅghato nikkhamitvā ekako vasitūṃ na yutto. Kāmañesa saṅghamajjhepi vasitūṃ ayuttova asaṅghasobhanatāya, ovādānusāsanippaṭibaddhattā pana nippariyāyeneva saṅghamhā vapakāsitūṃ na yutto. **Alaṃ saṅghamhā vapakāsitunti** cātuddisattā saṅghamhā nikkhamma ekako vasitūṃ yutto, saṅghasobhanatāya pana saṅghepi vasitūṃ yuttoyeva. Aṭṭhamāṃ uttānatthameva.

9. Parikuppasuttavaṇṇanā

129. Navame **apāyikāti** apāyagāmino. **Nerayikāti** nirayagāmino. **Parikuppāti** parikuppanasabhāvā purāṇavaṇṇasadisā. **Atekicchāti** akattabbaparikammā. Dasamaṃ uttānatthamevāti.

Gilānavaggo tatiyo.

(14) 4. Rājavaggo

1. Paṭhamacakkānuvattanasuttavaṇṇanā

131. Catutthassa paṭhame **dhammenāti** dasakusaladhammena. **Cakkanti** āṇacakkaṃ. **Atthaññūti** rajjatthaṃ jānāti. **Dhammaññūti** pavenīdhammaṃ jānāti. **Mattaññūti** daṇḍe vā balamhi vā pamāṇaṃ jānāti. **Kālaññūti** rajjasukhānubhavanakālaṃ, vinicchayakaraṇakālaṃ, janapadacārikākālañca jānāti. **Parisaññūti** ayaṃ parisā khattiyaparisā, ayaṃ brāhmaṇavessasuddasamaṇaparisāti jānāti.

Tathāgatavāre **atthaññūti** pañca atthe jānāti. **Dhammaññūti** cattāro dhamme jānāti. **Mattaññūti** catūsu paccayesu paṭiggahaṇaparibhogamattaṃ jānāti. **Kālaññūti** ayaṃ kālo paṭisallīnassa, ayaṃ samāpattiyā, ayaṃ dhammadesanāya, ayaṃ janapadacārikāyāti evaṃ kālaṃ jānāti. **Parisaññūti** ayaṃ parisā khattiyaparisā...pe... ayaṃ samaṇaparisāti jānāti. **Anuttaranti** navahi lokuttaradhammehi anuttaraṃ. **Dhammacakkanti** seṭṭhacakkaṃ.

2. Dutiyacakkānuvattanasuttavaṇṇanā

132. Dutīye **pitarā pavattitaṃ cakkanti** cakkavattimhi pabbajite vā kālakate vā cakkaratanaṃ sattāhamattaṃ ṭhatvā antaradhāyati, kathamesa taṃ anuppavatteti nāma? Pitu pavenīyaṃ ṭhatvā cakkavattivattaṃ pūretvā cakkavattirajjaṃ kārentopi pitarā pavattitameva anuppavatteti nāma.

3. Dhammarājāsuttavaṇṇanā

133. Tatiyaṃ tikanipāte vuttanayameva. Sevitabbāsevitabbe panettha pacchimapadadvayameva viseso. Tattha sammāājīvo sevitabbo, micchāājīvo na sevitabbo. Sappāyo gāmanigamo sevitabbo, asappāyo na sevitabbo.

4. Yassaṃdisaṃsuttavaṇṇanā

134. Catutthe **ubhatoti** dvīhipi pakkhehi. **Mātito ca pitito cāti** yassa hi mātā khattiyā, mātumātā khattiyā, tassāpi mātā khattiyā. Pitā khattiyō, pitupitā khattiyō, tassāpi pitā khattiyō. So ubhato sujāto mātito ca pitito ca. **Saṃsuddhagahaṇikoti** saṃsuddhāya mātukucchiyā samannāgato. “Samavepākiniyā gahaṇiyā”ti ettha pana kammajatejodhātu gahaṇīti vuccati. **Yāva sattamā pitāmahayugāti** ettha pitupitā pitāmaho, pitāmahassa yugaṃ pitāmahayugaṃ. Yuganti āyuppamāṇaṃ vuccati. Abhilāpamattameva cetam, atthato pana pitāmahoyeva pitāmahayugaṃ. Tato uddham sabbepi pubbapurisā pitāmahaggahaṇeneva gahitā. Evaṃ yāva sattamo puriso, tāva saṃsuddhagahaṇiko, atha vā akkhitto anupakkuṭṭho jātivādenāti dasseti. **Akkhittoti** “apanetha etaṃ, kiṃ iminā”ti evaṃ akkhitto anavakkhitto. **Anupakkuṭṭhoti** na upakkuṭṭho na akkosam vā nindaṃ vā pattapubbo. Kena kāraṇenāti? **Jātivādena**, “itipi hīnajātiko eso”ti evarūpena vacanenāti attho.

Aḍḍhotiādīsu yo koci attano santakena vibhavena aḍḍho hoti. Idha pana na kevalaṃ aḍḍhoyeva, **mahaddhano** mahatā aparimānasaṅkhena dhanena samannāgatoti attho. Pañcakāmaguṇavasena mahantā uḷārā bhogā assāti **mahābhogo**. **Paripuṇṇakosakoṭṭhāgāroti** koso vuccati bhaṇḍāgāraṃ, nidahitvā ṭhapitena dhanena paripuṇṇakoso, dhañña ca paripuṇṇakoṭṭhāgāroti attho. Atha vā catubbidho koso hatthī assā rathā raṭṭhanti, tividham koṭṭhāgāraṃ dhanakoṭṭhāgāraṃ dhaññaakoṭṭhāgāraṃ vatthakoṭṭhāgāraṃ. Tam sabbampi paripuṇṇamassāti paripuṇṇakosakoṭṭhāgāro. **Assavāyāti** kassaci bahumpi dhanam dentassa senā na suṇāti, sā anassavā nāma hoti. Kassaci adentassāpi suṇātiyeva, ayam assavā nāma. **Ovādapāṭikarāyāti** “idaṃ vo kattabba, idaṃ na kattabba”nti dinnaovādarkarāya. **Paṇḍitoti** paṇḍiccena samannāgato. **Byattoti** paññāveyyattiyena yutto. **Medhāvīti** ṭhānuppattikapaññāya samannāgato. **Paṭibhaloti** samattho. **Atthe cintetunti** vaḍḍhiatthe cintetuṃ. So hi paccuppannaatthavaseneva “atītepi evaṃ ahesuṃ, anāgatepi evaṃ bhavissanti”ti cinteti. **Vijitāvīnanti** vijitavijayānaṃ, mahantena vā vijayena samannāgatānaṃ. **Vimuttacittānanti** pañcahi vimuttihi vimuttamānasānaṃ.

5-6. Patthanāsuttadvayaṇṇanā

135-136. Pañcame **negamajānapadassāti** nigamavāsino ca raṭṭhavāsino ca janassa. **Hatthiminti**ādīhi hatthiassarathatharudhanulekhamuddāgaṇanādīni soḷasa mahāsippāni dassitāni. **Anavayoti** samattho paripuṇṇo. Sesamettha heṭṭhā vuttanayeneva veditabbaṃ. Chaṭṭhe **oparajjanti** uparājabhāvaṃ.

7. Appaṃsupatisuttavaṇṇanā

137. Sattame **purisādhippāyāti** assaddhammavasena purise uppannādhippāyā purisajjhāsaya. **Ādānādhippāyoti** idāni gahetuṃ sakkhissāmi, idāni sakkhissāmīti evaṃ gahaṇādhippāyo. **Visaṃyogādhippāyoti** idāni nibbānaṃ pāpuṇissāmi, idāni pāpuṇissāmīti evaṃ nibbānajjhāsayo.

8. Bhattādakasuttavaṇṇanā

138. Aṭṭhame **bhattādakoti** bhattakkhādako, bahubbhattabhuñjoti attho. **Okāsapharaṇoti** okāsaṃ pharivā aññesaṃ sambādham katvā ṭhānena okāsapharaṇo. Tattha tattha laṇḍaṃ sāreti pātetīti

laṅḍasāraṇo. Ettakā hatthīti gaṇanakāle salākaṃ gaṇhātīti **salākaggāhī.** Nisīdanasayanavasena mañcapīṭhaṃ maddatīti **mañcapīṭhamaddano.** Bhikkhugaṇanakāle salākaṃ gaṇhātīti **salākaggāhī.**

9. Akkhamasuttavaṇṇanā

139. Navame **hatthikāyanti** hatthighaṭaṃ. Sesesupi eseve nayo. Saṅgāme avacarantīti **saṅgāmāvacarā.** **Ekissā vā tiṇodakadattiyā vimānitoti** ekadivasam ekena tiṇodakadānena vimānito, ekadivasamattaṃ aladdhatiṇodakoti attho. Ito parampi eseve nayo. **Na sakkoti cittaṃ samādahitunti** ārammaṇe cittaṃ sammā ṭhapetum na sakkoti. Sesamettha uttānameva. Imasmim̐ pana sutte vaṭṭavivaṭṭaṃ kathitanti veditabbaṃ.

10. Sotasuttavaṇṇanā

140. Dasame **duruttānanti** na suṭṭhu vuttānaṃ dosavasena pavattitānaṃ pharusavacanānaṃ. **Durāgatānanti** dukkhuppādanākārena sotadvāraṃ āgatānaṃ. **Vacanapathānanti** vacanānaṃ. **Dukkānanti** dukkhamānaṃ. **Tibbānanti** bahalānaṃ tāpanasabhāvānaṃ vā. **Kharānanti** pharusānaṃ. **Kaṭukānanti** tikhiṇānaṃ. **Asātānanti** amadhurānaṃ. **Amanāpānanti** manam̐ appāyitum vaḍḍhetum asamattānaṃ. **Pāṇaharānanti** jīvitarānaṃ. **Yā sā disāti** sabbasaṅkhārasamathādivasena dissati apadissatīti nibbānaṃ disāti veditabbaṃ. Yasmā pana taṃ āgamma sabbe saṅkhārā samathaṃ gacchanti, tasmā **sabbasaṅkhārasamathoti** vuttaṃ. Sesam̐ sabbattha uttānameva. Imasmim̐ pana sutte silāsamādhīpaññā missikā kathitāti.

Rājavaggo catuttho.

(15) 5. Tikaṇḍakīvaggo

1. Avajānātisuttavaṇṇanā

141. Pañcamassa paṭhame **saṃvāsenāti** ekatovāsena. **Ādeyyamukhoti** ādiyanamukho, gahaṇamukhoti attho. **Tamaṇaṃ datvā avajānātīti** “ayaṃ dinnam̐ paṭiggahetumeva jānātī”ti evaṃ avamaññāti. **Tamaṇaṃ saṃvāsenā avajānātīti** appamattake kismiñcīdeva kujjhītvā “jānāmahaṃ tayā katakammaṃ, ettakaṃ addhānaṃ ahaṃ kiṃ karonto vasiṃ, nanu tuyhameva katākataṃ vīmaṃsanto”tiādīni vattā hoti. Atha itaro “addhā koci mayhaṃ doso bhavissatī”ti kiñci paṭippharitam̐ na sakkoti. **Taṃ khippaññeva adhimuccitā hotīti** taṃ vaṇṇam̐ vā avaṇṇam̐ vā sīghameva saddahati. Saddahanaṭṭhena hi ādānena esa ādiyanamukhoti vutto. **Ādheyyamukhoti** pāliyaṃ pana ṭhapitamukhoti attho. Magge khaṭṭāvāto viya āgatāgataṃ udakaṃ vaṇṇam̐ vā avaṇṇam̐ vā saddahanavasena sampaṭicchitum̐ ṭhapitamukhoti vuttaṃ hoti.

Ittarasaddhoti parittakasaddho. **Kusalākusale dhamme na jānātīti**ādīsu kusale dhamme “ime kusalā”ti na jānāti, akusale dhamme “ime akusalā”ti na jānāti. Tathā sāvajje sadosadhamme “ime sāvajjā”ti, anavajje ca niddosadhamme “ime anavajjā”ti, hīne hīnāti, paṇīte paṇītāti. **Kaṇhasukkasappaṭibhāgeti** “ime kaṇhā sukke paṭibāhetvā ṭhitattā sappaṭibhāgā nāma, ime ca sukkā kaṇhe paṭibāhitvā ṭhitattā sappaṭibhāgā”ti na jānāti.

2. Ārabhatissuttavaṇṇanā

142. Dutīye **ārabhati ca vippaṭisārī ca hotīti** āpattivītikkamanavasena ārabhati ceva, tappaccayā ca vippaṭisārī hoti. **Cetovimuttim̐ paññāvimuttinti** arahattasamādhīnceva arahattaphalaññaṇaṃ. **Nappa jānātīti** anadhigatattā na jānāti. **Ārabhati na vippaṭisārī hotīti** āpattim̐ āpajjati, vuṭṭhitattā pana na vippaṭisārī hoti. **Nārabhati vippaṭisārī hotīti** sakim̐ āpattim̐ āpajjitvā tato vuṭṭhāya pacchā kiñcāpi

nāpajjati, vippaṭisāraṃ pana vinodetuṃ na sakkoti. **Nārabhati na vippaṭisārī hotīti** na ceva āpattiṃ āpajjati, na ca vippaṭisārī hoti. **Tañca cetovimuttiṃ...pe... nirujjhantīti** arahattaṃ pana appatto hoti. Pañcamanayena khīṇāsavo kathito.

Ārambhajāti āpattivītikkamasambhavā. **Vippaṭisārajāti** vippaṭisārato jātā. **Pavaḍḍhantīti** punappunaṃ uppajjanena vaḍḍhanti. **Ārambhaje āsave pahāyāti** vītikkamasambhave āsave āpattidesanāya vā āpattivuṭṭhānena vā pajahitvā. **Paṭivinodetvāti** suddhante ʘhitabhāvapaccavekkhaṇena nīharitvā. **Cittaṃ paññañca bhāvetūti** vipassanācittañca taṃsampayuttaṃ paññañca bhāvetu. Sesam iminā upāyeneva veditabbanti.

3. Sārandadasuttavaṇṇanā

143. Tatiye **kāmādhimuttānanti** vatthukāmakilesakāmesu adhimuttānaṃ. **Dhammānudhammapaṭipanno**ti navalokuttaradhammatthāya sahasīlakaṃ pubbhāgappaṭipadaṃ paṭipanno paṭipattipūraako puggalo dullabho lokasmiṃ.

4. Tikaṇḍakīsuttavaṇṇanā

144. Catutthe **appaṭikūleti** appaṭikūlārammaṇe. **Paṭikūlasaññīti** paṭikūlanti evaṃsaññī. Esa nayo sabbattha. Kathaṃ panāyaṃ evaṃ viharatīti? Itthasmiṃ vatthusmiṃ pana asubhāya vā pharati, aniccato vā upasaṃharati. Evaṃ tāva appaṭikūle paṭikūlasaññī viharati. Anitthasmiṃ vatthusmiṃ mettāya vā pharati, dhātuto vā upasaṃharati. Evaṃ paṭikūle appaṭikūlasaññī viharati. Ubhayasmiṃ pana purimanayassa ca pacchimanayassa ca vasena tatiyacatutthavārā vuttā, chaḷaṅgupekkhāvasena pañcama. Chaḷaṅgupekkhā cesā khīṇāsavassa upekkhāsadisā, na pana khīṇāsavupekkhā. Tattha **upekkhako vihareyyāti** majjhatabhāve ʘhito vihareyya. **Kvacanīti** kismiñci ārammaṇe. **Katthacīti** kismiñci padese. **Kiñcanati** koci appamattakopi. Iti imasmiṃ sutte pañcasu ʘhānesu vipassanāva kathitā. Taṃ āradhaviṃpassako bhikkhu kātuṃ sakkoti, ñāṇavā paññuttaro bahussutasamaṇopi kātuṃ sakkoti. Soṭāpannasakadāgāmiānāgāmino kātuṃ sakkontiyeva, khīṇāsave vattabbameva natthīti. Pañcamaṃ uttānameva.

6. Mittasuttavaṇṇanā

146. Chaṭṭhe **kammantaṃ kāretīti** khettādikammantaṃ kāretī. **Adhikaraṇaṃ ādiyatīti** cattāri adhikaraṇāni ādiyati. **Pāmokkhesu bhikkhūsūti** disāpāmokkhesu bhikkhūsū. **Paṭiviruddho hotīti** paccanīkaggāhitāya viruddho hoti. **Anavatthacārikanti** anavatthānacārikaṃ.

7. Asappurisadānasuttavaṇṇanā

147. Sattame **asakkaccaṃ detīti** na sakkaritvā sucim katvā deti. **Acittikatvā detīti** acittikārena agāravavasena deti. **Apaviddhaṃ detīti** na nirantaraṃ deti, atha vā chaḍḍetukāmo viya deti. **Anāgamanadiṭṭhiko detīti** katassa nāma phalaṃ āgamiṣṣatīti na evaṃ āgamanadiṭṭhim na uppādetvā deti.

Sukkapakkhe **cittikatvā detīti** deyyadhamme ca dakkhiṇeyyesu ca cittikāraṃ upaṭṭhapetvā deti. Tattha deyyadhammaṃ paṇītaṃ ojavantaṃ katvā dento deyyadhamme cittikāraṃ upaṭṭhapeti nāma. Puggalaṃ vicinitvā dento dakkhiṇeyyesu cittikāraṃ upaṭṭhapeti nāma. **Sahatthā detīti** āṇattiyā parahatthena adatvā “anamatagge saṃsāre vicarantena me hatthapādānaṃ aladdhakālassa pamāṇaṃ nāma natthi, vaṭṭamokkhaṃ bhavanissaraṇaṃ karissāmi”ti sahattheneva deti. **Āgamanadiṭṭhikoti** “anāgatabhavassa paccayo bhavissatī”ti kammañca vipākañca saddahitvā detīti.

8. Sappurisdānasuttavaṇṇanā

148. Aṭṭhame **saddhāyāti** dānañca dānaphalañca saddahitvā. **Kālenāti** yuttappattakālena. **Anaggahitacittoti** aggahitacitto muttacāgo hutvā. **Anupahaccāti** anupaghātetvā guṇe amakkhetvā. **Kālāgatā cassa atthā pacurā hontīti** atthā āgacchamānā vayovuḍḍhakāle anāgantvā yuttappattakāle paṭhamavayasmimyeva āgacchanti ceva bahū ca honti.

9. Paṭhamasamayavimuttasuttavaṇṇanā

149. Navame **samayavimuttassāti** appitappitakkhaṇeyeva vikkhambhitehi kilesehi vimuttattā samayavimuttisañkhātāya lokiyavimuttiyā vimuttacittassa. Dasamaṃ uttānatthameva.

Tikaṇḍakāvaggo pañcamaṃ.

Tatīyapaṇṇāsakaṃ niṭṭhitam.

4. Catutthapaṇṇāsakaṃ

(16) 1. Saddhammavaggo

1. Paṭhamasammattaniyāmasuttavaṇṇanā

151. Catutthassa paṭhame **abhabbo niyāmaṃ okkamituṃ kusalesu dhammesu sammattanti** kusalesu dhammesu sammattabhūtaṃ magganiyāmaṃ okkamituṃ abhabbo abhājanaṃ. **Kathaṃ paribhotīti**ādāsu ‘kiṃ kathā nāma esā’ ti vadanto **kathaṃ paribhoti** nāma. ‘Kiṃ nāmesa katheti, kiṃ ayaṃ jānāti’ ti vadanto **kathikaṃ paribhoti** nāma. ‘Mayaṃ kiṃ jānāma, kuto amhākaṃ etaṃ sotuṃ bala’ nti vadanto **attānaṃ paribhoti** nāma. Vipariyāyena sukkapakkho veditabbo.

2. Dutiyasammattaniyāmasuttavaṇṇanā

152. Dutīye **anaññāte aññātamañīti** aviññātasmiṃyeva ‘viññātamidaṃ mayā’ ti evaṃmānī.

3. Tatīyasammattaniyāmasuttavaṇṇanā

153. Tatīye **makkhī dhammaṃ suṇātīti** makkhī hutvā guṇamakkhanacittena dhammaṃ suṇāti. **Upārambhacittoti** niggahāropanacitto. **Randhagavesīti** guṇarandhaṃ guṇacchiddaṃ gavesanto.

4. Paṭhamasaddhammasammosasuttavaṇṇanā

154. Catutthe **na sakkaccaṃ dhammaṃ suṇantīti** ohitasotā sukatakārino hutvā na suṇanti. **Na pariyaṇṇantīti** yathāsutaṃ dhammaṃ vaḷaṅjantāpi sakkaccaṃ na vaḷaṅjenti. Pañcamaṃ uttānameva.

6. Tatīyasaddhammasammosasuttavaṇṇanā

156. Chaṭṭhe **appaṭisaraṇoti** appatīṭṭho. Ācariyā hi suttantassa paṭisaraṇaṃ nāma, tesam abhāvā appaṭisaraṇo hoti. Sesamettha heṭṭhā vuttanayameva.

7. Dukkathāsuttavaṇṇanā

157. Sattame **puggalaṃ upanidhāyāti** taṃ taṃ puggalaṃ upanikkhipitvā, sakkhiṃ katvāti attho. **Kacchamānāyāti** kathiyamānāya. Sesamettha aṭṭhamañca uttānatthamevāti.

9. Udāyīsuttavaṇṇanā

159. Navame **anupubbiṃ kathaṃ kathessāmīti** dānānantaraṃ sīlaṃ, sīlānantaraṃ sagganti evaṃ desanānupubbiṃ kathaṃ vā, yaṃ yaṃ suttapadaṃ vā gāthāpadaṃ vā nikkhittaṃ hoti, tassa tassa anurūpakathaṃ kathessāmīti cittaṃ upaṭṭhapetvā paresaṃ dhammo desetabbo. **Pariyāyadassāvīti** tassa tassa atthassa taṃ taṃ kāraṇaṃ dassento. Kāraṇaṃhi idha pariyāyoti vuttaṃ. **Anuddayatam paṭiccāti** “mahāsambādhappatte satte sambādhato mocessāmī” ti anukampaṃ āgamma. **Na āmisantaroti** na āmisahetuko, attano catupaccayalābhaṃ anāsīsantoti attho. **Attānañca parañca anupahaccāti** attukkaṃsanaparavambhanādivasena attānañca parañca guṇupaghātena anupahantvā.

10. Duppaṭṭivinodayasuttavaṇṇanā

160. Dasame **duppaṭṭivinodayāti** yāni hassādāni kiccāni nipphādetuṃ ṭhānāni uppannāni honti, tesu matthakaṃ asampattesu antarāyeva dunnihārā duvikkhambhayā honti. **Paṭibhānanti** kathetukāmatā vuccati. Imāni pañca duppaṭṭivinodayāni, na suppaṭṭivinodayāni. Upāyena pana kāraṇena anurūpāhi paccavekkhaṇaanusāsānādīhi sakkā paṭivinodetunti.

Saddhammavaggo paṭhamo.

(17) 2. Āghātavaggo

1. Paṭhamaāghātapaṭivinayasuttavaṇṇanā

161. Dutiyaassa paṭhame āghātaṃ paṭivinenti vūpasamentīti **āghātapaṭivinayā**. **Yattha bhikkhuno uppanno āghāto sabbaso paṭivinetabboti** yattha āramaṇe bhikkhuno āghāto uppanno hoti, tattha so sabbo imehi pañcahi paṭivinodetabboti attho. **Mettā tasmim puggale bhāvetabbāti** tikacatukkajjhānavasena mettā bhāvetabbā. **Karuṇāyapi** eseva nayo. **Upekkhā** pana catukkapañcakajjhānavasena bhāvetabbā. Yasmā pana yaṃ puggalaṃ passato cittaṃ na nibbāti, tasmim muditā na saṅṭhahati, tasmā sā na vuttā. **Asatiamanasikāroti** yathā so puggalo na upaṭṭhāti, kuṭṭādīhi antarito viya hoti, evaṃ tasmim asatiamanasikāro āpajjitabbo. Sesam heṭṭhā vuttanayattā uttānameva.

2. Dutiyaāghātapaṭivinayasuttavaṇṇanā

162. Dutiye āghāto etesu paṭivinetabboti **āghātapaṭivinayā**. Āghāto etehi paṭivinetabbotipi **āghātapaṭivinayā**. Paṭivinayoti hi paṭivinayavatthūnampi paṭivinayakāraṇānampi etaṃ adhivacanaṃ, tadubhayampi idha vaṭṭati. Pañca hi puggalā paṭivinayavatthū honti pañcahi upamāhi pañca paṭipattiyo paṭivinayakāraṇāni. **Labhati ca kālena kālaṃ cetaso vivaraṃ cetaso pasādanti** kāle kāle samathavipassanācittassa uppannokāsasaṅkhātaṃ vivarañceva saddhāsampannabhāvasaṅkhātaṃ pasādañca labhati.

Rathiyāyāti antaravīthiyaṃ. **Nantakanti** pilotikakhaṇḍaṃ. **Niggahetvāti** akkamitvā. **Yo tattha sāroti** yaṃ tattha thiraṭṭhānaṃ. **Taṃ paripātetvāti** taṃ luñcitvā. **Evameva khoti** ettha paṃsukūliko viya mettāvihārī daṭṭhabbo, rathiyāya nantakaṃ viya veripuggalo, dubbalaṭṭhānaṃ viya aparisuddhakāyasamācārātā, thiraṭṭhānaṃ viya parisuddhavacīsamācārātā, dubbalaṭṭhānaṃ chaḍḍetvā thiraṭṭhānaṃ ādāya gantvā sibbitvā rajitvā pārupitvā vicaraṇakālo viya aparisuddhakāyasamācārataṃ amanasikatvā parisuddhavacīsamācārataṃ manasikatvā verimhi cittuppādaṃ nibbāpetvā phāsuvihārakālo daṭṭhabbo.

Sevālapaṇakapariyonaddhāti sevālena ca udakapappaṭakena ca paṭicchannā. **Ghammaparetoti** ghammena anugato. **Kilantoti** maggakilanto. **Tasitoti** taṇhābhībhūto. **Pipāsītōti** pānīyaṃ pātukāmo. **Apaviyūhitvāti** apantvā. **Pivītvāti** pasannaudakaṃ pivītvā. **Evameva khoti** ettha ghammābhitatto puriso viya mettāvīhārī daṭṭhabbo, sevālapaṇakaṃ viya aparisuddhavadāsamācārātā, pasannaudakaṃ viya parisuddhakāyasamācārātā, sevālapaṇakaṃ apaviyūhitvā pasannodakaṃ pivītvā gamaṇaṃ viya aparisuddhavadāsamācārataṃ amanasikatvā parisuddhakāyasamācārataṃ manasikatvā verimhi cittuppādaṃ nibbāpetvā phāsuvihārakālo daṭṭhabbo.

Khobhessāmīti cālessāmi. **Loḷessāmīti** ākulaṃ karissāmi. **Apeyyampi taṃ karissāmīti** pivītuṃ asakkuṇeyyaṃ karissāmi. **Catukkuṇḍikoti** jāṇūhi ca hatthehi ca bhūmiyaṃ paṭiṭṭhānena catukkuṇḍiko hutvā. **Gopītakaṃ pivītvāti** gāviyo viya mukhena ākaḍḍhento pivītvā. **Evameva khoti** ettha ghammābhitatto puriso viya mettāvīhārī daṭṭhabbo, gopadaṃ viya veripuggalo, gopade parittaudakaṃ viya tassabbhantare parittaguṇo, catukkuṇḍikassa gopītakaṃ pivītvā pakkamaṇaṃ viya tassa aparisuddhakāyavadāsamācārataṃ amanasikatvā yaṃ so kālena kālaṃ dhammassavanaṃ nissāya cetaso vivarappasādasāṅkhātāṃ pītipāmojjaṃ labhati, taṃ manasikatvā cittuppādanibbāpanaṃ veditabbaṃ.

Ābādhikoti iriyāpathabhañjanakena visabhāgābādhena ābādhiko. **Puratopissāti** puratopi bhaveyya. **Anayabyasananti** avaḍḍhivināsaṃ. **Evameva khoti** ettha so anāthagilāno viya sabbakaṇhadhammasamānāgato puggalo, addhānamaggo viya anamataggasamsāro, purato ca pacchato ca gāmaṇaṃ dūrabhāvo viya nibbānassa dūrabhāvo, sappāyabhojanānaṃ alābho viya sāmāññaphalabhojanānaṃ alābho, sappāyabhesajjānaṃ alābho viya samathavipassanānaṃ abhāvo, patirūpaupaṭṭhākānaṃ alābho viya ovādānusāsānīhi kilesatikicchakānaṃ abhāvo, gāmantanāyakassa alābho viya nibbānasampāpakassa tathāgatassa vā tathāgatasāvakaṃ vā aladdhabhāvo, aññatarassa purisassa disvā kāruññupaṭṭhānaṃ viya tasmim puggale mettāvīhārikassa kāruññaṃ uppādetvā cittanibbāpanaṃ veditabbaṃ.

Acchodakāti pasannodakā. **Sātodakāti** madhurodakā. **Sītōdakāti** tanusītasalilā. **Setakāti** ūmibhijjanaṭṭhānesu setavaṇṇā. **Supatitthāti** samatitthā. **Evameva khoti** ettha ghammābhitatto puriso viya mettāvīhārī daṭṭhabbo, sā pokkharaṇī viya parisuddhasabbadvāro puriso, nhatvā pivītvā paccuttarivā rukkhacchāyāya nipajjitvā yathākāmaṃ gamaṇaṃ viya tesu dvāresu yaṃ icchati, taṃ ārammaṇaṃ katvā cittanibbāpanaṃ veditabbaṃ. Tatiyacatutthāni heṭṭhā vuttanayāneva.

5. Pañhapucchāsuttavaṇṇanā

165. Pañcame **paribhavanti** paribhavanto, evaṃ paribhavissāmīti paribhavanatthāya pucchati attho. **Aññātukāmōti** jānitukāmo hutvā.

6. Nirodhasuttavaṇṇanā

166. Chaṭṭhe **atthetaṃ ṭhānanti** atthi etaṃ kāraṇaṃ. **No ce diṭṭheva dhamme aññaṃ ārādheyāti** no ce imasmimyeva attabhāve arahattaṃ pāpuṇeyya. **Kabaḷikārāhārābhakkhānaṃ devānanti** kāmāvacaradevānaṃ. **Aññataraṃ manomayaṃ kāyanti** jhānāmanena nibbattaṃ aññataraṃ suddhāvāsabrahmakāyaṃ. **Udāyīti** lāḷudāyī. So hi “manomaya”nti sutvā “āruppe na bhavitabba”nti paṭibāhi. Thero “sāriputto kiṃ jānāti, yassa sammukhā evaṃ bhikkhū vacanaṃ paṭikkosanti”ti evaṃ bālānaṃ laddhiuppattiṭṭhānaṃ taṃ vacanaṃ anadhivāsetvā yena bhagavā tenupasaṅkami.

Atthi nāmāti amarisanatthe nipāto. Teneva cettha “ajjupekkhissathā”ti anāgatavacanaṃ kataṃ. Ayañhetthattho – ānanda, tumhe therāṃ bhikkhuṃ viheṭṭhiyamānaṃ ajjupekkhatha, na vo etaṃ marisayāmi na sahāmi nādhivāsemīti. Kasmā pana bhagavā ānandatheraṃyeva evamāhāti? Dhammabhaṇḍāgārikattā. Dhammabhaṇḍāgārikassa hi evaṃ vadanto paṭibāhituṃ bhāro. Apicesa sāriputtattherassa piyasahāyo, tenāpissa esa bhāro. Tattha kiñcāpi bhagavā ānandattheraṃ garahanto

evamāha, na panesā tasseva garahā, sammukhībhūtānaṃ sabbesaṃyeva garahāti veditabbā.
Vihāranti gandhakuṭiṃ.

Anacchariyanti na acchariyaṃ. **Yathāti** kāraṇavacanaṃ. **Āyasmantaṃyevettha upavānaṃ paṭibhāseyyāti** ettha bhagavatā ca evaṃ etadeva kāraṇaṃ ārabba udāhaṭe āyasmatoyeva upavānassa paṭivacanaṃ paṭibhātu upaṭṭhātūti dīpeti. **Sārajjam okkantanti** domanassaṃ anupaviṭṭhaṃ. **Sīlavātiādīhi** khīṇāsavasīlādīniyeva kathitāni. **Khaṇḍiccenātiādīni** sakkārādīnaṃ kāraṇapucchāvasena vuttāni. Kiṃ khaṇḍiccādīhi kāraṇehi taṃ taṃ sabrahmacāriṃ sakkareyyuntī ayañhettha adhippāyo.

7. Codanāsuttavaṇṇanā

167. Sattame **codakenāti** vatthusandassanā āpattisandassanā saṃvāsappaṭikkhepo sāmīcippaṭikkhepoti catūhi codanāvattūhi codayamānena. **Kālena vakkhāmi no akālenāti** ettha cuditakassa kālo kathito, na codakassa. Paraṃ codentena hi parisamajjhe vā uposathapavāraṇagge vā āsanasālābhajanāsālādīsū vā na codetabbo, divaṭṭhāne nisinnakāle “karotāyasmā okāsaṃ, ahaṃ āyasmantaṃ vattukāmo”ti evaṃ okāsaṃ kāretvā codetabbo. Puggalaṃ pana upaparikkhitvā yo lolapuggalo abhūtaṃ vatvā bhikkhūnaṃ ayasaṃ āropeti, so okāsakammaṃ vināpi codetabbo. **Bhūtenāti** tacchena sabhāvena. **Sanḥenāti** maṭṭhena mudukena. **Atthasaṃhitenāti** atthakāmatāya hitakāmatāya upetena. **Avippaṭisāro upadahātābhoti** amaṅkubhāvo upanetabbo. **Alaṃ te avippaṭisārāyāti** yuttaṃ te amaṅkubhāvāya. Sesamettha uttānamevāti. Aṭṭhamaṃ heṭṭhā vuttanayattā pākaṭameva.

9. Khippanisantisuttavaṇṇanā

169. Navame khippaṃ nisāmayati upadhāretīti **kippanisanti**. Suggahitaṃ katvā gaṇhātīti **suggahitaggāhī**. **Atthakusaloti** aṭṭhakathāya cheko. **Dhammakusaloti** pāliyaṃ cheko. **Niruttikusaloti** niruttivacanesu cheko. **Byañjanakusaloti** akkharappabhede cheko. **Pubbāparakusaloti** atthapubbāparaṃ, dhammapubbāparaṃ, akkharapubbāparaṃ, byañjanapubbāparaṃ, anusandhipubbāparanti imasmiṃ pañcavidhe pubbāpare cheko. Tattha **atthapubbāparakusaloti** heṭṭhā atthena upari atthaṃ jānāti, upari atthena heṭṭhā atthaṃ jānāti. Kathaṃ? So hi heṭṭhā atthaṃ ṭhapetvā upari atthe vutte “heṭṭhā attho atthī”ti jānāti. Upari atthaṃ ṭhapetvā heṭṭhā atthe vuttepi “upari attho atthī”ti jānāti. Ubhato ṭhapetvā majjhe atthe vutte “ubhato attho atthī”ti jānāti. Majjhe atthaṃ ṭhapetvā ubhatobhāgesu atthe vutte “majjhe attho atthī”ti jānāti. **Dhammapubbāparādīsū**pi eseva nayo. **Anusandhipubbāpare** pana sīlaṃ ādiṃ katvā āradde suttante matthake chasu abhiññāsu āgatāsu “yathānusandhiṃ yathānuparicchedaṃ suttanto gato”ti jānāti. Diṭṭhivasena āradde upari saccesu āgatesūpi “yathānusandhinā gato”ti jānāti. Kalahabhaṇḍanavasena āradde upari sārāṇiyadhammesu āgatesūpi, dvattiṃsatiracchānakathāvasena āradde upari dasakathāvattūsū (a. ni. 10.69; udā.31) āgatesūpi “yathānusandhinā gato”ti jānātīti.

10. Bhaddajisuttavaṇṇanā

170. Dasame **abhibhūti** abhibhavitvā ṭhito jeṭṭhako. **Anabhibhūtoti** aññehi anabhibhūto. **Aññadatthūti** ekaṃsavacane nipāto. Dassanavasena **daso**, sabbam passatīti adhippāyo. **Vasavattīti** sabbam janaṃ vase vatteti. **Yathā passatoti** iṭṭhārammaṇaṃ vā hotu aniṭṭhārammaṇaṃ vā, yenākārena taṃ passantassa. **Anantarā āsavānaṃ khayō hotīti** anantarāyeva arahattaṃ uppajjati. **Yathā suṇatoti** etthāpi eseva nayo. Atha vā yaṃ cakkhunā rūpaṃ disvā nirantarameva vipassanaṃ paṭṭhapetvā arahattaṃ pāpuṇāti, taṃ tassa arahattaṃ cakkhuvīññāṇanantaraṃ nāma hoti. Taṃ sandhāya vuttaṃ – **idaṃ dassanānaṃ agganti**. Dutiyapadepi eseva nayo.

Yathā sukhitasāti yena maggasukhena sukhitasā. **Anantarā āsavānaṃ khayō hotīti** samanantarameva arahattaṃ uppajjati. **Idaṃ sukhānaṃ agganti** idaṃ maggasukhaṃ sukhānaṃ uttamaṃ. **Yathā saññissāti** idhāpi maggasaññāva adhippetā. **Yathā bhūtassāti** yasmim bhava yasmim

attabhāve ʃhitassa. **Anantarā**ti anantarāyena arahattaṃ uppajjati. **idaṃ bhavānaṃ** agganti ayaṃ pacchimo attabhāvo bhavānaṃ aggaṃ nāma. Atha vā **yathā bhūtassā**ti yehi khandhehi maggakkhaṇe bhūtassa vijjamaṇassa. **Anantarā āsavānaṃ khayō hotī**ti maggānantarameva phalaṃ uppajjati. **Idaṃ bhavānaṃ** agganti idaṃ maggakkhaṇe khandhapañcakaṃ bhavānaṃ aggaṃ nāmāti.

Āghātavaggo dutiyo.

(18) 3. Upāsakavaggo

1-3. Sārajjasuttādivaṇṇanā

171-173. Tatiyassa paṭhamadutiyatatiyesu agāriyappaṭipatti kathitā. Sotāpannasakadāgāminopi hontu, vaṭṭantiyeva.

4. Verasuttavaṇṇanā

174. Catutthe **bhayānī**ti cittutrāsabhayāni. **Verānī**ti akusalaverānīpi puggalaverānīpi. **Cetasikanti** cittanissitaṃ. **Dukkanti** kāyapasādavatthukaṃ dukkhaṃ. **Domanassanti** domanassavedanaṃ. Imasmiṃ sutte viratipahānaṃ kathitaṃ.

5. Caṇḍālasuttavaṇṇanā

175. Pañcame **upāsakapatikuṭṭhoti** upāsakapacchimako. **Kotūhalamaṅgalikoti** “iminā idaṃ bhavissatī”ti evaṃ pavattattā kotūhalasaṅkhātēna diṭṭhasutamutamaṅgalena samannāgato. **Maṅgalaṃ pacceci no kammaṃ**ti maṅgalaṃ oloketi, kammaṃ na oloketi. **Ito ca bahiddhā**ti imamhā sāsanaṃ bahiddhā. **Pubbakāraṃ karotī**ti dānādikaṃ kusalakiccaṃ paṭhamataraṃ karoti.

6. Pītisuttavaṇṇanā

176. Chaṭṭhe **kinti mayanti** kena nāma upāyena mayaṃ. **Pavivekaṃ pītinti** paṭhamadutiyajjhānāni nissāya uppajjanakapītiṃ. **Kāmūpasamhitanti** kāmanissitaṃ duvidhe kāme ārabba uppajjanakaṃ. **Akusalūpasamhitanti** “migasūkarādayo vijjhissāmī”ti saraṃ khipitvā tasmiṃ viraddhe “viraddhaṃ mayā”ti evaṃ akusale nissāya uppajjanakaṃ. Tādisesu pana ʃhānesu avirajjhantassa “suṭṭhu me viddhaṃ, suṭṭhu me pahaṭa”nti uppajjanakaṃ **akusalūpasamhitam sukhaṃ somanassaṃ** nāma. Dānādiupakaraṇānaṃ asampattiyā uppajjamānaṃ pana **kusalūpasamhitam dukkhaṃ domanassanti** veditabbaṃ.

7. Vaṇijjāsuttavaṇṇanā

177. Sattame **vaṇijjāti** vāṇijjakammāni. **Upāsakenāti** tisaraṇagatena. **Satthavaṇijjāti** āvudhabhaṇḍaṃ kāretvā tassa vikkayo. **Sattavaṇijjāti** manussavikkayo. **Mamsavaṇijjāti** sūkaramigādayo posetvā tesaṃ vikkayo. **Majjavaṇijjāti** yaṃkiñci majjaṃ kāretvā tassa vikkayo. **Visavaṇijjāti** viṣaṃ kāretvā tassa vikkayo. Iti sabbampi imaṃ vaṇijjaṃ neva attanā kātuṃ, na pare samādapetvā kāretuṃ vaṭṭati.

8. Rājasuttavaṇṇanā

178. Aṭṭhame **pabbājentī**ti raṭṭhamhā pabbājenti. **Yathāpaccayaṃ vā karontī**ti yathādhippāyaṃ yathājjhāsayaṃ karonti. **Tatheva pāpakammaṃ pavedentī**ti yathā tena kataṃ, taṃ tatheva aññesaṃ ārocenti kathenti.

9. Gihisuttavaṇṇanā

179. Navame **saṃvutakammantanti** pihitakammantaṃ. **Ābhicetasikānanti** uttamacittanissitānaṃ. **Diṭṭhadhammasukhavihārānanti** paccakkhēveva dhamme pavattikkhaṇe sukhavihārānaṃ. **Ariyakantehīti** ariyānaṃ kantehi maggaphalasīlehi.

Ariyadhammaṃ samādāyāti ettha ariyadhammoti pañca sīlāni kathitāni. **Merayaṃ vāruṇinti** catubbidhaṃ merayaṃ pañcavidhaṃ suraṃ. **Dhammañcānuvitakkayeti** navavidhaṃ lokuttaradhammaṃ anussativaseneva vitakkeyya. **Abyāpajjhaṃ hitaṃ cittanti** niddukkhaṃ mettādibrahmavihārācittaṃ. **Devalokāya bhāvayeti** brahmalokatthāya bhāveyya. **Puññatthassa jigīsatoti** puññaena atthikassa puññaṃ gavesantassa. **Santesūti** buddhapaccekabuddhatathāgatasāvakesu. **Vipulā hoti dakkhiṇāti** evaṃ dinnadānaṃ mahapphalaṃ hoti. **Anupubbenāti** sīlapūraṇādīnā anukkamena. Sesamaṃ tikanipāte vuttatthameva.

10. Gavesīsuttavaṇṇanā

180. Dasame **sitaṃ pātvākāsīti** mahāmaggeneva gacchanta taṃ sālavanaṃ oloketvā “atthi nu kho imasmiṃ ṭhāne kiñci sukāraṇaṃ uppannapubba”nti addasa kassapabuddhakāle gavesinā upāsakena kataṃ sukāraṇaṃ. Athassa etadahosi – “idaṃ sukāraṇaṃ bhikkhusaṅghassa apākaṭaṃ paṭicchannaṃ, handa naṃ bhikkhusaṅghassa pākaṭaṃ karomī”ti maggā okkamma aññatarasmiṃ padese ṭhitova sitapātukammaṃ akāsi, aggaḡadante dassetvā mandahasitaṃ hasi. Yathā hi lokiyamanussā udaraṃ paharantā “kahaṃ kaha”nti hasanti, na evaṃ buddhā. Buddhānaṃ pana hasitaṃ haṭṭhapahaṭṭhākāramattameva hoti.

Hasitaṅca nāmetaṃ terasahi somanassasahagatacittēhi hoti. Tattha lokiyamahājano akusalato catūhi, kāmāvacarakusalato catūhīti aṭṭhahi cittēhi hasati, sekhā akusalato diṭṭhigatasampayuttāni dve apanetvā chahi cittēhi hasanti, khīṇāsavā catūhi sahetukakiriyacittēhi, ekena ahetukakiriyacittēnāti pañcāhi cittēhi hasanti. Tesupi balavārammaṇe āpāthamāgate dvīhi ṇāṇasampayuttacittēhi hasanti, dubbalārammaṇe duhetukacittadvayena ca ahetukacittēna cāti tīhi cittēhi hasanti. Imasmiṃ pana ṭhāne kiriyāhetukamanoviññādhātusomanassasahagatacittaṃ bhagavato pahaṭṭhākāramattahasitaṃ uppādeti.

Taṃ panetaṃ hasitaṃ evaṃ appamattakampi therassa pākaṭaṃ ahosi. Kathaṃ? Tathārūpe hi kāle tathāgatassa catūhi dāṭṭhāhi cātuddīpikamahāmeghamukhato samosarītā vijjulatā viya virocāmānā mahātālakkhandhappamāṇā rasmivaṭṭiyo utṭhahitvā tikkhattuṃ siravaraṃ padakkhiṇaṃ katvā dāṭṭhaggesuyeva antaradhāyanti. Tena saññāṇena āyasmā ānando bhagavato pacchato gacchamānopi sitapātubhāvaṃ jānāti.

Iddhanti samiddhaṃ. **Phītanti** atisamiddhaṃ sabbapāliphullaṃ viya. **Ākiṇṇamanussanti** janasamākulaṃ. **Sīlesu aparipūrākārīti** pañcasu sīlesu asamattakārī. **Paṭidesitānīti** upāsakabhāvaṃ paṭidesitāni. **Samādapitānīti** saraṇesu paṭiṭṭhāpitānīti attho. **Iccetaṃ samasamanti** iti etaṃ kāraṇaṃ sabbākārato samabhāveneva samaṃ, na ekadesena. **Natthi kiñci atirekanti** mayhaṃ imehi kiñci atirekaṃ natthi. **Handāti** vavassaggaṭṭhe nipāto. **Atirekāyāti** visesakāraṇatthāya paṭipajjāmīti attho. **Sīlesu paripūrākārīṃ dhārethāti** pañcasu sīlesu samattakārīti jānātha. Ettāvātā tena pañca sīlāni samādinnāni nāma honti. **Kimaṅga pana na mayanti** mayaṃ pana keneva kāraṇena paripūrākārīno na bhavissāma. Sesamettha uttānamevāti.

Upāsakavaggo tatiyo.

(19) 4. Araññavaggo

1. Āraññikasuttavaṇṇanā

181. Catutthassa paṭhame **mandattā momūhattā**ti neva samādānaṃ jānāti, na ānisaṃsaṃ. Attano pana mandattā momūhattā aññāneva āraññako hoti. **Pāpiccho icchāpakatoti** ‘‘araññe me viharantassa ‘ayaṃ āraññako’ti catupaccayasakkāraṃ karissanti, ‘ayaṃ bhikkhu lajjī pavivitto’tiādīhi ca guṇehi sambhāvevassanti’’ti evaṃ pāpikāya icchāya ṭhatvā tāya eva icchāya abhibhūto hutvā āraññako hoti. Ummādavasena araññaṃ pavisitvā viharanto pana **ummādā cittakkhepā** āraññako nāma hoti. **Vaṇṇitanti** idaṃ āraññaṃ nāma buddhehi ca buddhasāvakehi ca vaṇṇitaṃ pasatthanti āraññako hoti. **Idamatthitanti** imāya kalyāṇāya paṭipattiyā attho etassāti idamatthī, idamatthino bhāvo idamatthitā. Taṃ idamatthitaṃyeva nissāya, na aññaṃ kiñci lokāmisanti attho. Sesamettha ito paresu ca uttānatthameva.

Arañnavaggo catuttho.

(20) 5. Brāhmaṇavaggo

1. Soṇasuttavaṇṇanā

191. Pañcamassa paṭhame **brāhmaṇadhammā**ti brāhmaṇasabhāvā. **Sunakhesūti** kukkuresu. **Neva kiṇanti na vikkiṇanti**ti na gaṇhantā kiṇanti, na dadantā vikkiṇanti. **Sampiyeneva saṃvāsaṃ saṃbandhāya sampavattenti**ti piyo piyaṃ upasaṅkamitvā paveniyā bandhanatthaṃ saṃvāsaṃ pavattayanti. **Udarāvadehakanti** udaraṃ avadihitvā upacinitvā pūretvā. **Avasesaṃ ādāya pakkamanti**ti yaṃ bhujjitaṃ na sakkonti, taṃ bhaṇḍikaṃ katvā gahetvā gacchanti. Imasmiṃ sutte vaṭṭameva kathitaṃ.

2. Doṇabrāhmaṇasuttavaṇṇanā

192. Dutiye **tvampi noti** tvampi nu. **Pavattāro**ti pavattayitāro. **Yesanti** yesaṃ santakaṃ. **Mantapadanti** vedasaṅkhātaṃ mantameva. **Gītanti** aṭṭhakādīhi dasahi porāṇakabrāhmaṇehi sarasampattivasena sajjhāyitaṃ. **Pavuttanti** aññesaṃ vuttaṃ, vācitantī attho. **Samhitanti** samupabyūḷhaṃ rāsikataṃ, piṇḍaṃ katvā ṭhapitanti attho. **Tadanugāyantī**ti etarahi brāhmaṇā taṃ tehi pubbehi gītaṃ anugāyanti anusajjhāyanti. **Tadanubhāsanti**ti taṃ anubhāsanti. Idaṃ purimasseva vevacanaṃ. **Bhāsitamanubhāsanti**ti tehi bhāsitaṃ anubhāsanti. **Sajjhāyitamanusajjhāyantī**ti tehi sajjhāyitaṃ anusajjhāyanti. **Vācitananuvācentī**ti tehi aññesaṃ vācitaṃ anuvācenti. **Seyyathidanti** te katameti attho. **Aṭṭhakoti**ādīni tesāṃ nāmāni. Te kira dibbena cakkhunā oloketvā parūpaghātaṃ akatvā kassapasammāsambuddhassa bhagavato pāvacaṇena saha saṃsandetvā mante ganthesuṃ. Aparāpare pana brāhmaṇā pāṇātipātādīni pakkhipitvā tayo vede bhinditvā buddhavacaṇena saddhiṃ viruddhe akaṃsu. **Tyāssu’meti** ettha **assūti** nipātamattaṃ, te brāhmaṇā ime pañca brāhmaṇe paññāpentīti attho.

Mante adhīyamānoti vede sajjhāyanto gaṇhanto. **Ācariyadhananti** ācariyadakkhiṇaṃ ācariyabhāgaṃ. **Na issatthenāti** na yodhājīvakammena uppādeti. **Na rājaporisenāti** na rājupatṭhākabhāvena. **Kevalaṃ bhikkhācariyāyāti** suddhāya bhikkhācariyāya eva. **Kapālaṃ anatimaññaṃ**noti taṃ bhikkhābhājanaṃ anatimaññaṃ. So hi puṇṇapattaṃ ādāya sīsaṃ nhāto kuladvāresu ṭhatvā ‘‘ahaṃ aṭṭhacattālīsa vassāni komārabrahmacariyaṃ carim, mantāpi me gahitā, ācariyassa ācariyadhanam dassāmi, dhanam me dethā’’ti yācati. Taṃ sutvā manussā yathāsatti yathābalaṃ aṭṭhapi soḷasapi satampi sahasampi denti. Evaṃ sakalagāmaṃ caritvā laddhadhanaṃ ācariyassa niyyādeti. Taṃ sandhāyetaṃ vuttaṃ. **Evaṃ kho doṇa brāhmaṇo brahmasamo hotīti** evaṃ brahmavihārehi samannāgatattā brāhmaṇo brahmasamo nāma hoti.

Neva kayena na vikkayenāti neva attanā kayam katvā gaṇhāti, na parena vikkayam katvā dinnam.

Udakūpassaṭṭhanti udakena upassaṭṭhaṃ pariccattaṃ. So hi yasmiṃ kule vayappattā dārikā atthi, gantvā tassa dvāre tiṭṭhati. “Kasmā ṭhitoṣī”ti vutte “ahaṃ aṭṭhacattālīsa vassāni komārabrahmacariyaṃ carim, taṃ sabbaṃ tumhākaṃ demi, tumhe mayhaṃ dārikaṃ dethā”ti vadati. Te dārikaṃ ānetvā tassa hatthe udakaṃ pātetvā denti. So taṃ udakūpassaṭṭhaṃ bhariyaṃ gaṇhitvā gacchati. **Atimīlhaḥajoti** atimīlhe mahāgūtharāsīmhi jāto. **Tassa sāti** tassa esā. **Na davatthāti** na kīlanatthā. **Na ratatthāti** na kāmaratiatthā. **Methunaṃ uppādetvāti** dhītaraṃ vā puttaṃ vā uppādetvā “idāni paveṇi ghaṭṭiyissatī”ti nikkhamitvā pabbajati. **Sugatiṃ saggamaṃ lokanti** brahmalokameva sandhāyetaṃ vuttaṃ. **Devasamo hotīti** dibbavīhārehi samannāgatattā devasamo nāma hoti.

Tameva puttassādaṃ nikāmayamānoti yvāssa dhītaraṃ vā puttaṃ vā jātaṃ disvā puttapemaṃ puttassādo uppajjati, taṃ patthayamāno icchamāno. **Kuṭumbaṃ ajjhāvasatīti** kuṭumbaṃ saṅṭhapetvā kuṭumbamajjhe vasati. Sesamettha uttānamevāti.

3. Saṅgāravasuttavaṇṇanā

193. Tatiye **pagevāti** paṭhamaññeva. **Kāmarāgapariyuṭṭhitenāti** kāmarāgaggahitena. **Kāmarāgaparetenāti** kāmarāgānugatena. **Nissaraṇanti** tividhaṃ kāmarāgassa nissaraṇaṃ vikkhambhananissaraṇaṃ, tadaṅganissaraṇaṃ, samucchedanissaraṇanti. Tattha asubhe paṭhamajjhānaṃ vikkhambhananissaraṇaṃ nāma, vipassanā tadaṅganissaraṇaṃ nāma, arahattamaggo samucchedanissaraṇaṃ nāma. Taṃ tividhampi nappajānātīti attho. **Attatthampīti** ādīsu arahattasaṅkhāto attano attho attattho nāma, paccayadāyakaṇaṃ attho parattho nāma, sveva duvidho ubhayattho nāma. Iminā nayena sabbavāresu attho vedītabbo.

Ayaṃ pana viseso – **byāpādassa nissaraṇanti** ādīsu hi dveva nissaraṇāni vikkhambhananissaraṇaṃca samucchedanissaraṇaṃca. Tattha byāpādassa tāva mettāya paṭhamajjhānaṃ vikkhambhananissaraṇaṃ nāma, anāgāmi maggo samucchedanissaraṇaṃ, thinamidhassa ālokasaññā vikkhambhananissaraṇaṃ, arahattamaggo samucchedanissaraṇaṃ. Uddhaccakukkuccassa yo koci samatho vikkhambhananissaraṇaṃ, uddhaccassa panettha arahattamaggo, kukkuccassa anāgāmi maggo samucchedanissaraṇaṃ. Vicikicchāya dhammavavattānaṃ vikkhambhananissaraṇaṃ, paṭhamamaggo samucchedanissaraṇaṃ.

Yā panettha **seyyathāpi, brāhmaṇa, udapatto saṃsaṭṭho lākhāya vāti** ādikā upamā vuttā, tāsu **udapattoti** udakabharitā pāti. **Saṃsaṭṭhoti** vaṇṇabhedakaraṇavasena saṃsaṭṭho. **Ukkudhitoti** kudhito. **Ussadakajātoti** usumakajāto. **Sevālapaṇakapariyonaddhoti** tilabījākādibhedena sevālena vā nīlamaṇḍūkapiṭṭhivaṇṇena vā udakapiṭṭhiṃ chādetvā nibbattena paṇakena pariyonaddho. **Vāteritoti** vātena erito kampito. **Āviloti** appasanno. **Luḷitoti** asannisinno. **Kalalībhūtoti** kaddamībhūto. **Andhakāre nikkhattoti** koṭṭhakantarādibhede anālokaṭṭhāne ṭhapito. Imasmiṃ sutte bhagavā tīhi bhavehi desanaṃ nivattetvā arahattanikūṭena niṭṭhapesi, brāhmaṇo pana saraṇamatte patiṭṭhitoti.

4. Kāraṇapālīsuttavaṇṇanā

194. Catutthe **kāraṇapālīti** pālōti tassa nāmaṃ, rājakulānaṃ pana kammante kāretīti kāraṇapālī nāma jāto. **Kammantaṃ kāretīti** pātova utthāya dvāraṭṭālakapākāre akate kāreti, jinṇe paṭijaggāpeti. **Piṅgiyāniṃ brāhmaṇanti** evaṃnāmakāṃ anāgāmi phale patiṭṭhitaṃ ariyasāvakaṃ brāhmaṇaṃ. So kira pātova utthāya gandhamālādīni gāhāpetvā satthu santikaṃ gantvā vanditvā gandhamālādīhi pūjetvā nagaraṃ āgacchati, idaṃ brāhmaṇassa devasikaṃ vattanti. Taṃ so evaṃ vattaṃ katvā āgacchantāṃ addasa. **Etadvocāti** “ayaṃ brāhmaṇo paññāvā ñāṇuttaro, kahaṃ nu kho pātova gantvā āgacchatī”ti cintetvā anukkamena santikaṃ āgataṃ sañjānitvā “handā kuto nū”ti ādivacanaṃ avoca.

Tattha **divā divassāti** divasassāpi divā, majjhanhikakāleti attho. **Paṇḍito maññeti** bhavaṃ piṅgiyānī samaṇaṃ gotamaṃ paṇḍitoti maññati, udāhu notī ayamettha attho. **Ko cāhaṃ, bhoti**, bho,

samaṇassa gotamassa paññāveyyattiyajānane ahaṃ ko nāma? **Ko ca samaṇassa gotamassa paññāveyyattiyam jānissāmīti** kuto cāhaṃ samaṇassa gotamassa paññāveyyattiyam jānissāmi, kena nāma kāraṇena jānissāmīti evaṃ sabbathāpi attano ajānanabhāvaṃ dīpeti. **Sopi nūnassa tādisovāti** yo samaṇassa gotamassa paññāveyyattiyam jāneyya, sopi nūna dasa pāramiyo pūretvā sabbaññutaṃ patto tādiso buddhoyeva bhavye. Sineruṃ vā hi pathaviṃ vā ākāsaṃ vā pametukāmena tappamāṇo daṇḍo vā rajju vā laddhuṃ vaṭṭati, samaṇassa gotamassa paññam jānantenapi tassa ñāṇasadisameva sabbaññutaññāṇam laddhuṃ vaṭṭatīti dīpeti. Ādaravasena panettha āmedītaṃ kataṃ. **Uḷārāyāti** uttamāya seṭṭhāya. **Ko cāhaṃ, bhoti**, bho, ahaṃ samaṇassa gotamassa pasamsane ko nāma. **Ko ca samaṇam gotamam pasamsissāmīti** kena kāraṇena pasamsissāmi.

Pasathappasatthoti sabbaguṇānaṃ upari carehi sabbalokapasatthehi attano guṇeḥva pasattho, na tassa aññehi pasamsanakiccaṃ atthi. Yathā hi campakapupphaṃ vā nīluppalaṃ vā padumaṃ vā lohitaḥcandanam vā attano vaṇṇagandhasiriyāva pāsādikañceva sugandhañca, na tassa āgantukehi vaṇṇagandhehi thomanakiccaṃ atthi. Yathā ca maṇiratanaṃ vā candamaṇḍalaṃ vā attano ālokeneva obhāsati, na tassa aññena obhāsanakiccaṃ atthi, evaṃ samaṇo gotamo sabbalokapasatthehi attano guṇeḥva pasattho thomito, sabbalokassa seṭṭhataṃ pāpito. Na tassa aññena pasamsanakiccaṃ atthi.

Pasatthehi vā pasatthotipi **pasathappasattho**. Ke pana pasatthā nāma? Rājā pasenadi kosalo kāsikosalavāsikehi pasattho, bimbisāro aṅgamagadhavāsīhi, vesālīkā licchavī vajjitaṭṭhavāsīhi pasatthā, pāveyyakā mallā kosinārakā mallā aññepi te te khattiyā tehi tehi jānapadehi pasatthā, caṅkiādayo brāhmaṇā brāhmaṇagaṇehi, anāthapiṇḍikādayo upāsakā upāsakagaṇehi, visākhādikā upāsikā anekasatāhi upāsikāhi, sakuludāyīdayo paribbājakā anekehi paribbājakasatehi, uppalavaṇṇattheriādikā mahāsāvīkā anekehi bhikkhunīsatehi, sārīputtattherādayo mahātherā anekasatehi bhikkhūhi, sakkādayo devā anekasahashehi devehi, mahābrahmādayo brahmāno anekasahashehi brahmehi pasatthā. Te sabbepi dasabalaṃ thomenti vaṇṇenti pasamsantīti bhagavā “pasathappasattho”ti vuccati. **Atthavasanti** atthānisamsam.

Athassa so attano pasādakāraṇam ācikkhanto **seyyathāpi, bho, purisotiādimāha**. Tattha **aggarasaparitittoti** bhojanarasesu pāyāso sneharasesu gosappi, kasāvarasesu khuddakamadhu aneḷakam, madhurarasesu sakkarāti evamādayo aggarasā nāma. Tesu yena kenaci parititto ākaṇṭhappamaṇam bhuñjitvā ṭhito. **Aññesaṃ hīnānanti** aggarasehi aññesaṃ hīnaraṇānaṃ. **Suttasoti** suttato, suttabhāvenāti attho. Sesupi eseḥva nayo. **Tato tatoti** suttādīsū tato tato. **Aññesaṃ puthusamaṇabrāhmaṇāppavādānanti** ye aññesaṃ puthūnaṃ samaṇabrāhmaṇānaṃ laddhisankhātappavādā, tesam. **Na pihetīti** na pattheti, te kathiyamāne sotumpi na icchati. **Jighacchādubbalyaparetoti** jighacchāya ceva dubbalabhāvena ca anugato. **Madhupiṇḍikanti** sālīpiṭṭhaṃ bhajjitvā catumadhurena yojetvā kataṃ baddhasattupiṇḍikaṃ, madhurapūvameva vā. **Adhigaccheyyāti** labheyya. **Asecanakanti** madhurabhāvakaraṇatthāya aññena rasena anāsittakam ojavantaṃ pañītarasaṃ.

Haricandanassāti suvaṇṇavaṇṇacandanassa. **Lohitaḥcandanassāti** rattavaṇṇacandanassa. **Surabhiḥgandhanti** sugandham. **Darathādayo** vaṭṭadarathā, vaṭṭakilamathā, vaṭṭaparilāhā eva. **Udānaṃ udānesīti** udāhāraṃ udāhari. Yathā hi yaṃ telaṃ mānaṃ gahetuṃ na sakkoti, vissanditvā gacchati, taṃ avasekoti vuccati. Yañca jalaṃ taḷākam gahetuṃ na sakkoti, ajjhottharivā gacchati, taṃ oghoti vuccati. Evamevaṃ yaṃ pītivacanaṃ hadayaṃ gahetuṃ na sakkoti, adhikam hutvā anto asaṅṭhahitvā bahi nikkhamati, taṃ udānanti vuccati. Evarūpaṃ pītimayavacanaṃ nicchāresīti attho.

5. Piṅgiyānisuttavaṇṇanā

195. Pañcame **nīlāti** idaṃ sabbasaṅgāhikam. **Nīlavaṇṇātiādi** tasseva vibhāgadassanaṃ. Tattha na tesam pakativāṇo nīlo, nīlavilepanavilittatā panetaṃ vuttaṃ. **Nīlavatthāti** paṭadukūlakoseyyādīnīpi tesam nīlāneva honti. **Nīlālankārāti** nīlamaṇīhi nīlapupphehi alānkatā, tesam hatthālankāra-assālankāra-

rathālaṅkāra-sāṇivitaṅkaṅcukāpi sabbe nīlāyeva honti. Iminā nayena sabbapadesu attho veditabbo.

Padumaṃ yathāti yathā satapattaṃ rattapadumaṃ. **Kokanadanti** tasseva vevacanaṃ. **Pātoti** pageva suriyuggamanakāle. **Siyāti** bhaveyya. **Avītagandhanti** avigatagandhaṃ. **Āṅgīrasanti** bhagavato āṅgamaṅgehi rasmiyo niccharanti, tasmā āṅgīrasoti vuccati. **Tapantaṃ ādiccamivantalikkheti** dvisahassadīparivāresu catūsu mahādīpesu ālokakaraṇavasena antalikkhe tapantaṃ ādiccaṃ viya virocamaṇaṃ. **Āṅgīrasaṃ passāti** attānameva vā mahājanaṃ vā sandhāya evaṃ vadati.

6. Mahāsupinasuttavaṇṇanā

196. Chaṭṭhe **mahāsupināti** mahantehi purisehi passitabbato mahantānaṅca atthānaṃ nimittabhāvato mahāsupinā. **Pāturahe**sunti pākaṭā ahesuṃ. Tattha supinaṃ passanto catūhi kāraṇehi passati dhātukkobbato vā anubhūtapubbato vā devatopasaṃhārato vā pubbanimittato vāti.

Tattha pittādīnaṃ khobhakarāṇapaccayappayogena khubhitadhātuko **dhātukkobbato** supinaṃ passati. Passanto ca nānāvidhaṃ supinaṃ passati pabbatā patanto viya, ākāseṇa gacchanto viya, vālamigahatthīcorādīhi anubaddho viya ca. **Anubhūtapubbato** passanto pubbe anubhūtapubbaṃ ārammaṇaṃ passati. **Devatopasaṃhārato** passantassa devatā atthakāmatāya vā anathakāmatāya vā atthāya vā anathāya vā nānāvidhāni ārammaṇāni upasaṃharanti. So tāsāṃ devatānaṃ ānubhāvena tāni ārammaṇāni passati. **Pubbanimittato** passanto puññāpuññavasena uppajjitukāmassa atthassa vā anathassa vā pubbanimittabhūtaṃ supinaṃ passati bodhisattamātā viya puttapaṭilābhanimittaṃ, kosalarājā viya soḷasa supine, ayameva bhagavā bodhisattabhūto ime pañca mahāsupine viya cāti.

Tattha yaṃ dhātukkobbato anubhūtapubbato ca supine passati, na taṃ saccaṃ hoti. Yaṃ devatopasaṃhārato passati, taṃ saccaṃ vā hoti alikaṃ vā. Kuddhā hi devatā upāyena vināsetukāmā viparītampi katvā dassenti. Yaṃ pana pubbanimittato passati, taṃ ekantaṃ saccameva hoti. Etesaṃ catunnaṃ mūlakāraṇānaṃ saṃsaggabhedatopi supinabhedo hotiyeva.

Taṃ panetaṃ catubbidhampi supinaṃ sekhaputhujjanāva passanti appahīnavipallāsattā, asekhā na passanti pahīnavipallāsattā. Kiṃ panetaṃ passanto sutto passati paṭibuddho, udāhu neva sutto na paṭibuddhoti? Kiñcetha yadi tāva sutto passati, abhidhammavirodho āpajjati. Bhavaṅgacittena hi supati, taṃ rūpanimittādiārammaṇaṃ rāgādisampayuttaṃ vā na hoti. Supinaṃ passantassa ca īdisāni cittāni uppajjanti. Atha paṭibuddho passati, vinayavirodho āpajjati. Yañhi paṭibuddho passati, taṃ sabbohārikacittena passati. Sabbohārikacittena ca kate vītikkame anāpatti nāma natthi. Supinaṃ passantena pana katepi vītikkame ekantaṃ anāpatti eva. Atha neva sutto na paṭibuddho passati, na nāma passati. Evañca sati supinassa abhāvo ca āpajjati? Na abhāvo. Kasmā? Yasmā kapimiddhapareto passati. Vuttañhetam – ‘‘kapimiddhapareto kho, mahārāja, supinaṃ passatī’’ti.

Kapimiddhaparetoti makkaṭaniddāya yutto. Yathā hi makkaṭassa niddā lahuparivattā hoti, evaṃ yā niddā punappunaṃ kusalādicittavokiṇṇattā lahuparivattā, yassā pavattiyam punappunaṃ bhavaṅgato uttaraṇaṃ hoti, tāya yutto supinaṃ passati. Tenāyaṃ supino kusalopi hoti akusalopi abyākatopi. Tattha supinante cetiyavandanadhammassavanadhammadesanādīni karontassa kusalo, pāṇātipātādīni karontassa akusalo, dvīhi antehi mutto āvajjanatadārammaṇakkhaṇe abyākatoti veditabbo. Svāyaṃ dubbalavattukattā cetanāya paṭisandhiṃ ākaḍḍhituṃ asamatto. Pavatte pana aññehi kusalākusalehi upatthambhito vipākaṃ deti. Kiñcāpi vipākaṃ deti, atha kho avisaye uppannattā abbohārikāva supinantacetanā. So panesa supino kālavasenapi divā tāva diṭṭho na sameti, tathā paṭhamayāme majjhimayāme pacchimayāme ca. Balavapaccūse pana asitapītakhāyite sammā pariṇāmaṃ gate kāyasmim oḷāya paṭiṭṭhitāya aruṇe uggacchamāneva diṭṭho supino sameti. Iṭṭhanimittaṃ supinaṃ passanto iṭṭhaṃ paṭilābhati, aniṭṭhanimittaṃ passanto aniṭṭhaṃ.

Ime pana pañca mahāsupine neva lokiyamahājano passati, na mahārājāno, na cakkavattirājāno, na

aggasāvākā, na paccekabuddhā, na sammāsambuddhā, eko sabbaññubodhisattoyeva passati. Amhākaṃ pana bodhisatto kadā ime supine passīti? “Sve buddho bhavissāmī”ti cātuddasiyaṃ pakkhassa rattivibhāyanakāle passi. Terasiyantipi vadantiyeva. So ime supine disvā uṭṭhāya pallāṅkaṃ ābhūñjitvā nisinno cintesi – “sace mayā kapilavatthunagare ime supinā diṭṭhā assu, pītu mahārājassa katheyyaṃ. Sace pana me mātā jīveyya, tassā katheyyaṃ. Imasmiṃ kho pana ṭhāne imesaṃ paṭiggāhako nāma natthi, ahameva paṭigaṇhissāmī”ti. Tato “idaṃ imassa pubbanimittaṃ idaṃ imassā”ti sayameva supine paṭiggaṇhitvā uruvelagāme sujātāya dinnāṃ pāyāsaṃ paribhuñjitvā bodhimaṇḍaṃ āruya bodhiṃ patvā anukkamena jetavane viharanto attano makulabuddhakāle diṭṭhe pañca mahāsupine vitthāretuṃ bhikkhū āmantetvā imaṃ desanaṃ ārabhi.

Tattha **mahāpathavī**ti cakkavāḷagabbhaṃ pūretvā ṭhitā mahāpathavī. **Mahāsayaṇaṃ ahoṣī**ti sirisayaṇaṃ ahoṣi. **Ohitoti** ṭhapito. So pana na udakasmimyeva ṭhapito ahoṣi, atha kho pācīnasamuddassa uparūparibhāgena gantvā pācīnacakkavāḷamatthake ṭhapito ahoṣī veditabbo. **Pacchime samudde dakkhiṇe samuddeti** etesupi eseva nayo. **Tiriyā nāma tiṇajātī**ti dabbatiṇaṃ vuccati. **Nābhiyā uggantvā nabhaṃ āhacca ṭhitā ahoṣī**ti naṅgalamattena rattadaṇḍena nābhito uggantvā passantassa passantasseva vidatthimattaṃ ratanamattaṃ byāmamattaṃ yaṭṭhimattaṃ gāvutamattaṃ aḍḍhajojanamattaṃ yojanamattanti evaṃ uggantvā uggantvā anekajojanasahassaṃ nabhaṃ āhacca ṭhitā ahoṣi. **Pādehi ussakkivā**ti agganakhato paṭṭhāya pādehi abhiruhitvā. **Nānāvaṇṇā**ti eko nīlavaṇṇo, eko pītavaṇṇo, eko lohīlavaṇṇo, eko paṇḍupalāsavaṇṇoti evaṃ nānāvaṇṇā. **Setā**ti paṇḍarā parisuddhā. **Mahato mīḷhapabbatassā**ti tiyojanubbedhassa gūthapabbatassa. **Uparūpari caṅkamātī**ti matthakamatthake caṅkamati. Dīghāyukabuddhā pana tiyojanike mīḷhapabbate anupavisitvā nisinnā viya honti.

Evaṃ ettakena ṭhānena pubbanimittāni dassetvā idāni saha pubbanimittēhi paṭilābhaṃ dassetuṃ **yampi, bhikkhavi**tiādimāha. Tattha sabbaḡaṇḍāyāyakkattā buddhānaṃ arahattamaggo **anuttarā sammāsambodhi** nāma. Tasmā yaṃ so cakkavāḷamahāpathaviṃ sirisayaṇabhūtaṃ addasa, taṃ buddhabhāvassa pubbanimittaṃ. Yaṃ himavantapabbatarājānaṃ bimbohanaṃ addasa, taṃ sabbaññutaññābimbohanaṃ pubbanimittaṃ. Yaṃ cattāro hatthapāde cakkavāḷamatthake ṭhite addasa, taṃ dhammacakkassa appaṭivattiyabhāve pubbanimittaṃ. Yaṃ attānaṃ uttānakaṃ nīpannaṃ addasa, taṃ tīsu bhavesu avakuḷjānaṃ sattānaṃ uttānamukhabhāvassa pubbanimittaṃ. Yaṃ akkhīni ummīletvā passanto viya ahoṣi, taṃ dibbacakkhupaṭilābhassa pubbanimittaṃ. Yaṃ yāva bhavaggā ekālokaṃ ahoṣi, taṃ anāvaraṇaṇāssa pubbanimittaṃ. Sesaṃ pāḷivaseneva veditabbanti.

7. Vassasuttavaṇṇanā

197. Sattame **nemittā**ti nimittapāṭhakā. **Tejodhātu pakuppatī**ti mahāaggikkhandho uppajjati. **Pāṇinā udakaṃ sampaṭicchitvā**ti uppannaṃ utusamuṭṭhānaṃ udakaṃ tiyojanasatena hatthena paṭiggahetvā. **Pamattā hontī**ti attano kīḷāya pamattā honti vippavuṭṭhasatino. Tesañhi sakāya ratiyā “ramāmā”ti citte uppanne akālepi devo vassati, tadabhāve na vassati. Taṃ sandhāyetaṃ vuttaṃ – “na kālavassa”nti. Aṭṭhamanavamāni uttānatthāneva.

10. Nissāraṇīyasuttavaṇṇanā

200. Dasame **nissāraṇīyā**ti nissaṭā visaññuttā. **Dhātuyoti** attasuññasabhāvā. **Kāmaṃ manasikarototi** kāmaṃ manasikarontassa, asubhajjhānato vuṭṭhāya agadaṃ gahetvā visaṃ vīmaṃsanto viya vīmaṃsanatthaṃ kāmābhimukhaṃ cittaṃ pesentassāti attho. **Na pakkhandatī**ti nappavisati. **Nappasīdatī**ti pasādaṃ nāpajjati. **Na santiṭṭhatī**ti nappatiṭṭhahati. **Na vimuccatī**ti na adhimuccati. Yathā pana kukkuṭapattaṃ vā nhārudaddulaṃ vā aggimhi pakkhittaṃ paṭilīyati patikuṭati pativaṭṭati na saṃpasārīyati, evaṃ paṭilīyati na saṃpasārīyati. **Nekkhammaṃ kho panā**ti idha nekkhammaṃ nāma asubhesu paṭhamajjhānaṃ, tadassa manasikaroto cittaṃ pakkhandati. **Tassa taṃ cittanti** tassa taṃ asubhajjhānacittaṃ. **Sugatanti** gocare gatattā suṭṭhu gataṃ. **Subhāvitanti** ahānabhāgiyattā suṭṭhu

bhāvitaṃ. **Suvuṭṭhanti** kāmato vuṭṭhitaṃ. **Suvimuttanti** kāmehi suṭṭhu vimuttaṃ. **Kāmapaccayā āsavā** nāma kāmahetukā cattāro āsavā. **Vighātāti** dukkhā. **Parilāhāti** kāmarāgaparilāhā. **Na so taṃ vedanaṃ vediyatīti** so taṃ kāmavedanaṃ vighātaparilāhavedanañca na vediyati. **Idamakkhātaṃ kāmānaṃ nissaraṇanti** idaṃ asubhajjhānaṃ kāmehi nissaṭṭatā kāmānaṃ nissaraṇanti akkhātaṃ. Yo pana taṃ jhānaṃ pādakaṃ katvā saṅkhāre sammāsanto tatiyamaggaṃ patvā anāgāmiphaleṇa nibbānaṃ disvā “puna kāmā nāma natthī”ti jānāti. Tassa cittaṃ accantanissaraṇameva. Sesapadesupi eseva nayo.

Ayaṃ pana vireso – dutiyavāre mettājhānāni byāpādassa nissaraṇaṃ nāma. Tatiyavāre karuṇājhānāni vihiṃsāya nissaraṇaṃ nāma. Catutthavāre arūpajjhānāni rūpānaṃ nissaraṇaṃ nāma. Accantanissaraṇaṇcetta arahattaphalaṃ yojetabbaṃ. Pañcamavāre **sakkāyaṃ manasikarototi** suddhasaṅkhāre pariggaṇhitvā arahattaṃ pattassa sukkhavipassakassa phalasaṃpattito vuṭṭhāya vīmaṃsanatthaṃ pañcupādānakkhandhābhimukhaṃ cittaṃ pesentassa. **Idamakkhātaṃ sakkāyassa nissaraṇanti** idaṃ arahattamaggena ca phaleṇa ca nibbānaṃ disvā ṭhitassa bhikkhuno “puna sakkāyo natthī”ti uppannaṃ arahattaphalasaṃpatticcittaṃ sakkāyassa nissaraṇanti akkhātaṃ. Idāni evaṃ sakkāyanissaraṇaṃ nirodhaṃ patvā ṭhitassa khīṇāsavassa vaṇṇaṃ kathento **tassa kāmanandīpi nānusetīti**tiādimāha. Tattha **nānusetīti** na nibbattati. **Ananusayāti** anibbattiyā. Sesamettha uttānatthamevāti.

Brāhmaṇavaggo pañcamaṃ.

Catutthapaṇṇāsakaṃ niṭṭhitaṃ.

5. Pañcamapaṇṇāsakaṃ

(21) 1. Kimilavaggo

1. Kimilasuttavaṇṇanā

201. Pañcamassa paṭhame **kimilāyanti** evaṃnāmake nagare. **Niculavaneti** mucalindavane. **Etadavocāti** ayaṃ kira thero tasmimyeva nagare seṭṭhiputto satthu santike pabbajitvā pubbenivāsaññaṃ paṭilabhi. So attanā nivutthaṃ khandhasantānaṃ anussaranto kassapadasabalassa sāsanosakkanakāle pabbajitvā catūsu parisāsu sāsane agāraṃ karontīsu nisseṇiṃ bandhitvā pabbataṃ āruya tattha samaṇadhammaṃ katvā attano nivutthabhāvaṃ addasa. So “satthāraṃ upasaṅkamitvā taṃ kāraṇaṃ pucchissāmi”ti etaṃ “ko nu kho, bhante”tiādivacanaṃ avoca.

Satthari agāravā viharanti appatissāti satthari gāraṇeṇa jeṭṭhakabhāvañca anupaṭṭhapetvā viharanti. Sesesupi eseva nayo. Tattha cetiyaṅgaṇādisu chattaṃ dhāretvā upāhanā āruya vicaranto nānappakārañca niratthakakathaṃ kathento satthari agāraṃ viharati nāma. Dhammassavanagge pana nisīditvā niddāyanto ceva nānappakārañca niratthakakathaṃ kathento dhamme agāraṃ viharati nāma. Saṅghamajjhe bāhāvikkhepaṃ nānattakathaṃ kathento theranavamañjimesu ca cittikāraṃ akaronto saṅghe agāraṃ viharati nāma. Sikkhaṃ aparipūrento sikkhāya agāraṃ viharati nāma. Aññaṃaññaṃ kalahabhaṇḍanādīni karonto aññaṃaññaṃ agāraṃ viharati nāma. Dutiyaṃ uttānatthameva.

3. Assājānīyasuttavaṇṇanā

203-204. Tatiye **ajjavenāti** ujjabhāvena avaṅkagamanena. **Javenāti** padajavena. **Maddavenāti** sarīramudutāya. **Khantiyāti** adhivāsanakkhantiyā. **Soraccenāti** sucisīlatāya. Bhikkhuvāre **ajjavanti** ñāṇassa ujukagamaṇaṃ. **Javoti** sūraṃ hutvā ñāṇassa gamanabhāvo. **Maddavanti** sīlamaddavaṃ. **Khanti**ti adhivāsanakkhantiyeva. **Soraccaṃ** sucisīlatāyeva. Catutthe pañca balāni missakāni kathitāni.

5. Cetokhilasuttavaṇṇanā

205. Pañcame **cetokhilā**ti cittaṣa thaddhabhāvā, kacavarabhāvā, khāṇukabhāvā. **Satthari kaṅkhatī**ti satthu sarīre vā guṇe vā kaṅkhati. Sarīre kaṅkhamāno “dvattiṃsavarapurisalakkhaṇapaṭimaṇḍitaṃ nāma sarīraṃ atthi nu kho natthī”ti kaṅkhati, guṇe kaṅkhamāno “atītānāgatapaccuppannajānanasamatthaṃ sabbaññutaññānaṃ atthi nu kho natthī”ti kaṅkhati. **Vicikicchati**ti vicinanto kicchati, dukkhaṃ āpajjati, vinicchetaṃ na sakkoti. **Nādhimuccati**ti evametanti adhimokkhaṃ na paṭilabhati. **Na sampasīdatī**ti guṇesu otarivā nibbicikicchabhāvena pasīditaṃ anāvilo bhavitaṃ na sakkoti. **Ātappāyāti** kilesasantāpakavīriyakaraṇatthāya. **Anuyogāyāti** punappunaṃ yogāya. **Sātaccāyāti** satatakiriya. **Padhānāyāti** padahanatthāya. **Ayaṃ paṭhamo cetokhiloti** ayaṃ satthari vicikicchāsāṅkhāto paṭhamo cittaṣa thaddhabhāvo evametassa bhikkhuno appahīno hoti.

Dhammeti pariyattidhamme ca paṭivedhadhamme ca. Pariyattidhamme kaṅkhamāno “tepiṭakaṃ buddhavacanaṃ caturāsītidhammakhandhasahassānīti vadanti, atthi nu kho etaṃ natthī”ti kaṅkhati. Paṭivedhadhamme kaṅkhamāno “vipassanānissando maggo nāma, magganissandaṃ phalaṃ nāma, sabbasaṅkhārapaṭinissaggo nibbānaṃ nāmāti vadanti, taṃ atthi nu kho natthī”ti kaṅkhati. **Saṅghe kaṅkhatī**ti “ujjupaṭipanno”tiādīnaṃ padānaṃ vasena “evarūpaṃ paṭipadaṃ paṭipanno cattāro maggaṭṭhā cattāro phalaṭṭhāti aṭṭhannaṃ puggalānaṃ samūhabhūto saṅgho nāma atthi nu kho natthī”ti kaṅkhati. **Sikkhāya** kaṅkhamāno “adhisīlasikkhā nāma adhicitāadhipaññāsikkhā nāmāti vadanti, sā atthi nu kho natthī”ti kaṅkhati. **Ayaṃ pañcamoti** ayaṃ sabrahmacārīsu kopasaṅkhāto pañcama cittaṣa thaddhabhāvo kacavarabhāvo khāṇukabhāvo.

6. Vinibandhasuttavaṇṇanā

206. Chaṭṭhe **cetasovinibandhā**ti cittaṃ vinibandhitvā muṭṭhiyaṃ katvā viya gaṇhantīti cetasovinibandhā. **Kāmeti** vatthukāmepe kilesakāmepe. **Kāyete** attano kāye. **Rūpeti** bahiddhārūpe. **Yāvadatthanti** yattakaṃ icchati, tattakaṃ. **Udarāvadehakanti** udarapūraṃ. Tañhi udaraṃ avadehanato udarāvadehakanti vuccati. **Seyyasukhanti** mañcapīṭhasukhaṃ, utusukhaṃ vā. **Passasukhanti** yathā samparivattakaṃ sayantassa dakkhiṇapassa vāmapassānaṃ sukhaṃ hoti, evaṃ uppannasukhaṃ. **Middhasukhanti** niddāsukhaṃ. **Anuyuttoti** yuttappayutto viharati. **Paṇidhāyāti** patthayitvā. **Sīlenā**tiādīsu **sīlanti** catupārisuddhisīlaṃ. **Vatanti** vatasamādānaṃ. **Tapoti** tapacaraṇaṃ. **Brahmacariyanti** methunavirati. **Devo vā bhavissāmīti** mahesakkhadevo vā bhavissāmi. **Devaññataro vāti** appesakkhadevesu vā aññataroti.

7-8. Yāgusuttādivaṇṇanā

207-208. Sattame **vātaṃ anulometīti** vātaṃ anulometvā harati. **Vatthiṃ sodhetīti** dhamaniyo suddhā karoti. **Āmāvasesaṃ pāceti**ti sace āmāvasesakaṃ hoti, taṃ pāceti. Aṭṭhame **acakkhussanti** na cakkhūnaṃ hitaṃ, cakkhuṃ visuddhaṃ na karoti.

9. Gītassarasuttavaṇṇanā

209. Navame **āyatakenā**ti dīghena, paripuṇṇapadabyañjanakaṃ gāthāvattañca vināsetvā pavattena. **Sarakuttimpi nikāmayamānassāti** evaṃ gītassaro kātabboti sarakiriyaṃ patthayamānassa. **Samādhissa bhaṅgo hotīti** samathavipassanācittaṣa vināso hoti.

10. Muṭṭhassatisuttavaṇṇanā

210. Dasame **dukkhaṃ supatīti** nānāvidhaṃ supinaṃ passanto dukkhaṃ supati. **Dukkhaṃ**

paṭibujjhatī paṭibujjhantopi uttasitvā salomahaṃso paṭibujjhati. Imasmiṃ sutte satisampajaññaṃ missakaṃ kathitaṃ.

Kimilavaggo paṭhamo.

(22) 2. Akkosakavaggo

1. Akkosakasuttavaṇṇanā

211. Dutiyassa paṭhame **akkosakaparibhāsakoti** dasahi akkosavatthūhi akkosako, bhayadassanena paribhāsako. **Chinnaparipanthoti** lokuttaraparipanthassa chinnattā chinnaparipantho. **Rogātaṅkanti** rogoyeva kicchajīvikāyāvahanato rogātaṅko nāma.

2. Bhaṇḍanakāraḥasuttavaṇṇanā

212. Dutīye **adhikaraṇakāraḥakoti** catunnaṃ adhikaraṇānaṃ aññatarassa kāraḥako. **Anadhigatanti** pubbe appattavisesaṃ.

3. Silasuttavaṇṇanā

213. Tatiye **dussīloti** asīlo nissīlo. **Silavipannoti** vipannasīlo bhinnasaṃvaro. **Pamādādhikaraṇanti** pamādakāraṇā. Idañca suttaṃ gahaṭṭhānaṃ vasena āgataṃ, pabbajitānampi pana labbhateva. Gahaṭṭho hi yena yena sippaṭṭhānena jīvikaṃ kappeti, yadi kasiyā, yadi vaṇijjāya, pāṇātipātādivasena pamatto taṃ taṃ yathākālaṃ sampādetuṃ na sakkoti, athassa mūlaṃ vinassati. Māghātakālepi pāṇātipātaṃ adinnādānādīni ca karonto daṇḍavasena mahatiṃ bhogajāniṃ nigacchati. Pabbajito dussīlo pamādakāraṇā sīlato buddhavacanato jhānato sattaariyadhanato ca jāniṃ nigacchati. Gahaṭṭhassa “asuko asukakule jāto dussīlo pāpadhammo pariccattaidhalokaparaloko salākabhattamattampi na detī”ti catuparisamajje pāpako kittisaddo abbhuggacchati. Pabbajitassa “asuko nāsakkhi sīlaṃ rakkhituṃ buddhavacanaṃ gahetuṃ, vejjakammādīhi jīvati, chahi agāravehi samannāgato”ti evaṃ abbhuggacchati.

Avisāradoti gahaṭṭho tāva “avassaṃ bahūnaṃ sannipātaṭṭhāne koci mama kammaṃ jānissati, atha maṃ niggaṇhissanti vā, rājakulassa vā dassanti”ti sabhayo upasaṅkamati. **Maṅkubhūto** ca patitakkhandho adhomukho aṅguṭṭhakena bhūmiṃ kasanto nisīdati, visārado hutvā kathetuṃ na sakkoti. Pabbajitopi “bahū bhikkhū sannipatitā, avassaṃ koci mama kammaṃ jānissati, atha me uposathampi pavāraṇampi ṭhapetvā sāmañña cāvetvā nikkadḍhissanti”ti sabhayo upasaṅkamati, visārado hutvā kathetuṃ na sakkoti. Ekacco pana dussīlopi dappito viya carati, sopi ajjhāsayena maṅku hotiyeva.

Sammūlho kālaṃ karotīti tassa hi maraṇamañce nipannassa dussīlakammaṃ samādāya vattitaṭṭhānaṃ āpāthaṃ āgacchati. So ummīletvā idhalokaṃ passati, nimmīletvā paralokaṃ. Tassa cattāro apāyā upaṭṭhahanti, sattisatena sīse pahariyamāno viya hoti. So “vāretha vārethā”ti viravanto marati. Tena vuttaṃ – “sammūlho kālaṃ karotī”ti. Pañcamapadaṃ uttānameva. Ānisaṃsakathā vuttavipariyāyena veditabbā.

4. Bahubhāṇisuttavaṇṇanā

214. Catutthe **bahubhāṇisminti** paññāya aparicchinditvā bahuṃ bhaṇante. **Mantabhāṇisminti** mantā vuccati paññā, tāya paricchinditvā bhaṇante.

5. Paṭhamaakkhantisuttavaṇṇanā

215. Pañcame **verabahuloti** puggalaverenapi akusalaverenapi bahuvero. **Vajjabahuloti** dosabahulo.

6. Dutiyaakkhantisuttavaṇṇanā

216. Chaṭṭhe **luddoti** dāruṇo kakkhaḷo. **Vipparisārīti** maṅkubhāvena samannāgato.

7. Paṭhamaapāsādikasuttavaṇṇanā

217. Sattame **apāsādiketi** apāsādikehi kāyakammādīhi samannāgate. **Pāsādiketi** pasādāvahe parisuddhasamācāre. Aṭṭhamanavamāni uttānatthāneva.

10. Madhurāsuttavaṇṇanā

220. Dasame **pañcime, bhikkhave, ādīnavā madhurāyanti** ekaṃ samayaṃ bhagavā bhikkhusaṅghaparivuto cārikaṃ caramāno madhurānagaram sampāpuṇitvā antonagaram pavisitum ārabhi. Athekā micchādīṭṭhikā yakkhinī acelā hutvā dve hatthe pasāretvā jivhaṃ nilāletvā dasabalassa purato aṭṭhāsi. Satthā antonagaram appavisitvā tatova nikkhamitvā vihāraṃ agamāsi. Mahājano khādaniyabhojanīyañceva sakkārasammānañca ādāya vihāraṃ gantvā buddhappamukhassa bhikkhusaṅghassa dānaṃ adāsi. Satthā tassa nagarassa niggaṇhanatthāya imaṃ suttaṃ ārabhi. Tattha **visamāti** na samatalā. **Bahurajāti** vātapaharaṇakāle uddhatena rajakkhandhena pariyonaddhā viya hoti. Sesam sabbattha uttānamevāti.

Akkosakavaggo dutiyo.

(23) 3. Dīghacārikavaggo

1. Paṭhamadīghacārikasuttavaṇṇanā

221. Tatiyassa paṭhame **anavatthacārikanti** avavatthitacārikaṃ. **Sutaṃ na pariyodapetīti** yampissa sutaṃ atthi, taṃ pariyodapetuṃ na sakkoti. **Sutenekaccena avisārado hotīti** thokathokena sutena vijjamānenāpi ñāṇena somanassappatto na hoti. **Samavatthacāreti** samavatthitacāre. Dutiyam uttānatthameva.

3-4. Atinivāsasuttādivaṇṇanā

223-224. Tatiye **bahubhaṇḍoti** bahuparikkhāro. **Bahubhesajjoti** sappinavanītādīnaṃ bahutāya bahubhesajjo. **Byattoti** byāsatto. **Saṃsaṭṭhoti** pañcavidhena saṃsaggena saṃsaṭṭho hutvā. **Ananulomikenāti** sāsanassa ananucchavikena. Catutthe **vaṇṇamaccharīti** guṇamaccharī. **Dhammaccharīti** pariyattimaccharī.

5-6. Kulūpakasuttādivaṇṇanā

225-226. Pañcame **anāmantacāre āpajjātīti** “nimantito sabhatto samāno santaṃ bhikkhuṃ anāpucchā purebhattaṃ vā pacchābhattaṃ vā kulesu cārittaṃ āpajjeyyā”ti sikkhāpade (pārā. 294) vuttaṃ āpattim āpajjati. **Raho nisajjāyāti**ādīnipi tesam tesam sikkhāpadānaṃ vasena vedītabbāni. Chaṭṭhe **ativelanti** atikkantapamāṇakālaṃ. Sattamaṃ uttānameva.

8. Ussūrabhattasuttavaṇṇanā

228. Aṭṭhame **ussūrabhatteti** atidivāpacanabhatte. **Na kālena paṭipūjentīti** yāgukāle yāguṃ, khajjakakāle khajjakam, bhojanakāle bhojanam apacantā yuttappayuttakālassa atināmitattā na kālena paṭipūjenti, attano citteneva denti nāma. Tato tepi tesu attano geham āgatesu tatheva karonti. Kulapaveṇiyā āgatā balipaṭiggāhikā devatāpi yuttappayuttakālena lābham labhamānāyeva rakkhanti gopayanti pīlam akatvā. Akāle labhamānā pana “ime amhesu anādarā”ti ārakkham na karonti.

Samaṇabrāhmaṇāpi “etesam gehe bhojanavelāya bhojanam na hoti, ṭhitamajjhanhike denti”ti maṅgalāmaṅgalesu kātabbam na karonti. **Vimukhā kammaṃ karontīti** “pāto kiñci na labhāma, khudāya paṭipīlitā kammaṃ kātuṃ na sakkomā”ti kammaṃ vissajjtvā nisīdanti. **Anojavantam hotīti** akāle bhuttaṃ ojaṃ harituṃ na sakkoti. Sukkapakkho vuttavipallāsena veditabbo.

9. Paṭhamakaṇhasappasuttavaṇṇanā

229. Navame **sabhīrūti** saniddo mahāniddam niddāyati. **Sappaṭibhayoti** tam nissāya bhayaṃ uppajjati, tasmā sappaṭibhayo. **Mittadubbhīti** pānabhojanadāyakampi mittam dubbhati hiṃsati. Mātugāmepe eseve nayo.

10. Dutiyakaṇhasappasuttavaṇṇanā

230. Dasame **ghoravisoti** kakkhaḷaviso. **Dujjivhoti** dvidhā bhinnajivho. **Ghoravisatīti** ghoravisatāya. Sesadvayepi eseve nayo.

Dīghacārikavaggo tatiyo.

(24) 4. Āvāsikavaggo

1. Āvāsikasuttavaṇṇanā

231. Catutthassa paṭhame **na ākappasampannoti** samaṇākappena sampanno. **Abhāvanīyo hotīti** vaḍḍhanīyo na hoti. Dutiyam uttānameva.

3. Sobhanasuttavaṇṇanā

233. Tatiye **paṭibaloti** kāyabalena ca ñāṇabalena ca samannāgatattā paṭibalo.

4. Bahūpakārasuttavaṇṇanā

234. Catutthe **khaṇḍaphullanti** patitaṭṭhānañca bhinnaṭṭhānañca. **Paṭisaṅkharotīti** paṭipākatikam karoti. **Ārocetīti** idam pavāritakulānam vasena vuttaṃ.

5. Anukampasuttavaṇṇanā

235. Pañcame **adhisīlesūti** pañcasu sīlesu. **Dhammadassane nivesetīti** catusaccadhammadassane patiṭṭhāpeti. **Arahaggatanti** sabbasakkārānam arahe ratanattayeva gatam, tīsu vatthūsu garucittikāram upaṭṭhapethāti attho. Chaṭṭham uttānameva.

7. Dutiyaavaṇṇārahasuttavaṇṇanā

237. Sattame **āvāsapaligedhīti** āvāsam balavagiddhivasena gilitvā viya ṭhito. Sesam sabbam uttānamevāti.

Āvāsikavaggo catuttho.

(25) 5. Duccaritavaggo

1. Paṭhamaduccaritasuttavaṇṇanā

241. Pañcamassa paṭhame **duccarite sucariteti** idaṃ abhedato vuttaṃ, **kāyaduccariteti**ādi kāyadvārādīnaṃ vasena bhedato. **Saddhammāti** dasakusalakammamapathadhammato. **Asaddhammeti** akusalakammamapathasāṅkhāte assaddhamme.

9. Sivathikasuttavaṇṇanā

249. Navame **sivathikāyāti** susāne. **Ārodanāti** ārodanaṭṭhānaṃ. **Asucināti** jigucchaniyena.

10. Puggalappasādasuttavaṇṇanā

250. Dasame **puggalappasādeti** ekapuggalasmimṃ uppannappasāde. **Ante nisīdāpetīti** bhikkhūnaṃ āsanapariyante nisīdāpeti. Sesamṃ sabbattha uttānatthamevāti.

Duccaritavaggo pañcama.

Pañcamapaṇṇāsakaṃ niṭṭhitaṃ.

(26) 6. Upasampadāvaggo

1-3. Upasampādetabbasuttādivaṇṇanā

251-253. Chaṭṭhassa paṭhame **upasampādetabbanti** upajjhāyena hutvā upasampādetabbaṃ. Dutiye **nissayo dātabboti** ācariyena hutvā nissayo dātabbo. Tatiye **sāmaṇero upaṭṭhāpetabboti** upajjhāyena hutvā sāmaṇero gahetabbo. Iti imāni tīṇipi suttāni paṭhamabodhiyaṃ khīṇāsavavasena vuttāni. Catutthādīni anupadaṇṇanāto uttānatthāneva.

1. Sammutipeyyālādivaṇṇanā

272. Bhattuddesakādīnaṃ vinicchayakathā samantapāsādikāya vinayaṭṭhakathāyaṃ (cūḷava. aṭṭha. 325) vuttanayena veditabbāti. **Sammato na pesetabboti** pakatīyā sammato “gaccha bhattāni uddisāhī”ti na pesetabbo.

273-285. **Sāṭiyaggāhāpakoti** vassikasāṭikāya gāhāpako. **Pattaggāhāpakoti** “yo ca tassā bhikkhuparisāya pattapariyanto, so tassa bhikkhuno padātabbo”ti ettha vuttapattaggāhāpako.

293-302. **Ājīvakoti** naggaparibbājako. **Nigaṇṭhoti** purimabhāgappaṭicchanno. **Muṇḍasāvakoti** nigaṇṭhasāvako. **Jaṭīlakoti** tāpaso. **Paribbājakoti** channaparibbājako. **Māgaṇḍikā**dayopi titthiyā eva. Etesamṃ pana sīlesu paripūrakāritāya abhāvena sukkapakkho na gahito. Sesamettha uttānamevāti.

Manorathapūraṇiyā aṅguttaranikāya-aṭṭhakathāya

Pañcakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Chakkanipāta-aṭṭhakathā

1. Paṭhamapaṇṇāsakaṃ

1. Āhuneyyavaggo

1. Paṭhamaāhuneyyasuttavaṇṇanā

1. Chakkanipātassa paṭhame **idha, bhikkhave, bhikkhūti**, bhikkhave, imasmiṃ sāsane bhikkhu. **Neva sumano hoti na dummanoti** iṭṭhārammaṇe rāgasahagatena somanassena sumano vā aniṭṭhārammaṇe dosasahagatena domanassena dummano vā na hoti. **Upekkhako viharati sato sampajānoti** majjhārammaṇe asamapekkhanena aññāṇupekkhāya upekkhakabhāvaṃ anāpajjitvā sato sampajāno hutvā ārammaṇe majjhatto viharati. Imasmiṃ sutte khīṇāsavassa satatavihāro kathito.

2. Dutiyāāhuneyyasuttavaṇṇanā

2-4. Dutīye **anekavihitam iddhividhanti**ādīni visuddhimagge vuttāneva. **Āsavānaṃ khayā anāsavanti** āsavānaṃ khayena anāsavaṃ, na cakkhuvīññāṇādīnaṃ viya abhāvenāti. Imasmiṃ sutte khīṇāsavassa abhiññā paṭipāṭiyā kathitā. Tatiyacatutthesu khīṇāsavo kathito.

5-7. Ājānīyasuttattayavaṇṇanā

5-7. Pañcame **aṅgehīti** guṇaṅgehi. **Khamoti** adhiṅāsako. **Rūpānanti** rūpārammaṇānaṃ. **Vaṇṇasampannoti** sarīravaṇṇena sampanno. Chatṭhe **balasampannoti** kāyabalena sampanno. Sattame **javasampannoti** padajavena sampanno.

8-9. Anuttariyasuttādivaṇṇanā

8-9. Aṭṭhame **anuttariyānīti** aññena uttaritarena rahitāni niruttarāni. **Dassanānuttariyanti** rūpadassanesu anuttaraṃ. Esa nayo sabbapadesu. Hatthiratanādīnañhi dassanaṃ na dassanānuttariyaṃ, nivīṭṭhasaddhassa pana nivīṭṭhapemavasena dasabalassa vā bhikkhusaṅghassa vā kasiṇaasubhanimittādīnaṃ vā aññatarassa dassanaṃ dassanānuttariyaṃ nāma. Khattiyādīnaṃ guṇakathāsavanaṃ na savanānuttariyaṃ, nivīṭṭhasaddhassa pana nivīṭṭhapemavasena tiṇṇaṃ vā ratanānaṃ guṇakathāsavanaṃ tepiṭakabuddhavacanasavanaṃ vā savanānuttariyaṃ nāma. Mañiratanādīnaṃ lābho na lābhānuttariyaṃ, sattavidhaariyadhanaṃ lābho pana lābhānuttariyaṃ nāma. Hatthisippādisikkhanaṃ na sikkhānuttariyaṃ, sikkhāttayassa pūraṇaṃ pana sikkhānuttariyaṃ nāma. Khattiyādīnaṃ pāricariyā na pāricariyānuttariyaṃ, tiṇṇaṃ pana ratanānaṃ pāricariyā pāricariyānuttariyaṃ nāma. Khattiyādīnaṃ guṇānussaraṇaṃ na anussatānuttariyaṃ, tiṇṇaṃ pana ratanānaṃ guṇānussaraṇaṃ anussatānuttariyaṃ nāma. Iti imāni cha anuttariyāni lokiyalokuttarāni kathitāni. Navame **buddhānussatīti** buddhaguṇārammaṇā sati. Sesapadesupī eśeva nayo.

10. Mahānāmasuttavaṇṇanā

10. Dasame **mahānāmoti** dasabalassa cūlapitu putto eko sakyaṛājā. **Yena bhagavā**

tenupasaṅkamīti bhuttapātarāso hutvā dāsaparijanaparivuto gandhamālādīni gāhāpetvā yattha satthā, tattha agamāsi. Ariyaphalaṃ assa āgatanti **āgataphalo**. Sikkhattayasāsanaṃ etena viññātanti **viññātasāsano**. Iti ayaṃ rājā “sotāpannessa nissayavihāraṃ pucchāmī”ti pucchanto evamāha.

Nevasa rāgapariyutthitanti na uppajjamānena rāgena utthahitvā gahitaṃ. **Ujugatanti** buddhānussatikammaṭṭhāne ujukameva gataṃ. **Tathāgataṃ ārabbhāti** tathāgataḡuṇe ārabbhā. **Atthavedanti** aṭṭhakathaṃ nissāya uppannaṃ pītipāmojjam. **Dhammavedanti** pāliṃ nissāya uppannaṃ pītipāmojjam. **Dhammūpasañhitanti** pāliṃca aṭṭhakathaṃca nissāya uppannaṃ. **Pamuditassāti** duvidhena pāmojjena pamuditassa. **Pīti jāyatīti** pañcavidhā pīti nibbattati. **Kāyo passambhatīti** nāmakāyo ca karajakāyo ca darathapaṭippassaddhiyā paṭippassambhati. **Sukhanti** kāyikacetāsikasukhaṃ. **Samādhiyatīti** ārammaṇe sammā ṭhapitaṃ hoti. **Visamagatāya pajāyāti** rāgadosamohavisamagatesu sattesu. **Samappattoti** samaṃ upasamaṃ patto hutvā. **Sabyāpajjhāyāti** sadukkhāya. **Dhammasotaṃ samāpannoti** vipassanāsāṅkhātaṃ dhammasotaṃ samāpanno. **Buddhānussatiṃ bhāvetīti** buddhānussatikammaṭṭhānaṃ brūheti vaḍḍheti. Iminā nayena sabbattha attho vedītabbo. Iti mahānāmo sotāpannessa nissayavihāraṃ pucchi. Satthāpissa tameva kathesi. Evaṃ imasmiṃ sutte sotāpannova kathitoti.

Āhuneyyavaggo paṭhamo.

2. Sāraṇīyavaggo

1. Paṭhamasāraṇīyasuttavaṇṇanā

11. Dutiyassa paṭhame **sāraṇīyāti** saritabbayuttakā. **Mettaṃ kāyakammanti** mettena cittena kātabbaṃ kāyakammaṃ. **Vacīkammamanokammesupi** eseva nayo. Imāni ca pana bhikkhūnaṃ vasena āgatāni, gihīsupi labbhanti. Bhikkhūnañhi mettena cittena ābhisamācārikadhammapūraṇaṃ mettaṃ kāyakammaṃ nāma. Gihīnaṃ cetiyavandanatthāya bodhivandanatthāya saṅghanimantanatthāya gamanaṃ, gāmaṃ piṇḍāya pavitṭhe bhikkhū disvā paccuggamaṃ, pattapaṭiggahaṇaṃ, āsanapaññānaṃ, anugamaṇanti evamādikaṃ mettaṃ kāyakammaṃ nāma.

Bhikkhūnaṃ mettena cittena ācārapaṇṇattisikkhāpanaṃ, kammaṭṭhānakathanaṃ, dhammadesanā, teṭṭakampi buddhavacanaṃ mettaṃ vacīkammaṃ nāma. Gihīnaṃ “cetiavandanāya gacchāma, bodhivandanāya gacchāma, dhammassavanaṃ karissāma, dīpamālāpupphapūjaṃ karissāma, tīṇi sucaritāni samādāya vattissāma, salākabhattādīni dassāma, vassāvāsikaṃ dassāma, ajja saṅghassa cattāro paccaye dassāma, saṅghaṃ nimantetvā khādanīyādīni saṃvidahatha, āsanāni paññāpetha, pānīyaṃ upaṭṭhāpetha, saṅghaṃ paccuggantvā ānetha, paññāttāsane nisīdāpetvā ussāhajātā veyyāvaccam karoṭhā”tiādivacanakāle mettaṃ vacīkammaṃ nāma.

Bhikkhūnaṃ pātova utthāya sarīrapaṭijagganaṃ cetiyaṅgaṇavattādīni ca katvā vivittāsane nisīditvā “imasmiṃ vihāre bhikkhū sukhī hontu averā abyāpajjhā”ti cintanaṃ mettaṃ manokammaṃ nāma. Gihīnaṃ “ayyā sukhī hontu averā abyāpajjhā”ti cintanaṃ mettaṃ manokammaṃ nāma.

Āvi ceva raho cāti sammukhā ca parammukhā ca. Tattha navakānaṃ cīvarakammādīsū sahāyabhāvagamanaṃ sammukhā mettaṃ kāyakammaṃ nāma, therānaṃ pana pādadhovanadānādibhedam sabbampi sāmīcikammaṃ sammukhā mettaṃ kāyakammaṃ nāma. Ubhayehipi dunnikkhittānaṃ dārubhaṇḍādīnaṃ tesu avaññaṃ akatvā attanā dunnikkhittānaṃ viya paṭisāmanaṃ parammukhā mettaṃ kāyakammaṃ nāma. “Devatthero tissatthero”ti evaṃ paggayha vacanaṃ sammukhā mettaṃ vacīkammaṃ nāma. Vihāre asantaṃ pana paṭipucchantassa “kaḡaṃ amhākaṃ devatthero, kaḡaṃ amhākaṃ tissatthero, kadā nu kho āgamissatī”ti evaṃ mamāyanavacanaṃ parammukhā mettaṃ vacīkammaṃ nāma. Mettāsinehasiniddhāni pana nayanāni ummīletvā pasannena

mukhena olokanaṃ sammukhā mettaṃ manokammaṃ nāma. “Devatthero tissatthero arogo hotu appābādhō”ti samannāharaṇaṃ parammukhā mettaṃ manokammaṃ nāma.

Lābhāti cīvarādayo laddhapaccayā. **Dhammikāti** kuhanādibhedam micchājīvaṃ vajjetvā dhammena samena bhikkhācariyavattena uppannā. **Antamaso pattapariyāpannamattampīti** pacchimakoṭiyā pattapariyāpannaṃ pattassa antogataṃ dvattikaṭacchubhikkhāmattampī. **Appaṭivibhattabhogīti** ettha dve paṭivibhattāni nāma āmisapaṭivibhattaṃ pana puggalapaṭivibhattaṃ. Tattha “ettakaṃ dassāmi, ettakaṃ na dassāmī”ti evaṃ cittena paṭivibhajaṇaṃ āmisapaṭivibhattaṃ nāma. “Asukassa dassāmi, asukassa na dassāmī”ti evaṃ cittena vibhajaṇaṃ pana puggalapaṭivibhattaṃ nāma. Tadubhayampi akatvā yo appaṭivibhattaṃ bhuñjati, ayaṃ appaṭivibhattabhogī nāma. **Sīlavantehi sabrahmacārīhi sādharmaṇabhogīti** ettha sādharmaṇabhogino idaṃ lakkhaṇaṃ – yaṃ yaṃ paṇītaṃ labhati, taṃ taṃ neva lābhenalābhaṃ-nijigīsanatāmukhena gihīnaṃ deti, na attanā paribhuñjati, paṭiggaṇhanto ca “saṅghena sādharmaṇaṃ hotū”ti gahetvā ghaṇṭiṃ paharivā paribhuñjitabbaṃ saṅghasantakaṃ viya passati.

Imaṃ pana sāraṇīyadhammaṃ ko pūreti, ko na pūreti? Dussīlo tāva na pūreti. Na hi tassa santakaṃ sīlavantā gaṇhanti. Parisuddhasīlo pana vattaṃ akhaṇḍento pūreti. Tatridaṃ vattaṃ – yo hi odissakaṃ katvā mātu vā pitu vā ācariyupajjhāyādīnaṃ vā deti, so dātabbaṃ deti. Sāraṇīyadhammo panassa na hoti, palibodhajaggaṇaṃ nāma hoti. Sāraṇīyadhammo hi muttapalibodhassa vaṭṭati. Tena pana odissakaṃ dentena gilānagilānupaṭṭhākaāgantukagamikānañceva navapabbajitassa ca saṅghāṭipattaggaṇaṃ ajānantassa dātabbaṃ. Etesaṃ datvā avasesaṃ therāsanato paṭṭhāya thokaṃ thokaṃ adatvā yo yattakaṃ gaṇhāti, tassa tattakaṃ dātabbaṃ. Avasiṭṭhe asati puna piṇḍāya caritvā therāsanato paṭṭhāya yaṃ yaṃ paṇītaṃ, taṃ taṃ datvā sesaṃ bhuñjitabbaṃ. “Sīlavantehi”ti vacanato dussīlassa adātumpi vaṭṭati.

Ayaṃ pana sāraṇīyadhammo susikkhitāya parisāya supūro hoti, susikkhitāya hi parisāya yo aññato labhati, so na gaṇhāti. Aññato alabhantopi pamāṇayuttameva gaṇhāti, na atirekaṃ. Ayaṃ pana sāraṇīyadhammo evaṃ punappunaṃ piṇḍāya caritvā laddhaṃ laddhaṃ dentassāpi dvādasahi vassehi pūreti, na tato oraṃ. Sace hi dvādasame vasse sāraṇīyadhammapūraṃ piṇḍapātapūraṃ pattaṃ āsanāsālāyaṃ ṭhapetvā nhāyitum gacchati, saṅghatthero ca “kasseso patto”ti vatvā “sāraṇīyadhammapūrakassā”ti vutte “āharatha na”nti sabbam piṇḍapātaṃ vicāretvāva bhuñjitvā rittapattaṃ ṭhapeti. Atha kho so bhikkhu rittapattaṃ disvā “mayhaṃ asesetvāva paribhuñjimsū”ti domanassaṃ uppādeti, sāraṇīyadhammo bhijjati, puna dvādasā vassāni pūretabbo hoti. Titthiyaparivāsasadisō hesa, sakim khaṇḍe jāte puna pūretabbova. Yo pana “lābhā vata me, suladdhaṃ vata me, yassa me pattagataṃ anāpucchāva sabrahmacārī paribhuñjantī”ti somanassaṃ janeti, tassa puṇṇo nāma hoti.

Evaṃ pūritasāraṇīyadhammassa pana neva issā na macchariyaṃ hoti, manussānaṃ piyo hoti, amanussānaṃ piyo hoti, sulabhapaccayo. Pattagatamassa diyyamānampi na khīyati, bhājanīyabhaṇḍaṭṭhāne aggabhaṇḍam labhati, bhaye vā chātake vā patte devatā ussukkaṃ āpajjanti.

Tatrimāni vatthūni – **senagirivāsī tissatthero** kira mahāgīrigāmaṃ upanissāya vasati, paññāsa mahātherā nāgadīpaṃ cetiyavandanatthāya gacchantā girigāme piṇḍāya caritvā kiñci aladdhā nikkhamimsu. Thero pavisanto te disvā pucchi – “laddhaṃ, bhante”ti? Vicarimhā, āvusoti. So aladdhabhāvaṃ ñatvā āha – “bhante, yāvāhaṃ āgacchāmi, tāva idheva hothā”ti. Mayaṃ, āvuso, paññāsa janā pattatemanamattampī na labhimhāti. Bhante, nevāsikā nāma paṭibalā honti, alabhantāpi bhikkhācāramaggasabhāgaṃ jānantīti. Therā āgamesuṃ. Thero gāmaṃ pavisi. Dhuraḡeheyeva mahāupāsikā khīrabhattaṃ sajjetvā therāṃ olokayamānā ṭhitā therassa dvāraṃ sampattasseva pattaṃ pūretvā adāsi. So taṃ ādāya therānaṃ santikaṃ gantvā “gaṇhatha, bhante”ti saṅghattheraṃ āha. Thero “amhehi ettakehi kiñci na laddhaṃ, ayaṃ sīghameva gahetvā āgato, kim nu kho”ti sesānaṃ mukhaṃ olokesi. Thero olokanākāreneva ñatvā, “bhante, dhammena samena laddho, nikkukkuccā gaṇhathā”ti

ādito paṭṭhāya sabbesaṃ yāvadatthaṃ datvā attanāpi yāvadatthaṃ bhuñji.

Atha naṃ bhattakiccāvasāne therā pucchimsu – “kadā, āvuso, lokuttaradhammaṃ paṭivijjhī”ti? Natthi me, bhante, lokuttaradhammoti. Jhānalābhīsi, āvusoti. Etampi, bhante, natthīti? Nanu, āvuso, paṭihāriyanti. Sāraṇīyadhammo me, bhante, pūrito, tassa me pūritakā lato paṭṭhāya sacepi bhikkhusatasahassaṃ hoti, pattagataṃ na khīyatīti. Sādhu sādhu, sappurisa, anucchavikamidaṃ tuyhanti. Idaṃ tāva **pattagataṃ na khīyatīti** ettha vatthu.

Ayameva pana thero cetiyapabbate giribhaṇḍamahāpūjāya dānaṭṭhānaṃ gantvā “imasmiṃ dāne kiṃ varabhaṇḍa”nti pucchi. Dve sātākā, bhanteti. Ete mayhaṃ pāpuṇissantīti? Taṃ sutvā amacco rañño ārocesi – “eko daharo evaṃ vadatī”ti. “Daharassa evaṃ cittaṃ, mahātherānaṃ pana sukhumasātākā vaṭṭantī”ti vatvā “mahātherānaṃ dassāmī”ti ṭhapesi. Tassa bhikkhusaṅghe paṭipāṭiyā ṭhite dentassa matthake ṭhapitāpi te sātākā hatthaṃ nārohani, aññeva ārohani. Daharassa dānakāle pana hatthaṃ āruḥhā. So tassa hatthe ṭhapetvā amaccassa mukhaṃ oloketvā daharaṃ nisīdāpetvā dānaṃ datvā saṅghaṃ vissajjetvā daharassa santike nisīditvā “kadā, bhante, imaṃ dhammaṃ paṭivijjhithā”ti āha. So pariyāyenapi asantaṃ avadanto “natthi mayhaṃ, mahārāja, lokuttaradhammo”ti āha. Nanu, bhante, pubbeva avacutthāti. Āma, mahārāja, sāraṇīyadhammapūraako ahaṃ, tassa me dhammassa pūritakā lato paṭṭhāya bhājanīyabhaṇḍaṭṭhāne aggabhaṇḍaṃ pāpuṇātīti. “Sādhu sādhu, bhante, anucchavikamidaṃ tumhāka”nti vatvā pakkāmi. Idaṃ **bhājanīyabhaṇḍaṭṭhāne aggabhaṇḍaṃ pāpuṇātīti** ettha vatthu.

Brāhmaṇatissabhaye pana bhātaragāma vāsino nāgattheriyā anārocetvāva palāyimsu. Therī paccūsasamaye “atīviya appanigghoso gāmo, upadhāretha tāvā”ti daharabhikkhuniyo āha. Tā gantvā sabbesaṃ gatabhāvaṃ ṇatvā āgamma theriyā ārocesuṃ. Sā sutvā “mā tumhe tesāṃ gatabhāvaṃ cintayittha, attano uddesapari pucchāyonisomanasikāresuyeva yogaṃ karoṭhā”ti vatvā bhikkhācāra velāyaṃ pārupitvā attadvādasamā gāmadvāre nigrodharukkhamūle aṭṭhāsi. Rukkhe adhivatthā devatā dvādasannampi bhikkhunīnaṃ piṇḍapātaṃ datvā, “ayye, aññattha mā gacchatha, niccaṃ idheva āgaccheyyāthā”ti āha. Theriyā pana kaniṭṭhabhātā nāgatthero nāma atthi. So “mahantaṃ bhayaṃ, na sakkā yāpetuṃ, paratīraṃ gamissāmī”ti attadvādasamova attano vasanaṭṭhānā nikkhanto “theriṃ disvā gamissāmī”ti bhātaragāmaṃ āgato. Therī “therā āgatā”ti sutvā tesāṃ santikaṃ gantvā “kiṃ ayyā”ti pucchi. So taṃ pavattim ārocesi. Sā “ajja ekadivasaṃ vihāreva vasitvā sve gamissathā”ti āha. Therā vihāraṃ agamiṃsu.

Therī punadivase rukkhamūle piṇḍāya caritvā therāṃ upasaṅkamitvā “imaṃ piṇḍapātaṃ paribhuñjathā”ti āha. Thero “vaṭṭissati therī”ti vatvā tuṅhī aṭṭhāsi. Dhammiko, tāta, piṇḍapāto, kukkuccaṃ akatvā paribhuñjathāti. Vaṭṭissati therīti? Sā pattaṃ gahetvā ākāse khipi, patto ākāse aṭṭhāsi. Thero “sattatālamatte ṭhitampi bhikkhunībhattameva therī”ti vatvā “bhayaṃ nāma sabbakālaṃ na hoti, bhaye vūpasante ariyavaṃsaṃ kathayamāno, ‘bho piṇḍapātika, bhikkhunībhattaṃ bhuñjitvā vītināmayitthā’ti cittaṃ anuvadiyamāno santhambhituṃ na sakkhissāmī, appamattā hotha therīyo”ti maggaṃ paṭipajji.

Rukkhadavatāpi “sace thero theriyā hatthato piṇḍapātaṃ paribhuñjissati, na taṃ nivattessāmī. Sace na paribhuñjissati, nivattessāmī”ti cintayamānā ṭhatvā therassa gamanaṃ disvā rukkha oruyha “pattaṃ, bhante, dethā”ti vatvā pattaṃ gahetvā therāṃ rukkhamūlaṃ yeva ānetvā āsanaṃ paññāpetvā piṇḍapātaṃ datvā katabhattakiccaṃ paṭiññaṃ kāretvā dvādasā bhikkhuniyo dvādasā ca bhikkhū satta vassāni upaṭṭhahi. Idaṃ **devatā ussukkaṃ āpajjantīti** ettha vatthu. Tatra hi therī sāraṇīyadhammapūrikā aho.

Akhaṇḍānītiādisu yassa sattasu āpattikkhandhesu ādimhi vā ante vā sikkhāpadaṃ bhinnaṃ hoti, tassa sīlaṃ pariyante chinna sātako viya **khaṇḍaṃ** nāma. Yassa pana vemajjhe bhinnaṃ, tassa chiddasātako viya **chiddaṃ** nāma hoti. Yassa paṭipāṭiyā dve tīṇi bhinnāni, tassa piṭṭhiyaṃ vā kucchīyaṃ vā uṭṭhitena visabhāgavaṇṇena kāḷarattādīnaṃ aññataravaṇṇā gāvī viya **sabalaṃ** nāma hoti. Yassa antarantarā bhinnāni, tassa antarantarā visabhāgabindu vicitrā gāvī viya **kammāsaṃ** nāma hoti. Yassa

pana sabbena sabbaṃ abhinnāni, tassa tāni sīlāni **akhaṇḍāni acchiddāni asabalāni akammāsāni** nāma honti. Tāni panetāni taṇhādāsabyato mocetvā bhujissabhāvakarāṇato **bhujissāni**, buddhādīhi viññūhi pasatthattā **viññuppasatthāni**, taṇhādīṭṭhīhi aparāmaṭṭhattā “idaṃ nāma tvaṃ āpannapubbo”ti kenaci parāmaṭṭhuṃ asakkuṇeyyattā ca **aparāmaṭṭhāni**, upacārasamādhim appanāsamādhim vā saṃvattayantīti **samādhisaṃvattanikānī**ti vuccanti.

Sīlasāmaññagato viharatī tesu tesu disābhāgesu viharantehi bhikkhūhi saddhim samānabhāvūpagatasīlo viharati. Sotāpannādīnañhi sīlaṃ samuddantarepi devalokepi vasantānaṃ aññesaṃ sotāpannādīnaṃ sīlena samānameva hoti, natthi maggasīle nānattaṃ. Taṃ sandhāyetaṃ vuttaṃ.

Yāyaṃ dīṭṭhīti maggasampayuttā sammādiṭṭhi. **Ariyā**ti niddosā. Niyyātīti **niyyānikā**. **Takkarassā**ti yo tathākārī hoti. **Dukkakkhayāyā**ti sabbadukkakkhayatthaṃ. **Dīṭṭhisāmaññagatoti** samānadiṭṭhibhāvaṃ upagato hutvā viharatīti.

2. Dutiyasāraṇīyasuttavaṇṇanā

12. Dutiye yo te dhamme pūreti, taṃ sabrahmacārīnaṃ piyaṃ karontīti **piyakaraṇā**. Garuṃ karontīti **garukaraṇā**. **Saṅgahāyā**ti saṅgaṇhanatthāya. **Avivādāyā**ti avivadanatthāya. **Sāmaggiyā**ti samaggabhāvattāya. **Ekībhāvāyā**ti ekabhāvattāya ninnānākaraṇāya. **Saṃvattantī**ti vattanti pavattanti.

3. Nissāraṇīyasuttavaṇṇanā

13. Tatiye **nissāraṇīyā dhātuyoti** nissaraṇadhātuyova. **Mettā hi kho me cetovimuttī**ti ettha paccanīkadhammehi vimuttattā tikacatukkajjhānikā mettāva mettācetovimutti nāma. **Bhāvitā**ti vaḍḍhitā. **Bahulikātā**ti punappunaṃ katā. **Yānikātā**ti yuttayānasadisā katā. **Vatthukatā**ti patiṭṭhā katā. **Anuṭṭhitā**ti adhiṭṭhitā. **Paricitā**ti samantato citā ācitā upacitā. **Susamāraddhā**ti suppaguṇakarāṇena suṭṭhu samāraddhā. **Pariyādāya tiṭṭhatī**ti pariyādiyitvā gahetvā tiṭṭhati. **Mā hevantissa vacanīyoti** yasmā abhūtabyākaraṇaṃ byākaroti, tasmā “mā evaṃ bhaṇī”ti vattabbo. **Yadidaṃ mettācetovimuttī**ti yā ayaṃ mettācetovimutti, idaṃ nissaraṇaṃ byāpādassa, byāpādato nissaṭṭhāti attho. Yo pana mettāya tikacatukkajjhānato vuṭṭhito saṅkhāre sammāsivā tatiyamaggaṃ patvā “puna byāpādo natthī”ti tatiyaphalena nibbānaṃ passati, tassa cittaṃ accantanissaraṇaṃ byāpādassa. Etenupāyena sabbattha attho veditabbo.

Animittācetovimuttīti balavavipassanā. Dīghabhāṇakā pana arahattaphalasaṃpattīti vadanti. Sā hi rāganimittādīnañceva rūpanimittādīnañca niccanimittādīnañca abhāvā animittāti vuttā. **Nimittānusārī**ti vuttappahedaṃ nimittaṃ anusaraṇasabhāvaṃ.

Asmīti asmimāno. **Ayamahamasmī**ti pañcasu khandhesu ayaṃ nāma ahaṃ asmīti. Ettāvata arahattaṃ byākataṃ hoti. **Vicikicchākathaṃkathāsallanti** vicikicchābhūtaṃ kathaṃkathāsallaṃ. **Mā hevantissa vacanīyoti** sace te paṭhamamaggavajjhā vicikicchā uppajjati, arahattabyākaraṇaṃ micchā hoti, tasmā “mā abhūtaṃ gaṇhī”ti vāretabbo. **Asmīti mānasamugghātoti** arahattamaggo. Arahattamaggaphalavasena hi nibbāne dīṭṭhe puna asmimāno natthīti arahattamaggo “asmīti mānasamugghāto”ti vutto. Iti imasmimṃ sutte abhūtabyākaraṇaṃ nāma kathitaṃ.

4. Bhaddakasuttavaṇṇanā

14. Catutthe **na bhaddakanti** na laddhakaṃ. Tattha yo hi bhūtabhīto marati, tassa na bhaddakaṃ maraṇaṃ hoti. Yo apāye paṭisandhim gaṇhāti, tassa na bhaddikā kālakiriyā hoti. **Kammārāmoti**ādīsū āramaṇaṃ āraṃo, abhiraṭṭīti attho. Vihāraṇādīdimhi navakamme āraṃo assāti **kammārāmo**.

Tasmimyeva kamme ratoti **kammarato**. Tadeva kammārāmatam punappunam yuttoti **anuyutto**. Esa nayo sabbattha. Ettha ca **bhassanti** ālāpasallāpo. **Niddāti** soppam. **Saṅgaṇikāti** gaṇasaṅgaṇikā. Sā “ekassa dutiyo hoti, dvinnam hoti tatiyako” tiādīnā nayena vedītabbā. **Samsaggoti** dassanasavanasamullāpasambhogakāyasamsaggavasena pavatto samsatṭhabhāvo. **Papañcoti** taṇhādīṭṭhimānavasena pavatto madanākārasaṅghito kilesapapañco. **Sakkāyanti** tebhūmakavaṭṭam. **Sammā dukkhassa antakiriyāyāti** hetunā nayena sakalavaṭṭadukkhassa parivaṭṭaparicchedakaraṇattham. **Magoti** magasadiso. **Nippapañcapadeti** nibbānapade. **Ārādhayāti** paripūrayi tam sampādesīti.

5. Anutappiyasuttavaṇṇanā

15. Pañcame **anutappāti** anusocītabbā anutāpakārī. Imesu dvīsūpi suttasu gāthāsu ca vaṭṭavivaṭṭam kathitam.

6. Nakulapitusuttavaṇṇanā

16. Chaṭṭhe **bāhagilānoti** adhimattagilāno. **Etadavocāti** sāmikassa bhesajjam katvā byādhiṃ vūpasametum asakkontī idāni sīhanādam naditvā saccakiriyāya byādhiṃ vūpasametum santike nisīditvā etaṃ “mā kho tva” ntiādivacanam avoca. **Sāpekkhoti** sataṅho. **Na nakulamātāti** ettha na-kāro na sakkhatīti evam parapadena yojetabbo. **Santharītūti** nicchiddam kātum, saṅghapetūti attho. **Veṇim olikhitūti** eḷakalomāni kappetvā vijaṭetvā veṇim kātum.

Aññam gharam gamissatīti aññam sāmikam gaṇhissati. **Soḷasa vassāni gahaṭṭhakaṃ brahmacariyam samāciṇṇanti** ito soḷasavassamatthake gahaṭṭhabrahmacariyavāso samāciṇṇo. **Dassanakāmatarāti** atirekena dassanakāmā. Imehi tīhi aṅgehi sīhanādam naditvā “iminā saccena tava sarīre byādhi phāsu hotū” ti saccakiriyam akāsi.

Idāni bhagavantam sakkhiṃ katvā attano sīlādiguṇehipi saccakiriyam kātum **siyā kho pana tetiādīmāha**. Tattha **paripūrakārīti** samattakārīni. **Cetosamathassāti** samādhikammaṭṭhānassa. **Ogādhappattāti** ogādham anuppavesam pattā. **Patigādhappattāti** patigādham patiṭṭham pattā. **Assāsappattāti** assāsam avassayam pattā. **Vesārajappattāti** somanassaññaṃ pattā. **Aparappaccayāti** parappaccayo vuccati parasaddhā parapattiyāyanā, tāya virahitāti attho. Imehi tīhi aṅgehi attano guṇe ārabha saccakiriyam akāsi. **Gilānā vuṭṭhitoti** gilāno hutvā vuṭṭhito. **Yāvatāti** yattikāyo. **Tāsam aññatarāti** tāsam antare ekā. **Anukampikāti** hitānukampikā. **Ovādikāti** ovādadāyikā. **Anusāsikāti** anusīṭṭhidāyikā.

7. Soppasuttavaṇṇanā

17. Sattame **paṭisallānā vuṭṭhitoti** ekībhāvāya dhammanijjhānakkhantito phalasaṃpattivihārato vuṭṭhito. **Yathāvihāranti** attano attano vasanavihāram. **Navāti** pabbajjāya navakā. Te pañcasatamattā ahesum. **Kācacchamānāti** kākasaddam karontā dante khādantā. **Therāti** thirabhāvam pattā. **Tena notī** tena nu. **Seyyasukhādīni** heṭṭhā vuttatthāneva. **Raṭṭhikoti** yo raṭṭham bhuñjati. **Pettaṇikoti** yo pitarā bhuttānubhuttam bhuñjati. **Senāpatikoti** senāya jeṭṭhako. **Gāmagāmaṇikoti** gāmaabhojako. **Pūgagāmaṇikoti** gaṇajetṭhako. **Avipassako kusalānam dhammānanti** kusalānam dhammānam anesako agavesako hutvā. **Bodhipakkhiyānam dhammānanti** sattatīmsāya bodhipakkhiyadhammānam.

8. Macchabandhasuttavaṇṇanā

18. Aṭṭhame **macchikanti** macchaghātakam. Hatthinā yātīti **hatthiyāyī**. Paratopi eseva nayo. **Vajjheti** vadhitabbe. **Vadhāyanītetī** vadhāya upanīte. **Pāpakena manasāti** lāmakena vadhakacittena.

Pāliyaṃ pana vadhāyupanīteti likhanti. **Māgavikoti** migaghātako. **Ko pana vādo manussabhūtaṃ** yo manussabhūtaṃ pāpakena manasā anupekkhati, tassa sampattiyaṃ abhāve kimeva vattabbaṃ. Idaṃ pāpakassa kammuno aṇiṭṭhaphalabhāvaṃ dassetuṃ vuttaṃ. Yesaṃ pana tādisaṃ kammaṃ karontānampi yasapaṭilābho hoti, tesāṃ taṃ akusalaṃ nissāya kusalaṃ vipaccatīti veditabbaṃ. Tena panassa akusalakammena upahatattā vipāko na ciraṭṭhitiko hoti. Imasmiṃ sutte akusalapakkhova kathito.

9. Paṭhamamaraṇassatisuttavaṇṇanā

19. Navame **nātiketi** evaṃnāmake gāme. **Giṇjakāvasatheti** iṭṭhakāmāye pāsāde. **Amatogadhāti** nibbānogadhā, nibbānapaṭiṭṭhāti attho. **Bhāvettha** noti bhāvettha nu. **Maraṇassatinti** maraṇassatikammaṭṭhānaṃ. **Aho vatāti** patthanatthe nipāto. **Bahuṃ vata me kataṃ assāti** tumbhākaṃ sāsane mama kiccaṃ bahu kataṃ assa. **Tadantaranti** taṃ antaraṃ khaṇaṃ okāsaṃ. **Assasitvā vā passasāmīti** ettha assāso vuccati anto pavisanavāto, passāso bahi nikkhamanavāto. Iti ayaṃ bhikkhu yāva anto paviṭṭhavāto bahi nikkhamati, bahi nikkhanto vāto anto pavisati, tāva jīvitāṃ patthento evamāha. **Dandhanti** mandaṃ garukaṃ asīghappavattaṃ. **Āsavānaṃ khayāyāti** arahattaphalattāya. Imasmiṃ sutte maraṇassati arahattaṃ pāpetvā kathitāti.

10. Dutiyamaraṇassatisuttavaṇṇanā

20. Dasame **patigatāyāti** paṭipannāya. **Iti paṭisañcikkhatīti** evaṃ paccavekkhati. **So mamassa antarāyoti** ettha tividho antarāyo jīvitantarāyo, samaṇadhammantarāyo, puthujjanakālakiriyaṃ karontassa saggantarāyo ceva maggantarāyo cāti. Taṃ sabbampi sandhāyevamāha. **Byāpajjeyyāti** ajiṇṇakādivasena vipajjeyya. **Adhimattoti** balavā. **Chandoti** kattukamyatāchando. **Vāyāmoti** payogavīriyaṃ. **Ussāhoti** ussāpanavīriyaṃ. **Ussolhīti** sampādanavīriyaṃ. **Appaṭivānīti** anukkaṇṭhanā appaṭisaṅgharaṇā. Sesāṃ sabbattha uttānatthamevāti.

Sāraṇīyavaggo dutiyo.

3. Anuttariyavaggo

1-2. Sāmakasuttādivaṇṇanā

21-22. Tatiyassa paṭhame **sāmagāmaketi** sāmakānaṃ ussannattā evaṃladdhanāme gāmake. **Pokkharāṇiyāyanti** pokkharāṇiyānāmake vihāre. **Abhikkantāya rattiyāti** rattiyā paṭhamayāmaṃ atikkamma majjhimayāme sampatte. **Abhikkantavaṇṇāti** abhikkantaatimanāpavaṇṇā. **Kevalakappanti** sakalakappaṃ. **Pokkharāṇiyaṃ obhāsetvāti** pokkharāṇiyānāmaṃ mahāvihāraṃ attano obhāsena pharivā. **Samanuññoti** samānaanuñño samānacitto. **Dovacassatāti** dubbacabhāvo. **Pāpamittatāti** lāmakamittatā. Imasmiṃ sutte parihāniyadhammāva kathitā. Dutīye aparihāniyadhammā lokuttaramissakā kathitā.

3. Bhayasuttavaṇṇanā

23. Tatiye **kāmarāgarattāyanti** kāmarāgaratto ayaṃ. **Chandarāgavinibaddhoti** chandarāgena vinibaddho. **Bhayāti** cittutrāsabhayā. **Paṅkāti** kilesapaṅkato. **Saṅgo paṅko ca ubhayanti** saṅgo ca paṅko ca idampi ubhayaṃ. **Ete kāmā pavuccanti, yattha satto puthujjanoti** yasmīṃ saṅge ca paṅke ca puthujjano satto laggo laggito palibuddho. **Upādāneti** catubbidhe upādāne. **Jātīmarāṇasambhaveti** jātiyā ca maraṇassa ca sambhave paccayabhūte. **Anupādā vimuccantīti** anupādiyitvā vimuccanti. **Jātīmarāṇasaṅkhaṇeti** jātimaraṇānaṃ saṅkhaṇasaṅkhāte nibbāne, nibbānārammaṇāya vimuttiyā vimuccantīti attho. Imasmiṃ ṭhāne vivaṭṭetvā arahattameva patto esa bhikkhu. Idāni taṃ khīṇāsavaṃ

thomento **te khemappattā**tiādīmāha. Tattha **khemappattā**ti khemabhāvaṃ pattā. **Sukhinoti** lokuttarasukhena sukhitā. **Diṭṭhadhammābhini**butāti abbhantare kilesābhāvena diṭṭhadhammeyeva abhinibbutā. Imasmiṃ sutte vaṭṭameva kathetvā gāthāsu vaṭṭavivaṭṭaṃ kathitaṃ.

4. Himavantasuttavaṇṇanā

24. Catutthe **padāleyyā**ti bhindeyya. **Chavāyā**ti lāmikāya. **Samādhissa samāpattikusalo hotī**ti āhārasappāyautusappāyāni pariggahetvā samādhim samāpajjituṃ kusalo hoti cheko samattho paṭibalo. **Samādhissa ṭhitikusaloti** samādhissa ṭhitiyaṃ kusalo, samādhim ṭhapetuṃ sakkotīti attho. **Samādhissa vuṭṭhānakusaloti** samādhissa vuṭṭhāne kusalo, yathāparicchedena vuṭṭhātuṃ sakkotīti attho. **Samādhissa kallitakusaloti** samādhissa kallatāya kusalo, samādhicittaṃ hāsetuṃ kallaṃ kātuṃ sakkotīti attho. **Samādhissa gocarakusaloti** samādhissa asappāye anupakārake dhamme vajjetvā sappāye upakārake sevantopi, ‘‘āyaṃ samādhinimittārammaṇo āyaṃ lakkhaṇārammaṇo’’ti jānantopi samādhissa gocarakusalo nāma hoti. **Samādhissa abhinīhārakusaloti** upariuparisamāpattisamāpajjanatthāya paṭhamajjhānādisamādhim abhinīharituṃ sakkonto samādhissa abhinīhārakusalo nāma hoti. So paṭhamajjhānā vuṭṭhāya dutiyaṃ samāpajjati, dutiyajjhānā...pe... tatiyajjhānā vuṭṭhāya catuttham samāpajjati.

5. Anussatiṭṭhānasuttavaṇṇanā

25. Pañcame **anussatiṭṭhānānī**ti anussatikāraṇāni. **Itipi so bhagavā**tiādīni visuddhimagge (visuddhi. 1.123 ādayo) vitthāritāneva. **Idampi kho, bhikkhave, ārammaṇaṃ karitvā**ti idaṃ buddhānussatikammaṭṭhānaṃ ārammaṇaṃ karitvā. **Visujjhan**tīti paramavisuddhim nibbānaṃ pāpuṇanti. Sesam sabbattha uttānatthameva. Imasmiṃ pana sutte cha anussatiṭṭhānāni missakāni kathitānīti veditabbāni.

6. Mahākaccānasuttavaṇṇanā

26. Chaṭṭhe **sambādheti** pañcakāmaguṇasambādhe. **Okāsādhigamoti** ettha okāsā vuccanti cha anussatiṭṭhānāni, tesam adhigamo. **Visuddhiyā**ti visujjhanatthāya. **Sokaparidevānaṃ samatikkamāyā**ti sokānañca paridevānañca samatikkamatthāya. **Atthaṅgamāyā**ti attham gamanatthāya. **Ñāyassa adhigamāyā**ti sahavipassanakassa maggassa adhigamanatthāya. **Nibbānassa sacchikiriyāyā**ti apaccayaparinibbānassa paccakkhikiriyatthāya.

Sabbasoti sabbākārena. **Ākāsasamenā**ti alagganatthena ceva apalibuddhatthena ca ākāsasadisena. **Vipulenā**ti na parittakena. **Mahaggatenā**ti mahantabhāvaṃ gatena, mahantehi vā ariyasāvakehi gatena, paṭipannenāti attho. **Appamāṇenā**ti pharaṇaappamāṇatāya appamāṇena. **Averenā**ti akusalaverapuggalaverarahitena. **Abyāpajjhenā**ti kodhadukkhavajjitena. Sabbametaṃ buddhānussaticcittameva sandhāya vuttaṃ. Paratopi eseva nayo. **Visuddhidhammā**ti visujjhanasabhāvā. Imasmiṃ sutte cha anussatiṭṭhānāni missakāneva kathitānīti.

7. Paṭhamasamayasuttavaṇṇanā

27. Sattame **manobhāvanīyassā**ti ettha maṇaṃ bhāveti vaḍḍhetīti manobhāvanīyo. **Dassanāyā**ti dassanattham. **Nissaraṇanti** niggamaṇaṃ vūpasamaṇaṃ. **Dhammaṃ desetī**ti kāmarāgappajahanatthāya asubhakammaṭṭhānaṃ katheti. Dutiyavārādisu byāpādappahānāya mettākammaṭṭhānaṃ, thinamiddhappahānāya thinamiddhavinodanakammaṭṭhānaṃ, ālokasaññaṃ vā vīriyārambhavatthuādīnaṃ vā aññataraṃ, uddhaccakukkucappahānāya samathakammaṭṭhānaṃ, vicikicchāpahānāya tiṇṇaṃ ratanānaṃ guṇakathaṃ kathento dhammaṃ desetīti veditabbo. **Āgammā**ti ārabha. **Manasikarototi** ārammaṇavasena citte karontassa. **Anantarā āsavānaṃ khayoti** anantarāyena āsavānaṃ khayoti.

8. Dutiyasamayassuttavaṇṇanā

28. Aṭṭhame **maṇḍalamāleti** bhojanasālāya. **Cārittakilamathoti** piṇḍapātacariyāya uppannakilamatho. **Bhattakilamathoti** bhattadaratho. **Vihārapacchāyāyanti** vihārapaccante chāyāya. **Yadevassa divā samādhinimittam manasikataṃ hotīti** yaṃ eva tassa tato purimadivasabhāge samathanimittam citte kataṃ hoti. **Tadevassa tasmim samaye samudācaratīti** taṃyeva etassa tasmim samaye divāvihāre nisinnassa manodvāre sañcarati. **Ojaṭṭhāyīti** ojāya ṭhito patiṭṭhito. **Phāsukassa hotīti** phāsukaṃ assa hoti. **Sammukhāti** kathentassa sammukhaṭṭhāne. **Sutanti** sotena sutam. **Paṭiggahitanti** cittena paṭiggahitam.

9. Udāyissuttavaṇṇanā

29. Navame **udāyinti** lāḷudāyittheram. **Suṇomahaṃ, āvusoti, āvuso, nāhaṃ badhiro, suṇāmi** bhagavato vacanam, pañham pana upaparikkhāmīti. **Adhicittanti** samādhivipassanācittam. **Idam, bhante, anussatiṭṭhānanti** idam jhānattayasāṅkhātam anussatikāraṇam. **Diṭṭhadhammasukhavihārāya samvattatīti** imasmimyeva attabhāve sukhavivārahāya pavattati. **Ālokasaññanti** ālokanimutte uppannasaññam. **Divā saññam adhiṭṭhātīti** divāti saññam ṭhpeti. **Yathā divā tathā rattinti** yathānena divā ālokasaññā manasikatā, rattimpi tatheva taṃ manasi karoti. **Yathā rattim tathā divāti** yathā vānena rattim ālokasaññā manasikatā, divāpi taṃ tatheva manasi karoti. **Vivaṭṭenāti** pākaṭena. **Apariyonaddhenāti** nīvaraṇehi anonaddhena. **Sappabhāsam cittaṃ bhāvetīti** dibbacakkhuññānāthāya sahoḥbhāsaṃ cittaṃ brūheti vaḍḍheti. Yaṃ pana “ālokasaññam manasi karoti”ti vuttam, taṃ thinamiddhavinodanālokasaññam sandhāya vuttam, na dibbacakkhuññānālokanti vedittabham. **Ñānadassanapaṭilābhāyāti** dibbacakkhusāṅkhātassa ñānadassanassa paṭilābhāya.

Imameva kāyantiādīsu yaṃ vattabham siyā, taṃ sabbam sabbākārena vitthārato visuddhimagge kāyagatāsaticammaṭṭhāne vuttam. **Kāmarāgappahānāyāti** pañcakāmaguṇikassa rāgassa pahānāthāya. **Seyyathāpi passeyyāti** yathā passeyya. **Sarīranti** matasarīram. **Sivathikāya chadditanti** susāne apavidham. Ekāham matassa assāti **ekāhamatam**. Dvīham matassa assāti **dvīhamatam**. Tīham matassa assāti **tīhamatam**. Bhastā viya vāyunā uddham jīvitapariyādānā yathānukkamaṃ samuggatena sūnabhāvena dhumātattā uddhumātam, uddhumātameva **uddhumātakam**. Paṭikūlattā vā kucchitam uddhumātanti **uddhumātakam**. Vinīlam vuccati viparibhinnavāṇam, vinīlameva **vinīlakam**. Paṭikūlattā vā kucchitam vinīlanti **vinīlakam**. Maṃsussadaṭṭhānesu rattavaṇṇassa pubbasannicayaṭṭhānesu setavaṇṇassa yebhuyyena ca nīlavaṇṇassa nīlaṭṭhāne nīlasāṭakapārutasseva chavasārassetam adhivacanam. Paribhinnaṭṭhānehi navahi vā vaṇamukhehi vissandamānam pubbam vipubbam, vipubbameva **vipubbakam**. Paṭikūlattā vā kucchitam vipubbanti vipubbakam. Vipubbakam jātam tathābhāvam gatanti **vipubbakajātam**.

So imameva kāyanti so bhikkhu imaṃ attano kāyam tena kāyena saddhim ñānena upasaṃharati upaneti. Kathaṃ? **Ayampi kho kāyo evaṃdhammo evaṃbhāvī evaṃanatītoti**. Idaṃ vuttam hoti – āyu usmā viññānanti imesaṃ tiṇṇam dhammānam atthitāya ayam kāyo ṭhānagamanādikhāmo hoti, imesaṃ pana vigamā ayampi evaṃdhammo evaṃpūtikasabhāvovayevāti. **Evaṃbhāvīti** evamevaṃ uddhumātādibhedo bhavissati. **Evaṃ anatītoti** evaṃ uddhumātādibhāvam anatikkanto.

Khajjamānanti udarādīsu nisīditvā udaramaṃsaotṭhamamaṃsaakkhikamaṃsādīni luñcitvā luñcitvā khādiyamānam. **Samaṃsalohitanti** sesāvasesamaṃsalohitayuttam. **Nimmaṃsalohitamakkhitanti** maṃse khīṇepi lohitaṃ na sussati, taṃ sandhāya vuttam – “nimmaṃsalohitamakkhita”nti. **Aññenāti** aññena disābhāgena. **Hatthaṭṭhikanti** catusaṭṭhibhedampi hatthaṭṭhikaṃ pāṭiyekkaṃ pāṭiyekkaṃ vippakiṇṇam. **Pādaṭṭhikādīsipi** eseva nayo. **Terovassikānīti** atikkantasamvaccharāni. **Pūtīnīti** abbhokāse ṭhitāni vātātapavutṭhisamphassena terovassikāneva pūtīni honti, antobhūmigatāni pana cirataram tiṭṭhanti. **Cuṇṇakajātānīti** cuṇṇavicuṇṇam hutvā vippakiṇṇāni. Sabbattha **so imamevāti** vuttanayena khajjamānādīnam vasena yojanā kātabbā. **Asmimānasamugghātāyāti** asmīti pavattassa

navavidhassa mānassa samugghātatthāya. **Anekadhātupaṭivedhāyāti** anekadhātūnaṃ paṭivijjanatthāya. **Satova abhikkamatīti** gacchanto satipaññāhi samannāgatova gacchati. **Satova paṭikkamatīti** paṭinivattantopi satipaññāhi samannāgatova nivattati. Sesapadesupi eseva nayo. **Satisampajaññāyāti** satiyā ca ñāṇassa ca atthāya. Iti imasmiṃ sutte satīñāṇāni missakāni kathitānīti.

10. Anuttariyasuttavaṇṇanā

30. Dasame **uccāvacanti** yaṃ kiñci mahantakhuddakaṃ, uccanīcaṃ vā. **Hīnanti** nihīnaṃ. **Gammanti** gāmaṃvāsikānaṃ dassanaṃ. **Pothujjanikanti** puthujjanānaṃ santakaṃ. **Anariyanti** na ariyaṃ na uttamaṃ na parisuddhaṃ. **Anatthasaṃhitanti** na atthasannissitaṃ. **Na nibbidāyāti** na vaṭṭe nibbindanatthāya. **Na virāgāyāti** na rāgādīnaṃ virajjanatthāya. **Na nirodhāyāti** na rāgādīnaṃ appavattinirodhāya. **Na upasamāyāti** na rāgādīnaṃ vūpasamanatthāya. **Na abhiññāyāti** na abhijānanatthāya. **Na sambodhāyāti** na sambodhisankhātassa catumaggañāṇassa paṭivijjanatthāya. **Na nibbānāyāti** na nibbānassa sacchikiriyāya.

Niviṭṭhasaddhoti paṭiṭṭhasaddho. **Niviṭṭhapemoti** paṭiṭṭhitapemo. **Ekantagatoti** ekantaṃ gato, acalappattoti attho. **Abhippasannoti** ativiya pasanno. **Etadānuttariyanti** etaṃ anuttaraṃ. **Hatthisimipi sikkhatīti** hatthinimittaṃ sikkhitabbaṃ hatthisippaṃ sikkhati. Sesapadesupi eseva nayo. **Uccāvacanti** mahantakhuddakaṃ sippaṃ sikkhati.

Upaṭṭhitā pāricariyeti pāricariyāya paccupaṭṭhitā. **Bhāvayanti anussatinti** anuttaraṃ anussatiṃ bhāventi. **Vivekappaṭisamyuttanti** nibbānanissitaṃ katvā. **Khemanti** nirupaddavaṃ. **Amatagāminanti** nibbānagāminānaṃ, ariyamaggaṃ bhāventīti attho. **Appamāde pamoditāti** satiyā avippavāsasaṅkhāte appamāde āmoditā pamoditā. **Nipakāti** nepakkena samannāgatā. **Sīlasaṃvutāti** sīlena saṃvutā pihitā. **Te ve kālena paccentīti** te ve yuttappayuttakāle jānanti. **Yattha dukkhaṃ nirujjhatīti** yasmīṃ ṭhāne sakalaṃ vaṭṭadukkhaṃ nirujjhati, taṃ amataṃ mahānibbānaṃ te bhikkhū jānantīti. Imasmiṃ sutte cha anuttariyāni missakāni kathitānīti.

Anuttariyavaggo tatiyo.

4. Devatāvaggo

1. Sekhasuttavaṇṇanā

31. Catutthassa paṭhame **sekhassāti** sattavidhassa sekhassa. Puthujjane pana vattabbameva natthi. **Parihānāyāti** uparūpariguṇaparīhānāya.

2-3. Aparihānasuttadvayaṇṇanā

32-33. Dutiye **satthugāravatāti** satthari garubhāvo. **Dhammagāravatāti** navavidhe lokuttaradhamme garubhāvo. **Saṅghagāravatāti** saṅghe garubhāvo. **Sikkhagāravatāti** tīsu sikkhāsu garubhāvo. **Appamādagāravatāti** appamāde garubhāvo. **Paṭisanthāragāravatāti** dhammāmisavasena duvidhe paṭisanthāre garubhāvo. Satthā garu assāti **satthugaru**. Dhammo garu assāti **dhammagaru**. **Tibbagāravoti** bahalagāravo. Paṭisanthāre gāravo assāti **paṭisanthāragāravo**. Tatiye **sappattissoti** sajeṭṭhako sagāravo. Hirottappaṃ panettha missakaṃ kathitaṃ.

4. Mahāmoggallānasuttavaṇṇanā

34. Catutthe **tisso nāma bhikkhūti** therasseva saddhivihāriko. **Mahiddhiko mahānubhāvoti** ijjanatṭhena mahatī iddhi assāti mahiddhiko. Anupharaṇatṭhena mahā ānubhāvo assāti mahānubhāvo.

Cirassaṃ kho, mārīsa moggallāna, imaṃ pariyāyamakāsīti evarūpaṃ loke pakatiyā piyasamudāhāravacanaṃ hoti. Lokiyā hi cirassaṃ āgataṃ anāgatapubbampi manāpajātiyaṃ āgataṃ disvā ‘‘kuto bhavaṃ āgato, cirassaṃ bhavaṃ āgato, kathaṃ te idhāgamanamaggo ñāto, kiṃ maggamūlhosī’’tiādīni vadanti. Ayaṃ pana āgatapubbattāyeva evamāha. Thero hi kālena kālaṃ brahmalokaṃ gacchatiyeva. Tattha **pariyāyamakāsīti** vāraṃ akāsi. **Yadidaṃ idhāgamanāyāti** yo ayaṃ idhāgamanāya vāro, taṃ cirassaṃ akāsīti vuttaṃ hoti. **Idamāsanam paññattanti** mahārahaṃ brahmapallānkaṃ paññāpetvā evamāha. **Aveccappasādenāti** adhigatena acalena maggappasādena. Imasmiṃ sutte sotāpattimaggañāṇaṃ kathitaṃ.

5. Vijjābhāgiyasuttavaṇṇanā

35. Pañcame **vijjābhāgiyāti** vijjākoṭṭhāsikā. **Aniccasaññāti** aniccānupassanāññāṇe uppannasaññā. **Anicce dukkhasaññāti** dukkhānupassanāññāṇe uppannasaññā. **Dukkhe anattasaññāti** anattānupassanāññāṇe uppannasaññā. **Pahānasaññāti** pahānānupassanāññāṇe uppannasaññā. **Virāgasaññāti** virāgānupassanāññāṇe uppannasaññā. **Nirodhasaññāti** nirodhānupassanāññāṇe uppannasaññā.

6. Vivādamūlasuttavaṇṇanā

36. Chaṭṭhe **vivādamūlānīti** vivādassa mūlāni. **Kodhanoti** kujjhanalakkhaṇena kodhena samannāgato. **Upanāhīti** veraappaṭinissaggalakkhaṇena upanāhena samannāgato. **Ahitāya dukkhāya devamanussānanti** dvinnam bhikkhūnaṃ vivādo kathaṃ devamanussānaṃ ahitāya dukkhāya saṃvattati? Kosambakakkhandhake viya dvīsu bhikkhūsu vivādam āpannesu tasmim vihare tesam antevāsikā vivadanti, tesam ovādam gaṇhanto bhikkhunisaṅho vivadati. Tato tesam upaṭṭhākā vivadanti, atha manussānaṃ ārakkhadevatā dve koṭṭhāsā honti. Tathā dhammavādīnaṃ ārakkhadevatā dhammavādīniyo honti, adhammavādīnaṃ adhammavādīniyo. Tato ārakkhadevatānaṃ mittā bhummadevatā bhijjanti. Evaṃ paramparāya yāva brahmalokā ṭhapetvā ariyasāvake sabbe devamanussā dve koṭṭhāsā honti. Dhammavādīhi pana adhammavādīniva bahutarā honti. Tato yaṃ bahukehi gahitaṃ, taṃ gacchanti. Dhammaṃ vissajjtvā bahutarāva adhammaṃ gaṇhanti. Te adhammaṃ purakkhatvā viharantā apāye nibbattanti. Evaṃ dvinnam bhikkhūnaṃ vivādo devamanussānaṃ ahitāya dukkhāya hoti. **Ajjhattam vāti** tumhākaṃ abhantaraparīsāya. **Bahiddhāti** paresam parisāya.

Makkhīti paresam guṇamakkhanalakkhaṇena makkhena samannāgato. **Paḷāsīti** yugaggāhalakkhaṇena paḷāsena samannāgato. **Issukīti** parassa sakkārādīni issāyanalakkhaṇāya issāya samannāgato. **Maccharīti** āvāsamacchariyādīhi samannāgato. **Saṭhoti** kerāṭiko. **Māyāvīti** katapaṭicchādako. **Pāpicchoti** asantasambhāvanicchako dussīlo. **Micchādīṭṭhīti** natthikavādī, aheturvādī, akiriyavādī. **Sandiṭṭhiparāmāsīti** sayam diṭṭhameva parāmasati. **Ādhānaggāhīti** dalhaggāhī. **Duppaṭinissaggīti** na sakkā hoti gahitaṃ vissajjāpetuṃ. Imasmiṃ sutte vaṭṭameva kathitaṃ.

7. Dānasuttavaṇṇanā

37. Sattame **veḷukaṇḍakīti** veḷukaṇḍakanagaravāsīnī. **Chaḷaṅgasamannāgatanti** chahi guṇaṅgehi samannāgataṃ. **Dakkhiṇam paṭiṭṭhāpetīti** dānaṃ deti. **Pubbeva dānā sumanoti** dānaṃ dassāmīti māsaḍḍhamāsato paṭṭhāya somanassappatto hoti. Ettha hi pubbecetanā dassāmīti cittuppādakālato paṭṭhāya ‘‘ito utṭhitena dānaṃ dassāmī’’ti khettaggaṇaṃ ādiṃ katvā cintentassa labbhati. **Dadam cittaṃ pasādetīti** evaṃ vuttā muñcetanā pana dānakāleyeva labbhati. **Datvā attamano hotīti** ayaṃ pana aparacetanā aparāparaṃ anussarantassa labbhati. **Vītarāgāti** vigatarāgā khīṇāsavā. **Rāgavinayāya vā paṭipannāti** rāgavinayapaṭipadaṃ paṭipannā. Ukkatṭhadesanā cesā, na kevalam pana khīṇāsavānaṃ, anāgāmi-sakadāgāmi-sotāpannānampi antamaso tadahupabbajitassa bhaṇḍagāhakasāmaṇerassāpi dinnā dakkhiṇā chaḷaṅgasamannāgatāva hoti. Sopi hi sotāpattimaggaṭṭhameva pabbajito.

Yaññassa sampadāti dānassa paripuñṇatā. **Saññatāti** sīlasaññamena saññatā. **Sayaṃ ācamayitvānāti** attanāva hatthapāde dhovitvā mukhaṃ vikkhāletvā. **Sakehi pāṇibhīti** attano hatthehi. Sayehītipi pāṭho. **Saddhoti** ratanattayaguṇe saddahanto. **Muttana cetasāti** lābhamacchariyādīhi vimuttana citta. **Abyāpajjhaṃ sukhaṃ lokanti** niddukkhaṃ uḷārasukhasomanassaṃ devalokaṃ.

8. Attakārīsuttavaṇṇanā

38. Aṭṭhame **addasaṃ vā assosiṃ vāti** akkhīni ummīletvā mā addasaṃ, asukasmim nāma ṭhāne vasatīti mā assosiṃ, kathentassa vā vacanaṃ mā assosiṃ. **Kathañhi nāmāti** kena nāma kāraṇena. **Ārambhadhātūti** ārabhanavasena pavattavīriyaṃ. **Nikkamadhātūti** kosajjato nikkhamanasabhāvaṃ vīriyaṃ. **Parakkamadhātūti** parakkamasabhāvo. **Thāmadhātūti** thāmasabhāvo. **Ṭhitidhātūti** ṭhitisabhāvo. **Upakkamadhātūti** upakkamasabhāvo. Sabbhaṃ cetaṃ tena tenākārena pavattassa vīriyasappa nāmaṃ.

9-10. Nidānasuttādivaṇṇanā

39-40. Navame **kammānanti** vaṭṭagāmikammānaṃ. **Samudayāyāti** piṇḍakaraṇatthāya. **Nidānanti** paccayo. **Lobhajanāti** lobhato jātena. **Na paññāyantīti** “evarūpena kammena nibbattā”ti na dissanti. Sukkapakkhe **kammānanti** vivaṭṭagāmikammānaṃ. Iti imasmim sutte vaṭṭavivaṭṭaṃ kathitaṃ. Dasame **niculavaneti** mahāmucalindavane. **Saddhammoti** sāsanasaddhammo.

11. Dārukhandhasuttavaṇṇanā

41. Ekādasame **cetovasippattoti** cittavasibhāvaṃ patto. **Pathavīveva adhimucceyyāti** thaddhākāraṃ pathavīdhātūti sallakkheyya. **Yaṃ nissāyāti** yaṃ vijjamaṇaṃ thaddhākāraṃ pathavīdhātuṃ nissāya amuṃ dārukhandhaṃ pathavīveva adhimucceyya, sā ettha pathavīdhātu atthīti. Iminā nayena sesapadānipi veditabbāni. Yatheva hi tasmim thaddhākārā pathavīdhātu atthi, evaṃ yūsākārā āpodhātu, uṇhākārā tejodhātu, vitthambhanākārā vāyodhātu, rattavaṇṇamhi sāre padumapupphavaṇṇā subhadhātu, pūtibhūte cuṇṇe ceva pheggupapaṭikāsu ca amanuññavaṇṇā asubhadhātu, taṃ nissāya amuṃ dārukhandhaṃ asubhantveva adhimucceyya sallakkheyyāti. Imasmim sutte missakavīhāro nāma kathito.

12. Nāgitasuttavaṇṇanā

42. Dvādasame **gāmantavīhārīti** gāmantasenāsanavāsīṃ. **Samāhitaṃ nisinnanti** tasmim gāmantasenāsane samādhim appētvā nisinnaṃ. **Idānimanti** idāni imaṃ. **Samādhimhā cāvessatīti** samādhito uṭṭhāpessati. **Na attamaṇo homīti** na sakamaṇo homi. **Pacalāyamānanti** niddāyamānaṃ. **Ekattanti** ekasabhāvaṃ, ekaggatābhūtaṃ araññasāññaṃyeva citte karissatīti attho. **Anurakkhissatīti** anuggaṇhissati. **Avimuttaṃ vā cittaṃ vimocessatīti** aññasim kāle avimuttaṃ cittaṃ idāni pañcahi vimuttīhi vimocayissati. **Riñcatīti** vajjeti vissajjeti. **Paṭipañāmetvāti** panuditvā vissajjetvā. **Uccārapassāvakkammāyāti** uccārapassāvakaṇatthāya. Iminā ettakena ṭhānena satthārā araññasenāsanassa vaṇṇo kathito. Suttassa pana paṭhamakoṭṭhāse yaṃ vattabbaṃ, taṃ heṭṭhā vuttamevāti.

Devatāvaggo catuttho.

5. Dhammikavaggo

1. Nāgasuttavaṇṇanā

43. Pañcamassa paṭhame **āyasmatā ānandena saddhinti** idam ‘‘āyāmānandā’’ti theram āmantetvā gatattā vuttaṃ, sathā pana anūnehi pañcahi bhikkhusatehi parivuto tattha agamāsīti veditabbo. **Tenupasaṅkamīti** teheva pañcahi bhikkhusatehi parivuto upasaṅkami. **Parisiñcitvāti** vohāravacanametam, nhāyitvāti attho. **Pubbāpayamānoti** rattadupaṭṭam nivāsetvā uttarāsaṅgacīvaram dvīhi hatthehi gahetvā pacchimalokadhātuṃ piṭṭhito katvā puratthimalokadhātuṃ abhimukho vodakabhāvena gattāni pubbasadisāni kurumāno aṭṭhāsīti attho. Bhikkhusaṅghopi tena tena ṭhānena otarivā nhatvā paccuttarivā sathhāraṃyeva parivāretvā aṭṭhāsi. Iti tasmim samaye ākāsato patamānam rattasuvannaṅkaṇḍalam viya sūriyo pacchimalokadhātuṃ paṭipajji, parisuddharajatamaṅdalo viya pācīnalokadhātuto cando abbhuggaṅchi, majjhāṭṭhānēpi pañcabhikkhusataparivāro sammāsambuddho chabbaṅṅabuddharasmiyo vissajjetvā pubbakotṭhakanadītīre lokaṃ alaṅkurumāno aṭṭhāsi.

Tena kho pana samayena...pe... seto nāma nāgoti setavaṇṇatāya evaṃ laddhanāmo hatthināgo. **Mahātūriyatālītavāditenāti** mahantena tūriyatālītavādītena. Tattha paṭhamam saṅghaṭṭanam tālītam nāma hoti, tato param vādītam. **Janoti** hatthidassanattham sannipatitamahājano. **Disvā evamāhāti** aṅgapaccaṅgāni ghaṃsitvā nhāpetvā uttāretvā bahitīre ṭhapetvā gattāni vodakāni katvā hatthālānkārena alaṅkataṃ tam mahānāgam disvā idam ‘‘abhirūpo vata, bho’’ti pasamsāvacanamāha. **Kāyupapannoti** sarīrasampattiyā upapanno, paripuṇṇaṅgapaccaṅgoti attho. **Āyasmā udāyīti** paṭisambhidāppatto kāludāyitthero. **Etadvocāti** tam mahājanam hatthissa vaṇṇam bhaṇantam disvā ‘‘ayaṃ jano ahetukapaṭisandhiyam nibbattahatthino vaṇṇam katheti, na buddhahatthissa. Aham dāni iminā hatthināgena upamam katvā buddhanāgassa vaṇṇam kathessāmī’’ti cintetvā etam ‘‘hatthimeva nu kho, bhante’’tiādivacanam avoca. Tattha **mahantanti** ārohasampannam. **Brahantanti** pariñāhasampannam. **Evamāhāti** evaṃ vadati. Atha bhagavā yasmā ayaṃ nāgasaddo hatthimhiceva assaṅṅauragarukkhamanussesu cāpi pavattati, tasmā **hatthimpi khoti**ādīmāha.

Āgunti pāpakaṃ lāmaṃ akusaladhammam. **Tamahaṃ nāgoti brūmīti** tam aham imehi tīhi dvārehi dasanam akusalakammam pathānam dvādasannaṅca akusalacittānam akaraṇato nāgoti vadāmi. Ayaṅhi na āguṃ karotīti iminā atthena nāgo. **Imāhi gāthāhi anumodāmīti** imāhi catusaṭṭhipadāhi soḷasahi gāthāhi anumodāmi abhinandāmi.

Manussabhūtanti devādibhāvam anupagantvā manussameva bhūtam. **Attadantanti** attanāyeva dantam, na aññehi damatham upanītam. Bhagavā hi attanā uppāditeneva maggadamatthena cakkhutopi danto, sotatopi, ghānatopi, jivhātopi, kāyatopi, manatopīti imesu chasu ṭhānesu danto santo nibbuto parinibbuto. Tenāha – ‘‘attadanta’’nti. **Samāhitanti** duvidhenāpi samādhinā samāhitam. **Iriyamānanti** viharamānam. **Brahmapatheti** seṭṭhapathe, amatapathe, nibbānapathe. **Cittassūpasame ratanti** paṭhamajjhānena pañca nīvaraṇāni vūpasametvā, dutiyajjhānena vitakkavicāre, tatiyajjhānena pītiṃ, catutthajjhānena sukhadukkham vūpasametvā tasmim cittassūpasame ratam abhiratam.

Namassantīti kāyena namassanti, vācāya namassanti, manasā namassanti, dhammānudhammapaṭipattiyā namassanti, sakkaronti garuṃ karonti. **Sabbadhammānapāragunti** sabbesam khandhāyanadhātudhammānam abhiññāpāragū, pariññāpāragū, pahānapāragū, bhāvanāpāragū, sacchikiriyāpāragū, samāpattipāragūti chabbidhena pāragamanena pāragatam pārapattam matthakappattam. **Devāpi tam namassantīti** dukkhappattā subrahmadevaputtādayo sukhappattā ca sabbeva dasasahassacakkavāḷavāsino devāpi tumhe namassanti. **Iti me arahato sutanti** iti mayā catūhi kāraṇehi arahāti laddhavohārānam tumhākaṃyeva santike sutanti dīpeti.

Sabbasaṃyojanātīnti sabbāni dasavidhasaṃyojanāni atikkantam. **Vanā nibbanamāgatanti** kilesavanato nibbanam kilesavanarahitam nibbānam āgatam sampattam. **Kāmehi nekkhammaratanti** duvidhehi kāmehi nikkhantattā pabbajjā aṭṭha samāpattiyō cattāro ca ariyamaggā kāmehi nekkhammam nāma, tattha ratam abhiratam. **Muttam selāva kañcananti** seladhātuto muttam kañcanasadisam.

Sabbe accarucīti sabbasatte atikkamitvā pavattaruci. Aṭṭhamakaṅhi atikkamitvā pavattarucitāya

sotāpanno accaruci nāma, sotāpannaṃ atikkamitvā pavattarucitāya sakadāgāmī...pe... khīṇāsavaṃ atikkamitvā pavattarucitāya paccekasambuddho, paccekasambuddhaṃ atikkamitvā pavattarucitāya sammāsambuddho accaruci nāma. **Himavāvaññe siluccayeti** yathā himavā pabbatarājā aññe pabbate atirocati, evaṃ atirocatīti attho. **Saccanāmoti** tacchanāmo bhūtanāmo āguṃ akaraṇeneva nāgoti evaṃ avitathanāmo.

Soraccanti sucisīlaṃ. **Avihimsāti** karuṇā ca karuṇāpubbabhāgo ca. **Pādā nāgassa te duveti** te buddhanāgassa duve purimapādā.

Tapoti dhutasamādānaṃ. **Brahmacariyanti** ariyamaggaṣīlaṃ. **Caraṇā nāgassa tyāpareti** te buddhanāgassa apare dve pacchimapādā. **Saddhāhatthoti** saddhāmayāya soṇḍāya samannāgato. **Upekkhāsetadantavāti** chaḷaṅgupekkhāmayehi setadantehi samannāgato.

Sati gīvāti yathā nāgassa aṅgapaccaṅgasmim sirājālānaṃ gīvā patiṭṭhā, evaṃ buddhanāgassa soraccādīnaṃ dhammānaṃ sati. Tena vuttaṃ – “sati gīvā”ti. **Siro paññāti** yathā hatthināgassa siro uttamaṅgo, evaṃ buddhanāgassa sabbaññutaññaṃ. Tena hi so sabbadhamme jānāti. Tena vuttaṃ – “siro paññā”ti. **Vīmaṃsā dhammacintanāti** yathā hatthināgassa aggasoṇḍo vīmaṃsā nāma hoti. So tāya thaddhamudukaṃ khādītābbākhādītābbañña vīmaṃsati, tato pahātābbaṃ pajahati, ādātābbaṃ ādiyati, evameva buddhanāgassa dhammakotṭhāsaparicchedakaññaṇasaṅkhātā dhammacintanā vīmaṃsā. Tena hi ñāṇena so bhābhābhabe jānāti. Tena vuttaṃ – “vīmaṃsā dhammacintanā”ti. **Dhammakucchisamātapoti** dhammo vuccati catutthajjhānasamādhi, kucchiyeva samātapo kucchisamātapo. Samātapo nāma samātapanaṭṭhānaṃ. Dhammo kucchisamātapo assāti dhammakucchisamātapo. Catutthajjhānasamādhismim ṭhitassa hi te te iddhividhādidhammā ijjhanti, tasmā so kucchisamātapoti vutto. **Vivekoti** kāyacittaupadhiviveko. Yathā nāgassa vāladhi makkhikā vāreti, evaṃ tathāgatassa viveko gahaṭṭhapabbajite vāreti. Tasmā so **vāladhīti** vutto.

Jhāyīti duvidhena jhānena jhāyī. **Assāsaratoti** nāgassa hi assāsapassāsā viya buddhanāgassa phalasaṃpatti, tattha rato, assāsapassāsāsehi viya tāya vinā na vattatīti attho. **Sabbattha saṃvutoti** sabbadvāresu saṃvuto. **Anavajjānīti** sammāajīvena uppannabhojanāni. **Sāvajjānīti** pañcavidhamicchājīvavasena uppannabhojanāni.

Aṇuṃthūlanti khuddakañña mahantañña. **Sabbaṃ chetvāna bandhananti** sabbaṃ dasavidhampi saṃyojanaṃ chinditvāna. **Nupalippati lokenāti** lokena saddhim taṇhāmānadiṭṭhilepehi na lippati. **Mahāginīti** mahāaggi. **Viññūhi desitāti** idha paṭisambhidāppatto kāḷudāyittherova viññū paṇḍito, tena desitāti attho. **Viññassanti mahānāgā, nāgaṃ nāgena desitanti** udāyittheranāgena desitaṃ buddhanāgaṃ itare khīṇāsavā nāgā vijānissanti.

Sarīraṃ vijahaṃ nāgo, parinibbissatīti bodhipallaṅke kilesaparinibbānena parinibbuto, yamakasālantare anupādisesāya nibbānadhātuyā parinibbāyissati. Evam paṭisambhidāppatto udāyitthero soḷasahi gāthāhi catusaṭṭhiyā padehi dasabalassa vaṇṇaṃ kathento desanaṃ niṭṭhāpesi. Bhagavā anumodi. Desanāvasāne caturāsītipāṇasahassāni amatapānaṃ pivimsūti.

2. Migasālāsuttavaṇṇanā

44. Dutīye **kathaṃ kathaṃ nāmāti** kena kena kāraṇena. **Aññeyyoti** ājānitabbo. **Yatra hi nāmāti** yasmim nāma dhamme. **Samasaṃgatikāti** samabhāveneva samagatikā. **Bhavissantīti** jātā. **Sakadāgāmipatto tusitaṃ kāyaṃ upapannoti** sakadāgāmipuggalo hutvā tusitabhavaneyeva nibbato. **Kathaṃ kathaṃ nāmāti** kena kena nu kho kāraṇena, kiṃ nu kho jānitvā desito, udāhu ajānitvāti. Thero kāraṇaṃ ajānanto **evaṃ kho panetaṃ bhagini bhagavatā byākatanti** āha.

Ammakā ammakapaññāti itthī hutvā itthisaññāya eva samannāgatā. **Ke ca**

purisapuggalaparopariyañāṇeti ettha purisapuggalaparopariyañāṇaṃ vuccati purisapuggalānaṃ tikkhamuduvasena indriyaparopariyañāṇaṃ. Tasmā kā ca bālā migasālā, ke ca purisapuggalānaṃ indriyaparopariyañāṇe appaṭihatavisayā sammāsambuddhā, ubhayametaṃ dūre suvidūreti ayamettha saṅkhepo.

Idāni migasālāya attano dūrabhāvaṃ dassento **chayime**, **ānandā**tiādīmāha. **Sorato hotīti** pāpato suṭṭhu orato virato hoti. Suratotipi pāṭho. **Abhinandanti sabrahmacārī ekattavāsenāti** tena saddhiṃ ekatovāsenā sabrahmacārī abhinandanti tussanti. Ekantavāsenātiipi pāṭho, satatavāsenāti attho. **Savanenapi akataṃ hotīti** sotabbayuttakaṃ asutaṃ hoti. **Bāhusaccenapi akataṃ hotīti** ettha bāhusaccaṃ vuccati vīriyaṃ, vīriyena kattabbayuttakaṃ akataṃ hotīti attho. **Diṭṭhiyāpi appaṭividdhaṃ hotīti** diṭṭhiyā paṭivijjhitaṃ appaṭividdhaṃ hoti. **Sāmāyikampi vimuttiṃ na labhatīti** kālānukālaṃ dhammassavanaṃ nissāya pītipāmojjaṃ na labhati. **Hānagāmīyeva hotīti** parihānimeva gacchati.

Pamāṇikāti puggalesu pamāṇaggāhakā. **Paminantīti** pametuṃ tuletum ārabhanti. **Eko hīnoti** eko guṇehi hīno. **Eko paṇītoti** eko guṇehi paṇīto. **Taṃ hīti** taṃ pamāṇakaraṇaṃ.

Abhikkantataroti sundarataro. **Paṇītaroti** uttamataro. **Dhammasoto nibbahatīti** sūraṃ hutvā pavattamānavipassanāñāṇaṃ nibbahati, ariyabhūmiṃ sampāpeti. **Tadantaraṃ ko jāneyyāti** taṃ antaraṃ taṃ kāraṇaṃ aññatra tathāgatena ko jāneyyāti attho.

Kodhamānoti kodho ca māno ca. **Lobhadhammāti** lobhoyeva. **Vacīsaṅkhārāti** ālāpasallāpavasena vacanāneva. **Yo vā panassa mādisoti** yo vā pana aññopi mayā sadiso sammāsambuddhoyeva assa, so puggalesu pamāṇaṃ gaṇheyyāti attho. **Khaññatīti** guṇakhaṇaṇaṃ pāpuṇāti. **Ime kho, ānanda, cha puggalāti** dve soratā, dve adhigatakodhamānalobhadhammā, dve adhigatakodhamānavacīsaṅkhārāti ime cha puggalā. **Gatinti** ñānagatiṃ. **Ekaṅgahīnāti** ekekena guṇaṅgena hīnā. Pūraṇo sīlena vīsesi ahoṣi, isidatto paññāya. Pūraṇassa sīlaṃ isidattassa paññāṭṭhāne ṭhitam, isidattassa paññā pūraṇassa sīlaṭṭhāne ṭhitāti.

3. Iṅasuttavaṇṇanā

45. Tatiye **dāliddiyanti** daliddabhāvo. **Kāmabhoginoti** kāme bhuñjanakasattassa. **Assakoti** attano santakena rahito. **Anāḷhikoti** na aḍḍho. **Iṅaṃ ādiyatīti** jīvitum asakkonto iṅaṃ ādiyati. **Vaḍḍhiṃ paṭissuṇātīti** dātum asakkonto vaḍḍhiṃ dassāmīti paṭijānāti. **Anucarantīpi nantī** parisamajjhagaṇamajjhādīsu ātapaṭhapanapaṃsuokiraṇādīhi vippakāraṃ pāpento pacchato pacchato anubandhanti. **Saddhā natthīti** okappanakasaddhā mattakampi natthi. **Hirī natthīti** hirīyanākāramattakampi natthi. **Ottappaṃ natthīti** bhāyanākāramattakampi natthi. **Vīriyaṃ natthīti** kāyikavīriyamattakampi natthi. **Paññā natthīti** kammassakatapaññā mattakampi natthi. **Iṅādānasmīṃ vadāmīti** iṅaggaṇaṃ vadāmi. **Mā maṃ jaññūti** mā maṃ jānātu.

Dāliddiyaṃ dukkhanti dhanadaliddabhāvo dukkhaṃ. **Kāmalābhābhijappinanti** kāmalābhaṃ patthentānaṃ. **Pāpakammavinibbayoti** pāpakammavaḍḍhako. **Samsappatīti** paripphandati. **Jānanti** jānanto. **Yassa vippaṭisārajāti** ye assa vippaṭisārato jātā. **Yonimaññataranti** ekaṃ tiracchānayoṇiṃ. **Dadaṃ cittaṃ pasādayanti** cittaṃ pasādentō dadamāno.

Kaṭaggāhoti jayaggāho, anaparādhaggāho hoti. **Ghamesinoti** gharāvāsaṃ pariyesantassa vasamānassa vā. **Cāgo puññaṃ pavaḍḍhatīti** cāgoti saṅkhaṃ gataṃ puññaṃ vaḍḍhati. Cāgā puññanti vā pāṭho. **Paṭiṭṭhitāti** paṭiṭṭhitasaddhā nāma sotāpannassa saddhā. **Hirimanoti** hirisampayuttacitto. **Nirāmisam sukhanti** tūṇi jhānāni nissāya uppajjanakasukhaṃ. **Upekkhanti** catutthajjhānupekkhaṃ. **Āraddhavīriyoti** paripuṇṇapaggahitavīriyo. **Jhānāni upasampajjāti** cattāri jhānāni patvā. **Ekodi nipako satoti** ekaggacitto kammassakataññasatīhi ca samannāgato.

Evam ñatvā yathābhūtanti evaṃ ettakaṃ kāraṇaṃ yathāsabhāvaṃ jānitvā.

Sabbasaṃyojanakkhayeti nibbāne. **Sabbasoti** sabbākārena. **Anupādāyāti** aggahetvā. **Sammā cittaṃ vimuccatīti** idaṃ vuttaṃ hoti – sabbasaṃyojanakkhayasaṅkhāte nibbāne sabbaso anupādiyitvā sammā hetunā nayena maggacittaṃ vimuccatī. “Etaṃ ñatvā yathābhūtaṃ, sabbasaṃyojanakkhaya”ntipi pāliyaṃ likhitaṃ, tassa etaṃ sabbasaṃyojanakkhayasaṅkhātaṃ nibbānaṃ yathābhūtaṃ ñatvāti attho. Purimapacchimehi pana saddhiṃ na ghaṭṭiyati.

Tassa sammā vimuttassāti tassa sammā vimuttassa khīṇāsavassa. **Ñāṇaṃ hotīti** paccavekkhaṇañāṇaṃ hoti. **Tādinoti** taṃsaṅghitassa. **Akuppāti** akuppārammaṇattā kuppakāraṇānaṃ kilesānaṃ abhāvena akuppā. **Vimuttīti** maggavimuttiṃ phalavimuttiṃ. **Bhavasāṃyojanakkhayeti** bhavasāṃyojanakkhayasaṅkhāte nibbāne bhavasāṃyojanānaṃ khayante uppannā. **Etaṃ kho paramaṃ ñāṇanti** etaṃ maggaphalañāṇaṃ paramañāṇaṃ nāma. **Sukhamanuttaranti** etadeva maggaphalasukhaṃ anuttaraṃ sukhaṃ nāma. **Āṇaṇyamuttamanti** sabbesaṃ aṇaṇaṃ khīṇāsavo uttamaaṇaṇo, tasmā arahattaphalaṃ āṇaṇyamuttamanti arahattaphalena desanāya kūṭaṃ gaṇhi. Imasmiṃca sutte vaṭṭameva kathetvā gāthāsu vaṭṭavivaṭṭaṃ kathitanti.

4. Mahācundasuttavaṇṇanā

46. Catutthe **cetīsūti** cetiraṭṭhe. **Sayaṃjātiyanti** evaṃnāmake nigame. **Mahācundoti** dhammasenāpatissa kaniṭṭhabhātiko. Dhamme yogo anuyogo etesanti **dhammayogā**. Dhammakathikānaṃ etaṃ nāmaṃ. Jhāyantīti **jhāyī**. **Apasādentīti** ghaṭṭenti hiṃsanti. **Jhāyantīti** cintenti. **Pajjhāyantīti**ādīni upasaggavasena vaḍḍhitāni. **Kimime jhāyantīti** kiṃ nāma ime jhāyanti. **Kintime jhāyantīti** kimatthaṃ ime jhāyanti. **Kathaṃ ime jhāyantīti** kena kāraṇena ime jhāyanti. **Amataṃ dhātuṃ kāyena phusitvā viharantīti** maraṇavirahitaṃ nibbānadhātuṃ sandhāya kammaṭṭhānaṃ gahetvā viharantā anukkamena taṃ nāmakāyena phusitvā viharanti. **Gambhīraṃ atthapadanti** gulhaṃ paṭicchannaṃ khandhadhātuāyatanādiatthaṃ. **Paññāya ativijja passantīti** sahavipassanāya maggapaññāya paṭivijjhitvā passanti. Imasmiṃ panatthe sammasanapaṭivedhapaññāpi uggahaparipucchapaññāpi vaṭṭatiyevāti.

5-6. Sandiṭṭhikasuttadvayaṇṇanā

47-48. Pañcame **santaṃ vā ajjhantanti** niyakajjhatte vijjamānaṃ. **Lobhoti**ādīhi tīpi akusalāmūlāni dassitāni. **Lobhadhammāti**ādīhi taṃsāmpayuttakā dhammā. Chaṭṭhe **kāyasandosanti** kāyadvārassa dussanākāraṃ. Sesadvayepi eseva nayo. Imesu dvīsu suttesu paccavekkhaṇāva kathitā.

7. Khemasuttavaṇṇanā

49. Sattame **vusitavāti** vutthabrahmacariyavāso. **Katakaraṇīyoti** catūhi maggehi kattabbaṃ katvā ṭhito. **Ohitabhāroti** khandhabhāraṃ kilesabhāraṃ abhisāṅkhārahāraṃ otāretvā ṭhito. **Anuppattasadatthoti** sadattho vuccati arahattaṃ, taṃ pattoti attho. **Parikkhīṇabhavasāṃyojanoti** khīṇabhavabandhano. **Sammadaññā vimuttoti** sammā hetunā kāraṇena jānitvā vimutto. **Tassa na evaṃ hoti atthi me seyyoti vāti**ādīhi seyyassa seyyohamasmīti mānādayo tayo mānā paṭikkhittā. Na hi khīṇāsavassa “atthi mayhaṃ seyyo, atthi sadiso, atthi hīno”ti māno hoti. **Natthi me seyyoti**ādīhipi teyeva paṭikkhittā. Na hi khīṇāsavassa “ahameva seyyo, ahaṃ sadiso, ahaṃ hīno, aññe seyyādayo natthi”ti evaṃ māno hoti.

Acirapakkantesūti arahattaṃ byākaritvā aciraṃyeva pakkantesu. **Aññaṃ byākarontīti** arahattaṃ kathenti. **Hasamānakā maññe aññaṃ byākarontīti** hasamānā viya kathenti. **Vighātaṃ āpajjantīti** dukkhaṃ āpajjanti.

Na ussesu na omesu, samatte nopaṇīyareti ettha **ussāti** ussitatā seyyapuggalā. **Omāti** hīnā.

Samattoti sadiso. Iti imesu tīsupi seyyahīnasadisesu khīṇāsavā mānena na upanīyare, na upanenti, na upagacchantīti attho. **Khīṇā jāṭīti** khīṇā tesam jāti. **Vusitam brahmacariyanti** vuttham maggabrahmacariyam. **Caranti saṃyojanavippamuttāti** sabbasaṃyojanehi vimuttā hutvā caranti. Suttepi gāthāyampi khīṇāsavo kathito.

8. Indriyasamvarasuttavaṇṇanā

50. Aṭṭhame **hatūpanisam hotīti** hatūpanissayam hoti. **Sīlavipannassāti** vipannasīlassa. **Yathābhūtañāḍadassananti** taruṇavipassanāñāḍam. **Nibbidāvirāgoti** ettha nibbidā balavavipassanā, virāgo ariyamaggo. **Vimuttiñāḍadassananti** ettha **vimuttīti** arahattaphalam, **ñāḍadassananti** paccavekkhaṇāñāḍam. **Upanissayasampannam hotīti** sampannaupanissayam hoti. Imasmim sutte sīlanurakkhaṇāindriyasamvaro kathito.

9. Ānandasuttavaṇṇanā

51. Navame **kittāvatāti** kittakena. **Assutañcevāti** aññasmim kāle assutapubbam. **Na sammosam gacchantīti** vināsam na gacchanti. **Cetaso samphuṭṭhapubbāti** cittena phusitapubbā. **Samudācarantīti** manodvāre caranti. **Aviññātañca vijānātīti** aññasmim kāle aviññātakāraṇam jānāti. **Pariyāpuṇātīti** vaḷañjeti katheti. **Desetīti** pakāseti. **Param vācetīti** param uggaṇhāpeti.

Āgatāgamāti dīghādīsu yo koci āgamo āgato etesanti āgatāgamā. **Dhammadharāti** suttantapiṭakadharā. **Vinayadharāti** vinayapiṭakadharā. **Mātikādharāti** dvepātimokkhadharā. **Paripucchātīti** anusandhipubbāparam pucchati. **Paripaṇhatīti** idañcidañca pucchissāmīti paritulati paricchindati. **Idam, bhante, kathanti,** bhante, idam anusandhipubbāparam katham hotīti pucchati. **Imassa kvatthoti** imassa bhāsītassa ko atthoti pucchati. **Avivaṇanti** avivaritam. **Vivarantīti** pākāṭam karonti. **Kaṅkhāṭhāniyesūti** kaṅkhāya kāraṇabhūtesu. Tattha yasmim dhamme kaṅkhā uppajjati, sveva kaṅkhāṭhāniyo nāmāti vedītabbo.

10. Khattiyasuttavaṇṇanā

52. Dasame **bhogādhippāyāti** bhogasaṃharaṇattham ṭhapitādhippāyā pavattaajjhāsayā. **Paññūpavicārāti** paññavanto bhaveyyāmāti evam paññatthāya pavattūpavicārā. Ayameva nesam vicāro citte upavicarati. **Balādhiṭṭhānāti** balakāyādhiṭṭhānā. Balakāyañhi laddhā te laddhapatiṭṭhā nāma hontī. **Pathavibhinivesāti** pathavisāmīno bhavissāmāti evam pathaviatthāya katacittābhinivesā. **Issariyapariyosānāti** rajjābhisekapariyosānā. Abhisekañhi patvā te pariyosānappattā nāma hontī. Iminā nayena sabbattha attho vedītabbo.

Sesapadesu panettha ayamadhippāyo – brāhmaṇā tāva mante labhitvā laddhapatiṭṭhā nāma hontī, gahapatikā yaṃkiñci sippam, itthī kuladāyajjasāmīkam puttam, corā yaṃkiñci āvudhasattham, samaṇā sīlaparipuṇṇā laddhapatiṭṭhā nāma hontī. Tasmā **mantādhiṭṭhānāti**ādīni vuttāni.

Brāhmaṇānañca “yaññam yajissāmā”ti cittaṃ abhinivisati, brahmaloke patte pariyosānappattā nāma hontī. Tasmā te **yaññābhinivesā brahmalokapariyosānāti** vuttā. Kammantakaraṇatthāya mano etesam abhinivisatīti **kammantābhinivesā**. Kamme niṭṭhite pariyosānappattā nāma hontīti **niṭṭhitakammantapariyosānā**.

Purisādhippāyāti purisesu pavattaajjhāsayā. Alaṅkāratthāya mano upavicarati etissāti **alaṅkārupavicārā**. Asapattī hutvā ekikāva ghare vaseyyanti evamassā cittaṃ abhinivisatīti **asapattībhinivesā**. Gharāvāsissariye laddhe pariyosānappattā nāma hontīti issariyapariyosānā.

Parabhaṇḍassa ādāne adhippāyo etesanti **ādānādhippāyā**. Gahane nilīyanatṭhāne etesaṃ mano upavicaratīti **gahanūpavicārā**. Andhakārattḥāya etesaṃ cittaṃ abhinivisatīti **andhakārābhīnivesā**. Adassanappattā pariyoṣānappattā hontīti **adassanapariyoṣānā**.

Adhivāsanakkhantiyañca sucibhāvasīle ca adhippāyo etesanti **khantisoraccādhippāyā**. Akiñcanabhāve niggahaṇabhāve cittaṃ etesaṃ abhinivisatīti **ākiñcaññābhīnivesā**. Nibbānappattā pariyoṣānappattā hontīti **nibbānapariyoṣānā**.

11. Appamādasuttavaṇṇanā

53. Ekādasame **samadhiggayhāti** suṭṭhu gaṇhitvā. **Jaṅgalānaṃ pāṇānanti** pathavītalacārīnaṃ sapādakapāṇānaṃ. **Padajātānīti** padāni. **Samodhānaṃ gacchantīti** odhānaṃ upanikkhepaṃ gacchanti. **Aggamakkhāyatīti** seṭṭhaṃ akkhāyati. **Pabbajalāyakoti** pabbajatiṇacchedako. **Odhunātīti** heṭṭhā mukhaṃ dhunāti. **Nidhunātīti** ubhoḥi passehi dhunāti. **Nicchādetīti** bāhāya vā paharati, rukkhe vā paharati. **Ambapiṇḍiyāti** ambapahalapiṇḍiyā. **Vaṇṭūpanibandhanānīti** vaṇṭe upanibandhanāni, vaṇṭe vā patiṭṭhitāni. **Tadanvayāni bhavanti** vaṇṭānuvattakāni bhavanti, ambapiṇḍidaṇḍakānuvattakāni bhavantiṭīpi attho. **Khuddarājānoti** khuddakarājāno, pakatirājāno vā.

12. Dhammikasuttavaṇṇanā

54. Dvādasame **sabbasoti** sabbesu. **Sattasu vihāresūti** sattasu pariveṇesu. **Paribhāsātīti** paribhavati bhayaṃ upadaṃseti. **Vihimsatīti** viheṭṭheti. **Vituvatīti** vijjhati. **Roseti vācāyāti** vācāya ghaṭṭeti. **Pakkamantīti** disā pakkamanti. **Na saṇṭhahantīti** nappatiṭṭhahanti. **Riñcantīti** chaḍḍenti vissajjenti. **Pabbājeyyāmāti** nīhareyyāma. **Handāti** vavassaggatthe nipāto. **Alanti** yuttametaṃ, yaṃ taṃ pabbājeyyunti attho. **Kim te imināti** kim tava iminā jātibhūmiyaṃ vāseṇa. **Tīradassim sakūṇanti** disākākaṃ. **Muñcantīti** disādassanattaṃ vissajjenti. **Sāmantāti** avidūre. Samantātipi pāṭho, samantatoti attho. **Abhinivesoti** pattharivā ṭhitasākhānaṃ niveso. **Mūlasantānakānanti** mūlānaṃ niveso.

Āḷhakathālikāti taṇḍulāḷhakassa bhattapacanaṭhālikā. **Khuddaṃ madhanti** khuddamakkhikāhi kataṃ daṇḍakamadhuṃ. **Anelakanti** niddosaṃ. **Na ca sudaṃ aññamaññassa phalāni hiṃsantīti** aññamaññassa koṭṭhāse phalāni na hiṃsanti. Attano koṭṭhāsehi mūlaṃ vā tacāṃ vā pattāṃ vā chindanto nāma natthi, attano attano sākḥāya heṭṭhā patitāneva paribhuñjanti. Aññassa koṭṭhāsato aññasa koṭṭhāsaṃ parivattitvā gatampi “na amhākaṃ sākḥāya phala”nti ñatvā no khādanti. **Yāvadatthaṃ bhakkhitvāti** kaṇṭhappamañeṇa khādītva. **Sākhaṃ bhañjitvāti** chattappamañamattaṃ chindītva chāyaṃ katvā pakkāmi. **Yatra hi nāmāti** yo hi nāma. **Pakkamissatīti** pakkanto. **Nādāsīti** devatāya ānubhāvena phalameva na gaṇhi. Evañhi sā adhiṭṭhāsi.

Tenupasaṅkamīti janapadavāsīhi gantvā, “mahārāja, rukkho phalaṃ na gaṇhi, amhākaṃ nu kho doso tumhāka”nti vutte “neva mayhaṃ doso atthi, na jānapadānaṃ, amhākaṃ vijjite adhammo nāma na vattati, kena nu kho kāraṇeṇa rukkho na phalito, sakkāṃ upasaṅkamitvā pucchissāmi”ti cintetvā yena sakko devānamindo tenupasaṅkami. **Pavattesīti** parivattesi. **Ummūlamakāsīti** uddhammūlaṃ akāsi. **Api nu tvanti** api nu tava. **Aṭṭhitāyevāti** aṭṭhitāya eva. **Sacchavīnīti** samānacchavīni pakatiṭṭhāne ṭhitāni. **Na paccakkosātīti** nappaṭikkosati. **Rosantanti** ghaṭṭentaṃ. **Bhaṇḍantanti** paharantaṃ.

Sunettoti nettā vuccanti akkhīni, tesāṃ sundaratāya sunetto. **Titthakaroti** sugatiogāhanatitthassa kāraṅko. **Vītarāgoti** vikkhambhanavasena vigatarāgo. **Pasavatīti** paṭilabhati. **Diṭṭhisampannanti** dassanasampannaṃ, sotāpannanti attho. **Khantinti** attano guṇakhaṇanaṃ. **Yathāmaṃ sabrahmacārīsūti** yathā imaṃ sabrahmacārīsu akkosanaparibhāsanāṃ, aññaṃ evarūpaṃ guṇakhanṭiṃ na vadāmīti attho. **Na no samasabrahmacārīsūti** ettha samajano nāma sakajano vuccati. Tasmā na no sakesu samānabrahmacārīsu cittāni paduṭṭhāni bhavissantīti ayamettha attho.

Jotipālo ca govindoti nāmena jotipālo thānena mahāgovindo. **Sattapurohitoti** reṇuādīnaṃ sattannaṃ rājūnaṃ purohito. **Ahiṃsakā atītaṃseti** ete cha sathhāro atītaṃse ahiṃsakā ahesuṃ. **Nirāmagandhāti** kodhāmagandhena nirāmagandhā. **Karuṇevimuttāti** karuṇajjhāne adhimuttā, karuṇāya ca karuṇāpubbabhāge ca thitā. **Yeteti** ete, ayameva vā pātho. **Na sādhurūpaṃ āsīdeti** sādhusabhāvaṃ na ghaṭṭeyya. **Diṭṭhiṭṭhānappahāyīnanti** dvāsaṭṭhidiṭṭhigatappahāyīnaṃ. **Sattamoti** arahattato paṭṭhāya sattamo. **Avītarāgoti** avigatarāgo. Etena anāgāmbhāvaṃ paṭikkhipati. **Pañcindriyā mudūti** pañca vipassanindriyāni mudūni. Tassa hi tāni sakadāgāmiṃ upādāya mudūni nāma honti. **Vipassanāti** saṅkhārapariggahaññaṃ. **Pubbeva upahaññatīti** paṭhamataraññeva upahaññati. **Akkhatoti** guṇakhaṇanena akkhatto anupahato hutvā. Sesam sabbattha uttānamevāti.

Dhammikavaggo pañcama.

Paṭhamapaṇṇāsakaṃ niṭṭhitaṃ.

2. Dutiyapaṇṇāsakaṃ

6. Mahāvaggo

1. Soṇasuttavaṇṇanā

55. Chaṭṭhassa paṭhame soṇoti sukhumālasonatthero. **Sītavaneti** evaṃnāmake susāne. Tasmim kira paṭipāṭiyā pañca caṅkamanapaṇṇasālāsātāni māpitāni, tesu thero attano sappāyacaṅkamaṇaṃ gahetvā samaṇadhammaṃ karoti. Tassa āraddhavīriyassa hutvā caṅkamato pādatalāni bhijjimsu, jāṇūhi caṅkamato jāṇukānīpi hatthatalānīpi bhijjimsu, chiddāni ahesuṃ. Evaṃ āraddhavīriyo viharanto obhāsanimittamattakampi dassetuṃ nāsakkhi. Tassa vīriyena kilamitakāyassa koṭiyam pāsāṇaphalake nisinnassa yo vitakko udapādi, taṃ dassetuṃ **atha kho āyasmatotīdi** vuttaṃ. Tattha **āraddhavīriyāti** paripuṇṇapaggahitavīriyā. **Na anupādāya āsavehi cittaṃ vimuccatīti** sace hi ahaṃ ugghaṭṭitaññū vā assaṃ vipaṇcītaññū vā neyyo vā, nūna me cittaṃ vimucceyya. Addhā panasmi padaparamo, yena me cittaṃ na vimuccatīti sannīṭṭhānaṃ katvā **saṃvijjanti kho panātīdāni** cintesi. Tattha **bhogāti** upayogathe paccattaṃ.

Pāturahosīti therassa cittācāraṃ ñatvā “ayaṃ soṇo ajja sītavane padhānabhūmiyaṃ nisinno imaṃ vitakkaṃ vitakketi, gantvāssa vitakkaṃ sahotthaṃ gaṇhitvā vīṇopamaṃ kammaṭṭhānaṃ kathessāmī”ti pamukhe pākaṭo ahosi. **Paññatte āsaneti** padhānikabhikkhū attano vasanaṭṭhāne ovadituṃ āgatassa buddhassa bhagavato nisīdanatthaṃ yathālābhena āsanaṃ paññāpetvāva padhānaṃ karonti, aññaṃ alabhamānā purāṇapaṇṇānīpi santharivā upari saṅghāṭim paññāpentī. Theropi āsanaṃ paññāpetvā padhānaṃ akāsi. Taṃ sandhāya vuttaṃ – “paññatte āsane”ti.

Taṃ kiṃ maññasīti sathā “imassa bhikkhuno avasesakammaṭṭhānehi attho natthi, ayaṃ gandhabbasippe cheko ciṇṇavasī, attano visaye kathiyamānaṃ khippameva sallakkhessatī”ti vīṇopamaṃ kathetuṃ “taṃ kiṃ maññasī”tiādīmāha. **Vīṇāya tantissare kusalatā** nāma vīṇāya vādanakusalatā, so ca tattha kusalo. Mātāpitaro hissa “amhākaṃ putto aññaṃ sippaṃ sikkhanto kāyena kilamissati, idaṃ pana sayane nisinneneva sakkā uggaṇhitu”nti gandhabbasippameva uggaṇhāpesuṃ. Tassa –

“Satta sarā tayo gāmā, mucchanā ekavīsati;
Thānā ekūnapaññāsa, iccete saramaṇḍalā”ti. –

Ādikaṃ gandhabbasippaṃ sabbameva paguṇaṃ ahosi. **Accāyatāti** atīyātā kharamucchanā. **Saravatīti** sarasampannā. **Kammaññāti** kammakkhamā kammayoggā. **Atisithilāti** mandamucchanā. **Same guṇe**

patiṭṭhitāti majjhime sare ṭhapetvā mucchitā.

Accāraddhanti atigāḷhaṃ. **Uddhaccāya saṃvattatī**ti uddhatabhāvāya saṃvattati. **Atilīnanti** atisithilaṃ. **Kosajjāyāti** kusītabhāvattāya. **Vīriyasamathaṃ adhiṭṭhahāti** vīriyasampayuttaṃ samathaṃ adhiṭṭhaha, vīriyaṃ samathena yojehīti attho. **Indriyānañca samataṃ paṭivijjhāti** saddhādīnaṃ indriyānaṃ samataṃ samabhāvaṃ adhiṭṭhāhi. Tattha saddhaṃ paññāya, paññañca saddhāya, vīriyaṃ samādhinā, samādhinā vīriyena yojayatā indriyānaṃ samatā adhiṭṭhitā nāma hoti. Sati pana sabbatthikā, sā sadā balavatīyeva vaṭṭati. Tañca pana tesam yojanāvidhānaṃ visuddhimagge (visuddhi. 1.60-62) pakāsītameva. **Tattha ca nimittaṃ gaṇhāhīti** tasmīñca samabhāve sati yena ādāse mukhabimbeneva nimittena uppajjitabbaṃ, taṃ samathanimittaṃ vipassanānimittaṃ magganimittaṃ phalanimittañca gaṇhāhi nibbattehīti evamassa satthā arahatte pakkhipitvā kammaṭṭhānaṃ kathesi.

Tattha ca nimittaṃ aggahesīti samathanimittañca vipassanānimittañca aggahesi. **Cha ṭhānānīti** cha kāraṇāni. **Adhimutto hotīti** paṭivijjhītvā paccakkhaṃ katvā ṭhito hoti. **Nekkhammādhimuttoti**tiādi sabbhaṃ arahattavaseneva vuttaṃ. Arahattañhi sabbakilesehi nikkhantattā **nekkhammaṃ**, teheva pavivittattā **paviveko**, byāpajjhābhāvato **abyāpajjhaṃ**, taṇhākkhayante uppannattā **taṇhākkhayo**, upādānakkhayante uppannattā **upādānakkhayo**, sammohābhāvato **asammohoti** vuccati.

Kevalaṃ saddhāmattakanti paṭivedharahitaṃ kevalaṃ paṭivedhapaññāya asammissakaṃ saddhāmattakaṃ. **Paṭicayanti** punappunaṃ karaṇena vaḍḍhiṃ. **Vītarāgattāti** maggapaṭivedhena rāgassa vigatattāyeva nekkhammasaṅkhātāṃ arahattaṃ paṭivijjhītvā sacchikatvā ṭhito hoti, phalasaṃpattivihārena viharati, tanninnaṃāsoyeva ca hotīti attho. Sesapadesupi eseva nayo.

Lābhasakkārasilokanti catupaccayalābhañca tesaññeva sukatabhāvāñca vaṇṇabhaṇaṇaṃ. **Nikāmayamānoti** icchamāno patthayamāno. **Pavivekādhimuttoti** paviveke adhimutto arahanti evaṃ arahattaṃ byākarotīti attho.

Sīlabbataparāmāsanti sīlañca vatañca parāmasitvā gahitaṃ gahaṇamattaṃ. **Sārato paccāgacchantoti** sārabhāvena jānanto. **Abyāpajjhādhimuttoti** abyāpajjhaṃ arahattaṃ byākaroti. Imināva nayena sabbatṭhānesu attho daṭṭhabbo. Apicettha “nekkhammādhimuttoti imasmiṃyeva arahattaṃ kathitaṃ, sesesu pañcasu nibbāna”nti eke vadanti. Apare “asammohādhimuttoti ettheva nibbānaṃ kathitaṃ, sesesu arahatta”nti vadanti. Ayaṃ panettha sāro – sabbesveva tesu arahattampi nibbānampi kathitamevāti.

Bhusāti balavanto dibbarūpasadisā. **Nevassa cittaṃ pariyādiyantīti** etassa khīṇāsavassa cittaṃ gahetvā ṭhātuṃ na sakkonti. Kilesā hi uppajjamānā cittaṃ gaṇhanti nāma. **Amissikatanti** kilesā hi ārammaṇena saddhiṃ cittaṃ missaṃ karonti, tesam abhāvā amissikataṃ. **Ṭhitanti** patiṭṭhitaṃ. **Āneñjappattanti** acalappattaṃ. **Vayañcassānupassatīti** tassa cesa cittaṃ uppādampi vayampi passati. **Bhusā vātavuṭṭhīti** balavā vātakkhandaṃ. **Neva sampakampeyyāti** ekabhāgena cāletuṃ na sakkuṇeyya. **Na sampakampeyyāti** thūṇaṃ viya sabbabhāgato kampetuṃ na sakkuṇeyya. **Na sampavedheyāti** vedhetvā pavedhetvā pātetuṃ na sakkuṇeyya.

Nekkhammaṃ adhimuttassāti arahattaṃ paṭivijjhītvā ṭhitassa khīṇāsavassa. Sesapadesupi arahattameva kathitaṃ. **Upādānakkhayaṃ cāti** upayogatthe sāmivacanaṃ. **Asammohañca cetasoti** cittaṃ ca asammohaṃ adhimuttassa. **Disvā āyatanuppādanti** āyatanānaṃ uppādañca vayañca disvā. **Sammā cittaṃ vimuccatīti** sammā hetunā nayena imāya vipassanāpaṭipattiyā phalasaṃpattivasena cittaṃ vimuccati, nibbānārammaṇe adhimuccati. Atha vā iminā khīṇāsavassa paṭipadā kathitā. Tassa hi āyatanuppādaṃ disvā imāya vipassanāya adhigatassa ariyamaggassānubhāvena sabbakilesehi sammā cittaṃ vimuccati. Evaṃ tassa **sammā vimuttassa...pe... na vijjati**. Tattha **santacittassāti** nibbutacittassa. Sesamettha uttānatthamevāti.

2. Phaggunasuttavaṇṇanā

56. Dutiye **samadhosīti** uṭṭhānākāraṃ dassesi. **Paṭikkamantīti** parihāyanti. **No abhikkamantīti** na vadḍhanti. **Sīsaveṭhanam dadeyyāti** sīsam veṭhetvā daṇḍakena samparivattakaṃ bandheyya. **Indriyāni vipasīdimṣūti** tasmim maraṇasamaye cha indriyāni vipasannāni ahesuṃ. **Atthupaparikkhāyāti** atthānatthaṃ kāraṇākāraṇaṃ upaparikkhane. **Anuttare upadhisaṅkhayeti** nibbāne. **Avimuttaṃ hotīti** arahattaphalena adhimuttaṃ hoti.

3. Chaḷabhijātisuttavaṇṇanā

57. Tatiye **chaḷabhijātiyoti** cha jātiyo. **Tatridanti** tatrāyaṃ. **Luddāti** dāruṇā. **Bhikkhū kaṇṭakavuttikāti** samaṇā nāmete. **Ekasātakāti** ekeneva pilotikakhaṇḍena purato paṭicchādanakā. **Akāmakassa bilaṃ olaggeyyunti** satthe gacchamāne goṇamhi mate gomaṃsamūlaṃ uppādanatthāya vibhajivā khādamānā ekassa gomaṃsaṃ anicchantasseva koṭṭhāsaṃ katvā “ayaṅca te khāditabbo, mūlaṅca dātabba”nti taṃ koṭṭhāsaṅkhātāṃ bilaṃ olaggeyyuṃ, balakkārena hatthe ṭhapeyyunti attho. **Akhettaññunāti** abhijātipaññattiyā khettaṃ ajānantena. **Taṃ suṇāhīti** taṃ mama paññattim suṇāhi. **Kaṇhābhijātikoti** kālakajātiko. **Kaṇhaṃ dhammaṃ abhijāyatīti** kaṇhasabhāvo hutvā jāyati nibbattati, kaṇhābhijātiyaṃ vā jāyati. **Nibbānaṃ abhijāyatīti** nibbānaṃ pāpuṇāti, ariyabhūmisāṅkhātāya vā nibbānajātiyā jāyati.

4. Āsavasuttavaṇṇanā

58. Catutthe **saṃvarā pahātabbāti** saṃvarena pahātabbā. Sesesupi eseva nayo. **Idhāti** imasmim sāsane. **Paṭisaṅkhāti** paṭisañjānitvā, paccavekkhitvāti attho. **Yonisoti** upāyena pathena. Ettha ca asaṃvare ādīnavapaṭisaṅkhā yoniso paṭisaṅkhāti veditabbā. Sā cāyaṃ “varam, bhikkhave, tattāya ayosalākāya ādittāya sampajjalitāya sajotibhūtāya cakkhundriyaṃ sampalimaṭṭhaṃ, na tveva cakkhuvīñṇeyyesu rūpesu anubyañjanaso nimittaggāho”tiādīnā ādittapariyāyena (saṃ. ni. 4.235) veditabbā. **Cakkhundriyaṃ saṃvarasaṃvuto viharatīti** ettha cakkhumeva indriyaṃ cakkhundriyaṃ, saṃvaraṇato saṃvaro, pidahanato thakanatoti vuttaṃ hoti. Satiyā etaṃ adhivacanaṃ. Cakkhundriye saṃvaro **cakkhundriyaṃ saṃvaro**. Javane uppajjamānopi hesa tasmim dvāre kilesānaṃ uppattivāraṇato cakkhundriyaṃ saṃvaroti vuccati. **Saṃvutoti** tena saṃvarena upeto. Tathā hi “pātimokkhasaṃvarasaṃvuto”ti imassa vibhaṅge “iminā pātimokkhasaṃvarena upeto hoti...pe... samannāgato”ti vuttaṃ. Atha vā saṃvaratī saṃvuto, thakesi pidahīti vuttaṃ hoti. Cakkhundriyaṃ saṃvarasaṃvutoti cakkhundriyaṃ saṃvarasaṅkhātāṃ satikavāṭaṃ cakkhudvāre gharadvāre kavāṭaṃ viya saṃvari thakesi pidahīti vuttaṃ hoti. Ayamevettha attho sundarataro. Tathā hi “cakkhundriyaṃ saṃvaram asaṃvutassa viharato, saṃvutassa viharato”ti etesu padesu ayamevattho dissatīti.

Yaṃ hissātiādīmihi yaṃ cakkhundriyaṃ saṃvaram assa bhikkhuno asaṃvutassa athaketvā apidahitvā viharantassāti attho. Yekārassa vā esa yaṃti ādeso, ye assāti attho. **Āsavā vighātapariḷāhāti** cattāro āsavā ca aññe ca vighātakarā kilesapariḷāhā vipākāpariḷāhā vā. Cakkhudvārasmiñhi iṭṭhārammaṇaṃ āpāthagataṃ kāmassādavasena assādayato abhinandato kāmasavo uppajjati, “īdisaṃ aññasmimpi sugatibhave labhissāmi”ti bhavapatthanāya assādayato bhavāsavo uppajjati, sattoti vā sattassāti vā gaṇhato diṭṭhāsavo uppajjati, sabbeheva sahaṇātaṃ aññānaṃ avijjāsavoti cattāro āsavā uppajjanti. Etehi sampayuttā apare kilesā vighātapariḷāhā āyatim vā tesam vipākā tehipi asaṃvutasseva viharato uppajjeyyunti vuccanti. **Evamsa teti** evaṃ assa te, etenupāyena na honti, no aññathāti vuttaṃ hoti. **Paṭisaṅkhā yoniso sotindriyaṃ saṃvarasaṃvutoti**ādīsipi eseva nayo. **Ime vuccanti āsavā saṃvarā pahātabbāti** imesu chasu dvāresu cattāro cattāro katvā catuvīsati āsavā saṃvarena pahātabbāti vuccanti.

Paṭisaṅkhā yoniso cīvarantiādīsipi yaṃ vattabbaṃ, taṃ sabbaṃ visuddhimagge (visuddhi. 1.18) silakathāya vuttameva. **Yaṃ hissāti** yañhi cīvaram piṇḍapātādīsipi vā aññatarāṃ assa. **Appaṭisevatoti**

evaṃ yoniso appaṭisevantassa. Imasmiṃ vāre aladdhaṃ cīvarādiṃ patthayato laddhaṃ vā assādayato kāmāsavassa uppatti veditabbā, īdisaṃ aññasmimpi sugatibhave labhissāmīti bhavapatthanāya assādayato bhavāsavassa, ahaṃ labhāmi na labhāmīti vā mayhaṃ vā idanti attasaññaṃ adhiṭṭhahato diṭṭhāsavassa, sabbeheva pana sahaṃ jāto avijjāsavoti evaṃ catunnaṃ āsavānaṃ uppatti vighātapariḷāhāva navavedanuppādanatopi veditabbā. **Ime vuccanti, bhikkhave, āsavā paṭisevanā pahātabbā**ti ime ekamekasmīṃ paccaye cattāro cattāro katvā soḷasa āsavā iminā ñāṇasaṃvarasaṅkhātena paccavekkhaṇapaṭisevanena pahātabbāti vuccanti.

Paṭisaṅkhā yoniso khamo hoti sītassāti upāyena pathena paccavekkhitvā khantā hoti sītassa, sītaṃ khamati sahati, na avīrapuriso viya appamattakenapi sītena calati kampati kammaṭṭhānaṃ vijahati. **Uṇhādīsupi** eseva nayo. Ettha ca vacanameva **vacanapathoti** veditabbo. **Dukkhānantiādīsu** dukkhamanaṭṭhena dukkhā, bahalaṭṭhena tībā, pharusaṭṭhena kharā, tikhiṇaṭṭhena kaṭukā, assādavīrahato asātā, manaṃ avaḍḍhanato amanāpā, pānaharaṇasamatthātāya pānaharāti veditabbā. **Yaṃ hissāti** sītādīsu yaṃkiñci ekadhammampi assa. **Anadhivāsototi** anadhivāsentassa akkhamantassa. Āsavuppatti panettha evaṃ veditabbā – sītena phuṭṭhassa uṇhaṃ patthayato kāmāsavo uppajjati, evaṃ sabbattha. “Natthi sugatibhave sītaṃ vā uṇhaṃ vā”ti bhavaṃ patthentassa bhavāsavo, mayhaṃ sītaṃ uṇhanti gāho diṭṭhāsavo, sabbeheva sampayutto avijjāsavoti. **Ime vuccantīti** ime sītādīsu ekamekassa vasena cattāro cattāro katvā aneke āsavā imāya khantisāṃvarasaṅkhātāya adhvāsānāya pahātabbāti vuccantīti attho.

Paṭisaṅkhā yoniso caṇḍaṃ hatthiṃ parivajjetīti ahaṃ samaṇoti na caṇḍassa hatthissa āsanne ṭhātabbaṃ. Tatonidānañhi maraṇampi maraṇamattampi dukkhaṃ bhaveyyāti evaṃ upāyena pathena paccavekkhitvā caṇḍaṃ hatthiṃ parivajjeti paṭikkamati. Esa nayo sabbattha. **Caṇḍanti** duṭṭhaṃ vāḷaṃ. **Khānunti** khadirakhāṇukādiṃ. **Kaṇṭakattānanti** yattha kaṇṭakā vijjhanti, taṃ okāsaṃ. **Sobbhanti** sabbato chinnataṃ. **Papātanti** ekato chinnataṃ. **Candanikanti** ucchiṭṭhodakagabbhamalādīnaṃ chaḍḍanaṭṭhānaṃ. **Oḷigallanti** tesamyeva kaddamādīnaṃ sandanokāsaṃ. Taṃ jaṇṇumattampi asucibharitaṃ hoti. Dvepi cetāni ṭhānāni amanussussadaṭṭhānāni honti, tasmā vajjetabbāni. **Anāsaneti** ettha ayuttaṃ āsanaṃ anāsaṃ, taṃ atthato aniyatavatthubhūtaṃ rahopaṭicchannāsananti veditabbāṃ. **Agocareti** etthapi ayutto gocaro agocaro. So vesiyādibhedato pañcavidho. **Pāpake mitteti** lāmake dussīle mittapatirūpake amitte. **Pāpakesūti** lāmakesu. **Okappeyyunti** saddaheyyuṃ adhimucceyyuṃ “addhā ayamāyasmā akāsi vā karissati vā”ti. **Yaṃ hissāti** hatthiādīsu yaṃkiñci ekampi assa. Āsavuppatti panettha evaṃ veditabbā – hatthiādīnīdānena dukkhena phuṭṭhassa sukhaṃ patthayato kāmāsavo uppajjati, “natthi sugatibhave īdisaṃ dukkha”nti bhavaṃ patthentassa bhavāsavo, maṃ hatthī maddati maṃ assoti gāho diṭṭhāsavo, sabbeheva sampayutto avijjāsavoti. **Ime vuccantīti** ime hatthiādīsu ekekassa vasena cattāro cattāro katvā aneke āsavā iminā sīlasaṃvarasaṅkhātena parivajjanena pahātabbāti vuccanti.

Paṭisaṅkhā yoniso uppannaṃ kāmavitakkaṃ nādhivāsetīti “itipāyaṃ vitakko akusalo, itipi sāvajjo, itipi dukkhavipāko, so ca kho attabyābādāhāya saṃvattatī”tiādīnā (ma. ni. 1.207-208) nayena yoniso kāmavitakke ādīnaṃ paccavekkhitvā tasmīṃ tasmīṃ ārammaṇe uppannaṃ kāmavitakkaṃ nādhivāseti, cittaṃ āropetvā na vāseti, abbhantare vā na vāsetīti attho. Anadhivāseto kiṃ karotīti? **Pajahati**. Kiṃ kacavaraṃ viya piṭakenāti? Na hi, api ca kho naṃ **vinodeti** tudati vijjhanti nīharati. Kiṃ balibaddaṃ viya patodenāti? Na hi, atha kho naṃ **byantikaroti** vigatantaṃ karoti, yathāssa antopi nāvasissati antamaso bhaṅgamattampi, tathā naṃ karoti. Kathaṃ pana naṃ tathā karotīti? **Anabhāvaṃ gameti** anu anu abhāvaṃ gameti, vikkhambhanappahānena yathā suvikkhambhito hoti, tathā karoti. Sesavitakkadvayepi eseva nayo. **Uppannuppanneti** uppanne uppanne, uppannamattheyevāti vuttaṃ hoti. Sakiṃ vā uppanne vinodetvā dutiye vāre ajjupekkhitā na hoti, satakkhattumpi uppanne uppanne vinodetiyeva. **Pāpake akusale dhammeti** teyeva kāmavitakkādayo, sabbepi vā nava mahāvitakke. Tattha tayo vuttā, avasesā “ñātivitakko, janapadavitakko, amarāvitakko, parānuddayatāpaṭisaṃyutto vitakko, lābhasakkārasilokappaṭisaṃyutto vitakko, anavaññattippaṭisaṃyutto vitakko”ti (mahāni. 207) ime cha. **Yaṃ hissāti** etesu vitakkesu yaṃkiñci assa. Kāmavitakko panettha kāmāsavo eva, tabbiseso

bhavāsavo, taṃsampayutto diṭṭhāsavo, sabbavitakkesu avijjā avijjāsavoti evaṃ āsavuppatti veditabbā. **Ime vuccantī** ime kāmavitakkādivasena vuttappakārā āsavā iminā tasmim tasmim vitakke ādīnavapaccavekkhaṇasahitena vīriyaṃvarasaṅkhātena vinodanena pahātabbāti vuccanti.

Paṭisaṅkhā yoniso satisambojjhaṅgaṃ bhāvetī abhāvanāya ādīnavam bhāvanāya ca ānisaṃsaṃ upāyena pathena paccavekkhitvā satisambojjhaṅgaṃ bhāveti. Eseva nayo sabbattha. Bojjhaṅgaṇaṃ bhāvanā heṭṭhā vitthāritāva. **Yaṃ hissāti** etesu bojjhaṅgesu yaṃkiñci assa. Āsavuppattiyam panettha imesaṃ ariyamaggasampayuttānaṃ bojjhaṅgaṇaṃ abhāvitattā ye uppajjeyyūṃ kāmāsavādayo āsavā, bhāvayato evaṃsa te na hontīti ayaṃ nayo veditabbo. **Ime vuccantī** ime kāmāsavādayo āsavā imāya lokuttarāya bojjhaṅgabhāvanāya pahātabbāti vuccanti. Imehi chahākārehi pahīnāsavaṃ bhikkhūṃ thomento **yato kho, bhikkhāvetī**ādīmāha. Tattha **yatoti** sāmivacane to-kāro, yassāti vuttaṃ hoti. Porāṇā pana yaṃhi kāleti vaṇṇayanti. **Ye āsavā saṃvarā pahātabbā, te saṃvarā pahīnā hontīti** ye āsavā saṃvarena pahātabbā, te saṃvareneva pahīnā hontī, na appahīnesuyeva pahīnasaññī hotīti.

5. Dārūkammikasuttavaṇṇanā

59. Pañcame **dārūkammikoti** dāruvikkayena pavattitājīvo eko upāsako. **Kāsikacandananti** saṅhacandanam. **Aṅgenāti** aḡuṅgena, sukkapakkhe ḡuṅgena. **Nemantanikoti** nimantanam ḡaṅhanako. **Saṅhe dānaṃ dassāmīti** bhikkhusaṅghassa dassāmi. So evaṃ vatvā satthāraṃ abhivādetvā pakkāmi. Athassa aparabhāge pañcasatā kulūpakā bhikkhū gihibhāvaṃ pāpuṇṇisu. So “kulūpakabhikkhū te vibbhantā”ti vutte “kiṃ ettha mayha”nti vatvā cittuppādavemattamattampi na akāsi. Idaṃ sandhāya satthā **saṅhe te dānaṃ dadato cittaṃ pasīdissatīti** āha.

6. Hatthisāriputtasuttavaṇṇanā

60. Chaṭṭhe **abhidhammakathanti** abhidhammamissakaṃ kathaṃ. **Kathaṃ opātetīti** tesam kathaṃ vicchinditvā attano kathaṃ katheti. **Therānaṃ bhikkhūnanti** karaṇatthe sāmivacanaṃ, therehi bhikkhūhi saddhinti attho. Yā ca therānaṃ abhidhammakathā, taṃ ayampi kathetuṃ sakkotīti attho. **Cetopariyāyanti** cittavāraṃ. **Idhāti** imasmim loke. **Soratasoratoti** sūrato viya sūrato, soraccasamannāgato viyāti attho. **Nivātanivātoti** nivāto viya nivāto, nivātavutti viyāti attho. **Upasantupasantoti** upasanto viya upasanto. **Vapakassateva satthārāti** satthu santikā apagacchati. **Samsatṭhassāti** pañcahi saṃsaggehi saṃsatṭhassa. **Vissatṭhassāti** vissajjītassa. **Pākatassāti** pākatindriyassa.

Kitṭhādoti kitṭhakhādako. **Antaradhāpeyyāti** nāseyya. **Gopasūti** ḡavo ca aḡikā ca. **Sippisambukanti** sippiyo ca sambukā ca. **Sakkharakaṭhalanti** sakkharā ca kaṭhalāni ca. **Ābhidosikanti** abhiññātasam kudrūsakabhojanaṃ. **Nacchādeyyāti** na ruceyya. Tattha yadetam **purisaṃ bhuttāvinti** upayogavacanaṃ, taṃ sāmīatthe daṭṭhabbaṃ. **Amuṃ hāvuso, purisanti,** āvuso, amuṃ purisaṃ.

Sabbanimittānanti sabbesaṃ niccanimittādīnaṃ nimittānaṃ. **Animittam cetosamādhinti** balavavipassanāsamādhim. **Cīrikasaddoti** jhallikasaddo. **Sarissati nekkhammassāti** pabbajjāya ḡuṇam sarissati. **Arahatam ahoṣīti** bhagavato sāvakānaṃ arahantānaṃ antare eko arahā ahoṣī. Ayañhi thero satta vāre ḡihī hutvā satta vāre pabbajji. Kiṃ kāraṇā? Kassapasammāsambuddhakāle kiresa ekassa bhikkhuno gihibhāve vaṇṇam kathesi. So teneva kammena arahattassa upanissaye vijjamāneyeva satta vāre gihibhāve ca pabbajjāya ca sañcaranto sattame vāre pabbajitvā arahattam pāpuṇṇīti.

7. Majjesuttavaṇṇanā

61. Sattame **pārāyane metteyyapañheti** pārāyanasamāgamamhi metteyyamānavassa pañhe. **Ubhonte veditvānāti** dve ante dve koṭṭhāse jānitvā. **Majje mantā na lippatīti** mantā vuccati paññā, tāya ubho ante veditvā majje na lippati, vemajjheṭṭhāne na lippati. **Sibbanimaccagāti** sibbanisaṅkhātam

taṇhaṃ atīto. **Phassoti** phassavasena nibbattatā ayaṃ attabhāvo. **Eko antoti** ayameko koṭṭhāso. **Phassasamudayoti** phasso samudayo assāti phassasamudayo, imasmiṃ attabhāve katakammaphassapaccayā nibbato anāgatattabhāvo. **Dutiyo antoti** dutiyo koṭṭhāso. **Phassanirodhoti** nibbānaṃ. **Majjheti** sibbinitaṇhaṃ chetvā dvidhākaraṇaṭṭhena nibbānaṃ majjhe nāma hoti. **Taṇhā hi naṃ sibatīti** taṇhā naṃ attabhāvadvayasaṅkhātāṃ phassaṅca phassasamudayaṅca sibatīti ghaṭṭeti. Kiṃ kāraṇā? Tassa tasseva bhavassa abhinibbattiyā. Yadi hi taṇhā na sibeyya, tassa tassa bhavassa nibbatti na bhaveyya. Imasmiṃ ṭhāne koṭṭimajjhikūpamaṃ gaṇhanti. Dvinnañhi kaṇḍānaṃ ekato katvā majjhe suttena saṃsibbitānaṃ koṭi majjhanti vuccati. Sutte chinne ubho kaṇḍāni ubhato patanti. Evamettha kaṇḍadvayaṃ viya vuttappakārā dve antā, sibatīvā ṭhitasuttaṃ viya taṇhā, sutte chinne kaṇḍadvayassa ubhatopanaṃ viya taṇhāya niruddhāya antadvayaṃ niruddhameva hoti. **Ettāvatāti** ettakena iminā ubho ante viditvā taṇhāya majjhe anupalittabhāvena abhiññeyyaṃ catusaccadhammaṃ abhijānāti nāma, tīraṇapariññāya ca pahānapariññāya ca parijānitabbaṃ lokiyasaccadvayaṃ parijānāti nāma. **Diṭṭheva dhammeti** imasmiṃyeva attabhāve. **Dukkassantakaro hotīti** vaṭṭadukkassa koṭikaro paricchedaparivaṭumakaro hoti nāma.

Dutiyavāre tiṇṇaṃ kaṇḍānaṃ vasena upamā veditabbā. Tiṇṇañhi kaṇḍānaṃ suttena saṃsibbitānaṃ sutte chinne tīṇi kaṇḍāni tīsu ṭhānesu patanti, evamettha kaṇḍattayaṃ viya atītānāgatapaccuppannā khandhā, suttaṃ viya taṇhā. Sā hi atītaṃ paccuppanna, paccuppannaṅca anāgatena saddhiṃ saṃsibbati. Sutte chinne kaṇḍattayassa tīsu ṭhānesu patanaṃ viya taṇhāya niruddhāya atītānāgatapaccuppannā khandhā niruddhāva honti.

Tatīyavāre **adukkhamasukhā majjheti** dvinnaṃ vedanānaṃ antaraṭṭhakabhāvena majjhe. Sukhañhi dukkhassa, dukkhaṃ vā sukhasa antaraṃ nāma natthi. **Taṇhā sibbinīti** vedanāsu nandirāgo vedanānaṃ upacchedaṃ nivāretīti tā sibatīti nāma.

Catutthavāre **viññānaṃ majjheti** paṭisandhiviññānaṃpi sesaviññānaṃpi nāmarūpappaccayasamudāgatattā nāmarūpānaṃ majjhe nāma.

Pañcamavāre **viññānaṃ majjheti** kammaviññānaṃ majjhe, ajjhantikāyatanesu vā manāyatana kammassa gahitattā idha yaṃkiñci viññānaṃ majjhe nāma, manodvāre vā āvajjanassa ajjhantikāyatananissitattā javanaviññānaṃ majjhe nāma.

Chatthavāre **sakkāyoti** tebhūmakavaṭṭaṃ. **Sakkāyasamudayoti** samudayasaccaṃ. **Sakkāyanirodhoti** nirodhasaccaṃ. **Pariyāyenāti** tena tena kāraṇeneva. Sesam sabbattha vuttanayeneva veditabbaṃ.

8. Purisindriyañāṇasuttavaṇṇanā

62. Aṭṭhame **aññataroti** devadattapakkhiko eko. **Samannāharitvāti** āvajjitvā. Iduṃ so “kiṃ nu kho bhagavatā jānitvā kathitaṃ, udāhu ajānitvā, ekaṃsikaṃ vā kathitaṃ udāhu vibhajjakathita”nti adhippāyena pucchati. **Āpāyikoti** apāye nibbattanako. **Nerayikoti** nirayagāmī. **Kappaṭṭhoti** kappaṭṭhiyakamma kattaṭṭā kappaṃ ṭhassati. **Atekkicchoti** na sakkā tikicchitum. **Dvejjhanti** dvidhābhavaṃ. **Vālaggakoṭinittudanamattanti** vālassa aggakoṭiyā dassetabbamattakam, vālaggakoṭinipātamattakam vā. **Purisindriyañāṇānīti** purisapuggalānaṃ indriyaparopariyattañāṇāni, indriyānaṃ tikkhamudubhāvajānanāñāṇānīti attho.

Vijjamānā kusalāpi dhammā akusalāpi dhammāti ettakā kusalā dhammā vijjanti, ettakā akusalā dhammāti jānāmi. **Antarahitāti** adassanaṃ gatā. **Sammukhībhūtāti** samudācāravasena pākāṭā jātā. **Kusalāmūlanti** kusalajjhāsayo. **Kusalā kusalanti** tamhā kusalajjhāsayā aññampi kusalaṃ nibbattissati. **Sārādānīti** sārādāni gahitasārāni, saradamāse vā nibbattāni. **Sukhasayitānīti** sukhasannicitāni. **Sukhetteti** maṇḍakhette. **Nikkhattānīti** vuttāni. **Sappaṭibhāgāti** sarikkhakā. **Abhido addharattanti**

abhiaddharattaṃ addharatte abhimukhībhūte. **Bhatakālasamayeti** rājakulānaṃ bhatakālasaṅkhāte samaye. **Parihānadhammoti** ko evaṃ bhagavatā ñātoti? Ajātasatturājā. So hi pāpamittaṃ nissāya maggaphalehi parihīno. Aparepi suppubuddhasunakkhattādayo bhagavatā ñātāva. **Aparihānadhammoti** evaṃ bhagavatā ko ñāto? Susīmo paribbājako aññe ca evarūpā. **Parinibbāyissatīti** evaṃ ko ñāto bhagavatāti? Santatimahāmatto aññe ca evarūpā.

9. Nibbedhikasuttavaṇṇanā

63. Navame anibbidhāpubbe appadālitapubbe lobhakkhandhādayo nibbijjhati padāletīti **nibbedhikāpariyāyo**, nibbijjhanakāraṇanti attho. **Nidānasambhavoti** kāme nideti uppādanasamattatāya niyyādetīti nidānaṃ. Sambhavati tatoti sambhavo, nidānameva sambhavo **nidānasambhavo**. **Vemattatāti** nānākaraṇaṃ.

Kāmaguṇāti kāmayitabbaṭṭhena kāmā, bandhanaṭṭhena guṇā “antaguṇa” ntiādīsu viya. **Cakkhuvīññeyāti** cakkhuvīññānaena passitabbā. **Iṭṭhāti** pariyiṭṭhā vā honu mā vā, iṭṭhārammaṇabhūtāti attho. **Kantāti** kamanīyā. **Manāpāti** manavaḍḍhanakā. **Piyarūpāti** piyajātikā. **Kāmūpasañhitāti** ārammaṇaṃ katvā uppajjamānena kāmēna upasañhitā. **Rajanīyāti** rāgupattikāraṇabhūtā. **Nete kāmāti** na ete kamaṇaṭṭhena kāmā nāma honti. **Saṅkapparāgoti** saṅkappavasena uppannarāgo. **Kāmoti** ayaṃ kāmappahānāya paṭipannehi pahātabbo. Kamaṇaṭṭhena kāmā nāma. **Citrānīti** citravicitrārammaṇāni.

Phassoti sahaṇāphasso. **Kāmayamānoti** kāmaṃ kāmayamāno. **Tajjaṃ tajjanti** tajjātikāṃ tajjātikāṃ. **Puññabhāgiyanti** dibbe kāme patthetvā sucaritapāripūriyā devaloke nibbattassa attabhāvo puññabhāgiyo nāma, ducaritapāripūriyā apāye nibbattassa attabhāvo apuññabhāgiyo nāma. **Ayaṃ vuccati, bhikkhave, kāmānaṃ vipākoti** ayaṃ duvidhopi kāmāpatthanāṃ nissāya uppānattā kāmānaṃ vipākoti vuccati. **So imaṃ nibbedhikanti** so bhikkhu imaṃ chaṭṭiṃsaṭṭhānesu nibbijjhanakāṃ seṭṭhacariyaṃ jānāti. **Kāmanirodhanti** kāmānaṃ nirodhane evaṃ laddhanāmaṃ. Imasmiñhi ṭhāne brahmacariyaṃsaṅkhāto maggo kāmanirodhoti vutto.

Sāmisāti kilesāmisasampayuttā. Iminā nayena sabbāṭṭhānesu attho vedītabbo. Apicettha **vohāravēpakkanti** vohāravipākāṃ. Kathāsaṅkhāto hi vohāro saññāya vipāko nāma. **Yathā yathā nanti** ettha **naṃ**-iti nipātamattameva. Iti yasmā yathā yathā sañjānāti, tathā tathā evaṃsaññī ahosinti katheti, tasmā vohāravēpakkāti attho.

Avijjāti aṭṭhasu ṭhānesu aññāṇabhūtā bahalaavijjā. Nirayaṃ gamentīti **nirayagamanīyā**, niraye nibbattipaccayāti attho. Sesesupi eseva nayo. **Cetanāhanti** cetanaṃ ahaṃ. Idha sabbasaṅgāhikā saṃvidahanacetanā gahitā. **Cetayitvāti** dvārappavattacetanā. **Manasāti** cetanāsampayuttacittena. **Nirayavedanīyanti** niraye vipākādāyakaṃ. Sesesupi eseva nayo. **Adhimattanti** balavadukkhāṃ. **Dandhvirāgīti** garukaṃ na khippaṃ saṅkaṃ vigacchanakadukkhāṃ. **Urattāliṃ kantatīti** uraṃ tāletvā rodati. **Pariyēṭṭhīti** pariyesanaṃ. **Ekapadaṃ dvipadanti** ekapadamantaṃ vā dvipadamantaṃ vā, ko mantāṃ jānāti attho. **Sammohavēpakkanti** sammohavipākāṃ. Dukkhasa hi sammoho nissandavipāko nāma. Dutiyapadehi eseva nayo. Pariyesanāpi hi tassa nissandavipākoti. Imasmiṃ sutte vaṭṭavivaṭṭaṃ kathitaṃ.

10. Sihanādasuttavaṇṇanā

64. Dasame **āsabhaṃ ṭhānanti** seṭṭhaṃ niccalaṭṭhānaṃ. **Sihanādanti** abhītanādaṃ pamukhanādaṃ. **Brahmacakkanti** seṭṭhaññācakkāṃ paṭivedhaññāñceva desanāññāñca. **Ṭhānañca ṭhānatoti** kāraṇaṃ kāraṇato. **Yampīti** yena ñānaena. **Idampi tathāgatassāti** idampi ṭhānāṭṭhānaññaṃ tathāgatassa tathāgatābalaṃ nāma hoti. Evaṃ sabbapadesu attho vedītabbo. **Kammasamādānānanti** samādiyitvā katānaṃ kusalākusalakammānaṃ, kammameva vā kammasamādānaṃ. **Ṭhānaso hetusoti** paccayato ceva hetuto ca. Tattha gatiupadhikālapayogā vipākassa ṭhānaṃ, kammaṃ hetu.

Jhānavimokkhasamādhisamāpattīnanti catunnaṃ jhānaṃ aṭṭhannaṃ vimokkhānaṃ tinnaṃ samādhīnaṃ navannaṃ anupubbasaṃpattīnaṃca. **Samkilesanti** hānabhāgiyaṃ dhammaṃ. **Vodānanti** visesabhāgiyaṃ dhammaṃ. **Vuṭṭhānanti** “vodānampi vuṭṭhānaṃ, tamhā tamhā samādhimhā vuṭṭhānampi vuṭṭhānaṃ”nti (vibha. 828) evaṃ vuttaṃ paṇaṇajjhānaṃceva bhavaṅganaphalasaṃpattiyō ca. Heṭṭhimaṃ heṭṭhimaṃhi paṇaṇajjhānaṃ uparimassa uparimassa padaṭṭhānaṃ hoti, tasmā “vodānampi vuṭṭhānaṃ”nti vuttaṃ. Bhavaṅgena pana sabbajjhānehi vuṭṭhānaṃ hoti, phalasaṃpattiyā nirodhasaṃpattito vuṭṭhānaṃ hoti. Taṃ sandhāya “tamhā tamhā samādhimhā vuṭṭhānampi vuṭṭhānaṃ”nti vuttaṃ. **Anekavihitanti**ādīni visuddhimagge (visuddhi. 2.402) vaṇṇitāni. Āsavakkhayaṅgaṃ heṭṭhā vuttatthameva. Purimassāpi ṇāṇattayassa vittharakathaṃ icchantena majjhimaṭṭhakathāya mahāsīhanādavaṇṇanā (ma. ni. aṭṭha. 1.146 ādayo) oloketabbā. **Samāhitassāti** ekaggacittassa. **Samādhi maggoti** samādhi etesaṃ ṇāṇanaṃ adhigamāya upāyo. **Asamādhīti** anekaggabhāvo. **Kummaggoti** micchāmaggo. Imasmiṃ sutte tathāgatassa ṇāṇabalaṃ kathitanti.

Mahāvaggo chaṭṭho.

7. Devatāvaggo

1-3. Anāgāmiṃphalasuttādivaṇṇanā

65-67. Sattamaṃsa paṭhame **assaddhiyanti** assaddhabhāvaṃ. **Duppaññatanti** nippaṇṇabhāvaṃ. Dutīye **pamādanti** sativippavāsaṃ. Tatiye **ābhisamācārikanti** uttamasamācārabhūtaṃ vattavasena paṇṇattisīlaṃ. **Sekhadhammanti** sekhaṇṇattisīlaṃ. **Silānīti** cattāri mahāsīlāni.

4. Saṅgaṇikārāmasuttavaṇṇanā

68. Catutthe **saṅgaṇikārāmoti** gaṇasaṅgaṇikārāmo. Suttantikagaṇādīsū pana gaṇesu attano vā parisāsaṅkhāte gaṇe ramatīti **gaṇārāmo**. **Paviveketi** kāyaviveke. **Cittassa nimittanti** samādhivipassanācittassa nimittaṃ samādhivipassanākāraṃ. **Sammādiṭṭhanti** vipassanāsamādiṭṭhiṃ. **Samādhinti** maggasamādhīṅceva phalasaṃmādhīṅca. **Samyojanānīti** dasa samyojanāni. **Nibbānanti** apaccayapariniṅgānaṃ.

5. Devatāsuttavaṇṇanā

69. Pañcame **sovacassatāti** subbacabhāvo. **Kalyāṇamittatāti** sucimittatā. **Satthugāravoti** sathhari gāravayutto. Esa nayo sabbattha.

6. Samādhisuttavaṇṇanā

70. Chaṭṭhe **na santenāti** paccanīkakilesehi avūpasantena. **Na paṇītenāti** na atappakena. **Na paṭippassaddhiladdhenāti** kilesappaṭippassaddhiyā aladdhena appattena. **Na ekodibhāvādhigatenāti** na ekaggabhāvaṃ upagatena.

7. Sakkhibhabbasuttavaṇṇanā

71. Sattame **tatra tatrāti** tasmim tasmim visese. **Sakkhibhabbatanti** paccakkhabhāvaṃ. **Āyataneti** kāraṇe. **Hānabhāgiyādayo** visuddhimagge (visuddhi. 1.39) saṃvaṇṇitā. **Asakkaccakārīti** na sukatakārī, na ādarakārī. **Asappāyakārīti** na sappāyakārī, na upakārabhūtaḍḍhammakārī.

8. Balasuttavaṇṇanā

72. Aṭṭhame **balatanti** balabhāvaṃ thāmabhāvaṃ. **Asātaccakārīti** na satatakārī. Sesam heṭṭhā vuttanayameva.

9-10. Tajjhānasuttadvayaṇṇanā

73-74. Navame **na yathābhūtaṃ sammappaññāya sudiṭṭho hotīti** vatthukāmakilesakāmesu ādīnavo na yathāsabhāvato jhānapaññāya sudiṭṭho hoti. Dasamaṃ uttānatthamevāti.

Devatāvaggo sattamo.

8. Arahattavaggo

1. Dukkhasuttavaṇṇanā

75. Aṭṭhamassa paṭhame **savighātanti** saupaghātaṃ sopaddavaṃ. **Sapariḷāhanti** kāyikacetāsikena pariḷāhena sapariḷāhaṃ. **Pāṭikañkhāti** icchitabbā avassaṃbhāvinī.

2. Arahattasuttavaṇṇanā

76. Dutīye **mānanti** jātiādīhi maññaṃ. **Omānanti** hīnohamasmīti mānaṃ. **Atimānanti** atikkamitvā pavattaṃ accuṇṇatimānaṃ. **Adhimānanti** adhigatamānaṃ. **Thambhanti** kodhamānehi thaddhabhāvaṃ. **Atinipātanti** hīnassa hīnohamasmīti mānaṃ.

3. Uttarimanussadhammasuttavaṇṇanā

77. Tatiye **uttarimanussadhammāti** manussadhammato uttari. **Alamariyaññadassanavisesanti** ariyabhāvaṃ kātuṃ samatthaṃ ñāṇadassanavisesaṃ, cattāro magge cattāri ca phalānīti attho. **Kuhananti** tividhaṃ kuhanavatthuṃ. **Lapananti** lābhatthikatāya ukkhipitvā avakkhipitvā vā lapaṇaṃ.

4. Sukhasomanassasuttavaṇṇanā

78. Catutthe **yoni cassa āraddhā hotīti** kāraṇaṅcassa paripuṇṇaṃ paggahitaṃ hoti. **Dhammārāmoti** dhamme ratīṃ vindati. Bhāvanāya ramatī, bhāvento vā ramatīti **bhāvanārāmo**. Pahāne ramatī, pajahanto vā ramatīti **pahānārāmo**. Tividhe paviveke ramatīti **pavivekārāmo**. Abyāpajjhe niddukkhabhāve ramatīti **abyāpajjhārāmo**. Nippapañcasankhāte nibbāne ramatīti **nippapañcārāmo**.

5. Adhigamasuttavaṇṇanā

79. Pañcame **na āyakusaloti** na āgamanakusalo. **Na apāyakusaloti** na apagamanakusalo. **Chandanti** kattukamyatāchandaṃ. **Na ārakkhatīti** na rakkhati.

6. Mahantattasuttavaṇṇanā

80. Chaṭṭhe **āloka bahuloti** ñāṇāloka bahulo. **Yogabahuloti** yoge bahulaṃ karoti. **Vedabahuloti** pītipāmojjabahulo. **Asantuṭṭhibahuloti** kusaladhammesu asantuṭṭho. **Anikkhattadhuroti** aṭṭhapitadhuro paggahitavīriyo. **Uttari ca patāretīti** sampati ca uttariṅca vīriyaṃ karoteva. Sattamaṃ uttānameva.

8-10. Dutīyanirayasuttādivaṇṇanā

82-84. Aṭṭhame **pagabbhoti** kāyapāgabbhiyādīhi samannāgato. Navamaṃ uttānatthameva. Dasame **vighātavāti** mahicchataṃ nissāya uppanna lobhadukkheṇa dukkhito. Sesama sabbattha uttānamevāti.

Arahattavaggo aṭṭhamao.

9. Sītivaggo

1. Sītibhāvasuttavaṇṇanā

85. Navamassa paṭhame **sītibhāvanti** sītalabhāvaṃ. **Yasmiṃ samaye cittaṃ niggaṇhitabbanti**ādīsu uddhaccasamaye cittaṃ samādhinā niggahetabbaṃ nāma, kosajjānupatitakāle vīriyena paggaṇhetabbaṃ nāma, nirassādagatakāle samādhinā sampahaṃsitabbaṃ nāma, samappavattakāle bojjaṅgupekkhāya ajjupekkhitabbaṃ nāma.

2. Āvaraṇasuttavaṇṇanā

86. Dutiye **kammāvaraṇatāyāti** pañcānantariyakammehi. **Kilesāvaraṇatāyāti** niyatamicchādīṭṭhiyā. **Vipākāvaraṇatāyāti** akusalavipākapaṭisandhiyā vā kusalavipākehi ahetukapaṭisandhiyā vāti.

4-5. Sussūsisuttādivaṇṇanā

88-89. Catutthe **anattanti** avaḍḍhiṃ. **Atthaṃ riñcatīti** vaḍḍhiatthaṃ chaḍḍeti. **Ananulomikāyāti** sāsanassa ananulomikāya. Pañcame **diṭṭhisampadanti** sotāpattimaggam.

8-11. Abhabbaṭṭhānasuttacatukkavaṇṇanā

92-95. Aṭṭhame **anāgamanīyaṃ vatthunti** anupagantabbaṃ kāraṇam, pañcannaṃ verānaṃ dvāsaṭṭhiyā ca diṭṭhigatānametaṃ adhivacanaṃ. **Aṭṭhamaṃ bhavanti** kāmāvacare aṭṭhamaṃ paṭisandhiṃ. Navame **kotūhalamaṅgalenāti** diṭṭhasutamutamaṅgalena. Dasame **sayamkatanti**ādīni attadiṭṭhivasena vuttāni. **Adhiccasaṃuppannanti** ahetunibbattaṃ. Sesama sabbattha uttānamevāti.

Sītivaggo navamao.

10. Ānisaṃsavaggo

1-2. Pātubhāvasuttādivaṇṇanā

96-97. Dasamassa paṭhame **ariyāyataneti** majjhimadese. **Indriyānanti** manacchaṭṭhānaṃ. Dutiye **saddhammaniyatoti** sāsanasaddhamme niyato. **Asādhāraṇenāti** puthujjanehi asādhāraṇena.

7. Anavatthitasuttavaṇṇanā

102. Sattame **anodhiṃ karitvāti** “ettakāva saṅkhārā aniccā, na ito pare”ti evaṃ sīmaṃ mariyādaṃ akatvā. **Anavatthitāti** avatthitāya rahitā, bhijjamānāva hutvā upaṭṭhahissantīti attho. **Sabbaloketi** sakale tedhātuke. **Sāmaññenāti** samaṇabhāvena, ariyamaggenāti attho.

8. Ukkhittāsikasuttavaṇṇanā

103. Aṭṭhame **mettāvatāyāti** mettāyuttāya pāricariyāya. Satta hi sekhā tathāgataṃ mettāvatāya paricaranti, khīṇāsavo pariciññasatthuko.

9. Atammayasuttavaṇṇanā

104. Navame **atammayoti** tammayā vuccanti taṇhādiṭṭhiyo, tāhi rahito. **Ahaṃkāṛāti** ahaṃkāradiṭṭhi. **Mamaṃkāṛāti** mamaṃkārataṇhā. Sesam sabbattha uttānamevāti.

Ānisaṃsavaggo dasamo.

Dutiyapaṇṇāsakaṃ niṭṭhitaṃ.

11. Tikavaggo

1. Rāgasuttavaṇṇanā

107. Ekādasamassa paṭhame **asubhāti** asubhakammaṭṭhānaṃ. **Mettāti** mettākammaṭṭhānaṃ. **Paññāti** sahavipassanā maggapaññā.

6. Assādasuttavaṇṇanā

112. Chaṭṭhe **assādadiṭṭhīti** sassatadiṭṭhi. **Attānudiṭṭhīti** attānaṃ anugatā vīsativatthukā sakkāyadiṭṭhi. **Micchādiṭṭhīti** dvāsaṭṭhividhāpi diṭṭhi. **Sammādiṭṭhīti** maggasammādiṭṭhi, natthi dinnantiādikā vā micchādiṭṭhi, kammassakatañānaṃ sammādiṭṭhi.

7. Aratisuttavaṇṇanā

113. Sattame **adhammacariyāti** dasa akusalakammaṭṭhā.

10. Uddhaccasuttavaṇṇanā

116. Dasame **asaṃvaroti** anadhivāsakabhāvo. Sesam sabbattha uttānamevāti.

Tikavaggo ekādasamo.

12. Sāmaññavaggavaṇṇanā

119-121. Ito paresu **tapussoti** dnevācīkupāsako. **Tathāgate niṭṭhaṅgatoti** buddhaguṇesu paṭiṭṭhitacitto pahīnakaṅkho. Amataṃ addasāti **amataddaso**. **Ariyenāti** niddosena lokuttarasīlena. **Ñānenāti** paccavekkhaṇaṇāna. **Vimuttiyāti** sekhaphalavimuttiyā. **Tavakaṇṇikoti** evaṃnāmako gahapati. Tapakaṇṇikotipi pāḷi.

24. Rāgapeyyālavaṇṇanā

140. **Rāgassāti** pañcakāmaguṇīkarāgassa. Sesam sabbattha uttānatthamevāti.

Manorathapūraṇiyā aṅguttaranikāya-aṭṭhakathāya

Chakkanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Sattakanipāta-aṭṭhakathā

Paṇṇāsakaṃ

1. Dhanavaggo

1-5. Paṭhamapiyasuttādivaṇṇanā

1-5. Sattakanipātassa paṭhame **anavaññattikā**moti abhiññātabhāvakāmo. Tatiye **yoniso vicine dhammanti** upāyena catusaccadhammaṃ vicināti. **Paññāyatthaṃ vipassatī** sahavipassanāya maggapaññāya saccadhammaṃ vipassati. **Pajjotassevāti** dīpasseva. **Vimokkho hoti cetasoti** tassa imehi balehi samannāgatassa khīṇāsavassa dīpanibbānaṃ viya carimakacittassa vatthārammaṇehi vimokkho hoti, gataṭṭhānaṃ na paññāyati. Catutthe **saddho hotī**tiādīni pañcakanipāte vaṇṇitāneva. Pañcame **dhanānī**ti adāliddiyakaraṇaṭṭhena dhanāni.

7. Uggasuttavaṇṇanā

7. Sattame **uggo rājamahāmattoti** pasenadikosalassa mahāamacco. **Upasaṅkamī**ti bhuttaṭṭarāso upasaṅkami. **Aḍḍhoti** nidhānagatena dhanena aḍḍho. **Migāro rohaṇeyyoti** rohaṇaseṭṭhino nattāraṃ migāraseṭṭhiṃ sandhāyevamāha. **Mahaddhanoti** vaḷaṅjanadhanena mahaddhano. **Mahābhogoti** upabhogaparibhogabhaṇḍassa mahantatāya mahābhogo. **Hiraññassāti** suvaṇṇasseva. Suvaṇṇāmeva hissa koṭisaṅkhyāṃ ahosi. **Rūpiyassāti** sesassa taṭṭakasarakaattharaṇapāvuraṇādino paribhogaparikkhārassa pamāṇasaṅkhāne vādoyeva natthi.

8. Saṃyojanasuttavaṇṇanā

8. Aṭṭhame **anunayasamyojananti** kāmarāgasamyojanaṃ. Sabbāneva cetāni bandhanaṭṭhena saṃyojanānīti veditabbāni. Imasmiṃ sutte vaṭṭameva kathitaṃ. Sesam sabbattha uttānatthamevāti.

Dhanavaggo paṭhamo.

2. Anusayavaggo

3. Kulasuttavaṇṇanā

13. Dutiyassa tatiye **nālanti** na yuttaṃ nānucchavikaṃ. **Na manāpenāti** na manamhi appanakena ākārena nisinnāsanato paccuṭṭhenti, anādarameva dassenti. **Santamassa pariguhantī**ti vijjamānampi deyyadhammaṃ etassa niguhanti paṭicchādentī. **Asakkaccaṃ denti no sakkaccanti** lūkhaṃ vā hotu paṇītaṃ vā, asahatthā acittikārena denti, no cittikārena.

4. Puggalasuttavaṇṇanā

14. Catutthe **ubhatobhāgavimuttoti** dvīhi bhāgehi vimutto, arūpasamāpattiyā rūpakāyato vimutto, maggena nāmakāyato. So catunnaṃ arūpasamāpattīnaṃ ekekato vuṭṭhāya saṅkhāre sammāsivā arahattaṃ pattānaṃ catunnaṃ, nirodhā vuṭṭhāya arahattaṃ pattaanāgāmino ca vasena pañcavidho hoti. Pāli panettha “katamo ca puggalo ubhatobhāgavimutto? Idhekacco puggalo aṭṭha vimokkhe kāyena phusitvā viharati, paññāya cassa disvā āsavā parikkhīṇā hontī” ti (pu. pa. 208) evaṃ aṭṭhavimokkhalābhino vasena āgatā.

Paññāya vimuttoti **paññāvimutto**. So sukkhavipassako, catūhi jhānehi vuṭṭhāya arahattaṃ pattā cattāro cāti imesaṃ vasena pañcavidho hoti. Pāli panettha aṭṭhavimokkhapaṭikkhepavaseneva āgatā. Yathāha – “na heva kho aṭṭha vimokkhe kāyena phusitvā viharati, paññāya cassa disvā āsavā parikkhīṇā hontī. Ayaṃ vuccati puggalo paññāvimutto” ti.

Phuṭṭhantaṃ sacchikatoti **kāyasakkhī**. So jhānaphassaṃ paṭhamam phusati, pacchā nirodham nibbānaṃ sacchikaroti. So sotāpattiphalatṭham ādim katvā yāva arahattamaggaṭṭhā chabbidho hoti. Tenāha – “idhekacco puggalo aṭṭha vimokkhe kāyena phusitvā viharati, paññāya cassa disvā ekacce āsavā parikkhīṇā hontī. Ayaṃ vuccati puggalo kāyasakkhī” ti (pu. pa. 208).

Diṭṭhantaṃ pattoti **diṭṭhippattro**. Tatrīdaṃ saṅkhepalakkhaṇam – dukkhā saṅkhārā, sukho nirodhoti nātaṃ hoti diṭṭham viditaṃ sacchikataṃ phusitaṃ paññāyāti diṭṭhippattro. Vitthārato pana sopi kāyasakkhī viya chabbidho hoti. Tenevāha – “idhekacco puggalo ‘idaṃ dukkha’nti yathābhūtaṃ pajānāti...pe... ‘ayaṃ dukkhanirodhagāminī paṭipadā’ ti yathābhūtaṃ pajānāti, tathāgatappaveditā cassa dhammā paññāya vodiṭṭhā hontī vocaritā paññāya...pe... ayaṃ vuccati puggalo diṭṭhippattro” ti.

Saddhāya vimuttoti **saddhāvimutto**. Sopi vuttanayeneva chabbidho hoti. Tenāha – “idhekacco puggalo ‘idaṃ dukkha’nti yathābhūtaṃ pajānāti...pe... ‘ayaṃ dukkhanirodhagāminī paṭipadā’ ti yathābhūtaṃ pajānāti, tathāgatappaveditā cassa dhammā paññāya vodiṭṭhā hontī vocaritā paññāya...pe... no ca kho yathādiṭṭhippattassa. Ayaṃ vuccati puggalo saddhāvimutto” ti. Etassa hi saddhāvimuttassa pubbhāgamaggakkhaṇe saddahantassa viya okappentassa viya adhimuccantassa viya ca kilesakkhāyo hoti, diṭṭhippattassa pubbhāgamaggakkhaṇe kilesacchedakaññaṃ adandham tikhiṇam sūram hutvā vahati. Tasmā yathā nāma nātīkhiṇena asinā kadaliṃ chindantassa chinnaṭṭhānaṃ maṭṭham na hoti, asi sīgham na vahati, saddo suyati, balavataro vāyāmo katabbo hoti, evarūpā saddhāvimuttassa pubbhāgamaggabhāvanā. Yathā pana sunisitena asinā kadaliṃ chindantassa chinnaṭṭhānaṃ maṭṭham hoti, asi sīgham vahati, saddo na suyati, balavavāyāmakiccaṃ na hoti, evarūpā paññāvimuttassa pubbhāgamaggabhāvanā veditabbā.

Dhammaṃ anussaratīti **dhammānusārī**. Dhammoti paññā, paññāpubbaṅgamaṃ maggaṃ bhāvetīti attho. **Saddhānusārī**hi eseva nayo. Ubhopete sotāpattimaggaṭṭhāyeva. Vuttampi cetam – “yassa puggalassa sotāpattiphalasacchikiriyāya paṭipannassa paññindriyaṃ adhimattaṃ hoti, paññāvāhiṃ paññāpubbaṅgamaṃ ariyamaggaṃ bhāveti. Ayaṃ vuccati puggalo dhammānusārī. Yassa puggalassa sotāpattiphalasacchikiriyāya paṭipannassa saddhindriyaṃ adhimattaṃ hoti, saddhāvāhiṃ saddhāpubbaṅgamaṃ ariyamaggaṃ bhāveti. Ayaṃ vuccati puggalo saddhānusārī” ti (pu. pa. 208). Ayamettha saṅkhepo, vitthārato panesā ubhatobhāgavimuttādīkathā visuddhimagge (visuddhi. 2.771, 889) paññābhāvanādhikāre vuttā. Tasmā tattha vuttanayeneva veditabbāti.

5. Udakūpamāsuttavaṇṇanā

15. Pañcame **udakūpamā**ti nimujjanādiākāraṃ gahetvā udakena upamitā. **Sakim nimuggoti** ekavārameva nimuggo. **Ekantakāḷakehī**ti niyatamicchādiṭṭhiṃ sandhāya vuttam. **Ummujjatī**ti uṭṭhahati. **Sādhū**ti sobhanā bhaddakā. **Hāyatiyevā**ti caṅkavāre āsittaudakaṃ viya parihāyateva. **Ummujjitvā vipassati viloketī**ti uṭṭhahitvā gantabbadisam vipassati viloketi. **Pataratī**ti gantabbadisābhimukho tarati nāma. **Paṭigādhappatto hotī**ti uṭṭhāya viloketvā patarivā ekasmiṃ ṭhāne

patiṭṭhāpato nāma hoti, tiṭṭhati na punāgacchati. **Tiṇṇo pāraṅgato thale tiṭṭhatīti** sabbakilesogham taritvā paratīraṃ gantvā nibbānathale patiṭṭhito nāma hoti. Imasmiṃ sutte vaṭṭavivaṭṭaṃ kathitaṃ.

6. Aniccānupassīsuttavaṇṇanā

16. Chaṭṭhe aniccāti evaṃ paññāya pharanto anupassatīti **aniccānupassī**. Aniccāti evaṃ saññā assāti **aniccasaññī**. Aniccāti evaṃ ñāṇena paṭisaṃveditā assāti **aniccapaṭisaṃvedī**. **Satatanti** sabbakālaṃ. **Samitanti** yathā purimacittena pacchimacittaṃ samitaṃ samupagataṃ ghaṭṭitaṃ hoti, evaṃ. **Abbokiṇṇanti** nirantaraṃ aññena cetasā asaṃmissaṃ. **Cetasā adhimuccamānoti** cittena sannitiṭṭhāpayamāno. **Paññāya pariyoḡāhamānoti** vipassanāññāṇena anupavisamāno.

Apubbaṃ acarimanti apure apacchā ekakkhaṇeyeva. Idha samasīsī kathito. So catubbidho hoti rogasamasīsī, vedanāsamasīsī, iriyāpathasamasīsī, jīvitāsamasīsīti. Tattha yassa aññatarena rogena phuṭṭhassa sato rogavūpasamo ca āsavakkhayo ca ekappahārenea hoti, ayaṃ **rogasamasīsī** nāma. Yassa pana aññataraṃ vedanaṃ vedayato vedanāvūpasamo ca āsavakkhayo ca ekappahārenea hoti, ayaṃ **vedanāsamasīsī** nāma. Yassa pana ṭhānādīsu iriyāpathesu aññatarasamaṅgino vipassantassa iriyāpathassa pariyoḡānaṅca āsavakkhayo ca ekappahārenea hoti, ayaṃ **iriyāpathasamasīsī** nāma. Yassa pana upakkamato vā sarasato vā jīvitapariyādānaṅca āsavakkhayo ca ekappahārenea hoti, ayaṃ **jīvitāsamasīsī** nāma. Ayamidha adhippeto. Tattha kiñcāpi āsavapariyādānaṃ maggacittena, jīvitapariyādānaṃ cuticittena hotīti ubhinnaṃ ekakkhaṇe sambhavo nāma natthi. Yasmā panassa āsavesu khīṇamattesu paccavekkhaṇavārānantameva jīvitapariyādānaṃ gacchati, antaraṃ na paññāyati, tasmā evaṃ vuttaṃ.

Antarāparinibbāyīti yo pañcasu suddhāvāsesu yattha katthaci uppanno nibbattakkhaṇe vā thokaṃ atikkamitvā vā vemajjhe ṭhatvā vā arahattaṃ pāpuṇāti, tassetam nāmaṃ. **Upahaccaparinibbāyīti** yo tattheva āyuvemajjhaṃ atikkamitvā arahattaṃ pāpuṇāti. **Asaṅkhāraparinibbāyīti** yo tesameva puggalānaṃ asaṅkhārenea appayogena kilese khepeti. **Sasaṅkhāraparinibbāyīti** yo sasaṅkhārenea sappayogena kilese khepeti. **Uddhamsoto akaniṭṭhagāmīti** yo heṭṭhā catūsu suddhāvāsesu yattha katthaci nibbattitvā tato cuto anupubbena akaniṭṭhe uppajjitvā arahattaṃ pāpuṇāti.

7-9. Dukkhānupassīsuttādivaṇṇanā

17-19. Sattame **dukkhānupassīti** pīḷanākāraṃ dukkhato anupassanto. Aṭṭhame **anattānupassīti** avasavattanākāraṃ anattāti anupassanto. Navame **sukhānupassīti** sukhanti evaṃ ñāṇena anupassanto.

10. Niddasavatthusuttavaṇṇanā

20. Dasame **niddasavatthūnīti** niddasādivatthūni, “niddaso bhikkhu, nibbīso, nittiṃso, niccattālīso, nippaññāso”ti evaṃ vacanakāraṇāni. Ayaṃ kira pañho titthiyasamaye uppanno. Titthiyā hi dasavassakāle mataṃ nigaṇṭhaṃ niddasoti vadanti. So kira puna dasavasso na hoti. Na kevalaṅca dasavasso, navavassopi ekavassopi na hoti. Eteneva nayena vīsativassādikālepi mataṃ nigaṇṭhaṃ “nibbīso nittiṃso niccattālīso nippaññāso”ti vadanti. Āyasmā ānando gāme vicaranto taṃ kathaṃ sutvā vihāraṃ gantvā bhagavato ārocesi. Bhagavā āha – “na idaṃ, ānanda, titthiyānaṃ adhivacanaṃ, mama sāsane khīṇāsavassetam adhivacanaṃ. Khīṇāsavo hi dasavassakāle parinibbuto puna dasavasso na hoti. Na kevalaṅca dasavassova, navavassopi...pe... ekavassopi. Na kevalaṅca ekavassova, ekādasamāsikopi...pe... ekamāsikopi ekamuhuttikopi na hotiyeva”. Kasmā? Puna paṭisaṅdhiyā abhāvā. Nibbīsādīsopi eseva nayo. Iti bhagavā “mama sāsane khīṇāsavassetam adhivacana”nti vatvā yehi kāraṇehi niddaso hoti, tāni dassetuṃ imaṃ desanaṃ ārabhi.

Tattha **idhāti** imasmiṃ sāsane. **Sikkhāsamādāne tibbacchando hotīti** sikkhāttayapūraṇe balavacchando hoti. **Āyatiṅca sikkhāsamādāne avigatapemoti** anāgate punadivāsādīsopi sikkhāpūraṇe

avigatapemeneva samannāgato hoti. **Dhammanisantiyā**ti dhammanisāmanāya. Vipassanāyetaṃ adhivacanāṃ. **Ichāvīnāyeti** taṇhāvināye. **Paṭisallānēti** ekābhāve. **Vīriyārambheti** kāyikacetasikassa vīriyassa pūraṇe. **Satinepakketi** satiyañceva nipakabhāve. **Diṭṭhipaṭivedheti** maggadassane. Sesāṃ sabbattha uttānamevāti.

Anusayavaggo dutiyo.

3. Vajjisattakavaggo

1. Sārandadasuttavaṇṇanā

21. Tatiyassa paṭhame **sārandade cetiyeti** evaṃnāmake vihāre. Anuppanne kira tathāgate tattha sārandadassa yakkhassa nivāsanaṭṭhānaṃ cetiyaṃ ahoṣi, athettha bhagavato vihāraṃ kāresuṃ. So sārandadacetiyaṃtveva saṅkhaṃ gato. **Yāvākivañcā**ti yattakaṃ kālaṃ. **Abhiṅhaṃ sannipātā**ti divasassa tikkhattuṃ sannipatantāpi antarantarā sannipatantāpi abhiṅhaṃ sannipātāva.

Sannipātabahulāti “hiyyopi purimadivasampi sannipatamha, puna ajja kimatthaṃ sannipatāmā”ti vosānāmanāpajjanena sannipātabahulā. **Vuddhiyeva licchavī vajjīnaṃ pāṭikaṅkhā no parihānī**ti abhiṅhaṃ asannipatantā hi disāsu āgataṃ sāsanaṃ na suṇanti, tato “asukagāmasīmā vā nigamasīmā vā ākulā, asukaṭṭhāne corā pariyuṭṭhitā”ti na jānanti. Corāpi “pamattā rājāno”ti ñatvā gāmanigamādīni paharantā janapadaṃ nāsenti. Evaṃ rājūnaṃ parihāni hoti. Abhiṅhaṃ sannipatantā pana taṃ pavattim suṇanti, tato balaṃ pesetvā amittamaddanaṃ karonti. Corāpi “appamattā rājāno, na sakkā amhehi vaggabandhanena vicaritu”nti bhijjivā palāyanti. Evaṃ rājūnaṃ vuddhi hoti. Tena vuttaṃ – “vuddhiyeva licchavī vajjīnaṃ pāṭikaṅkhā no parihāni”ti.

Samaggātiādīsu sannipātabheriyā niggaṭāya “ajja me kiccaṃ atthi maṅgalaṃ atthi”ti vikkhepaṃ karontā na samaggā sannipatanti nāma. Bherisaddaṃ pana sutvāva bhuñjamānāpi alaṅkurumānāpi vatthāni nivāsayaṃnāpi addhabhuttā addhālaṅkatā vatthaṃ nivāsentaṃva sannipatantā **samaggā sannipatanti** nāma. Sannipatitā pana cintetvā mantetvā kattappaṃ katvā ekatova avuṭṭhahantā na samaggā vuṭṭhahanti nāma. Evaṃ vuṭṭhitesu hi ye paṭhamaṃ gacchanti, tesāṃ evaṃ hoti – “amhehi bāhirakathāva sutā, idāni vinicchayakathā bhavissati”ti. Ekato vuṭṭhahantā pana **samaggā vuṭṭhahanti** nāma. Apica “asukāṭṭhāne gāmasīmā vā nigamasīmā vā ākulā, corā vā pariyuṭṭhitā”ti sutvā “ko gantvā amittamaddanaṃ karissati”ti vutte “ahaṃ paṭhamaṃ ahaṃ paṭhama”nti vatvā gacchantāpi samaggā vuṭṭhahanti nāma. Ekassa pana kammante osīdamāne sesā puttabhātaro pesetvā tassa kammantaṃ upatthambhayamānāpi āgantukarājānaṃ “asukassa gehaṃ gacchatu, asukassa gehaṃ gacchatu”ti avatvā sabbe ekato saṅgaṇhantāpi ekassa maṅgale vā roge vā aññasmim vā pana tādise sukhadukkhe uppanne sabbe tattha sahāyabhāvaṃ gacchantāpi **samaggā vajjikaraṇīyāni karonti** nāma.

Appaññattantiādīsu pubbe akataṃ suṅkaṃ vā baliṃ vā daṇḍaṃ vā āharāpentā **appaññattaṃ paññāpentī** nāma. Porāṇapaveṇiyā āgatameva pana anāharāpentā **paññattaṃ samucchindanti** nāma. Coroti gahetvā dassite avicinitvā chejjabhejjaṃ anusāsantā porāṇaṃ vajjidhammaṃ samādāya na vattanti nāma. Tesāṃ apaññattaṃ paññāpentānaṃ abhinavasūṅkādiṭṭhitā manussā “atiupaddutamha, ke imesaṃ vijite vasissanti”ti paccantaṃ pavisitvā corā vā corasahāyā vā hutvā janapadaṃ hananti. Paññattaṃ samucchindantānaṃ paveṇiāgatāni suṅkādiṇi aṅgaṇhantānaṃ koso parihāyati, tato hatthiassabalakāyaorodhādayo yathānibaddhaṃ vaṭṭaṃ alabhamānā thāmaḥbalena parihāyanti. Te neva yuddhakkhamā honti na pāricariyakkhamā. Porāṇaṃ vajjidhammaṃ samādāya avattantānaṃ vijite manussā “amhākaṃ puttaṃ pitaraṃ bhātaraṃ acoraṃyeva coroti katvā chindimṣu bhindimṣu”ti kujjhivā paccantaṃ pavisitvā corā vā corasahāyā vā hutvā janapadaṃ hananti. Evaṃ rājūnaṃ parihāni hoti. Apaññattaṃ na paññāpentānaṃ pana “paveṇiāgataṃyeva rājāno karonti”ti manussā haṭṭhatuṭṭhā kasivāṇijjādike kammante sampādentī. Paññattaṃ asamucchindantānaṃ paveṇiāgatāni suṅkādiṇi gaṇhantānaṃ koso vaḍḍhati, tato hatthiassabalakāyaorodhādayo yathānibaddhaṃ vaṭṭaṃ labhamānā

thāmabalasampannā yuddhakkhamā ceva pārīcariyakkhamā ca honti. Porāṇe vajjidhamme samādāya vattantānaṃ manussā na ujjhāyanti. “Rājāno porāṇapaveṇiyā karonti, aṭṭakulikasenāpatiuparājūhi parikkhitam sayampi parikkhipitvā paveṇipotthakam vācāpetvā anucchavikameva daṇḍam pavattayanti, etesaṃ doso natthi, amhākaṃyeva doso”ti appamattā kammante karonti. Evaṃ rājūnaṃ vuddhi hoti.

Sakkarissantīti yaṃkiñci tesam sakkāraṃ karontā sundarameva karissanti. **Garuṃ karissantīti** garubhāvaṃ paccupaṭṭhapetvā karissanti. **Mānessantīti** manena piyāyissanti. **Pūjessantīti** paccayapūjāya pūjessanti. **Sotabbaṃ maññissantīti** divasassa dve tayo vāre upaṭṭhānaṃ gantvā tesam katham sotabbaṃ saddhāttabbaṃ maññissanti. Tattha ye evaṃ mahallakānaṃ rājūnaṃ sakkārādīni na karonti, ovādatthāya vā nesaṃ upaṭṭhānaṃ na gacchanti, te tehi vissatṭhā anovadiyamānā kīlāpasutā rajjato parihāyanti. Ye pana tathā paṭipajjanti, tesam mahallakarājāno “idaṃ kātābbaṃ idaṃ na kātābba”nti porāṇapaveṇiṃ ācikkhanti. Saṅgāmaṃ patvāpi “evaṃ pavisitabbaṃ, evaṃ nikkhamitabba”nti upāyaṃ dassenti. Te tehi ovadiyamānā yathāovādaṃ paṭipajjamānā sakkonti rajjapaveṇiṃ sandhāretuṃ. Tena vuttaṃ – “vuddhiyeva licchavī vajjīnaṃ pāṭikaṅkhā”ti.

Kulitthiyoti kulagharāṇiyo. **Kulakumāriyoti** anividdhā tāsam dhītarō. **Okassāti** vā **pasayhāti** vā pasayhākārassevetam nāmaṃ. Okāsātipi paṭhanti. Tattha **okassāti** avakasitvā ākaḍḍhitvā. **Pasayhāti** abhibhavitvā ajjhottharivāti ayaṃ vacanattho. Evañhi karontānaṃ vijite manussā “amhākaṃ gehe puttābhātaropi, kheḷasiṅghānikādīni mukhena apanetvā saṃvaḍḍhitā dhītaropi ime balakkārena gahetvā attano ghare vāsenti”ti kupitā paccantaṃ pavisitvā corā vā corasahāyā vā hutvā janapadaṃ hananti. Evaṃ akarontānaṃ pana vijite manussā appossukkā sakāni kammāni karontā rājakosaṃ vaḍḍhenti. Evamettha vuddhihāṇiyo veditābā.

Vajjīnaṃ vajjicetiyanīti vajjirājūnaṃ vajjiraṭṭhe cittīkātāṭṭhena cetiyānīti laddhanāmāni yakkhatṭhānāni. **Abbhantarānīti** antonagare ṭhitāni. **Bāhirānīti** bahinagare ṭhitāni. **Dinnapubbaṃ katapubbanti** pubbe dinnaṃ kataṃ. **No parihāpessantīti** ahāpetvā yathāpavattameva karissanti. Dhammikaṃ baliṃ parihāpentānañhi devatā ārakkham saṃvaḍḍhitam na karonti, anuppannaṃ dukkham uppādetuṃ asakkontiyopi uppannaṃ kāsāsīsarogādiṃ vaḍḍhenti, saṅgāme patte sahāyā na honti. Aparihāpentānaṃ pana ārakkham saṃvaḍḍhitam karonti, anuppannaṃ sukham uppādetuṃ asakkontiyopi uppannaṃ kāsāsīsarogādiṃ haranti, saṅgāmasīse sahāyā hontīti. Evamettha vuddhihāṇiyo veditābā.

Dhammikā rakkhāvaraṇaguttīti ettha rakkhā eva yathā anicchitam nāgacchati, evaṃ āvaraṇato āvaraṇam. Yathā icchitam na nassati, evaṃ gopāyanato gutti. Tattha balakāyena parivāretvā rakkhānaṃ pabbajitānaṃ dhammikā rakkhāvaraṇagutti nāma na hoti. Yathā pana vihārassa upavane rukkhe na chindanti, vājikā vājam na karonti, pokkharāṇiṃ macche na gaṇhanti, evaṃ karaṇam dhammikā rakkhāvaraṇagutti nāma. **Kintīti** kena nu kho kāraṇena.

Tattha ye anāgatānaṃ arahantānaṃ āgamaṃ na icchanti, te assaddhā honti appasannā. Pabbajite sampatte paccuggamaṃ na karonti, gantvā na passanti, paṭisanthāraṃ na karonti, pañham na pucchanti, dhammaṃ na suṇanti, dānaṃ na denti, anumodanaṃ na suṇanti, nivāsanaṭṭhānaṃ na saṃvidahanti. Atha nesaṃ avaṇṇo uggacchati “asuko nāma rājā assaddho appasanno, pabbajite sampatte paccuggamaṃ na karoti...pe... nivāsanaṭṭhānaṃ na saṃvidahatī”ti. Tam sutvā pabbajitā tassa nagaradvārena gacchantāpi nagaraṃ na pavisanti. Evaṃ anāgatānaṃ arahantānaṃ anāgamaṃyeva hoti. Āgatānaṃ pana phāsuvihāre asati yepi ajānitvā āgatā, te “vasissāmāti tāva cintetvā āgatamhā, imesaṃ pana rājūnaṃ iminā nīhārena ke vasissanti”ti nikkhamitvā gacchanti. Evaṃ anāgatesu anāgacchantesu āgatesu dukkham viharantesu so doso pabbajitānaṃ anāvāso hoti. Tato devatārakkhā na hoti, devatārakkhāya asati amanussā okāsaṃ labhanti, amanussā ussannā anuppannaṃ byādhiṃ uppādeti. Sīlavantānaṃ dassanapañhapucchanaḍḍivattukassa puññassa anāgamo hoti. Vipariyāyena yathāvuttakaṇhapakkhaviṇṇatassa sukkapakkhassa sambhavo hotīti evamettha vuddhihāṇiyo veditābā.

2. Vassakārasuttavaṇṇanā

22. Dutiye **abhiyātukāmoti** abhibhavanatthāya yātukāmo. **Vajjīti** vajjirājāno. **Evamamahiddhiketi** evaṃ mahatiyā rājiddhiyā samannāgate. Etena nesam samaggabhāvaṃ katheti. **Evamamahānubhāveti** evaṃ mahantena rājānubhāvena samannāgate. Etena nesam hatthisippādīsu katasikkhatam katheti, yaṃ sandhāya vuttam – “sikkhitā vatime licchavikumārakā, susikkhitā vatime licchavikumārakā, yatra hi nāma sukhumena tālacchiggaḷena asanaṃ atipātayissanti poṅkhānupoṅkham avirādhitā”nti (sam. ni. 5.1115). **Ucchecchāmīti** ucchindissāmi. **Vināsessāmīti** adassanaṃ nayissāmi. **Anayabyasananti** avaḍḍhiñceva, ñātibyasanañca. **Āpādessāmīti** pāpayissāmi.

Iti kira so ṭhānanisajjādīsu imaṃ yuddhakathameva katheti, “gamanasajjā hothā”ti ca balakāyaṃ āṇāpeti. Kasmā? Gaṅgāya kira ekaṃ paṭṭanagāmaṃ nissāya addhajojanaṃ ajātasattuno vijjitaṃ, addhajojanaṃ licchavīnaṃ. Tatra pabbatapādato mahagghabhaṇḍaṃ otarati. Taṃ sutvā “ajja yāmi, sve yāmī”ti ajātasattuno saṃvidahantasseva licchavīno samaggā sammodamānā puretaraṃ āgantvā sabbaṃ gaṇhanti. Ajātasattu pacchā āgantvā taṃ pavattiṃ ñatvā kujjhivā gacchati. Te punasaṃvaccharepi tatheva karonti. Atha so balavāghātajāto, tadā evamakāsi.

Tato cintesi – “gaṇena saddhiṃ yuddham nāma bhāriyaṃ, ekopi moghappahāro nāma natthi. Ekena kho pana paṇḍitena saddhiṃ mantevā karonto niraparādho hoti, paṇḍito ca satthārā sadiso natthi, satthā ca avidūre dhuravīhāre vasati, handāhaṃ pesetvā pucchāmi. Sace me gatena koci attho bhavissati, satthā tuṅhī bhavissati. Anatthe pana satī ‘kiṃ rañño tattha gatenā’ti vakkhatī”ti. So vassakāraṃ brāhmaṇaṃ pesesi. Brāhmaṇo gantvā bhagavato tamatthaṃ ārocesi. Tena vuttam – **atha kho rājā... pe... āpādessāmi vajjīti.**

Bhagavantaṃ bijayamānoti thero vattasīse ṭhatvā bhagavantaṃ bijati, bhagavato pana sītaṃ vā uṇhaṃ vā natthi. Bhagavā brāhmaṇassa vacanaṃ sutvā tena saddhiṃ amantevā therena saddhiṃ mantetukāmo **kinti te, ānanda, sutantiādīmāha.** Taṃ vuttatthameva.

Ekamidāhanti idaṃ bhagavā pubbe vajjīnaṃ imassa vajjisattakassa desitabhāvappakāsanatthaṃ āha. **Akaraṇīyāti** akattabbā, aggahetabbāti attho. **Yadidanti** nipātamattaṃ. **Yuddhassāti** karaṇatthe sāmivacanaṃ, abhimukhaṃ yuddhena gahetuṃ na sakkāti attho. **Aññatra upalāpanāyāti** ṭhapetvā upalāpanaṃ. Upalāpanā nāma “alam vivādena, idāni samaggā homā”ti hatthiassarathahiraññasuvaṇṇādīni pesetvā saṅgahakaraṇaṃ, evañhi saṅgahaṃ katvā kevalaṃ vissāsenā sakkā gaṇhitunti attho. **Aññatra mithubhedāti** ṭhapetvā mithubhedam. Iminā “aññamaññabhedam katvāpi sakkā ete gahetu”nti dasseti. Idaṃ brāhmaṇo bhagavato kathāya nayaṃ labhitvā āha. Kiṃ pana bhagavā brāhmaṇassa imāya kathāya nayalābhaṃ jānātīti? Āma jānāti. Jānanto kasmā kathesi? Anukampāya. Evaṃ kirassa ahosi – “mayā akathitepi katipāhena gantvā sabbe gaṇhissati, kathite pana samagge bhindanto tīhi saṃvaccharehi gaṇhissati. Ettakampi jīvitameva varam. Ettakañhi jīvantā attano patiṭṭhābhūtaṃ puññaṃ karissanti”ti. **Abhinanditvāti** cittena nanditvā. **Anumoditvāti** “yāva subhāsitamidaṃ bhotā gotamenā”ti vācāya anumoditvā. **Pakkāmīti** rañño santikaṃ gato. Rājāpi tameva pesetvā sabbe bhinditvā gantvā anayabyasanaṃ pāpesi.

3. Paṭhamasattakasuttavaṇṇanā

23. Tatiye **abhiṇhaṃ sannipātāti** idaṃ vajjisattake vuttasadisameva. Idhāpi ca abhiṇhaṃ asannipatantā disāsu āgatasāsanam na suṇanti, tato “asukavihārasīmā ākulā, uposathappavāraṇā ṭhitā, asukasmim ṭhāne bhikkhū vejjakammadūtakammādīni karonti, viññattibahulā phalapupphadānādīhi jīvikam kappenti”tiādīni na jānanti. Pāpabhikkhūpi “pamatto saṅgho”ti ñatvā rāsibhūtā sāsanam osakkāpentī. Abhiṇhaṃ sannipatantā pana taṃ pavattiṃ suṇanti, tato bhikkhusaṅghaṃ pesetvā sīmaṃ ujum kārenti, uposathappavāraṇāyo pavattāpentī, micchājīvānaṃ ussannaṭṭhāne ariyavaṃsike pesetvā ariyavaṃsaṃ kathāpentī, pāpabhikkhūnaṃ vinayadharehi niggahaṃ kārapenti. Pāpabhikkhūpi

“appamatto saṅgho, na sakkā amhehi vaggabandhanena vicaritu”nti bhijjivā palāyanti. Evamettha vuddhīhāniyo veditabbā.

Samaggātiādīsu cetiyapaṭijagganattamaṃ vā bodhigharauposathāgāracchādanattamaṃ vā katikavattamaṃ vā ṭhapetukāmatāya “saṅgho sannipatatū”ti bheriyā vā ghaṇṭiyā vā ākoṭitamattāya “mayhaṃ cīvarakammaṃ atthi, mayhaṃ patto pacitabbo, mayhaṃ navakammaṃ atthi”ti vikkhepaṃ karontā na samaggā sannipatanti nāma. Sabbaṃ pana taṃ kammaṃ ṭhapetvā “ahaṃ purimataraṃ, ahaṃ purimatara”nti ekappahāreneva sannipatantā samaggā sannipatanti nāma. Sannipatitā pana cintetvā mantetvā kattabbaṃ katvā ekatova avuṭṭhahantā na samaggā vuṭṭhahanti nāma. Evaṃ vuṭṭhitesu hi ye paṭhamaṃ gacchanti, tesamaṃ evamaṃ hoti “amhehi bāhirakathāva sutā, idāni vinicchayakathā bhavissatī”ti. Ekappahāreneva vuṭṭhahantā samaggā vuṭṭhahanti nāma. Apica “asukatṭhāne vihārasīmā ākulā, uposathappavāraṇā ṭhitā, asukatṭhāne vejjakammādikārakā pāpabhikkhū ussannā”ti sutvā “ko gantvā tesamaṃ niggaḥamaṃ karissatī”ti vutte “ahaṃ paṭhamaṃ, ahaṃ paṭhama”nti vatvā gacchantāpi samaggā vuṭṭhahanti nāma.

Āgantukamaṃ pana disvā “imaṃ pariveṇamaṃ yāhi, etaṃ pariveṇamaṃ yāhi, ayaṃ ko”ti avatvā sabbe vattamaṃ karontāpi, jīṇṇapattacīvarakamaṃ disvā tassa bhikkhācāravattena pattacīvaraṃ pariyesantāpi, gilānassa gilānabhesajjamaṃ pariyesamānāpi, gilānameva anāthaṃ “asukapariveṇamaṃ yāhi”ti avatvā attano attano pariveṇe paṭijaggantāpi, eko olīyamānako gantho hoti, paññavantamaṃ bhikkhumaṃ saṅgaṇhitvā tena taṃ ganthamaṃ ukkhipāpentāpi samaggā saṅghakaraṇīyāni karonti nāma.

Appaṇṇattantiādīsu navaṃ adhammikaṃ katikavattamaṃ vā sikkhāpadaṃ vā gaṇhantā appaṇṇattamaṃ paññāpentī nāma purāṇasanthatavattusmiṃ sāvattiyamaṃ bhikkhū viya. Uddhammaṃ ubbinayamaṃ sāsanaṃ dīpentā paññattamaṃ samucchindanti nāma, vassasatapariniḥḥute bhagavati vesālikā vajjiputtakā viya. Khuddānukhuddakā pana āpattiyō sañcicca vītikkamantā yathāpaññattesu sikkhāpadesu samādāya na vattanti nāma assajipunabbasukā viya. Tathā akarontā pana appaṇṇattamaṃ na paññāpentī, paññattamaṃ na samucchindanti, yathāpaññattesu sikkhāpadesu samādāya vattanti nāma āyasmā upaseno viya, āyasmā yaso kākaṇḍakaputto viya, āyasmā mahākassapo viya ca. **Vuddhiyevā**ti sīlādiguṇehi vuddhiyeva, no parihāni.

Therāti thirabhāvappattā therakārahehi guṇehi samannāgatā. Bahū rattiyō jānantīti **rattaññū**. Ciramaṃ pabbajitānaṃ etesanti **cirapabbajitā**. Saṅghassa pitiṭṭhāne ṭhitāti **saṅghapīṭaro**. Pitiṭṭhāne ṭhitattā saṅghamaṃ pariṇenti, pubbaṅgamā hutvā tīsu sikkhāsu pavattentīti **saṅghapariṇāyaka**.

Ye tesamaṃ sakkārādīni na karonti, ovādatthāya dve tayo vāre upaṭṭhānaṃ na gacchanti, tepi tesamaṃ ovādaṃ na denti, pavenīkathaṃ na kathenti, sārabhūtaṃ dhammapariyāyamaṃ na sikkhāpentī. Te tehi vissatṭhā sīlādīni dhammakhandhehi sattahi ca ariyadhanehīti evamādīhi guṇehi parihāyanti. Ye pana tesamaṃ sakkārādīni karonti, upaṭṭhānaṃ gacchanti, tesamaṃ te “evamaṃ te abhikkamitabba”ntiādikaṃ ovādaṃ denti, pavenīkathaṃ kathenti, sārabhūtaṃ dhammapariyāyamaṃ sikkhāpentī, terasahi dhutaṅgehi dasahi kathāvattūhi anusāsanti. Te tesamaṃ ovāde ṭhatvā sīlādīni guṇehi vaḍḍhamānā sāmāññattamaṃ anupāṇanti. Evamettha hānivuddhiyo daṭṭhabbā.

Punabbhavo sīlamassāti ponobbhavikā, punabbhavadāyikāti attho, tassā **ponobbhavikāya**. Na **vasamaṃ gacchissantī** ettha ye catunnaṃ paccayānaṃ kāraṇā upaṭṭhākānaṃ padānupadikā hutvā gāmato gāmaṃ vicaranti, te tassā vasamaṃ gacchantī nāma. Itare na gacchantī. Tattha hānivuddhiyo pākaṭāyeva.

Āraññakesūti pañcadhanusatikapacchimesu. **Sāpekkhā**ti sālayā. Gāmantasenāsanesu hi jhānaṃ appetvāpi tato vuṭṭhitamattova itthipurisadārakādārikādīsaddamaṃ suṇāti, yenassa adhigatavisesopi hāyatiyeva. Araññasenāsanese niddāyitvāpi pabuddhamatto sīhabyagghamorādīnaṃ saddamaṃ suṇāti, yena araññe pītiṃ paṭilabhivā tameva sammāsanto aggaphale patiṭṭhāti. Iti bhagavā gāmantasenāsanese jhānaṃ appetvā nisinnabhikkhuto araññe niddāyamānameva pasamsatī. Tasmā tameva atthavasamaṃ paṭicca

“āraññakesu senāsanesu sāpekkhā bhavissantī”ti āha.

Paccattaññeva satim upaṭṭhapessantiti attanāva attano abbhantare satim upaṭṭhapessanti. **Pesalā**ti piyasīlā. Idhāpi sabrahmacārīnaṃ āgamaṇaṃ anicchantā nevāsikā assaddhā honti appasannā, vihāraṃ sampattabhikkhūnaṃ paccuggamana-pattacīvarapaṭiggahaṇa-āsanapaññāpanatālavantaṅgahaṇādīni na karonti. Atha nesam ayaṇṇo uggacchati “asukavihāravāsino bhikkhū assaddhā appasannā vihāraṃ paviṭṭhānaṃ vattappaṭivattampi na karonti”ti. Taṃ sutvā pabbajitā vihāradvārena gacchantāpi vihāraṃ na pavisanti. Evaṃ anāgatānaṃ anāgamaṇameva hoti. Āgatānaṃ pana phāsuvihāre asati yepi ajānitvā āgatā, te “vasissāmāti tāvacintetvā āgatamhā, imesaṃ pana nevāsikānaṃ iminā nīhārena ko vasissati”ti nikkhamitvā gacchanti. Evaṃ so vihāro aññesaṃ bhikkhūnaṃ anāvāsova hoti. Tato nevāsikā sīlavantānaṃ dassanaṃ alabhantā kaṅkhāvinodakaṃ vā ācārasikkhāpakam vā madhuradhammasavanaṃ vā na labhanti. Tesam neva aggahitadhammaggaṇaṃ na gahitasajjhāyakaraṇaṃ hoti. Iti nesam hāniyeva hoti, na vuddhi.

Ye pana sabrahmacārīnaṃ āgamaṇaṃ icchanti, te saddhā honti pasannā, āgatānaṃ sabrahmacārīnaṃ paccuggamaṇādīni katvā senāsaṇaṃ paññapetvā denti, te gahetvā bhikkhācāraṃ pavisanti, kaṅkhaṃ vinodenti, madhuradhammasavanaṃ labhanti. Atha nesam kittisaddo uggacchati “asukavihāre bhikkhū evaṃ saddhā pasannā vattasampannā saṅgāhakā”ti. Taṃ sutvā bhikkhū dūratopi āgacchanti. Tesam nevāsikā vattaṃ karonti, samīpaṃ gantvā vuḍḍhataraṃ āgantukaṃ vanditvā nisīdanti, navakatarassa santike āsanaṃ gahetvā nisīditvā “imasmiṃ vihāre vasissatha, gamissathā”ti pucchanti. “Gamissāmā”ti vutte “sappāyaṃ senāsaṇaṃ, sulabhā bhikkhā”tiādīni vatvā gantuṃ na denti. Vinayadharo ce hoti, tassa santike vinayaṃ sajjhāyanti. Suttantādidharo ce, tassa santike taṃ taṃ dhammaṃ sajjhāyanti. Te āgantukatherānaṃ ovāde ṭhatvā saha paṭisambhidāhi arahattaṃ pāpuṇanti. Āgantukā “ekaṃ dve divasāni vasissāmāti āgatamhā, imesaṃ pana sukhasaṃvāsātāya dasa dvādasā vassāni vasimhā”ti vattāro honti. Evamettha hānivuddhiyo veditabbā.

4. Dutiyasattakasuttavaṇṇanā

24. Catutthe na kammārāmāti ye divasaṃ cīvarakamma-kāyabandhanaparissāvana-dhammakaraṇa-sammajjani-pādaḥkaṭhalikādīneva karonti, te sandhāyesa paṭikkhepo. Yo pana tesam karaṇavelāya evaṃ etāni karoti, uddesavelāya uddesaṃ gaṇhāti, sajjhāyavelāya sajjhāyati, cetiyaṅgaṇavattavelāya cetiyaṅgaṇavattaṃ karoti, manasikāraṇavelāya manasikāraṇaṃ karoti, na so kammārāmo nāma.

Yo itthivaṇṇapurisavaṇṇādivasena ālāpasallāpaṃ karontoyeva rattindivaṃ vītināmeti, evarūpe bhasse pariyaṅtakārī na hoti, ayaṃ **bhassārāmo** nāma. Yo pana rattindivaṃ dhammaṃ katheti, pañhaṃ vissajjeti, ayaṃ appabhassova bhasse pariyaṅtakārīyeva. Kasmā? “Sannipatitānaṃ vo, bhikkhave, dvayaṃ karaṇīyaṃ dhammī vā kathā ariyo vā tuṅhībhāvo”ti (ma. ni. 1.273) vuttattā.

Yo ṭhitopi gacchantopi nisinnopi thinamiddhābhībhūto niddāyatiyeva, ayaṃ **niddārāmo** nāma. Yassa pana karajakāyagelaññena cittaṃ bhavaṅgaṃ otarati, nāyaṃ niddārāmo. Tenevāha – “abhijānāmaṃ, aggivessana, gimhānaṃ pacchime māse pacchābhattaṃ piṇḍapātappaṭikkanto catugguṇaṃ saṅghāṭiṃ paññapetvā dakkhiṇena passena sato sampajāno niddaṃ okkamitā”ti (ma. ni. 1.387).

Yo “ekassa dutiyo, dvinnaṃ tatiyo, tiṇṇaṃ catuttho”ti evaṃ saṃsaṭṭhova viharati, ekako assādaṃ na labhati, ayaṃ **saṅgaṇikārāmo**. Yo pana catūsu iriyāpathesu ekakova assādaṃ labhati, nāyaṃ saṅgaṇikārāmo.

Asantasambhāvanicchāya samannāgatā dussīlā **pāpicchā** nāma. Yesam pāpakā mittā catūsu iriyāpathesu saha ayanato pāpasahāyā, ye ca tanninnatappaṇatappaṇabbhāratāya pāpesu sampavaṅkā, te

pāpamittā pāpasahāyā pāpasampavaṅkā nāma.

Oramattakenāti avaramattakena appamattakena. **Antarā**ti arahattaṃ appatvāva etthantare. **Vosānanti** pariniṭṭhitabhāvaṃ “alamettāvata”ti osakkanaṃ. **Idaṃ vuttaṃ** hoti – yāva sīlapārisuddhijjhānavipassanā sotāpannabhāvādīnaṃ aññataramattakena vosānaṃ nāpajjissanti, tāva vuddhiyeva bhikkhūnaṃ pāṭikaṅkhā, no parihānti.

7. Saññāsuttavaṇṇanā

27. Sattame **aniccasaññā**dayo aniccānupassanādīhi sahagatasaññā.

8. Paṭhamaparihānisuttavaṇṇanā

28. Aṭṭhame uppannānaṃ saṅghakiccānaṃ nittharaṇena bhāraṃ vahantīti **bhāravāhino. Te tena paññāyissanti**ti te therā tena attano therabhāvānurūpena kiccena paññāyissanti. **Tesu yogaṃ āpajjati**ti payogaṃ āpajjati, sayamaṃ tāni kiccāni kātuṃ ārabhatīti.

9. Dutiyaparihānisuttavaṇṇanā

29. Navame **bhikkhudassanaṃ hāpetī**ti bhikkhusaṅghassa dassanattāyā gamanaṃ hāpeti. **Adhisīleti** pañcasīladasasīlasaṅkhāte uttamasīle. **Ito bahiddhā**ti imamhā sāsanaṃ bahiddhā. **Dakkhīṇeyyaṃ gavesati**ti deyyadhammapaṭiggāhake pariyesati. **Tattha ca pubbakāraṃ karotī**ti tesamaṃ bāhirānaṃ tīthiyānaṃ datvā pacchā bhikkhūnaṃ deti. Sesamaṃ sabbattha uttānamevāti.

Vajjisattakavaggo tatiyo.

4. Devatāvaggo

5. Paṭhamamittasuttavaṇṇanā

36. Catutthassa pañcame **duddadanti** duppariccajaṃ mahārahaṃ bhaṇḍakaṃ. **Dukkaraṃ karotī**ti kātuṃ asukaraṃ kammaṃ karoti. **Dukkhamāṃ khamati**ti sahāyassa atthāyā duradhivāsaṃ adhvāseti. **Guyhamassa āvikarotī**ti attano guyhaṃ tassa āvikaroti. **Guyhamassa pariguhati**ti tassa guyhaṃ aññesaṃ nācikkhati. **Khīṇena nātimaññati**ti tassa bhoge khīṇe tena khayena taṃ nātimaññati, tasmīṃ omānaṃ attani ca atimānaṃ na karoti.

6. Dutiyamittasuttavaṇṇanā

37. Chaṭṭhe **vattā**ti vacanakusalo. **Vacanakkhamoti** vacanaṃ khamati, dinnaṃ ovādaṃ karoti. **Gambhīranti** guyhaṃ rahassaṃ jhānanissitaṃ vipassanāmaggaphalanibbānanissitaṃ.

7. Paṭhamapaṭisambhidāsuttavaṇṇanā

38. Sattame **idaṃ me cetaso līnanti** uppanne cetaso līnante “idaṃ me cetaso līnatta”nti yathāsabhāvato jānāti. **Ajjhattaṃ samkhittaṃ** nāma thinamidhānugataṃ. **Bahiddhā vikkhittaṃ** nāma pañcasu kāmagaṇesu vikkhittaṃ. **Vedanā**tiādīni papañcamūlavasena gahitāni. Vedanā hi taṇhāya mūlaṃ sukhavasena taṇhuppattito, saññā diṭṭhiyā mūlaṃ avibhūtārammaṇe diṭṭhiuppattito, vitakko mānassa mūlaṃ vitakkavasena asmīti mānuppattito. **Sappāyāsappāyesūti** upakārānupakāresu. **Nimittanti** kāraṇaṃ. Sesamaṃ sabbattha uttānatthamevāti.

Devatāvaggo catuttho.

5. Mahāyaññavaggo

1-2. Sattaviññāṇaṭṭhitisuttādivaṇṇanā

44-45. Pañcamassa paṭhame **viññāṇaṭṭhiyoti** paṭisandhiviññāṇassa ṭhānāni. **Seyyathāpīti** nidassanatthe nipāto, yathā manussāti attho. Aparimāṇesu hi cakkavāḷesu aparimāṇānaṃ manussānaṃ vaṇṇasaṅṭhānādivasena dvepi ekasadisā natthi. Yepi hi katthaci yamakabhātarō vaṇṇena vā saṅṭhānena vā sadisā honti, tesampi ālokitavilokitakathitahasitagamaṇaṭṭhānādīhi viseso hotiyeva. Tasmā **nānattakāyā**ti vuttā. Paṭisandhisaññā pana nesam tihetukāpi dvihetukāpi ahētukāpi hoti. Tasmā **nānattasaññinoti** vuttā. **Ekacce ca devāti** cha kāmāvacaradevā. Tesu hi kesañci kāyo nīlo hoti, kesañci pītakādivaṇṇo. Saññā pana tesam dvihetukāpi tihetukāpi hoti, ahētukā natthi. **Ekacce ca vinipātikāti** catuapāyavinimuttā uttaramātā yakkhinī, piyaṅkaramātā, phussamittā, dhammaguttāti evamādikā aññe ca vemānikā petā. Etesaṅhi pītaodātakāḷamaṅguracchavisāmavaṇṇādivasena ceva kisa thūlarassadīghavasena ca kāyo nānā hoti, manussānaṃ viya dvihetukatihetukaahētukavasena saññāpi. Te pana devā viya na mahesakkhā, kapaṇamanussā viya appesakkhā dullabhaḅhāsacchādanā dukkhaṇṇitā viharanti. Ekacce kāḷapakkhe dukkhitā juṅhapakkhe sukhitā honti. Tasmā sukhasamussayato vinipatitattā **vinipātikāti** vuttā. Ye panettha tihetukā, tesam dhammābhisamayopi hoti piyaṅkaramātādīnaṃ viya.

Brahmakāyikāti brahmapārisajjabrahmapurohitamahābrahmāno. **Paṭhamābhinibbattāti** te sabbepi paṭhamajjhānena abhinibbattā. Brahmapārisajjā pana parittena abhinibbattā, tesam kappassa tatiyo bhāgo āyupamāṇaṃ. Brahmapurohitā majjhimena, tesam upaḅḅhakappo āyupamāṇaṃ, kāyo ca tesam vipphārikataro hoti. Mahābrahmāno paṇītena, tesam kappo āyupamāṇaṃ, kāyo ca pana tesam ativipphārikova hoti. Iti te kāyassa nānattā paṭhamajjhānavasena saññāya ekattā **nānattakāyā ekattasaññinoti** veditabbā.

Yathā ca te, evaṃ catūsu apāyesu sattā. Nirayesu hi kesañci gāvutaṃ, kesañci aḅḅhayojanaṃ, kesañci yojanaṃ atabhāvo hoti, devadattassa pana yojanasatiko jāto. Tiracchānesupi keci khuddakā, keci mahantā. Pettivisayesupi keci saṭṭhihatthā, keci asītihatthā honti, keci suvaṇṇā, keci dubbaṇṇā. Tathā kālakañcika asurā. Apicettha dīghapiṭṭhikapetā nāma saṭṭhiyojanikāpi honti. Saññā pana sabbesampi akusalavipākāhetukāva hoti. Iti āpāyikāpi **nānattakāyā ekattasaññinot**veva saṅkhyāṃ gacchanti.

Ābhassarāti daṅḅaukkāya acci viya etesaṃ sarīrato ābhā chijjivā chijjivā patantī viya sarati vissaratīti ābhassarā. Tesu pañcakanaye dutiyatatiyajjhānavayaṃ parittam bhāvetvā upapannā parittābhā nāma honti, tesam dve kappā āyupamāṇaṃ. Majjhimam bhāvetvā upapannā appamāṇābhā nāma honti, tesam cattāro kappā āyupamāṇaṃ. Paṇītam bhāvetvā upapannā ābhassarā nāma honti, tesam aṭṭha kappā āyupamāṇaṃ. Idha pana ukkaṭṭhaparicchedavasena sabbeva te gahitā. Sabbesaṅhi tesam kāyo ekavipphārova hoti, saññā pana avitakkavicāramattā vā avitakkaavicārā vāti nānā.

Subhakiṇhāti subhena vokiṇṇā vikiṇṇā, subhena sarīrappabhāvaṇṇena ekagghanāti attho. Etesaṅhi na ābhassarānaṃ viya chijjivā chijjivā pabhā gacchati. Pañcakanaye pana parittamajjhimapaṇītassa catutthajjhānassa vasena soḷasabāttimsacatussaṭṭhikappāyukā parittaappamāṇasubhakiṇhā nāma hutvā nibbantanti. Iti sabbepi te **ekattakāyā** ceva catutthajjhānasaññāya **ekattasaññino** cāti veditabbā. **Vehapphalāpi** catutthaviññāṇaṭṭhitimeva bhajanti. **Asaññasattā** viññāṇābhāvā ettha saṅghaṃ na gacchanti, sattāvāsesu gacchanti.

Suddhāvāsā vivaṭṭapakkhe ṭhitā na sabbakālikā, kappasatasahassampi asaṅkheyyampi

buddhasuññe loka na uppajjanti. Soḷasakappasahassaabbhantare buddhesu uppannesuyeva uppajjanti. Dhammacakkappavattissa bhagavato khandhāvāraṭṭhānasadisā honti. Tasmā neva viññāṇaṭṭhitim na sattāvāsaṃ bhajanti. Mahāsīvatthero pana “na kho pana so, sārīputta, āvāso sulabharūpo, yo mayā anāvutthapubbo iminā dīghena addhunā aññatra suddhāvāsehi devehī” ti (ma. ni. 1.160) iminā suttana suddhāvāsāpi catutthaviññāṇaṭṭhitim catutthasattāvāsañca bhajantīti vadati, taṃ appatibāhiyattā suttassa anuññātaṃ.

Nevasaññānāsaññāyatanam yatheva saññāya, evaṃ viññāṇassāpi sukhumattā neva viññāṇam nāvīññāṇam. Tasmā viññāṇaṭṭhitisu na vuttaṃ. Dutīye **samādhiparikkhārāti** maggasamādhissa sambhārā.

3. Paṭhamaaggisuttavaṇṇanā

46. Tatiye sabbepi rāgādayo anuḍahanaṭṭhena **aggi. Āhuneyyaggīti**ādīsū panettha āhunam vuccati sakkāro, āhunam arahantīti āhuneyyā. Mātāpitaro hi puttānam bahupakārattā āhunam arahanti, tesu vippaṭipajjamānā puttā nirayādīsū nibbattanti. Tasmā kiñcāpi mātāpitaro na anuḍahanti, anuḍahassa pana paccayā honti. Iti anuḍahanaṭṭheneva āhuneyyaggīti vuccanti. **Gahapatīti** pana gehasāmiko vuccati, so mātugāmassa sayanavattālañkāradīyanuppadānena bahupakāro. Taṃ aticaranto mātugāmo nirayādīsū nibbattati. Tasmā sopi purimanayeneva anuḍahanaṭṭhena **gahapataggīti** vutto. **Dakkhiṇeyyaggīti** ettha pana dakkhiṇāti cattāro paccayā, bhikkhusaṅgho dakkhiṇeyyo. So hi gihīnam tisu saraṇesu pañcasu sīlesu dasasu sīlesu mātāpītipaṭṭhāne dhammikasamaṇabrāhmaṇupaṭṭhāneti evamādīsū kalyāṇadhammesu niyojanena bahupakāro. Tasmim micchāpaṭipannā gihī bhikkhusaṅgham akkositvā paribhāsivā nirayādīsū nibbattanti. Tasmā sopi purimanayeneva anuḍahanaṭṭhena dakkhiṇeyyaggīti vutto. Kaṭṭhato nibbato pākatikova aggi **kaṭṭhaggi** nāma.

4. Dutīyaaggisuttavaṇṇanā

47. Catutthe **uggatasarīrassāti** so kira brāhmaṇamahāsālo attabhāvenapi bhogehipi uggato sārappatto ahoṣi, tasmā uggatasarīrotveva paññāyittha. **Upakkaḥoti** paccupaṭṭhito. **Thūṇūpanītānīti** yūpasañkhātāṃ thūṇaṃ upanītāni. **Yaññatthāyāti** vadhitvā yajanatthāya. **Upasañkamīti** so kira sabbam taṃ yaññasambhāraṃ sajjitvā cintesi – “samaṇo kira gotamo mahāpañño, kiṃ nu kho me yaññassa vaṇṇam kathessati udāhu avaṇṇam, pucchitvā jānissāmī” ti iminā kāraṇena yena bhagavā tenupasañkami. **Aggiṣṣa ādānanti** yaññāyajanatthāya navassa maṅgalaggino ādiyanam. **Sabbena sabbanti** sabbena sutena sabbam sutam sameti saṃsandati, ekasadisam hotīti dasseti. **Satthānīti** vihiṃsanaṭṭhena satthāni viyāti satthāni. **Sayam paṭhamam samārambhatīti** attanāva paṭhamataram ārabhati. **Hantuntī** hanitum.

Pahātabbāti pariharitabbā. **Atohayanti** ato hi mātāpītito ayam. **Āhutoti** āgato. **Sambhūtoti** uppanno. **Ayam vuccati, brāhmaṇa, gahapataggīti** ayam puttadārādigaṇo yasmā, gahapatī, viya gehasāmiko viya hutvā aggati vicarati, tasmā gahapataggīti vuccati. **Attānanti** cittaṃ. **Damentīti** indriyadamanena damenti. **Samentīti** rāgādisamanena samenti. Tesaññeva parinibbāpanena **parinibbāpenti**. **Nikkhipitabboti** yathā na vinassati, evaṃ ṭhapetabbo. **Upavāyatanti** upavāyatu. Evañca pana vatvā brāhmaṇo sabbesampi tesam pāṇanam jīvitaṃ datvā yaññasālam viddhamsetvā satthu sāsane opānabhūto ahoṣīti.

5-6. Saññāsuttadvaṇṇanā

48-49. Pañcame **amatogadhāti** nibbānapaṭṭhā. **Amatapariyosānāti** nibbānāvasānā. Chaṭṭhe **methunadhammasamāpattiyāti** methunadhammena samaṅgibhāvato. **Nhārudaddulanti** nhārukhaṇḍam nhāruvilekhanam vā. **Anusandatīti** pavattati. **Natthi me pubbenāparam visesoti** natthi mayham pubbena abhāvitakālena saddhim aparam bhāvitakāle viseso. **Lokacitresūti**

tidhātukalokasannivāsasañkhātesu lokacitresu. **Ālasyeti** ālasiyabhāve. **Vissatthiyeti** vissatthabhāve. **Ananuyogeti** yogassa ananuyuñjane. **Ahañkāramamañkāramānāpagatanti** ahañkāraditthito ca mamañkāraṇhāto ca navavidhamānato ca apagataṃ. **Vidhāsamatikkantanti** tisso vidhā atikkantaṃ. **Santanti** tappaccanīkakilesehi santaṃ. **Suvimuttanti** pañcahi vimuttīhi suṭṭhu vimuttaṃ.

7. Methunasuttavaṇṇanā

50. Sattame **upasañkamīti** bhuttapātarāso dāsakammakaraparivuto upasañkami. **Bhavampinoti** bhavampi nu. **Brahmacārī paṭijānātīti** “ahaṃ brahmacārī”ti evaṃ brahmacariyavāsaṃ paṭijānātīti pucchati. Evaṃ kirassa ahosi – “brāhmaṇasamaye vedaṃ uggaṇhantā aṭṭhacattālīsa vassāni brahmacariyaṃ caranti. Samaṇo pana gotamo agāraṃ ajjhāvasanto tīsu pāsādesu tividhanāṭakaratiyā abhirami, idāni kiṃ nu kho vakkhatī”ti imamatthaṃ sandhāyevaṃ pucchati. Tato bhagavā mantena kaṇhasappaṃ gaṇhanto viya amittaṃ gīvāya pādena akkamanto viya attano saṃkilesakāle chabbassāni padhānacariyāya rajjasukhaṃ vā pāsādesu nāṭakasampattiṃ vā ārabba vitakkamattassāpi anuppannabhāvaṃ sandhāya sīhanādaṃ nadanto **yañhi taṃ brāhmaṇāti**ādīmāha. Tattha **dvayaṃdvayasamāpattinti** dvīhi dvīhi samāpajjitabbabhāvaṃ. **Dukkhasmāti** sakalavaṭṭadukkhato. **Sañjagghatīti** hasitakathaṃ katheti. **Samkīlatīti** keḷiṃ karoti. **Samkelāyatīti** mahāhasitaṃ hasati. **Cakkhunā cakkhunti** attano cakkhunā tassā cakkhuṃ paṭivijjhivā upanijjhāyati. **Tirokuṭṭaṃ vā tiropākāraṃ vāti** parakuṭṭe vā parapākāre vā. **Devoti** eko devarājā. **Devaññataroti** aññataro devaputto. **Anuttaraṃ sammāsambodhinti** arahattañceva sabbaññutaññānaṃca.

8. Saṃyogasuttavaṇṇanā

51. Aṭṭhame **saṃyogavisam̐yoganti** saṃyogavisam̐yogasādhakaṃ. **Dhammapariyāyanti** dhammakāraṇaṃ. **Ajjhattaṃ itthindriyanti** niyakajjhatte itthibhāvaṃ. **Itthikuttanti** itthikiriyaṃ. **Itthākappanti** nivāsanapārūpanādiitthiākappaṃ. **Itthividhanti** itthiyā mānavidhaṃ. **Itthichandanti** itthiyā ajjhāsayaacchandaṃ. **Itthissaranti** itthisaddaṃ. **Itthālañkāraṇanti** itthiyā pasādhanabhaṇḍaṃ. **Purisindriyādīsupi** eseva nayo. **Bahiddhā saṃyoganti** purisena saddhiṃ samāgamaṃ. **Ativattatīti** anabhiratāti evaṃ vuttāya balavavipassanāya ariyamaggaṃ patvā ativattati. Imasmiṃ sutte vaṭṭavivaṭṭaṃ kathitaṃ.

9. Dānamahapphalasuttavaṇṇanā

52. Navame **sāpekhōti** sataṇho. **Paṭibaddhacittoti** vipāke baddhacitto. **Sannidhipekhoti** nidhānapekho hutvā. **Peccāti** paralokaṃ gantvā. **Taṃ kammaṃ khepetvāti** taṃ kammavipākaṃ khepetvā. **Iddhinti** vipākiddhiṃ. **Yasanti** parivārasampadaṃ. **Ādhipaccanti** jeṭṭhabhāvākāraṇaṃ. **Āgantā itthattanti** itthabhāvaṃ ime pañcakkhandhe puna āgantā, na tatrūpapattiko na uparūpapattiko, heṭṭhāgāmīyeva hotīti attho. **Sāhu dānanti** dānaṃ nāmetaṃ sādhu bhaddakaṃ sundaraṃ. **Tāni mahāyaññānīti** tāni sappinavanītadadhimadhuphāṇitādīhi niṭṭhānaṃ gatāni mahādānāni. **Cittālañkāracittaparikkhāraṇanti** samathavipassanācittassa alañkārabhūtañceva parivārabhūtañca. **Brahmakāyikānaṃ devānaṃ saḥabyatanti** na sakkā tattha dānena upapajjituṃ. Yasmā pana taṃ samathavipassanācittassa alañkārabhūtaṃ, tasmā tena dānālañkatena cittena jhānañceva ariyamaggañca nibbattetvā jhānena tattha upapajjati. **Anāgāmī hotīti** jhānānāgāmī nāma hoti. **Anāgantā itthattanti** puna itthabhāvaṃ na āgantā, uparūpapattiko vā tatrūpapattiko vā hutvā tattheva parinibbāyati. Iti imesu dānesu paṭhamaṃ taṇhuttariyadānaṃ, dutiyaṃ cittikāradānaṃ, tatiyaṃ hirottappadānaṃ, catutthaṃ niravasesadānaṃ, pañcamaṃ dakkhiṇeyyadānaṃ, chaṭṭhaṃ somanassupavicāradānaṃ, sattamaṃ alañkāraparivāradānaṃ nāmāti.

10. Nandamātāsuttavaṇṇanā

53. Dasamaṃ atthuppattivasena desitaṃ. Sathā kira vutthavasso pavāretvā dve aggasāvake ohāya

“dakkhiṇāgiriṃ cārikaṃ gamissāmī”ti nikkhami, rājā pasenadi kosalo, anāthapiṇḍiko gahapati, visākhā mahāupāsikā, aññe ca bahujanā dasabalaṃ nivattetuṃ nāsakkhiṃsu. Anāthapiṇḍiko gahapati “satthāraṃ nivattetuṃ nāsakkhi”nti raho cintayamāno nisīdi. Atha naṃ puṇṇā nāma dāsī disvā “kiṃ nu kho te, sāmī, na pubbe viya indriyāni vip̐pasannāni”ti pucchi. Āma, puṇṇe, satthā cārikaṃ pakkanto, tamahaṃ nivattetuṃ nāsakkhiṃ. Na kho pana sakkā jānituṃ puna sīghaṃ āgaccheyya vā na vā, tenāhaṃ cintayamāno nisinnoti. Sacāhaṃ dasabalaṃ nivatteyyaṃ, kiṃ me kareyyāsīti? Bhujissaṃ taṃ karissāmīti. Sā gantvā satthāraṃ vanditvā “nivattatha, bhante”ti āha. Mama nivattanapaccayā tvaṃ kiṃ karissāsīti? Tumhe, bhante, mama parādhīnabhāvaṃ jānātha, aññaṃ kiñci kātuṃ na sakkomi, saraṇesu pana patiṭṭhāya pañca sīlāni rakkhissāmīti. Sādhu sādhu puṇṇeti, satthā dhammagāravena ekapadasmiññeva nivatti. Vuttañhettaṃ – “dhammagaru, bhikkhave, tathāgato dhammagāravo”ti (a. ni. 5.99).

Satthā nivattitvā jetavanamahāvihāraṃ pāvīsi. Mahājano puṇṇāya sādhu kārāsahassāni adāsi. Satthā tasmīṃ samāgame dhammaṃ desesi, caturāsītipāṇasahassāni amatapānaṃ pivīṃsu. Puṇṇāpi seṭṭhinā anuññatā bhikkhuniupassayaṃ gantvā pabbaji. Sammāsambuddho sārīputtamoggallāne āmantetvā “ahaṃ yaṃ disaṃ cārikāya nikkhanto, tattha na gacchāmi. Tumhe tumhākaṃ parisāya saddhiṃ taṃ disaṃ cārikaṃ gacchathā”ti vatvā uyyojesi. Imissaṃ atthupattiyaṃ **ekaṃ samayaṃ āyasmā sārīputtotiādi** vuttaṃ.

Tattha **veḷukaṇḍakīti** veḷukaṇṭakanagaravāsīni. Tassa kira nagarassa pākāraguttatthāya pākārapariyantena veḷū ropitā, tenassa veḷukaṇṭakanteva nāmaṃ jātaṃ. **Pārāyananti** nibbānasāṅkhātapāraṃ ayanato pārāyananti laddhavohāraṃ dhammaṃ. **Sarena bhāsati** sattabhūmikassa pāsādassa uparimatale susaṃvihitārakkhatthāne nisinnā samāpattibalena rattibhāgaṃ vītināmetvā samāpattito vuṭṭhāya “imaṃ rattāvasesaṃ katarāya ratiyā vītināmessāmī”ti cintetvā “dhammaratiyā”ti katasanniṭṭhānā tīṇi phalāni pattā ariyasāvika aḍḍhateyyagāthāsatarimānaṃ pārāyanasuttaṃ madhurena sarabhañña bhāsati. **Assosi khoti** ākāsaṭṭhakavimānāni pariharitvā tassa pāsādassa uparibhāgaṃ gatena maggena naravāhanayānaṃ āruya gacchamāno assosi. **Kathāpariyosānaṃ āgamayamāno atthāsīti** “kiṃ saddo esa bhāṇe”ti pucchitvā “nandamātāya upāsikāya sarabhaññasaddo”ti vutte otaritvā “idamavocā”ti idaṃ desanāpariyosānaṃ olokeno avidūratthāne ākāse atthāsī.

Sādhu bhagini, sādhu bhaginīti “suggahitā te bhagini dhammadesanā sukathitā, pāsānakacetiye nisīditvā soḷasannaṃ pārāyanikabrāhmaṇānaṃ sammāsambuddhena kathitadivase ca ajja ca na kiñci antaraṃ passāmi, majje bhinnasuvaṇṇaṃ viya te satthu kathitena saddhiṃ sadisameva kathita”nti vatvā sādhu kārāṃ dadanto evamāha. **Ko paneso bhadrāmukhāti** imasmīṃ susaṃvihitārakkhatthāne evaṃ mahantena saddena ko nāmesa, bhadrāmukha, laddhamukha, kiṃ nāgo supaṇṇo devo māro brahmāti suvaṇṇapaṭṭavaṇṇaṃ vātapānaṃ vivaritvā vigatasārajjā tīṇi phalāni pattā ariyasāvika vessavaṇena saddhiṃ kathayamānā evamāha. **Ahaṃ te bhagini bhātāti** sayaṃ sotāpannattā anāgāmiariyasāvikaṃ jeṭṭhikaṃ maññaṃ māno “bhaginī”ti vatvā puna taṃ paṭhamavaye ṭhitattā attano kaniṭṭhaṃ, attānaṃ pana navutivassasatasahassāyukattā mahallakatarāṃ maññaṃ māno “bhātā”ti āha. **Sādhu bhadrāmukhāti**, bhadrāmukha, sādhu sundaraṃ, svāgamaṃ te āgamaṃ, āgantūṃ yuttaṭṭhānamevasi āgatoti attho. **Idaṃ te hotu ātitheyyanti** idameva dhammabhaṇanaṃ tava atithipaṇṇākāro hotu, na hi te aññaṃ ito uttaritaraṃ dātabbaṃ passāmīti adhippāyo. **Evañceva me bhavissati ātitheyyanti** evaṃ attano pattidānaṃ yācitvā “ayaṃ te dhammakathikasakkāro”ti aḍḍhateḷasāni koṭṭhasatāni rattasālīnaṃ pūretvā “yāvāyaṃ upāsikā carati, tāva mā khayāṃ gamiṃsū”ti adhiṭṭhahitvā pakkāmi. Yāva upāsikā atthāsī, tāva koṭṭhānaṃ heṭṭhimatalaṃ nāma daṭṭhuṃ nāsakkhiṃsu. Tato paṭṭhāya “nandamātāya koṭṭhāgāraṃ viyā”ti vohāro udapādi.

Akatapātarāsoti abhuttapātarāso. **Puññaṃ**ti pubbacetanā ca muñcanacetanā ca. **Puñña mahīti** aparacetanā. **Sukhāya hotūti** sukhatthāya hitatthāya hotu. Evaṃ attano dāne vessavaṇassa pattim adāsi.

Pakaraṇeti kāraṇe. **Okkassa pasayhāti** ākaḍḍhitvā abhibhavitvā. **Yakkhayoninti** bhummadevatābhāvaṃ. **Teneva purimena attabhāvena uddasseti** purimasarīrasadisameva sarīraṃ māpetvā alaṅkatapaṭiyatto sirigabbhasayanatale attānaṃ dasseti. **Upāsikā paṭidesitāti** upāsikā ahanti evaṃ upāsikābhāvaṃ desesiṃ. **Yāvadeti** yāvadeva. Sesam sabbattha uttānamevāti.

Mahāyaññavaggo pañcama.

Paṇṇāsakaṃ niṭṭhitam.

6. Abyākatavaggo

1. Abyākatasuttavaṇṇanā

54. Chaṭṭhavaggassa paṭhame **abyākatavatthūsūti** ekaṃsādivasena akathitavatthūsu. **Tathāgatoti** satto. **Diṭṭhigatametanti** micchādiṭṭhimattakametaṃ, na tāya diṭṭhiyā gahitasatto nāma atthi. **Paṭipadanti** ariyamaggaṃ. **Na chambhatīti** diṭṭhivasena na kampati. Sesapadesupi eseva nayo. **Taṇhāgatanti** diṭṭhitaṇhā. **Saññāgatādīsipi** eseva nayo. Diṭṭhisaññā eva hettha saññāgataṃ, diṭṭhinissitamānoyeva diṭṭhimaññītameva vā maññītaṃ, diṭṭhipapañcova papañcitaṃ, diṭṭhupādānameva upādānaṃ, diṭṭhiyā virūpaṃ paṭisaraṇabhāvoyeva vippaṭisāro nāmāti veditabbo. Ettha ca diṭṭhiggahaṇena dvāsatti diṭṭhiyo, diṭṭhinirodhagāminipaṭipadāgahaṇena sotāpattimaggo gahitoti.

2. Purisagatisuttavaṇṇanā

55. Dutiye **purisagatiyoti** purisassa ñāṇagatiyo. **Anupādāparinibbānanti** apaccayanibbānaṃ. **No cassāti** atīte attabhāvanibbattakaṃ kammaṃ no ce abhaviṣṣa. **No ca me siyāti** etarahi me ayaṃ attabhāvo na siyā. **Na bhavissatīti** etarahi me anāgatattabhāvanibbattakaṃ kammaṃ na bhavissati. **Na ca me bhavissatīti** anāgate me attabhāvo na bhavissati. **Yadatthi yaṃ bhūtanti** yaṃ atthi yaṃ bhūtaṃ paccuppanakkhandhapañcakaṃ. **Taṃ pajahāmīti upekkhaṃ paṭilabhatīti** taṃ tattha chandarāgappahānena pajahāmīti vipassanupekkhaṃ paṭilabhati. **Bhave na rajjatīti** atīte khandhapañcake taṇhādiṭṭhīhi na rajjati. **Sambhave na rajjatīti** anāgatepi tatheva na rajjati. **Atthuttari padaṃ santanti** uttari santaṃ nibbānapadaṃ nāma atthi. **Sammappaññāya passatīti** taṃ sahavipassanāya maggapaññāya sammā passati. **Na sabbena sabbanti** ekaccānaṃ kilesānaṃ appahīnattā saccapaṭicchādakassa tamassa sabbaso aviddhamṣitattā na sabbākārena sabbam. **Haññamāneti** saṅḍāsena gahetvā muṭṭhikāya koṭṭiyamāne. **Antarāparinibbāyīti** upapattisamanantarato paṭṭhāya āyuno vemajjhaṃ anatikkamitvā etthantare kilesaparinibbānena parinibbuto hoti. **Anupahacca talanti** ākāsatamaṃ anupahacca anatikkamitvā, bhūmiṃ appatvā ākāseyeva nibbāyeyyāti imāhi tīhi upamāhi tayo antarāparinibbāyī dassitā.

Upahaccaparinibbāyīti āyuvemajjhaṃ atikkamitvā pacchimakoṭṭiṃ appatvā parinibbuto hoti. **Upahacca talanti** jalamānā gantvā ākāsatamaṃ atikkamitvā pathavītamaṃ vā upahanitvā pathaviyaṃ patitamattāva nibbāyeyya. Asaṅkhārena appayogena kilese khepetvā parinibbāyīti **asaṅkhāraparinibbāyīti**. Sasāṅkhārena sappayogena kilese khepetvā parinibbāyīti **sasaṅkhāraparinibbāyīti**. **Gacchanti** nirāraḍḍhaṃ araññaṃ. **Dāyanti** sārakkhaṃ abhayatthāya dinnam araññaṃ. Sesamettha uttānatthameva. Imasmim sutte ariyapuggalāva kathitāti.

3. Tissabrahmāsuttavaṇṇanā

56. Tatiye **bhikkhuniyoti** mahāpajāpatiyā parivārā pañcasatā bhikkhuniyo. **Vimuttāti** pañcahi vimuttīhi vimuttā. **Anupādisesāti** upādānasesam aṭṭhapetvā pañcahi vimuttīhi anavasesāhipi vimuttā. **Saupādisese vā saupādisesoti** saupādānasese puggale “saupādānaseso aya”nti. Itarasmimpi eseva

nayo. **Tissoti** therassa saddhivihārikabrahmā. **Anulomikānīti** paṭipattiyā anulomāni vivittāni antimapariyantimāni. **Indriyānīti** saddhādīni vipassanindriyāni. **Samannānāyamaṇoti** samannāhāre ṭhapayamāno. **Na hi pana teti** idaṃ kasmā ārabhi? Sattamassa puggalassa dassanattamaṃ. Sattamo hi saddhānusāripuggalo na dassito. Atha bhagavā balavavipassakavasena taṃ dassento evamāha. Tattha **sabbanimittānanti** sabbesaṃ niccanimittādīnaṃ. **Animittanti** balavavipassanāsamādhim.

4. Sīhasenāpatisuttavaṇṇanā

57. Catutthe **maccharīti** pañcamaccherayutto. **Kadariyoti** thaddhamacchariyo, paresaṃ diyyamānampi vāreti. **Anuppadānaratoti** punappunaṃ dānaṃ dadamānova ramati. **Anukampantāti** “ko ajja amhehi anuggahetabbo, kassa deyyadhammaṃ vā paṭiggaṇṇheyāma, dhammaṃ vā deseyyāma”ti evaṃ cittaṇa anukampamānā.

5. Arakkheyyasuttavaṇṇanā

58. Pañcame **nimittanti** dhammanimittampi puggalanimittampi. Ayañhi attanā desitadhamme ekapadampi durakkhātaṃ aniyyānikaṃ apassanto dhammanimittaṃ na samanupassati, “durakkhāto tayā dhammo na svākkhāto”ti uttāhavitvā paṭippharantaṃ ekaṃ puggalampi apassanto puggalanimittaṃ na samanupassati nāma. Sesadvayepi eseva nayo. Chaṭṭhasattamāni uttānāneva.

8. Pacalāyamānasuttavaṇṇanā

61. Aṭṭhame **pacalāyamānoti** taṃ gāmaṃ upanissāya ekasmiṃ vanasaṇḍe samaṇadhammaṃ karonto sattāhaṃ caṅkamanavīriyena nimmathitattā kilantagatto caṅkamanakoṭṭiyaṃ pacalāyamāno nisinna hoti. **Pacalāyasi notī** niddāyasi nu. **Anumajjivāti** parimajjivā. **Ālokasaññanti** middhavinodanaālokasaññaṃ. **Divāsaññanti** divātisaññaṃ. **Yathā divā tathā rattinti** yathā divā ālokasañña adhiṭṭhitā, tathā naṃ rattimpi adhiṭṭhaheyyāsi. **Yathā rattim tathā divāti** yathā ca te rattim ālokasañña adhiṭṭhitā, tathā naṃ divāpi adhiṭṭhaheyyāsi. **Sappabhāsanti** dibbacakkuhūñāṇatthāya sahoḥhāsaṃ. **Pacchāpuresaññanti** purato ca pacchato ca abhiharaṇasaññāya saññāvā. **Antogatehi indriyehīti** bahi avikkhittehi anto anupaviṭṭheheva pañcahi indriyehi. **Middhasukhanti** niddāsukhaṃ. Ettakena ṭhānena bhagavā therassa middhavinodanakammaṭṭhānaṃ kathesi. **Soṇḍanti** mānasoṇḍaṃ. **Kiccakaraṇīyānīti** ettha avassaṃ kattabbāni kiccāni, itarāni karaṇīyāni. **Maṅkubhāvoti** nittejatā domanassatā. Ettakena ṭhānena sathārā therassa bhikkhācāravattaṃ kathitaṃ.

Idāni bhasse pariyantakāritāya samādapetuṃ **tasmātihāti**tiādīmāha. Tattha **viggāhikakathanti** “na tvaṃ imaṃ dhammavinayaṃ ājānāsi”tiādinayappavattā viggāhikakathā. **Nāhaṃ moggallānāti**tiādi pāpamittasamsaggavivajjanattamaṃ vuttaṃ. **Kittāvatā nu khoti** kittakena nu kho. **Taṇhāsāṅkhayavimutto hotīti** taṇhāsāṅkhaye nibbāne taṃ ārammaṇaṃ katvā vimuttacittatāya taṇhāsāṅkhayavimutto nāma saṃkhittena kittāvatā hoti. Yāya paṭipattiyā taṇhāsāṅkhayavimutto hoti, tameva khīṇāsavassa bhikkhuno pubbabhāgapaṭipadaṃ saṃkhittena desethāti pucchati. **Accantaniṭṭhoti** khayavayasāṅkhātaṃ antaṃ atītāti accantā, accantā niṭṭhā assāti accantaniṭṭho, ekantaniṭṭho satataniṭṭhoti attho. **Accantayogakkhemīti** accantaṃ yogakkhemī, niccayogakkhemīti attho. **Accantabrahmacārīti** accantaṃ brahmacārī, niccabrahmacārīti attho. Accantaṃ pariyoṣānamassāti purimanayeneva **accantapariyoṣāno**. **Seṭṭho devamanussānanti** devānañca manussānañca seṭṭho uttamo. Evarūpo bhikkhu kittāvatā hoti, saṅkhepeveva tassa paṭipattiṃ kathethāti yācati.

Sabbe dhammā nālaṃ abhinivesāyāti ettha sabbe dhammā nāma pañcakkhandhā dvādasāyatanāni aṭṭhārasa dhātuyo, te sabbe pi taṇhādhiṭṭhivasena abhinivesāya nālaṃ na pariyattā na samattā na yuttā. Kasmā? Gahitākārena atitṭhanaṃ. Te hi niccā sukhā attāti gahitāpi aniccā dukkhā anattāva sampajjanti. Tasmā nālaṃ abhinivesāya. **Abhijānāti**ti aniccaṃ dukkhaṃ anattāti nātapariññāya abhijānāti. **Parijānāti**ti tatheva tīraṇapariññāya parijānāti. **Yaṃkiñci vedananti** antamaso

pañcaviññāṇasampayuttaṃ yaṃkiñci appamattakampi vedanaṃ anubhavati. Iminā bhagavā therassa vedanāvasena ca vinivaṭṭetvā arūpariggahaṃ dassesi.

Aniccānupassīti aniccato anupassanto. **Virāgānupassīti** ettha dve virāgā khayavirāgo ca accantavirāgo ca. Tattha saṅkhārānaṃ khayam khayato passanā vipassanāpi, accantavirāgaṃ nibbānaṃ virāgato dassanamaggañāṇampi virāgānupassanā. Tadubhayasamaṅgipuggalo virāgānupassī nāma. Taṃ sandhāya vuttaṃ – “virāgānupassī”ti, virāgato anupassantoti attho. **Nirodhānupassimhipi** eseva nayo. Nirodhopi hi khayanirodho accantanirodhoti duvidhoyeva. **Paṭinissaggānupassīti** ettha paṭinissaggo vuccati vossaggo. So ca pariccāgavossaggo pakkhandanavossaggoti duvidho hoti. Tattha **pariccāgavossaggoti** vipassanā. Sā hi tadaṅgavasena kilese ca khandhe ca vossajati. **Pakkhandanavossaggoti** maggo. So hi nibbānaṃ ārammaṇato pakkhandati. Dvīhipi vā kāraṇehi so vossaggoyeva, samucchavedavasena khandhānaṃ kilesānañca vossajanato nibbāne ca pakkhandanato. Tasmā kilese ca khandhe ca pariccajati paṭinissaggavossaggo. Nirodhāya nibbānadhātuyā cittaṃ pakkhandatīti pakkhandanavossaggoti ubhayampetaṃ magge sameti. Tadubhayasamaṅgī puggalo imāya paṭinissaggānupassanāya samannāgatattā paṭinissaggānupassī nāma hoti. Taṃ sandhāyetaṃ vuttaṃ. **Na kiñci loke upādiyati** kiñci ekampi saṅkhāragataṃ taṇhāvasena na upādiyati na gaṇhāti na parāmasati. **Anupādiyam na paritassati** aggaṇhanto taṇhāparitassanāya na paritassati. **Paccattaṃyeva parinibbāyati** sayameva kilesaparinibbānena parinibbāyati. **Khīṇā jāti**tiadinā panassa paccavekkhaṇā dassitā. Iti bhagavā saṃkhittena khīṇāsavassa pubbhāgappaṭipadaṃ pucchito saṃkhitteneva kathesi. Idam pana suttaṃ therassa ovādopi ahosi vipassanāpi. So imasmimyeva sutte vipassanaṃ vaḍḍhetvā arahattaṃ pattoti.

9. Mettasuttavaṇṇanā

62. Navame mā, bhikkhave, puññānaṃ bhāyitthāti puññāni karontā tesam mā bhāyittha. **Mettacittaṃ bhāvesinti** tikacatukkajjhānikāya mettāya sampayuttaṃ pañītaṃ katvā cittaṃ bhāvesinti dasseti. **Samvaṭṭamāne sudāhanti** samvaṭṭamāne sudaṃ ahaṃ. **Samvaṭṭamāneti** jhāyamāne vipajjamāne. **Dhammikoti** dasakusaladhammasamannāgato. **Dhammarājāti** tasseva vevacanaṃ. Dhammena vā laddharajjattā dhammarājā. **Cāturantoti** puratthimasamuddādīnaṃ catunnaṃ samuddānaṃ vasena cāturantāya pathaviyā issaro. **Vijitāvīti** vijitasāṅgāmo. Janapado tasmim thāvariyaṃ thirabhāvaṃ pattoti **janapadatthāvariyappatto**. **Parosahassanti** atirekasahassaṃ. **Sūrāti** abhīruno. **Vīraṅgarūpāti** vīraṇaṃ aṅgaṃ vīraṅgaṃ, vīriyasetaṃ nāmaṃ. Vīraṅgarūpametesanti vīraṅgarūpā. Vīriyajātikā vīriyasabhāvā vīriyamayā viya akilāsuno divasampi yujjhantā na kilamantīti vuttaṃ hoti. **Sāgarapariyantanti** cakkavālapabbataṃ sīmaṃ katvā thitasamuddapariyantaṃ. **Adaṇḍenāti** dhanadaṇḍenapi chejjabhejjānusāsanaṃ satthadaṇḍenapi vināyeva. **Asatthenāti** ekatodhārādīnaṃ paraviheṭhanasatthenapi vināyeva. **Dhammena abhivijiyāti** ehi kho, mahārājāti evaṃ paṭirājūhi sampaṭicchitāgamano “pāṇo na hantabbo”tiadinā dhammeneva vuttappakāraṃ pathaviṃ abhivijitvā.

Sukhesinoti sukhapariyesake satte āmanteti. **Suññabrahmūpagoti** suññabrahmavimānūpago. **Pathaviṃ imanti** imaṃ sāgarapariyantaṃ mahāpathaviṃ. **Asāhasenāti** na sāhasikakammena. **Samena manusāsitanti** samena kammena anusāsīm. **Tehi etaṃ sudesitanti** tehi saṅgāhakehi mahākāruṇikehi buddhehi etaṃ ettakaṃ thānaṃ sudesitaṃ sukathitaṃ. **Pathabyoti** puthavisāmiko.

10. Bhariyāsuttavaṇṇanā

63. Dasame **kevaṭṭā maññe macchavilopeti** kevaṭṭānaṃ macchapacchim otāretvā thitattāhāne jāle vā udakato ukkhittamatte macchaggāhakānaṃ mahāsaddo hoti, taṃ sandhāyetaṃ vuttaṃ. **Sujātāti** visākhāya kaniṭṭhā. **Sā neva sassum ādiyati**ti sassuyā kattabbavattaṃ nāma atthi, taṃ na karoti, sassūtipi naṃ na gaṇeti. **Na sasuraṃ ādiyati**ti vacanaṃ na gaṇhāti. Evaṃ anādaratāyapi aggaḥaṇenapi na ādiyati nāma. Sesesupi eseva nayo. Evaṃ anāthapiṇḍiko suṇisāya ācāraṃ gahetvā satthu purato

nisīdi. Sāpi sujātā “kiṃ nu kho ayaṃ seṭṭhi dasabalassa santike mayhaṃ guṇaṃ kathessati udāhu aguṇa”nti gantvā avidūre saddaṃ suṇantī aṭṭhāsi. Atha naṃ satthā **ehi sujātetī** āmantesi.

Ahitānukampinīti na hitānukampinī. **Aññesūti** parapurisesu. **Atimaññateti** omānāti mānavasena atimaññati. **Dhanena kītassāti** dhanena kītā assa. **Vadhāya ussukā** vadhituṃ ussukkamāpannā. **Yaṃ itthiyā vindati sāmiko dhananti** itthiyā sāmiko yaṃ dhanam labhati. **Appampi tassa apahātumicchatī**ti thokatopi assa harituṃ icchati, uddhane āropitaukkhaliyaṃ pakkhipitabbaṇḍulatopi thokaṃ haritumeva vāyamaṭi. **Alasāti** nisinnaṭṭhāne nisinnāva ṭhitatṭhāne ṭhitāva hoti. **Pharusāti** kharā. **Duruttavādinī**ti dubbhāsitaḥāsini, kakkhaḷaṃ vālakathameva katheti. **Uṭṭhāyakānaṃ abhibhuyya vattatī**ti ettha uṭṭhāyakānanti bahuvacanavasena viriyuṭṭhānasampanno sāmiko vutto, tassa taṃ uṭṭhānasampattim abhibhavivā heṭṭhā katvā vattati. **Pamodatī**ti āmoditapamoditā hoti. **Koleyyakāti** kulasampannā. **Patibbatī**ti patidevatā. **Vadhadaṇḍatajjitī**ti daṇḍakaṃ gahetvā vadhena tajjitā, “ghātessāmi na”nti vuttā. **Dāsīsamanti** sāmikassa vattapūrikā dāsīti maṃ bhagavā dhāretūti vatvā saraṇesu patiṭṭhāsi.

11. Kodhanasuttavaṇṇanā

64. Ekādasame **sapattakantāti** sapattānaṃ verīnaṃ kantā piyā tehi icchitapatthitā. **Sapattakaraṇāti** sapattānaṃ verīnaṃ atthakaraṇā. **Kodhaparetoti** kodhānugato. **Pacuratthatāyāti** bahuatthatāya bahuhitatāya. **Anatthampī**ti avuddhimpī. **Attho me gahitoti** vuḍḍhi me gahitā.

Atho atthaṃ gahetvānāti atho vuddhim gahetvā. **Anatthaṃ adhipajjati**ti anattho me gahitoti sallakkheti. **Vadhaṃ katvānāti** pāṇātipātakammaṃ katvā. **Kodhasammadasammattoti** kodhamadena matto, ādinnagahitaparāmaṭṭhoti attho. **Āyasakyaṃ**ti ayasabhāvaṃ, ayaso niyaso hotīti attho. **Antarato jātanti** abbhantare uppannaṃ. **Atthaṃ na jānāti**ti vuddhiatthaṃ na jānāti. **Dhammaṃ na passatī**ti samathavipassanādhammaṃ na passati. **Andhatamanti** andhabhāvakaṃ tamaṃ bahalatamaṃ. **Sahateti** abhibhavati.

Dummaṅkuyanti dummaṅkubhāvaṃ nittejataṃ dubbaṇṇamukhataṃ. **Yato patāyatī**ti yadā nibbattati. **Na vāco hoti gāravoti** vacanassapi garubhāvo na hoti. **Na dīpaṃ hoti kiñcananti** kāci patiṭṭhā nāma na hoti. **Tapanīyānī**ti tāpajanakāni. **Dhammehī**ti samathavipassanādhammehi. **Ārakāti** dūre. **Brāhmaṇanti** khīṇāsavabrāhmaṇaṃ. **Yāya mātu bhatoti** yāya mātārā bhato posito. **Pāṇadadiṃ santinti** jīvitadāyikaṃ samānaṃ. **Hanti kuddho puthuttānanti** kuddho puggalo puthu nānākāraṇehi attānaṃ hanti. **Nānārūpesu mucchitoti** nānārammaṇesu adhimucchito hutvā. **Rajjuyā bajjha miyantī**ti rajjuyā bandhitvā maranti. **Pabbatāmapī kandareti** pabbatakandarepi patitvā maranti.

Bhūnahaccānīti hatavuddhīni. **Itāyanti** iti ayaṃ. **Taṃ damena samucchindeti** taṃ kodhaṃ damena chindeyya. Katarena damenāti? **Paññāvīriyena diṭṭhiyāti** vipassanāpaññāya ceva vipassanāsampayuttana kāyikacetasikavīriyena ca maggasammādiṭṭhiyā ca. **Tatheva dhamme sikkhethāti** yathā akusalaṃ samucchindeyya, samathavipassanādhammepi theveva sikkheyya. **Mā no dummaṅkuyam ahūti** mā amhākaṃ dummaṅkubhāvo ahoṣīti imamatthaṃ patthayamānā. **Anāyāsāti** anupāyāsā. **Anussukāti** katthaci ussukkaṃ anāpannā. Sesam sabbattha uttānamevāti.

Abyākatavaggo chaṭṭho.

7. Mahāvaggo

1. Hiriottappasuttavaṇṇanā

65. Sattamassa paṭhame **hatūpanisoti** hataupaniso chinnapaccayo. **Yathābhūtaññadassananti**

taruṇavipassanā. **Nibbidāvirāgoti** balavavipassanā ceva maggo ca. **Vimuttiñāṇadassananti** arahattavimutti ca paccavekkhaṇā ca.

2. Sattasūriyasuttavaṇṇanā

66. Dutiye yasmā ayaṃ sattasūriyadesanā tejoṣaṃvaṭṭadassanavasena pavattā, tasmā tayo saṃvaṭṭā, tisso saṃvaṭṭasīmā, tīṇi saṃvaṭṭamūlānī, tīṇi kolāhalānīti ayaṃ tāva āditova imassa suttassa purecārikakathā veditabbā. Sā visuddhimagge (visuddhi. 2.403) pubbenivāsānussatiniddese vitthāritāva. **Etadavocāti** aniccakammaṭṭhānikānaṃ pañcannaṃ bhikkhusatānaṃ ajjhāsayaena upādinnakānaṃ anupādinnakānaṃ saṅkhārānaṃ vipattidassanattamaṃ etaṃ “aniccā, bhikkhave, saṅkhārā” tiadisattasūriyopamasuttantaṃ avoca. Tattha **aniccāti** hutvā abhāvaṭṭhena aniccā. **Saṅkhārāti** upādinnakaanupādinnakā saṅkhārādhammā. **Addhuvāti** evaṃ aciraṭṭhena na dhuvā. **Anassāsikāti** asassatabhāvena assāsarahitā. **Alamevāti** yuttameva.

Ajjhogāḷhoti uduke anupaviṭṭho. **Accuggatoti** udakapiṭṭhito uggato. **Devo na vassatīti** paṭhamam tāva upakappanamegho nāma koṭisatasahassacakkavāḷe ekamegho hutvā vassati, tadā nikkhantabijam na puna geham pavisati. Tato paṭṭhāya dhamakaraṇe niruddham viya udakam hoti, puna ekabindumpi devo na vassatīti upamānadhammakathāva pamāṇam. Vinassante pana loke paṭhamam avīcīto paṭṭhāya tuccho hoti, tato uṭṭahitvā sattā manussaloke ca tiracchānesu ca nibbattanti. Tiracchānesu nibbattāpi puttabhātikesu mettam paṭilabhivā kālakatā devamanussesu nibbattanti. Devatā ākāseṇa carantiyo ārocenti – “na idaṃ ṭhānaṃ sassatam na nibaddham, mettam bhāvettha, karuṇam, muditam, upekkham bhāvetthā” ti. Te mettādayo bhāvetvā tato cutā brahmaloke nibbattanti.

Bijagāmāti ettha bijagāmo nāma pañca bijajātāni. **Bhūtagāmo** nāma yaṃkiñci nikkhantamūlapanṇam haritakam. **Osadhitiṇavanappatayoti** ettha **osadhīti** osadharukkhā. **Tiṇāti** bahisārā tālanāḷikerādayo. **Vanappatayoti** vanajetṭhakarukkhā. **Kunnadiyoti** ṭhapetvā pañca mahānadiyo avasesā ninnagā. **Kusobbhāti** ṭhapetvā satta mahāsare avasesā rahadādayo. **Dutiyo sūriyoti** adīsū dutiyasūriyakāle eko udeti, eko atthaṅgameti. Tatiyakāle eko udeti, eko atthaṅgameti, eko majjhe hoti. Catutthakāle catukulike gāme cattāro piṇḍacārikā dvārapaṭipāṭiyā ṭhitā viya honti. Pañcamādikālepi eseva nayo. **Palujjantīti** chijjitvā chijjitvā patanti. **Neva chārikā paññāyati na masīti** cakkavāḷamahāpathavī sinerupabbatarājā himavā cakkavāḷapabbato cha kāmasaggā paṭhamajjhānikabrahmalokāti ettake ṭhāne daḍḍhe accharāya gahetabbamattāpi chārikā vā aṅgāro vā na paññāyati. **Ko mantā ko saddhātāti** ko tassa saddhāpanattāya samattho, ko vā tassa saddhātā. **Aññatra diṭṭhapadehīti** diṭṭhapade sotāpanne ariyasāvake ṭhapetvā ko añño saddahissatīti attho.

Vītarāgoti vikkhambhanavasena vītarāgo. **Sāsanam ājāniṃsūti** anusitṭhim jāniṃsu, brahmalokasahabyatāya maggam paṭipajjiṃsu. **Samasamagatiyoti** dutyattabhāve sabbākāreṇa samagatiko ekagatiko. **Uttari mettam bhāveyyanti** paṭhamajjhānato uttari yāva tikacatukkajjhānā paṇītam katvā mettam bhāveyyam. **Cakkhumāti** pañcahi cakkhūhi cakkhumā. **Parinibbutoti** bodhipallaṅkeyeva kilesaparinibbānena parinibbuto. Evaṃ aniccalakkhaṇam dīpetvā satthari desanam vinivaṭṭente pañcasatāpi te aniccakammaṭṭhānikā bhikkhū desanānusāreṇa ñāṇam pesetvā nisinnāsanēsuyeva arahattam pāpuṇiṃsūti.

3. Nagaropamasuttavaṇṇanā

67. Tatiye yatoti yadā. **Paccantimanti** raṭṭhapariyante raṭṭhāvasāne niviṭṭham. Majjhimadesanagarassa pana rakkhākiccam natthi, tena tam na gahitam. **Nagaraparikkhārehi suparikkhatanti** nagarālaṅkārehi alaṅkatam. **Akaraṇīyanti** akattabbaṃ ajiniyam. **Gambhīranemāti** gambhīraāvātā. **Sunikhātāti** suṭṭhu sannisīdāpitā. Tam panetaṃ esikāthambham iṭṭhakāhi vā karonti silāhi vā khadirādīhi vā sāraruṅkhehi. Tam nagaraguttatthāya karontā bahinagare karonti, alaṅkaratthāya karontā antonagare. Tam iṭṭhakāmayam karontā mahantaṃ āvāṭam katvā cayaṃ cinitvā upari aṭṭhaṃsam

katvā sudhāya limpanti. Yadā hatthinā dantehi abhishato na calati, tadā sulitto nāma hoti. Silāthambhādayopi aṭṭhaṃsā eva honti. Te sace aṭṭha ratanā honti, caturatanamattaṃ āvāṭe pavisati, caturatanamattaṃ upari hoti. Soḷasaratanavīsātiratanesupi eseva nayo. Sabbesañhi upaḍḍhaṃ heṭṭhā hoti, upaḍḍhaṃ upari. Te gomuttavaṅkā honti, tena tesam antare padaramayaṃ katvā kammaṃ kātuṃ sakkā hoti, te pana katacittakammā paggahitaddhajāva honti.

Parikhāti parikkhipitvā ṭhitamātikā. **Anupariyāyapathoti** anto pākārassa pākārena saddhiṃ gato mahāpatho, yattha ṭhitā bahipākāre ṭhitehi saddhiṃ yujjhanti. **Salākanti** saratomarādinissaggiyāvudhaṃ. **Jevanikanti** ekatodhārādisesāvudhaṃ.

Hatthārohāti sabbepe hatthiācariyahatthivejjahatthibandhādayo. **Assārohāti** sabbepe assācariyaassavejjaassabandhādayo. **Rathikāti** sabbepe rathācariyarathayodharatharakkhādayo. **Dhanuggahāti** issāsā. **Celakāti** ye yuddhe jayaddhaṃ gahetvā purato gacchanti. **Calakāti** “idha rañño ṭhānaṃ hotu, idha asukamahāmatassā” ti evaṃ senābyūhakārakā. **Piṇḍadāyikāti** sāhasikamahāyodhā. Te kira parasenaṃ pavisitvā piṇḍapiṇḍamiva chetvā chetvā dayanti, uppatitvā niggacchantīti attho. Ye vā saṅgāmamajjhe yodhānaṃ bhattapānīyaṃ gahetvā pavisanti, tesampetaṃ nāmaṃ. **Uggā rājaputtāti** uggatuggatā saṅgāmāvacarā rājaputtā. **Pakkhandinoti** ye “kassa sīsaṃ vā āvudhaṃ vā āharāmā” ti vatvā “asukassā” ti vuttā saṅgāmaṃ pakkhanditvā tadeva āharanti, ime pakkhandantīti pakkhandino. Mahānāgā viya **mahānāgā**, hatthiādīsipi abhimukhaṃ āgacchantesu anivattiyayodhānaṃ etaṃ adhivacanaṃ. **Sūrāti** ekasūrā, ye sajalīkāpi savammikāpi samuddaṃ taritūṃ sakkonti. **Cammayodhinoti** ye cammakañcukaṃ vā pavisitvā saraparittānacammaṃ vā gahetvā yujjhanti. **Dāsakaputtāti** balavasinehā gharadāsayodhā. **Dovārikoti** dvārapālako. **Vāsanalepanasampannoti** vāsanena sabbavivarapaṭicchādanena sudhālepena sampanno. Bahi vā khāṇupākārasaṅkhātena vāsanena ghanamaṭṭhena ca sudhālepena sampanno puṇṇaghaṭapantiṃ dassetvā katacittakammaṃ paggahitaddhajo. **Tiṇakattṭhodakanti** hatthiassādīnaṃ ghāsathāya gehānañca chādanatthāya āharitvā bahūsu ṭhānesu ṭhapitatiṇaṃ, gehakaraṇapacānādīnaṃ atthāya āharitvā ṭhapitakattṭhaṃ, yantehi pavevetvā pokkharāṇīsu ṭhapitadakañca. **Sannicitam hotīti** paṭikacceva anekesu ṭhānesu suṭṭhu nicitaṃ hoti. **Abhantarānaṃ ratiyāti** antonagaravāsīnaṃ ratiatthāya. **Aparitassāyāti** tāsāṃ anāpajjanatthāya. **Sāliyavakanti** nānappakārā sāliyo ceva yavā ca. **Tilamuggamāsāparaṇṇanti** tilamuggamāsā ca sesāparaṇṇaṃ.

Idāni yasmā tathāgatassa nagare kammaṃ nāma natthi, nagarasadisāṃ pana ariyasāvakaṃ, nagaraparikkhārasadise ca satta dhamme, catuāhārasadisāni ca cattāri jhānāni dassetvā ekādasasu ṭhānesu arahattaṃ pakkhipitvā desanaṃ vinivaṭṭessāmīti ayaṃ upamā ābhatā. Tasmā taṃ desanaṃ pakāsetuṃ idaṃ **evameva khoti** ādi āradhaṃ. Tattha **saddhammehīti** sudhammehi. **Saddhoti** okappanasaddhāya ceva paccakkhasaddhāya ca samannāgato. Tattha dānasīlādīnaṃ phalaṃ saddahitvā dānādipuññakaraṇe saddhā okappanasaddhā nāma. Maggena āgatasaddhā paccakkhasaddhā nāma. Pasādasaddhātīpi eṣā eva. Tassā lakkhaṇādīhi vibhāgo veditabbo.

“Sampakkhandanalakkhaṇā ca, mahārāja, saddhā sampasādanalakkhaṇā cā” ti (mi. pa. 2.1.10) hi vacanato idaṃ saddhāya **lakkhaṇaṃ** nāma. “Tīhi, bhikkhave, ṭhānehi saddho pasanno veditabbo. Katamehi tīhi? Sīlavantānaṃ dassanakāmo hoti” tiādīnā (a. ni. 3.42) nayena vuttaṃ pana saddhāya **nimittaṃ** nāma. “Ko cāhāro saddhāya, saddhammassavanantissa vacanīya” nti (a. ni. 10.61) ayaṃ panassā **āhāro** nāma. “Saddhāpabbajitassa, bhikkhave, bhikkhuno ayaṃ anudhammo hoti, yaṃ rūpe nibbidābahulo viharissati” ti ayamassa **anudhammo** nāma. “Saddhā bandhati pātheyyaṃ, sirī bhogānamāsayo” (saṃ. ni. 1.79). “Saddhā dutiyā purisassa hoti” (saṃ. ni. 1.36). “Saddhāya tarati oghaṃ” (saṃ. ni. 1.246). “Saddhā bījaṃ tapo vuṭṭhi” (su. ni. 77; saṃ. ni. 1.197). “Saddhāhattho mahānāgo. Upekḥāsetadantavā” tiādīsū pana suttesu etissā baddhabhattapuṭṭhādisarikkhatāya anekasarasatā bhagavatā pakāsītā. Imasmiṃ pana nagaropamasuttante eṣā acalāsuppatiṭṭhitāya esikāthambhasadisā katvā dassitā.

Saddhesikoti saddham esikāthambham katvā ariyasāvako akusalam pajahatīti iminā nayena sabbapadesu yojanā kātabbā. Apicettha hirottappehi tīsu dvāresu saṃvaro sampajjati, so catupārisuddhisīlam hoti. Iti imasmiṃ sutte ekādasasu ṭhānesu arahattam pakkhipitvā desanāya kūṭam gahitanti veditabbam.

4. Dhammaññūsuttavaṇṇanā

68. Catutthe **kālam jānātīti** yuttappattakālam jānāti. **Ayam kālo uddesassāti** ayam buddhavacanam uggaṇhanakālo. **Paripucchāyāti** atthānattham kāraṇākāraṇam paripucchāya. **Yogassāti** yoge kammaṃ pakkhipanassa. **Paṭisallānassāti** nilīyanassa ekībhāvassa. **Dhammānudhammapaṭipannoti** navannaṃ lokuttaradhammānaṃ anurūpadhammaṃ pubbhāgapaṭipadaṃ paṭipanno. **Evam kho, bhikkhave, bhikkhu puggalaparoparaññū hotīti** evam bhikkhu puggalānaṃ paroparaṃ tikkhamudubhāvaṃ jānanasamattho nāma hoti.

5. Pāricchattakasuttavaṇṇanā

69. Pañcame **pannapalāsoti** patitapalāso. **Jālakajātoti** sañjātapattapupphajālo. Tassa hi pattajālaṅca pupphajālaṅca saheva nikkhamati. **Khārakajātoti** pāṭiyekkaṃ sañjātena suvibhattena pattajālakena ca pupphajālakena ca samannāgato. **Kuṭumalakajātoti** sañjātamakuḷo. **Korakajātoti** avikasitehi mahākucchīhi sambhinnamukhehi pupphehi samannāgato. **Sabbapāliphulloti** sabbākārena supupphito. **Dibbe cattāro māseti** dibbena āyunā cattāro māse. Manussagaṇanāya pana tāni dvādasa vassasahassāni honti. **Paricārentīti** ito cito ca indriyāni cārenti, kīḷanti ramantīti attho.

Ābhāya phuṭam hotīti tattakam ṭhānaṃ obhāsena phuṭam hoti. Tesañhi pupphānaṃ bālasūriyassa viya ābhā hoti, pattāni paṇṇacchattappamāṇāni, anto mahātumbamattā reṇu hoti. Pupphite pana pāricchattake ārohanakiccaṃ vā aṅkusakam gahetvā namanakiccaṃ vā pupphāharaṇattham caṅgotakakiccaṃ vā natthi, kantanakavāto uṭṭhahitvā pupphāni vaṇṭato kantati, sampaṭicchanaṃ kavāto sampaṭicchati, pavesanakavāto sudhammaṃ devasabham paveseti, sammajjanakavāto purāṇapupphāni nīharati, santharaṇakavāto pattakaṇṇikakesarāni rañjento santharati. Majjhaṭṭhāne dhammāsanam hoti yojanappamāṇo ratanapallaṅko upari tiyojanaena setacchattena dhāriyamānena, tadanantaram sakkassa devarañño āsanam atthariyati, tato tettiṃsāya devaputtānam, tato aññesaṃ mahesakkhānam devānam, aññataradevatānam pupphakaṇṇikāva āsanam hoti. Devā devasabham pavisitvā nisīdanti. Tato pupphehi reṇuvaṭṭi uggantvā uparikaṇṇikam āhacca nipatamānā devatānam tigāvutappamānaṃ attabhāvaṃ lākhārasaparikammaṃ sajjitaṃ viya suvaṇṇacuṇṇapiṇjaram viya karoti. Ekacce devā ekekaṃ puppham gahetvā aññamaññaṃ paharantāpi kīḷantiyeva. Paharaṇakālepi mahātumbappamāṇā reṇu nikkhamitvā sarīram pabhāsampannehi gandhacuṇṇehi sañjatamanosilārāgam viya karoti. Evam sā kīḷā catūhi māsehi pariyoṣānam gacchati. **Ayamānubhāvoti** ayam anupharitum ānubhāvo.

Idāni yasmā na sathā pāricchattakena atthiko, tena pana saddhiṃ upametvā satta ariyasāvake dassetukāmo, tasmā te dassetuṃ **evameva khoti**ādīmāha. Tattha **pabbajjāya cetetīti** pabbajissāmīti cinteti. **Devānamvāti** devānam viya. **Yāva brahmalokā saddo abbhuggacchatīti** pathavitalato yāva brahmalokā sādhuḷkārasaddena sabbam ekasaddameva hoti. **Ayamānubhāvoti** ayam khīṇāsavassa bhikkhuno anupharaṇānubhāvo. Imasmiṃ sutte catupārisuddhisīlam pabbajjānissitam hoti, kasiṇaparikkammaṃ paṭhamajjhānasannissitam, vipassanāya saddhiṃ tayo maggā tīni ca phalāni arahattamaggasannissitāni honti. Desanāya heṭṭhato vā uparito vā ubhayato vā paricchedo hoti, idha pana ubhayato paricchedo. Tenetaṃ vuttam. Saṅkhepato panettha vaṭṭavivaṭṭam kathitanti veditabbam.

6. Sakkaccasuttavaṇṇanā

70. Chatṭhe **parisuddhā ca bhavissantīti** bhiyyosomattāya parisuddhā bhavissanti nimmalā. **Sakammāragatoti** ettha sa-kāro nipātamattaṃ, kammāragato kammāruddhanagatoti attho.

7. Bhāvanāsuttavaṇṇanā

71. Sattame **ananuyuttassāti** na yuttappayuttassa hutvā viharato. **Seyyathāpi, bhikkhave, kukkuṭiyā aṇḍānīti** imā kaṇhapakkhasukkapakkhavasena dve upamā vuttā. Tāsu kaṇhapakkhūpamā atthassa asādhikā, itarā sādhiḱāti sukkapakkhūpamāya eva attho veditabbo. **Seyyathāti** opammatthe nipāto. **Apīti** sambhāvanatthe. Ubhayenāpi seyyathāpi nāma, bhikkhaveti dasseti. **Kukkuṭiyā aṇḍāni aṭṭha vā dasa vā dvādasa vāti** ettha pana kiñcāpi kukkuṭiyā vuttappakārato ūnādhikānīpi aṇḍāni honti, vacanasiliṭṭhatāya panetaṃ vuttaṃ. Evañhi loke siliṭṭhaṃ vacanaṃ hoti. **Tānassūti** tāni assu, bhaveyyunti attho. **Kukkuṭiyā sammā adhisayitānīti** tāya janettiyā kukkuṭiyā pakkhe pasāretvā tesam upari sayantiyā sammā adhisayitāni. **Sammā pariseditānīti** kālena kālaṃ utuṃ gaṇhāpentiyā suṭṭhu samantato seditāni, usmīkatānīti vuttaṃ hoti. **Sammā paribhāvītānīti** kālena kālaṃ suṭṭhu samantato bhāvītāni, kukkuṭagandhaṃ gāhāpitānīti attho.

Kiñcāpi tassā kukkuṭiyāti tassā kukkuṭiyā imaṃ tividhakiriyākaraṇena appamādaṃ katvā kiñcāpi na evaṃ icchā uppajjeyya. **Atha kho bhabbāva teti** atha kho te kukkuṭapotakā vuttanayena sotthinā abhinibbhijjituṃ bhabbāva. Te hi yasmā tāya kukkuṭiyā evaṃ tīhākārehi tāni aṇḍāni paripāliyamānāni na pūtīni honti. Yopi nesaṃ allasineho, so pariyaḍānaṃ gacchati, kapālaṃ tanukaṃ hoti, pādanakhasikhā ca mukhatuṇḍakañca kharaṃ hoti, sayampi pariṇāmaṃ gacchati. Kapālassa tanuttā bahiddhā āloko anto paññāyati, tasmā “ciraṃ vata mayaṃ saṃkuṭitahatthapādā sambādhe sayimha, ayañca bahi āloko dissati, ettha dāni no sukhavihāro bhavissati” ti nikkhamitukāmā hutvā kapālaṃ pādena paharanti, gīvaṃ pasārenti, tato taṃ kapālaṃ dvedhā bhijjati. Atha te pakkhe vidhunantā taṃkhaṇānurūpaṃ vīravantā nikkhamantiyeva. Nikkhamantā ca gāmakkhetaṃ upasobhayamānā vicaranti.

Evameva khoti idaṃ opammasampātipādanaṃ. Taṃ evaṃ atthena saṃsandetvā veditabbaṃ – tassā kukkuṭiyā aṇḍesu adhisayanāditividhakiriyākaraṇaṃ viya hi imassa bhikkhuno bhāvanaṃ anuyuttakālo, kukkuṭiyā tividhakiriyāsampādanena aṇḍānaṃ apūtībhāvo viya bhāvanaṃ anuyuttassa bhikkhuno tividhānupassanāsampādanena vipassanāññāssa aparīhāni. Tassā tividhakiriyākaraṇena aṇḍānaṃ allasinehapariyaḍānaṃ viya tassa bhikkhuno tividhānupassanāsampādanena bhavattayānugatanikantisinehapariyaḍānaṃ, aṇḍakapālānaṃ tanubhāvo viya bhikkhuno avijjaṇḍakosassa tanubhāvo, kukkuṭapotakānaṃ nakhatuṇḍakānaṃ thaddhabhāvo viya bhikkhuno vipassanāññāssa tikkhakaravippasannasūrabhāvo, kukkuṭapotakānaṃ pariṇāmakālo viya bhikkhuno vipassanāññāssa pariṇāmakālo vaḍḍhikālo gabbhaggahaṇakālo, kukkuṭapotakānaṃ pādanakhasikhāya vā mukhatuṇḍakena vā aṇḍakosaṃ padāletvā pakkhe papphoṭetvā sotthinā abhinibbhīdākālo viya tassa bhikkhuno vipassanāññāgabbhaṃ gaṇhāpetvā vicarantassa tajjātikaṃ utusappāyaṃ vā bhojanasappāyaṃ vā puggalasappāyaṃ vā dhammassavanasappāyaṃ vā labhitvā ekāsane nisinnasseva vipassanaṃ vaḍḍhentassa anupubbādhigatena arahattamaggena avijjaṇḍakosaṃ padāletvā abhiññāpakkhe papphoṭetvā sotthinā arahattappattakālo veditabbo.

Yathā pana kukkuṭapotakānaṃ pariṇatabhāvaṃ ñatvā mātāpi aṇḍakosaṃ bhindati, evaṃ tathārūpassa bhikkhuno ñāṇaparipākaṃ ñatvā satthāpi –

“Ucchinda sinehamattano, kumudaṃ sārādikaṃva pāṇinā;
Santimaggameva brūhaya, nibbānaṃ sugatena desita”nti. (dha. pa. 285) –

Ādinā nayena obhāsaṃ pharivā gāthāya avijjaṇḍakosaṃ paharati. So gāthāpariyosāne avijjaṇḍakosaṃ bhinditvā arahattaṃ pāpuṇāti. Tato paṭṭhāya yathā te kukkuṭapotakā gāmakkhetaṃ upasobhayamānā tattha vicaranti, evaṃ ayampi mahākhīṇāsavo nibbānārammaṇaṃ phalasaṃpattim appētvā saṅghārāmaṃ upasobhayamāno vicarati.

Phalagaṇḍassāti vaḍḍhakissa. So hi olambakasaṅkhātāṃ phalaṃ cāretvā dārūnaṃ gaṇḍaṃ haratīti

phalagaṇḍoti vuccati. **Vāsijaṭeti** vāsidaṇḍakassa gahaṇaṭṭhāne. **Ettakaṃ me ajja āsavānaṃ khīṇanti** pabbajitassa hi pabbajjāsāṅkhepena uddekena paripucchāya yonisomanasikārena vattapaṭipattiyā ca niccakālaṃ āsavā khīyanti. Evaṃ khīyamānānaṃ pana nesāṃ “**ettakaṃ ajja khīṇaṃ ettakaṃ hiyyo**”ti evamassa ñāṇaṃ na hotīti attho. Imāya upamāya vipassanānisamso dīpito.

Hemantikenāti hemantasamayena. **Paṭippassambhantīti** thirabhāvena parihāyanti. **Evameva khoti** ettha mahāsamuddo viya sāsanaṃ daṭṭhabbaṃ, nāvā viya yogāvacaro, nāvāya mahāsamudde pariyāyanaṃ viya imassa bhikkhuno ūnapaṇcavassakāle ācariyupajjhāyānaṃ santike vicaraṇaṃ, nāvāya mahāsamuddaudakena khajjamānānaṃ bandhanānaṃ tanubhāvo viya bhikkhuno pabbajjāsāṅkhepena uddeparipucchādīhiyeva saṃyojanānaṃ tanubhāvo, nāvāya thale ukkhittakālo viya bhikkhuno nissayamuttakassa kammaṭṭhānaṃ gahetvā araṇṇe vasanakālo, divā vātātapena saṃsussanaṃ viya vipassanāñāṇena taṇhāsinehassa saṃsussanaṃ, rattim himodakena temaṇaṃ viya kammaṭṭhānaṃ nissāya uppanna pītipāmojjena cittatemaṇaṃ, rattindivaṃ vātātapehi ceva himodakena ca parisukkhariparittānaṃ bandhanānaṃ dubbalabhāvo viya vipassanāñāṇapītipāmojjehi saṃyojanānaṃ bhīyosomattāya dubbalabhāvo, pāvussakamegho viya arahattamaggañānaṃ, meghavuttīhiudakena nāvāya antopūtibhāvo viya āradhaviṇṇasakassa rūpasattakādivasena vipassanaṃ vaḍḍhentassa okkhāyamāne pakkhāyamāne kammaṭṭhāne ekadivasam utusappāyādīni laddhā ekapallaṅkena nisinnassa arahattaphalādhigamo. Pūtibandhanāya nāvāya kiñci kālaṃ ṭhānaṃ viya khīṇasaṃyojanassa arahato mahājanaṃ anuggaṇhantassa yāvātāyukaṃ ṭhānaṃ, pūtibandhanāya nāvāya anupubbena bhijjivā apanṇattikabhāvūpagamo viya khīṇāsavassa upādinnakkhandhabhedena anupādisesāya nibbānadhātuyā parinibbutassa apanṇattikabhāvūpagamoti imāya upamāya saṃyojanānaṃ dubbalatā dīpitā.

8. Aggikkhandhopamasuttavaṇṇanā

72. Aṭṭhamaṃ atthuppattiyam kathitaṃ. Atthuppatti panassa hetṭhā cūlaccharāsaṅghātasuttavaṇṇanāya (a. ni. aṭṭha. 1.1.51 ādayo) vitthāritā eva. **Passatha noti** passatha nu. **Āliṅgitvāti** upagūhitvā. **Upanisīdeyyāti** samīpe nissāya nisīdeyya. **Upanipajjeyyāti** upagantvā nipajjeyya. **Ārocayāmīti** ācikkhāmi. **Paṭivedayāmīti** paṭivedetvā jānāpetvā kathemi. **Vālarajjuyāti** assavālagovālehi vaṭṭitarajjuyā. **Paccorasminti** uramajjhe. **Phenuddehakanti** pheṇaṃ uddehitvā, ussādetvāti attho. **Attatthanti** attano diṭṭhadhammikasamparāyikalokiyalokuttaraṃ atthaṃ. **Paratthobhayatthesupi** eseva nayo. Sesamettha yaṃ vattabbaṃ siyā, taṃ sabbaṃ cūlaccharāsaṅghātasuttassa (a. ni. 1.51 ādayo) atthuppattiyam kathitameva. Idaṇca pana suttaṃ kathetvā satthā cūlaccharāsaṅghātasuttaṃ kathesi. Navamaṃ uttānatthameva.

10. Arakasuttavaṇṇanā

74. Dasame **parittanti** appaṃ thokaṃ. Tañhi sarasaparittatāyapi khaṇaparittatāyapi ṭhitiparittatāyapi parittameva. Laḥuṃ uppajjivā nirujjhanato **lahukaṃ**. **Mantāyaṃ boddhabbanti** mantāya boddhabbaṃ, paññāya jānitabbanti attho. **Pabbateyyāti** pabbatasambhavā. **Hārahārinīti** rukkhanaḷaveḷuādīni haritabbāni haritum samatthā. Sesam sabbattha uttānatthamevāti.

Mahāvaggo sattamo.

8. Vinayavaggo

1. Paṭhamavinayadharasuttavaṇṇanā

75. Aṭṭhamassa paṭhame **āpattim jānātīti** āpattimyeva āpattīti jānāti. Sesapadesupi eseva nayo.

2. Dutiyavinayadharasuttavaṇṇanā

76. Dutiye **svāgatānī**ti suāgatāni suppaṅṇāni. **Suvibhattānī**ti koṭṭhāsato suṭṭhu vibhattāni. **Suppavattīnī**ti āvajjitāvajjitaṭṭhāne suṭṭhu pavattāni dalhappagaṅṇāni. **Suvinicchitānī**ti suṭṭhu vinicchitāni. **Suttasoti** vibhaṅgato. **Anubyañjanasoti** khandhakaparivārato.

3. Tatiyavinayadharasuttavaṅṇanā

77. Tatiye **vinaye kho pana ṭhito hotī**ti vinayalakkhaṇe patiṭṭhito hoti. **Asaṃhīroti** na sakkā hoti gahitaggahaṇaṃ vissajjāpetuṃ.

9. Satthusāsanasuttavaṅṇanā

83. Navame **ekoti** adutiyo. **Vūpakaṭṭhoti** kāyena gaṇato, cittena kilesehi vūpakaṭṭho vivekaṭṭho dūrībhūto. **Appamattoti** satiavippavāse ṭhito. **Pahitattoti** pesitatto. **Nibbidāyāti** vaṭṭe ukkaṇṭhanatthāya. **Virāgāyāti** rāgādīnaṃ virajjanatthāya. **Nirodhāyāti** appavattikaraṇatthāya. **Vūpasamāyāti** kilesavūpasamāya appavattiyā. **Abhiññāyāti** tilakkhaṇaṃ āropetvā abhijānanatthāya. **Sambodhāyāti** maggaśāṅkhātassa sambodhassa atthāya. **Nibbānāyāti** nibbānassa sacchikaraṇatthāya.

10. Adhikaraṇasamathasuttavaṅṇanā

84. Dasame adhikaraṇāni samenti vūpasamentīti **adhikaraṇasamathā**. **Uppannuppannānanti** uppannānaṃ uppannānaṃ. **Adhikaraṇānanti** vivādādhikaraṇaṃ anuvādādhikaraṇaṃ āpattādhikaraṇaṃ kiccādhikaraṇanti imesaṃ catunnaṃ. **Samathāya vūpasamāyāti** samathatthañceva vūpasamanatthañca. **Sammukhāvinayo dātabbo...pe... tiṇavatthārakoti** ime satta samathā dātabbā. Tesam vinicchayo vinayasamvaṅṇanato (cūlava. aṭṭha. 186-187 ādayo) gahetabbo. Apica dīghanikāye saṅgītisuttavaṅṇanāyampi (dī. ni. aṭṭha. 3.331 adhikaraṇasamathasattakavaṅṇanā) vitthāritoyeva, tathā majjhimanikāye sāmaḡāmasuttavaṅṇanāyāti (ma. ni. aṭṭha. 3.46).

Vinayavaggo aṭṭhamo.

Ito parāni satta suttāni uttānatthāneva. Na hettha kiñci heṭṭhā avuttanayaṃ nāma atthīti.

Manorathapūraṇiyā aṅguttaranikāya-aṭṭhakathāya

Sattakanipātassa samvaṅṇanā niṭṭhitā.